




1844





SPIRITUS SS. P.N. BENEDICTI.

PARS TERTIA.

Continens Meditationes a secundo Julii  
usque ad primum Octobris.

JULIUS.

DIES II.

IN FESTO VISITATIONIS B. V. MARIE.

De Officiis Charitatis.

Sibi sub charitate invicem serviant. Cap. 35.  
v. 6.

PUNCTUM PRIMUM.

**B**eatissima Virgo religiosa pro officio, festina præ gaudio pergit in montana ad serviendum prægnanti Cognatæ suæ Elisabeth. Non abhorret Virgo a communi servitio mulierum. Amor non cogitat, quam vile sit, quod agit; dummodo serviendo possit amare. Hoc ipsum exposcit SS. Pater, dum Cap. 35. præcipit: *Sibi sub charitate invicem serviant.* Nihil sic amorem mutuum provocat; quam cum quivis ad exercitia communia suam

A 2

opem



opem contribuit. Sic alter alterius onera portat. — Et dum ab omnibus communi consensu portantur, vix sentitur onus. Quod si quidam portare negligant, jam cæteris duplicatur onus. Hinc sub onere gemunt, aut murmurant. Subinde, & ipsi oneri cedunt. Tu ergo hanc charitatem nunquam intermitte, ne onus disciplinæ cæteris reddas intolerabile. Sequere B. Virginem, quæ ex fervida charitate communibus mulierum ministeriis cum gaudio se addicit. Imitare SS. Patrem. En! Fratres in Choro, in Agro, ubique juvat.

#### PUNCTUM SECUNDUM.

**E**Xurgens Maria abiit in montana cum festinatione, ut Prægnantem Cognatam in ministeriis rei domesticæ adjuvet. Et hoc statuit SS. Pater, ut Fratres *sibi sub charitate invicem serviant. Portarius, si indiget solatio, juniorem Fratrem accipiat. Coquis, si indigent, solatia administrentur. Imbecillibus procurentur solatia. Habeant omnes solatia secundum modum Congregationis.* Vide, quam impense nobis commendet SS. P.; ut Fratrem Frater adjuvet in ministerio suo. Ratio ipsius corporis monastici id postulat. Congregatio quippe religiosa sic consistit unitate singulorum, sicut corpus nostrum unitum est compage membrorum. Alia sunt namque membra in corpore, quæ intuendæ luci deserviunt; alia, quæ a terreno actu minime disjunguntur. Oculus quippe luci intenditur, & ne cæcari



cari valeat, a pulvere custoditur. Pes verò tunc suum officium recte peragit, cum suscipiendum terræ pulverem non refugit. Quæ tamen corporis membra vicissim sibi sua officia impertiendo ita copulantur, ut pes oculis currat, & oculus pedi prospiciat. Sic itaque sic Congregationis monasticæ membra debent & officio esse distincta, & charitate conjuncta, ut unum alteri in suo officio ex dispositione capitis solatium afferat & adjutorium. *Maxima hinc charitas acquiritur.*

PUNCTUM TERTIUM.

**E**Xurgens Maria abiit in montana cum festinatione. Quare? Ut quemvis domesticum speciali afficeret beneficio. Ut enim salutavit Elisabeth, repleta est Spiritu sancto. Ut audita est vox salutationis ipsius, exultavit Joannes in utero per Verbum Dei sanctificatus. Zachariam de Mysterio Incarnationis edocuit. Tanta operata est mira officiosa charitas Virgineæ Matris. Ad hanc hortatur SS. Pater, *ut Fratres sibi sub charitate invicem serviant.* Charitas hoc modo rite adimpletur. Non enim, ait Discipulus amoris, diligamus solum lingua, sed opere, & veritate. In hoc debet esse unicus Religiosorum zelus, ut alter alterum honore, amore, & obsequio præveniat. Haud secus ac grana mali punici sic se habere debent. Charitas, quæ cortex est, eos proteget. Obsequia charitatis invicem jugiter cohærere faciant. Sint velut civitas munita.



Et nullus adversarius eis prævalere poterit. Ah! quanta olim hujus charitatis contentio? Unus alterius ministerium supplere conabatur. Unus alteri servire contendebat. Lego de quodam, quod plures cellas ædificaverit, eo tantum fine, ut adventanti Fratri cum tota suppellectili eam cederet. Charitas plane ingeniosa est, si magna, ut ubivis dilectum obsequiis charitatis præveniat. Modo opera charitatis spiritualia, modo corporalia impendit.

#### PUNCTUM QUARTUM.

**A**N ergo, o Religiose! ad exemplum B. V. Confratres adjuvas in communibus Monasterii exercitiis? Si communia refugis exercitia, & singularium meritum amittis. An in officiis constitutos libenter obsequiis juvas? Cogita. Membrum es de membro. An cuilibet ex charitate servire contendis? Amorem inæstimabilem tibi concilias. Dole, quod hucusque officiis charitatis non studueris. Proponere

1. In exercitiis communibus omnes Confratres,
2. In officiis Officiales ex dispositione Superiorum, &
3. In quacunque occasione quemvis obsequiis charitatis adjuvare.

*DIES*





## DIES III.

## De Ruinis Religiosorum.

Necesse est animas periclitari. Cap. 65. v. 8.

## PUNCTUM PRIMUM.

**N***Ecessè est, ut ait SS. P. N. animas periclitari* primo, si fervor primus deficiat. Florem enim in germine extinguit pruina, & tepor fundamentum virtutis evertit. A facie frigoris ejus quis sustinebit? Hoc frigus, si semel animam pervaserit, perturbaverit judicii lumen, concusserit affectiones, libertatem adduxerit spiritus, ut febricitantes subit quidam animi rigor. Vigor lentescit. Languor fingitur Virum. Horror austeritatis intenditur. Timor sollicitat paupertatis. Contrahitur animus. Subtrahitur gratia. Protrahitur longitudo vitæ. Sopitur ratio. Spiritus extinguitur. Deservescit novitius fervor. Ingravescit tepor fastidiosus. Refrigescit fraterna charitas. Blanditur voluptas. Fallit securitas. Quid plura? Dissimulantur Regulæ. Abdicantur occulte vota. Derelinquitur timor Domini. Sic florem omnem primi fervoris. Aquilo teporis perdit. Ut rursus vinea floreat, & det odorem virtutis necesse est, *non esse pigrum*. Oportet, ut ad primum fervorem quotidie se excitet. *Amice ad quid venisti?*

## PUNCTUM SECUNDUM.

**N***Ecessè est, animas periclitari* secundo si sub specie zeli boni, aut utilitatis communis



subit desiderium prædicandi, convertendi animas, aut alia Monasterii officia obeundi. Sane timet propheticum incurrere maledictum, si quæ abscondito accepit frumenta, abscondat in populis. Hinc Superioribus, blandimentis, & precibus per se, aut alios jugiter molestus est, donec desiderio ipsius annuant. Vulpecula hoc desiderium est, quod demolitur vineam. Nam cum adeptus est, quod tamdiu concupivit, totum se officio suo impendit. Obliviscitur sui ipsius. Exercitia spiritualia aut omittit, aut perfunctorie peragit. Raro se recolligit, vel si recolligit, hoc ipsum tepide agit. Paulatim & quasi nesciens minima sacrae Regulæ transgreditur præcepta. Ratione officii liberior fit, ut solitudinem, & mortificationem horreat. Sic miser paulatim totus de statu suo cadit. Sed cape vulpeculam. Primo Moyses ait: non arabis in primogenito bovis. Hoc Paulus interpretans: non Neophytum, inquit, ne in superbiam elatus, incidat in iudicium Diaboli. Rursus. Nec quisquam sibi assumit honorem, sed qui vocatur a Deo tanquam Aaron. Monachi officium est non docere, non domesticare, sed lugere, & orare. Libentius volo, aiebat quidam Patrum, exercitia mea, etsi exigua, in solitudine cum puritate cordis Deo offerre quam multa præclara externa opera, quæ plurimis imperfectionibus scatent, coram hominibus peragere. Deo enim solum gratum est, quod purum, atque ex omni parte perfectum. Ex his ergo texe tibi rete. Cape hanc vul-



vulpeculam, ne demoliatur vineam tuam. *Sine iussione Abbatis nihil fac.* Tibi ante omnia, non aliis intende.

## PUNCTUM TERTIUM.

**N***Ecessè est, animas periclitari* tertio, si absque discretionè exercitia mortificationis, vel pietatis assumant. Quidam enim fervore infano correpti, abstinètia, cilicio, flagellis ita corpus extenuant, ut onera communia amplius ferre nequeant. Alii orationi, meditationi, & actibus virtutum tam crebro, & diu vacant, ut fatigati necessario desistere debeant. Ex qua indiscretionè sequitur, quod mortificationem ceu noxiam, spiritualia vero exercitia ceu intolerabilia aspiciant, & cum tædio abjiciant. Hoc vero spirituali tædio, & nausea affecti, nunquam ad perfectionem Religiosam surgunt. Cape has vulpeculas. *Difcretio mater virtutum est. Nihil age sine Patris spiritualis voluntate.* Paulatim, & cum longanimitate multo altius ascendes. Nescio utrum plures nimius fervor, vel nimius tempor a gradu vocationis suæ dejecerit. Hoc ex vitis Patrum disco, quod multo gravius lapsi sint, qui primo, quam qui altero modo decepti sunt. Angelus quippe Sathanæ eo periculosius sagittat in obscuro rectos corde, quo se amplius sub specie boni transfigurat in Angelum lucis. Oportet ergo hujusmodi spirituales bestiolas omni cautela observare, per discretionem capere, & confidentia ad Patrem




spiritualem comprehendere in astutia sua. Secus demolientur vineam, ut fructum nullum amplius afferat.

#### PUNCTUM QUARTUM.

**A**N non, o Religiose! periclitatur anima tua; quia primum fervorem amisisti? Habeo aliquid adversum te; quia primam charitatem dereliquisti. An non periclitatur anima tua; quia officio externo plusquam interno vacas? Quid proderit; si mundum universum lucre-  
ris, animæ vero tuæ detrimentum patiaris. An non periclitatur anima tua; quia nullam discretionem servas? Non ignores astutias Sathanæ, neque cogitationes ejus. Dole, quod inadvertenter tot ruinas, & pericula animæ tuæ incurreris. Propone

1. Fervorem primum semper instaurare, ne illum amittas.
2. Tuo officio ante omnia vacare, ne pereas agendo aliud.
3. Discretionem Patris spiritualis te subjungere, ne decipiaris, & fessus retrospicias.



#### DIES IV.

De Septimanariis coquinæ.

Septimanarii hora refectionis serviant Fratribus suis. Cap. 35. v. 14.

PUN-



## PUNCTUM PRIMUM.

**S**anctissimus Pater tria Servitori ad mensam præscribit. Primum est, ut *accepta benedictione ingrediatur, & egrediens de Septimana accipiat benedictionem.* Jure SS. Pater duplicem benedictionem a Servitore peti statuit. Una necessaria est, ut auxilium Divinum impetret rite suum officium adimplendi. Altera opus habet, ut gratus sit pro collato subsidio. Pro auxilii Divini impetratione præscribit versum: *Deus in adjutorium meum intende; Domine ad adjuvandum me festina.* Hic namque versiculus competenter applicatur ad impetrandum Divinum auxilium. Continet enim invocationem Dei contra pericula. Continet humilitatem pie confessionis, vigilantiam spiritualis sollicitudinis, considerationem propriæ fragilitatis, confidentiam exauditionis, atque præsentis, ac semper astantis Divini subsidii. Iste versiculus omni in occasione, omni in loco, omni in statu utiliter applicatur. Sed & maxime Servitori opus est, ut absque murmuratione, vel tædio Fratribus inserviat. Pro gratiarum actione SS. Pater assignat istum versiculum: *Benedictus es Domine Deus, qui adjuvisti me, & consolatus es me.* Et congruenter. Hoc enim versiculo Deo adscribitur, quidquid bene actum est. Hoc versiculo propriam defectuositatem agnoscimus. Hoc versiculo dignas Deo grates agimus pro collato cœlesti auxilio. Sic grati ampliores meremur vires, & gratias ex alto.

PUN.



## PUNCTUM SECUNDUM.

**A**lterum est, quod SS. Pater Servitori injungit, ut *sub charitate serviat*. Tanti æstimat hoc charitatis obsequium, ut neminem velit excusari ab hoc officio; *nisi aut ægritudine, aut in causa gravis utilitatis quis occupatus fuerit*. Nec imbecilles excipit, sed vult, ut *ipsis procurentur solatia*. Et jure; quia *exinde major merces, & charitas acquiritur*. Ipsemet Salvator exemplo prævit. Surrexit de cœna. Linteo pedes lavit Apostolorum. Eis inserviit. Beati erimus, si secuti fuerimus eum. O quis ergo libenter non inserviret Fratribus suis? Christi personam sustinet. Idem agit, quod Christus egit. Humilitatem, & charitatem ipsius imitatur. Beatitudinem brevi, & facili labore assequitur. Pudeat te, si Fratribus inservire dedignaris. Si enim Dominus, & Magister tuus Apostolis servire dignatus est, quanto magis tu Fratribus ex charitate servire debes. Et tamen quoties te vel ob superbiam, vel ob laborem ab hoc servitio subtrahis? Time, ne sicut SS. Pater superbum illum, & delicatum Monachum, quem puduit, ac tæduit lucernam ejus ad mensam tenere, ab officio Servitoris amovit, ita & te amoveat. Perdes deinde mercedem beatitudinis a Christo promissæ, & charitatem.

## PUNCTUM TERTIUM.

**T**ertium est, quod SS. Pater a Servitore exigit, ut *absque tristitia, & sine murmuratione*



*tionem hora refectiois Fratribus serviat. Ob hoc ante unam horam refectiois concedit ipsi biberem, & panem. Jure. Nam qui cum tristitia, aut murmuratione hoc facit, nullam mercedem acquirit. Pœnam murmurantium incurrit. Charitatem non exercet. Obsequium ipsius nec Deo, nec fratribus acceptabile esse potest. Hilarem enim datorem diligit Deus. Et cur non cum gaudio servires? Ecce! merces promittitur illi, qui tantum potum aquæ frigidæ porrexerit. Ecce! laudantur, & ad dexteram collocantur, qui uni ex minimis Jesu Christi sitienti, & esurienti bibere, & manducare dederunt. Ecce! S. Carolomannus Princeps, factus Cassinensis Monachus Lixæ in culina multo tempore operam navat. Ecce! Bathildis Regina Lotharii Imperatoris Mater in eodem servitio multum sedula est. Ecce! Radegundis Galliæ Regina ambiciosissimo studio non solum per suam, sed etiam extra suam Septimanam Sororibus ad mensam ministrat, & earum pedes lavat. Quis ergo es tu, ut cum tristitia, aut murmure hoc officium obeas? An nobilior his? An delicatior, & imbecillior istis?*

#### PUNCTUM QUARTUM.


**A**N ergo, o Religiose! humiliter ante tuam Septimanam Divinum imploras auxilium, & post eam Deo gratias pro collato subsidio rependis? Sine hisce Benedictionibus Benedictionem cœlestem non obtinebis. An ex magna charitate Fratribus exemplo Christi ad mensam

sam servis? Quo major charitas, eo major merces erit. An absque tristitia, & murmuratione servis? Indignus es hoc dominico ministerio, si vel a longe tristitiam præendas. Dole, quod hucusque hoc sacrum Exercitium non digne æstimaveris, & obieris. Propone

1. Ante & post tuam Septimanam devote Benedictiones accipere.

2. Ex charitate magna ad exemplum JE<sup>ſ</sup>i Christi.

3. Absque murmuratione, aut tristitia Fratribus ad mensam servire.



## DIES V.

### De Scientia Religiosa.

Lectioes sanctas libenter audire. Cap. 4.

Instr. §6.

### PUNCTUM PRIMUM.

**S**ANCTISSIMUS Pater Noster liberiori genere ex provincia Nursiæ exortus, Romæ liberalibus litterarum studiis traditus fuerat. Sed cum in eis multos ire per abrupta vitiorum cerneret, eum, quem quasi in ingressu mundi posuerat, retraxit pedem: ne, si quid de ejus scientia attingeret; ipse quoque in immane præcipitium totus iret. Nil sic nocet Monacho, ut scientia mundi. Quid enim ad Monachum novellæ? Quid ad eum historiæ de

Prin-



Principibus? Quid ad eum scientiæ de Astrologia, & ejusmodi? Non judicabitur de illis, si nescierit. Judicabitur, si inde, ut assolet, superbierit. Si, ut solet, desiderium lectionis sacrae amiserit. Si propterea spiritum compunctionis, devotionis, & religiosæ mortificationis perdididerit. Si propterea obligationes status sui vel ignoret, vel implere omittat. Si propterea plus ad scientiam inutilem afficiatur, quam ad disciplinam. Tu ergo præter eam, quæ ad curam animæ tuæ, & aliarum animarum spectat, nullam aliam addiscere scientiam stude. Nullum quippe tempus tibi supererit, sit hanc ex fundamento scire laboraveris. Cum SS. P. despectis inutilibus, & non necessariis litterarum studiis, esto scienter nescius, & sapienter indoctus. *Lectiones sanctas ad ejus exemplum, & monitum, libenter audi & lege ex Regula S. Patris nostri Basilii, collationibus, institutis, & vitis Patrum, nec non libris Sanctorum Catholicorum Patrum, atque præ omnibus ex paginis divinæ auctoritatis veteris, ac novi Testamenti.*

## PUNCTUM SECUNDUM.

**N**il si contrarium est vocationi Religiosæ, quam scientiæ mundanæ, inutiles, ac infructuosæ. Status namque Monasticus est status pœnitentiæ. Hinc Monachus tenetur in solitudine, in silentio, in simplicitate, & humilitate Deo servire. At quantum non contrariantur huic vacationi scientiæ mundanæ, atque



que infructuosæ? Quid magis inflat, quam scientia? Quid majorem mundi gloriam accersit, quam scientia? Quid obedientiæ jugum sæpius confringit, quam scientia? Quid spiritum mundi magis implantat, quam scientia? Quid spiritum vocationis citius extinguit, quam scientia? Pro dolor! quot tragicas experientias non numeramus hoc tempore? Tu ergo præter ea, quæ ad tuam vocationem, & curam animarum spectant, nihil disce. Quid turbaris erga plurima? Unum est necessarium, ut scias Jesum, & hunc Crucifixum. Ab hoc *Lectiones sanctas libenter audi!*

#### PUNCTUM TERTIUM.

**I**Mo quam plurimum profectum spiritualem impedit ipsum studium S. Lectionum, si ad inutilem tantum scientiam assumatur. Paululum est internarum passionum. Origo est superbiæ, vanæ gloriæ, propriæ existimationis, curiositatis. Causa est ariditatis internæ, variarum distractionum, multarum perturbationum, ut fervor ad actus virtutum, atque ad exercitium Regulæ sensim intepelescat, frigeat. Ad quid enim verbum auditum, & non creditum? Ad majorem damnationem cedit. Ad quid veritas intellecta, & non opere perfecta? Ad obcæcationem mentis, ad obductionem cordis cedit. Non enim cognitores, sed factoris legis justificabuntur. Et sane scientia Sanctorum non obtinetur, nisi per exercitium sanctitatis. Unde suam scientiam haurerunt



ferunt SS. Antonius, Pachomius, Hilarion, SS. Pater Noster institutores orientalis, & occidentalis Monastices? Ipsorummet testimonio non aliunde, quam ab exercitio eorum, quæ in sacris Scripturis legerunt. Hoc modo & tu *sanctas Lectiones libenter audi*, & ad profectum tuum semper utiliter scientiæ Sanctorum vocabis.

## PUNCTUM QUARTUM.

**A**N ergo, o Religiose! abjicis scientias inutiles, quæ non conducunt ad tuam, aut proximorum salutem? Ecce timor Domini, ipsa est sapientia, & recedere a malo intelligentia. An abjicis infructuosas scientias, quæ repugnant vocationi tuæ? Qui custodit legem, filius sapiens est. An etiam in scientia S. Lectionum non meram intelligentiam, sed fructum spectas atque profectum? Sapientia, quæ desursum est, pudica est, pacifica, modesta, plena fructibus bonis. Dole, quod plus scientiæ sæculari, quam Religiosæ te addixeris. Propone

1. Despicere, ac relinquere scientias inutiles ad curam animarum,
2. Contrarias vocationi tuæ, &
3. Curiosas, atque infructuosas ad profectum spiritualem.



## DIES VI.

De causis non murmurandi contra  
victum.

Ubi autem loci necessitas exposcit, ut nec supra scripta mensura inveniri possit, sed multo minus, aut ex toto nihil, benedicant Deum, qui ibi habitant, & non murmurent. Cap. 40. v. 7. Sufficere credimus ad refectiorem quotidianam tam Sextæ quam Nonæ omnibus mensis eocta duo pulmentaria. Cap. 39.

## PUNCTUM PRIMUM.

**S**S. Pater memor Israëliti murmuris super Manna, & Vindictæ Divinæ, quæ ascendit super eos, dum adhuc escæ erant in ore ipsorum, statuit: *Ubi autem loci necessitas exposcit, ut nec supra scripta mensura inveniri possit, sed multo minus, aut ex toto nihil, benedicant Deum, qui ibi habitant, & non murmurent.* Quare? Monachus sua, & aliorum peccata plangere tenetur. Unde omnes antiqui S. Monachi, & Eremitæ jejunio, & victu vili, ac duro contenti erant. S. Antonius primum post quemvis tertium diem parum panis cum sale, & aqua sumebat. S. Dorotheus per 60. annos 6. unciiis panis cum aqua, & aliquibus herbis corpus reficiebat. Dixerat enim sibi senium objicientibus: Corpus meum



meum mortificabo; quia & me mortificat. SS. Patri nostro jejunium ferme cibus quotidianus erat. Hinc & suis cibum vilem; ac obvium præscripsit: *Duo pulmentaria cocta fratribus omnibus sufficiant.* Quomodo enim Monacho conveniat cibus delicatus, cujus unicum officium est plangere? Et quomodo murmurabit? super victum, qui se vestigiis SS. PP. insistere proficitur?

PUNCTUM SECUNDUM.

**S***I nec supra scripta mensura inveniri possit, sed multo minus, non murmurent.* Quare? Vita Monachi perpetua mortificatio esse debet. Nihil enim sic Religiosæ mortificationi contrarium est, sicut victus delicatus. Gustum satiat. Libidinem provocat. Scurrilitatem, & levitatem excitat. Spiritum compunctionis tollit. Orationis gratiam aufert. Contra victus vilis, & parcus gustum mortificat. Castimoniam corporis conservat. Spiritum compunctionis auget. Orationis gratiam conciliat. Natura quippe in vili, & parco victu nihil delicatum, aut superfluum invenit, quo leges temperantiæ transgrediatur. Concoctio quoque cum sit brevior, vaporibus multum, aut diu cerebrum non impedit, ne statim orationi, aut meditationi incumbere possit. Quomodo ergo murmurabit super vilem, & parcum victum, qui mortificationem carnis habitu, & professione proficitur? Væ illis Religiosis, quibus nec terra, nec mare sufficien-

res ad gustum delicias progerminare potest! nonne opere comprobant, quod nondum spiritu, sed carne vivant? Væ illis Religiosis, qui semper satiantur multitudine, & varietate ciborum? Nonne Deo per habitum, & tonsuram mentiuntur; sæculo autem servant fidem?

### PUNCTUM TERTIUM.

**S***I nec supra scripta mensura inveniri possit: sed multo minus, non murmurent. Quare?* Paupertatis status hoc exigit. Aspice pauperes. Atro pane, & aqua contenti sunt. Grati sunt, cum ipsis unum tantum frustulum datur. Delicias festivas reputant, si in anno semel, aut bis parum carnis, aut vini degustare possunt. Quomodo ergo Religiosus, paupertatem professus, delicias victus sine transgressione voti amplectetur? Quomodo murmurare audebit, si cibi ad gustum non satis præparati, aut ad gulam numerosi apponuntur? Nunquid hac sua murmuratione Confratres contristat, sæculares scandalizat, omnibus se hypocritam demonstrat? O quam multi sæculares optant saturari de micis, quæ cadunt de mensis Religiosorum! pudeat igitur Religiosum murmurare verbo, aut quovis signo super victum. Imo si ex omnibus, qui apponuntur, cibus omnino nihil pro se sumere possit, *benedicat Deum & non murmuret.* Cogitet illud SS. Patris sui: Hodie quidem minus est, cras autem abundanter habebis. Nihil deest timentibus Deum.

PUN-



PUNCTUM QUARTUM.

**A**N ergo, o Religiose! contentus fuisti vili victu ad exemplum SS. Patrum propter spiritum compunctionis? Nullum in vitis ipsorum, nec in fastis SS. Ordinis tui reperies, qui non omni vilitate, & extremitate fuerit contentus, pœnitentiæ sapor cibos eorum condiebat. An vili, & parco victu contentus fuisti, quia statui mortificationis te ultro addixisti? Nullus sine mortificatione Monachus est. An vili, parco, ac duro victu contentus es propter votum paupertatis? Pauper non est, qui deliciis divitum pascitur. Dole ergo, quod tam sæpe super cibum, & potum murmuraveris. Propone, vili victu contentus esse ad exemplum SS. Patrum

1. Propter spiritum compunctionis,
2. Propter mortificationem carnis,
3. Propter votum paupertatis.



DIES VII.

De malo pro malo non reddendo.

Malum pro malo non reddere. Cap. 4. Instr. 29.

PUNCTUM PRIMUM.

**S**anctissimus Pater Noster præclare hoc instrumentum observavit. Nunquam enim malum pro malo reddidit, sed benefecit

B. 3

illis,

illis, qui oderant ipsum. Sic oravit pro persequentibus Monachis, & Florentio impio illo Presbytero. Ad hoc ipsum nos hortatur, dum Cap. 4. Instr. 29. cavet, *ne malum pro malo reddamus*. Tria autem hoc instrumento præcipit. Primum est, *ne malum pro malo reddamus*. Quid enim juvat malum pro malo reddere? Dum malum pro malo reddis, inimicum tuum ad novum malum, & tibi irrogandum obarmas. Hoc accepto nec tu desistes malum rursus illi inferre. Ita malorum nullus erit finis. Miserrimam duces vitam. Continua amaritudo, quam foves in pectore, solatium omne reddet amarum. Cibus & potus, somnus, & requies non sapient. Et quod caput est; quia Fratrem persequeris, Deus te persequitur. Et qualis est hæc persecutio? Animam, & corpus usque ad medullas ossium consumit. Hoc Patres in lege naturæ animadvertentes, nunquam malum pro malo, dentem pro dente, oculum pro oculo reddiderunt. Job, antequam Dominus præcepit, inimicos esse diligendos ait: Si lætatus sum ad ruinam ejus, qui me oderat, & gavisus sum, quod invenisset eum malum. Si dixi in corde meo, bene factum est. Sequere eum propter pacem. Secus non erit pax ossibus tuis.

#### PUNCTUM SECUNDUM.

**A**lterum est, ut benefacias his, qui oderunt te. Non enim sufficit *malum pro malo non reddere*. Semper occultum odii virus  
te



te depascetur, quousque benefacias. Uno actu opus est, ut inimicum rursus sincere, diligas. Si vel semel dulciter aspexeris, amabiliter allocutus fueris, aut obsequium quoddam præstiteris, restituisi primam tibi charitatem. Ordine autem ad hanc ascendendum est. Primitus malum a Confratre illatum pure de manu Domini suscipiendum est. Secundo. Damna ex hoc malo secutura Divinæ Providentiæ committenda sunt, quæ omnia ad salutem disponet. Tertio. Crebri actus amoris cum oratione pro Confratre eliciendi sunt. Hisce interna amaritudo paulatim dulcescet, ut sine periculo novæ commotionis & fraternæ cum eo converseris, & obsequia charitatis ei præstes. Ita Joseph Patriarcha egit. Sub lege naturæ Apostolicum præceptum implevit. Pro odio reddidit charitatem. Pro dolore dilectionis affectum monstravit. Odium Fratrum charitatis lachrymis abluit. Pro malis bona retribuit. Sequere. Secus lex charitatis damnabit te.

### PUNCTUM TERTIUM.

**T**ertium est, ut in bono vincamus malum. Non satis etenim est, *malum pro malo non reddere*, benefacere inimicis. Vera charitas hisce contenta non est, ut diligit. Vult, ut & inimicus charitatem amplectatur. Sequitur monitum Spiritus sancti. Si inimicus tuus esurierit, ciba illum. Hoc enim faciens, carbones ignis congeres super caput ejus.


Quando enim crebro inimico tuo benefeceris, quamlibet sit impius, tandem poenitere incipiet, quod admisit. Et caput ipsius, seu sensus rationis charitatis igne succendetur. Et qui prius quasi frigidus, & phreneticus consueverat contra te iracundiam retinere, spiritali calore de tua bonitate succensus incipit toto corde diligere. Ita Moyse & Aaron populum rebellem in bono vincere studuerunt. Nam cum seditio incretceret, fugerunt ad tabernaculum fœderis. At cum ira egressa esset a Domino super populum, præcepit Moyse Aaroni, ut cum incenso pergens ad populum vindictam ab eo averteret. Hac charitate autem inimicum populum sibi amicum reddiderunt. Sequere. Quot vinctes in bono malos, tot animas cœlo lucraberis.

### PUNCTUM QUARTUM.

**A**N non ergo, o Religiose! malum pro malo hucusque reddidisti? Charitatem amisisti. An benefecisti eis, qui oderant te? Charitatem recuperasti. An vicisti in bono malum? Charitatem inimico restituisisti. Dole, quod legem charitatis Evangelicæ, & Benedictinæ non melius custodieris. Propone

1. Malum pro malo non reddere.
2. Benefacere inimicis tuis.
3. Vincere in bono malum.





## DIES VIII.

## De Castitatis perfectione.

Castitatem amare. Cap. 4. Instr. 63.

## PUNCTUM PRIMUM.

**U**T quis rite, *castitatem amet*, ad perfectum ejus amorem oportet illum ascendere. Perfectio quippe hujus voti non solum in corporali consistit puritate, sed quam maxime in mentis integritate. Totus vitæ cursus virgineus esse debet. Omnes motus animæ, & corporis virginem referre debent. Nam & sermone committitur fornicatio. Visu adulterium patrat. Auditum scurrilium anima polluitur. Immunda cogitatione corrumpitur. Delectatione in creaturis fœdatur. Desiderio rei terrenæ maculatur. Inordinatis passionibus fidem, Sponso cœlesti datam, frangit. Hinc ira, æmulatio, invidia, recordatio injuriarum, mendacium, superbia, levitas, & distractio, sermo inconsideratus, tepor in oratione, in observantia regulari, amor recreationis, somni, requiei &c. castitati perfectæ adversantur. Perfectam siquidem puritatem cœlestis Sponsus a Religiosa anima requirit. Tamdiu displicebit ei, quamdiu ab omni nævo imperfectionis purum cor non habuerit. Hanc puritatem cordis assecutus est

SS. P. N.; quia cor ab omni inordinata affectione immune conservavit.

### PUNCTUM SECUNDUM.

**U**T quis *castitatem perfecte amet*, non sit contentus; quia corpus ab omnibus mundi affectibus possidet, sed etiam illud virtutibus exornet. Sponsus cœlestis duplicem quippe miratur pulchritudinem in Sponsa sua. Quam pulchra es amica mea! quam pulchra es! pulchritudine animæ, & corporis delectatur. Hanc cuivis virgini præcepit per Apostolum suum, ut sit sancta corpore & spiritu. Sancta Spiritu est, si *in cogitationibus suis Deum semper præsentem habet*. Si divinas ejus perfectiones jugiter meditatur. Si solum, & unum sponsum amat, ut dicere possit; *ante te omne desiderium meum*. Si ob amorem sponsi unice omnia agit, & patitur. Si dulciter afficitur ad omnia, quæ ei placent. Si illi soli placere desiderat. Si omnes affectiones suas in virtutes sacrae Regulæ commutavit. Sancta corpore est, si *corpus castigare gaudeat*. Si *omni hora se custodiat a vitiis oculorum, linguæ, manuum, pedum*. Si omnes sensus ad modestiam S. Regulæ reformaverit. Si *nullas amplius delicias amplectatur*. Si *patientiam in omnibus amplectatur*. Ecce! talis Sponsa cœlesti Sponso placet; quia ornata est monilibus virtutum.

PUN-



## PUNCTUM TERTIUM.


**U**T quis *castitatem amet*, ejusque munditiam, & ornatum perfectum acquirat, sequentia jugiter observet. Nihil agat, aut admittat, quod quovis peccato animam maculare possit. Et hoc timore Dei facile obtinebit. Nihil patiat inordinatum in suis affectionibus. Et hoc amore Dei breviter acquireret. Nihil agat, quod sanctitati Professionis suæ a longe repugnet. Et hoc frequenti meditatione obligationum status sui observabit. Omni custodia custodiat cor suum, ne cogitatione, vel affectione a Divino amore declinet. Si vel modice declinaverit, statim ad illum cor suum revocet. Deploret instabilitatem cordis sui, & de novo Divinum imploret auxilium. Hoc præsentia Dei præstat. Omnem curam animæ, dignis statui suo virtutibus exornandæ, adhibeat. Corpus negligat, nisi quod illud jugiter castigare sollicitetur. Omnis enim decor animæ ab intra est. Ecce! o Religiose! quanta perfectio in uno castitatis voto lateat. Ad hanc ergo conare totis viribus, ni velis a cœlesti Sponso ceu adultera reprobari.

## PUNCTUM QUARTUM.

**A**N ergo, o Religiose! amore castitatis perfectæ cor mundas ab omni nævo imperfectionis? Cor mundum crea in me Deus. An exornas omni virtute S. Regulæ tuæ? Spiritu principali confirma me Deus. An ideo omni  
cona-

conatu conservas cor tuum in præsentia & amore Dei? Omni custodia custodi cor tuum. Dole, quod nec a longe hucusque ad perfectionem castitatis enisus fueris. Propone

1. Cor mundare ab imperfectionibus,
2. Cor ornare virtutibus Religioso dignis,
3. Cor conservare in jugi præsentia & amore Dei.



## DIES IX.

De vitando dolo.

Dolum in corde non tenere. Cap. 4. Instr. 24.

### PUNCTUM PRIMUM.

**D**Um SS. Pater Noster jubet, *dolum in corde non tenere*; triplicem dolum prohibet. Primus dolus in corde tenetur erga Deum. Dolum enim corde tenet, qui intentionem bonam erga Deum prætendit, sed occulte seipsum quærit. Cor ejus non est rectum cum Deo. Quare in omnibus, quæ agit proprium honorem, proprium commodum, proprium placitum quærit. Labiis honorat Deum. Exterius bonam format intentionem. At intus cor in veritate Dei gloriam, Dei amorem, Dei beneplacitum non quærit, sed seipsum. Sic cor, quod se simulat Deo esse unitum, longe est ab eo. Dolum in corde tenet, qui dicit se amare Deum super omnia, & occulte



culte quam plurima Deo præponit. Quomodo enim Deum super omnia amat, qui aliquid cum Deo amat? Quomodo super omnia amat, qui propter Deum omnia relinquere non est paratus? Quomodo super omnia amat, qui creaturarum impuro amorì totus adhæret? Dolum in corde tenet, qui unius Dei timorem prætendit, sed in corde majori hominum timore corripitur. Sæpius exercet se in timore Dei, sed ob respectum humanum legem Dei transgredi non veretur. Corde dicit se timere Deum, opere plus timet hominem. O Religiose! quando tandem Deo sincere servies? Quando *dolum in corde adversus Deum non tenebis*? Virum dolosum abominabitur Dominus.

#### PUNCTUM SECUNDUM.

SECUNDUS dolus tenetur in corde adversus Superiores, & Confratres. Dolosus erga Superiores est, qui amorem, & honorem exterius ipsis ostendit; in corde autem eos odit, ac contemnit. Dolosus erga Superiores est, qui confidentiam magnam verbis monstrat; in corde autem, quæ ipsis revelanda essent, occulte abscondit. Dolosus erga Superiores est, qui eorum dicta, & facta exterius approbat; in corde autem reprobat. Erga confratres dolosus est, qui mel in ore, fel in corde gerit. Erga Confratres dolosus est, qui loquitur amabiliter, & insidiatur in abscondito. Erga Confratres dolosus est, qui in faciem laudat,  
in

in corde observat, ut a tergo vituperet. Erga Confratres dolosus est, qui eos curiose in omnibus circumspicit, ut ad Superiores omnia facta, ficta, vera, falsa deferat. O Religiose hoc non est, *dolum in corde non tenere*, sed supra modum dolosum esse. Sed cui magis nocet, quam tibi? Quem magis decipis, quam teipsum? Quem magis odibilem reddis, quam teipsum? Omnes a te fugient. Nec amicissimus amplius fidet. Cunctis timori eris, atque averfioni. Ita fraudulentus nunquam invenies lucrum.

### PUNCTUM TERTIUM.

**T**ertius dolus tenetur in corde erga semetipsum. Seipsum decipit, qui apud se excusat peccata sua. Seipsum decipit, qui magni æstimando merita sua defendit peccatum suum. Seipsum decipit, qui quotidianos defectus, & imperfectiones contra Regulam non vult agnoscere. Seipsum decipit, qui nimia securitate dissolvitur. Seipsum decipit, qui omnia, quæ agit, approbat. Quia cum iustitia sonet exterius, iniquitas latet interius. Dum se defendendo, & magni æstimando exultat, destruitur ipsius fortitudo. Nemo quippe fortis, nisi in Domino; nam virtus in infirmitate perficitur. O Religiose! vide, ne hunc perniciosissimum, sed tamen vix non communem *dolum in corde teneas*. Distinctionem retributionis considera, & de damnis tuis non exultabis. Audi quomodo super te Propheta Sophonias



nias vim divinæ animadversionis intendat. Ecce! dies Domini venit magnus, & horribilis dies illa, dies iræ, dies tenebrarum, & caliginis, dies nebulæ, & turbinis, dies tubæ, & clangoris super omnes civitates munitas, & super omnes angulos excelsos. Ecce super civitatem munitam dies Domini venit. Ecce! super suspectam mentem venit, quæ fallaci excusatione circumdatur, nec veritatis ad se jacula admittit? Ecce! super excelsos angulos venit, in quibus duplex est paries. Ecce! super duplices corde venit, qui dum veritatis simplicitatem fugiunt, ad semetipsos quodammodo duplicitatis perversitate replicantur. Et quod deterius est, apud cogitationes suas in fastu prudentiæ ex ipsa se culpa extolunt. Dies ergo venit super civitates munitas, & super angulos excelsos; quia dies Judicii corda, & defensionibus contra veritatem clausa, destruet, & duplicitatibus involuta, dissolveth.


#### PUNCTUM QUARTUM.

**A**N ergo, o Religiose! nullum dolum hucusque tenuisti in corde tuo adversus Deum? Abominatio Domini est omnis illusor. An nullum dolum tenuisti in corde adversus Superiores, & Confratres? Fraudulenti vasa pessima sunt: ipse enim cogitationes concinnabit ad perdendos mites in sermone mendacii, cum loqueretur pauper judicium. An nullum dolum adversus temetipsum tenuisti in corde tuo?

Plaga

Plaga dolosa dividet vulnera. Dole, quod ha-  
tenuis nec erga Deum, nec erga Superiores,  
& Confratres, nec erga temetipsum sincerus,  
& rectus corde fueris. Propone

1. Nullum dolum adversus Deum,
2. Adversus Superiores, & Confratres, &
3. Adversus temetipsum in corde tenere.



## D I E S. X.

### De Necessitate S. Silentii.

Omni tempore Silentio debent studere Mona-  
chi. Cap. 42. v. 1.

### PUNCTUM PRIMUM.

**D**Ura multis videtur ista Regula: *Omni tempore Silentio debent studere Monachi*; sed tamen summe necessaria est. Primo enim necessaria est ad supprimendas passiones. Ubi enim superbus, aut vanæ gloriæ cupidus magis suam passionem monstrabit, quam in colloquiis vane se jactando? Ubi inobediens murmura sua, & sussurationes magis prodet, quam in colloquiis partialitates instituendo? Ubi iracundus suam iram magis exercebit, quam in colloquiis? Ubi calumniator suas detractiones, & mendacia potius sparget, quam in colloquiis? Ubi dissolutus facetiis, risibus, & scurrilitatibus potius vacabit, quam in colloquiis? Breviter: Nulla occasio



ocasio passiones suas exercendi aptior est, quam collocutio. Hinc S. Arsenius tam infensus hostis garrulitatis erat, quod vix in præsencia sui Episcopi loqueretur. Et merito. Lingua ignis est, universitas iniquitatis; maculat totum corpus, & inflammat rotam civitatis nostræ. Linguam nullus hominum domare potest, inquietum malum, plena veneno mortifero. Multi quidem ceciderunt in ore gladii; sed non sic, quasi qui interierunt per linguam suam.

## PUNCTUM SECUNDUM.

**N**ecessaria secundo est ista Regula, *omni tempore Silentio debent studere Monachi*, ad conservandam charitatem erga Superiores, & Confratres. Ubi enim magis unus alterius infirmitates revelat, quam in colloquiis? Ubi unus alteri suas cogitationes, sua consilia de futuris dispositionibus Superiorum magis vendit, quam in colloquiis? Ubi suam displicentiam de Superiorum, & Confratrum actis, & factis alteri communicat, quam in colloquiis? Ubi familiaritatis nocivæ, rixæ, invidiæ, contumaciæ, diffidentiae, vitia omnia contra charitatem uberius nascuntur, quam in colloquiis? Econtra cum *omni tempore Silentium* servatur, nulla est occasio offendendi Superiores, vel Confratres. Et dum nullus de altero malum quid audit, omnes magni facit, & ideo etiam sincere diligit. Unus alterum miro modo sic ædificat. Hinc S. Pambos.

*Spir. S. Ben, P. III.*      **C**      noluit

noluit loqui in adventu nobilium personarum  
dicens: Nisi Silentio meo ædificentur, nec do-  
ctrina mea ædificabuntur.

### PUNCTUM TERTIUM.

**N**Ecessaria est tertio ista Regula, *omni tem-  
pore Silentio debent studere Monachi*, ad  
obtinendam perfectionem religiosam. Silen-  
tium enim parit spiritum compunctionis. Si-  
lentium implantat humilitatem. Silentium in-  
tellectum illuminat, & bonis cogitationibus  
implet. Silentium voluntatem inflammat ad  
amorem Dei. Silentium memoriam replet re-  
cordatione beneficiorum Dei, ut in gratiarum  
actiones, & laudes lingua profiliat. Silentium  
orationis dulcedinem conservat. Silentium  
constantem animæ quietem gignit. Silentium  
docet scientiam Sanctorum. Silentium obliga-  
tionibus status sui jugiter vacat, & ad perfe-  
ctionem suaviter, ac fortiter perducit. Hinc  
S. Antonius sæpe suis S. Silentium commen-  
davit. Hoc autem nemo rite custodiet, nisi  
omne commercium cum Parentibus &c., mun-  
di negotiis &c. reliquerit. Sufficit enim, ut  
quivis necessitates suorum, & totius mundi  
Deo in oratione commendet. Nemo virtutem  
Silentii obtinebit, nisi varietate exercitiorum  
custodiat. Nemo continuum Silentium serva-  
bit, nisi *cum loquendum erit, de Sanctis, &  
ædificationum eloquiis* humiliter, ac simplici-  
ter ad devotionem & compunctionem dicat.  
Quidquid enim his contrarium agitur, Silen-  
tium




tium franget, passionibus fræna laxabit, & perfectionem minuet.

PUNCTUM QUARTUM.

**A**N ergo, o Religiose! S. Silentium custodies ad suppressionem passionum tuarum? In multiloquio non effugies peccatum. An S. Silentium servabis ad conservandam charitatem erga Superiores, & Confratres? Opus justitiæ pax, & opus justitiæ Silentium. An S. Silentio vocabis ad obtinendam religiosam perfectionem? In Silentio spes ejus est. Dole, quod S. Silentium hucusque tam parvi feceris, & levius fregeris. Propone, S. Silentio continuo studere

1. Ad suppressionem passionum tuarum.
2. Ad conservandam charitatem.
3. Ad obtinendam perfectionem religiosam.



*DIES XI.*

IN SOLEMNI COMMEMORATIONE  
SS. P. N. BENEDICTI.

De Necessitate perfectæ abrenunciationis.

Ad te ergo nunc meus sermo dirigitur, quisquis abrenuncians propriis voluptatibus obedientiæ fortissima arma assumis. Prolog. §. 1. v. 2.

PUNCTUM PRIMUM.

**F**uit vir vitæ venerabilis, gratia Benedictus, & nómine ab ipso suæ pueritiæ tempore

cor gerens senile. Ætatem quippe moribus transiens, nulli animum voluptati dedit. Sed dum in hac terra adhuc esset, quò temporali- ter libere uti potuisset, despexit jam quasi ari- dum mundum cum flore. Qui liberiori gene- re ex provincia Nursiæ exortus Romæ libera- libus litterarum studiis traditus fuerat. Sed cum in eis multos ire per abrupta vitiorum cer- neret, eum, quem quasi in ingressu mundi po- fuerat, retraxit pedem: ne si quid de scientia ejus attingeret; ipse quoque in immane præ- cipitium totus iret. Despectis itaque littera- rum studiis, relicta domo, rebusque Patris plus appetens mala mundi perpeti quam lau- des: & pro Deo laboribus fatigari, quam vi- tæ hujus favoribus extolli nutricem suam quo- que occulte fugiens, deserti loci secessum pe- tiit, & soli Deo placere cupiens, sanctæ Con- versationis habitum quæsit. Omnia ergo re- liquit SS. Pater. Scivit, quod sine plena abre- nunciatione charitas obtineri nequeat. Agno- vit, quod obedientia, quæ ducit ad charita- tem absque omnimoda abnegatione acquiri non possit. Hinc & in Regula, post quam ejus finem, & scopum proposuit, nos ad istam ab- renunciationem hortatur. *Ad te ergo nunc meus sermo dirigitur, quisquis abrenunciare propriis voluptatibus, Domino Christo vero Regi militaturus, obedientiæ fortissima arma assumis. An o Religiose! secutus es SS. Patrem? Nisi hoc modo ad finem, & scopum Regulæ contenderis, nunquam perfectionem vocationis tuæ obtinebis.*

PUN.



PUNCTUM SECUNDUM.

**N**Ecessaria est abrenunciatio ad finem S. Regulæ. Nunquam enim Dei charitatem in omni Regulæ observantia intendet, qui prius omnibus *propriis voluptatibus ad mentem & exemplum SS. P. N. non abrenunciaverit.* Quomodo enim Deum toto corde in paupertate diliget, qui adhuc affectu ad res terrenas afficitur? Abnegandus est hic affectus, relinquenda sunt omnia, ut Deum toto corde diligas. Et cur non? Omnino dulciora, & amabiliora sunt, quæ ex Patre sunt, & quibus nobis ista recompensat. Quomodo Deum in humilitate toto corde diliget, qui adhuc gloriam & amorem mundi ambit? Abneganda, & relinquenda sunt, ut Deum toto corde diligas. Et cur non? JESUS humiliavit semetipsum amore tui, ut & tu in humilitate illum amares. Quomodo Deum in patientia toto corde diliget, qui voluptates mundi, & carnis toto desiderio affectat? Relinquendæ sunt, ut Deus toto corde diligatur. Et cur non? Deus promittit diligentibus se voluptatem, quæ in cor hominis non ascendit. Breviter; quomodo Deum in quacunque regulari observantia totis viribus diliget, qui vires animæ, & corporis circa mundi delicias dispergit? Omnibus abrenunciandum est, ut Deus totis viribus diligatur. Et cur non? Deus pro momentanea vita, vitam æternam, quietam, & beatam promittit.

## PUNCTUM TERTIUM.

**N**Ecessaria est abrenunciatio ad scopum Regulæ. Nemo enim SS. Regulæ in omnibus obediet, quamdiu, ut SS. Pater ait, *propriis voluptatibus non abrenunciaverit*. Semper voluntas propria aliud vult, quam quod communis Monasterii Regula cohortatur. Semper contra Regulam charitatis non ad honorem Dei, non ad utilitatem Fratrum, sed propter seipsam facit, quod agit. Non intendit placere Deo, & prodesse Fratribus, sed propriis motibus animorum. Verbo, nullam virtutis, aut exercitii communis Regulam invenies, cui se propria voluntas non opponat. Semper iudicium proprium S. Regulam interpretatur secundum suum sentire, & non quod Regula sentit. Ignorat Dei iustitiam, & suam vult constituere. Contra Regulam, aut majorum exempla novos ritus inducit. Sæpe ex vano prætextu sibi ipsi secundum suum videre in ea dispensat, cum tamen Abbas in corporalibus solum ex magna necessitate, & charitate, & pro tempore tantum; in spiritualibus vero nunquam ausit dispensare. Etenim & Abbas Regulæ per Professionem subditur, eique etiam præcipitur, ne temere ab ea declinet. Vide ergo o Religiose! quod absque abrenunciatione proprii iudicii, & voluntatis obedientiam erga S. Regulam præstare non possis.



PUNCTUM QUARTUM.

**A**N igitur, o Religiose! S. Patrem sequeris in abrenunciatione? Nisi quis renunciaverit omnibus, non potest meus esse Discipulus. An sequeris illum in abrenunciatione, ut finem S. Regulæ jugiter intendas? Amoris Dei, & mundi sicut lucis ad tenebras nulla est conventio. An sequeris illum in abrenunciatione, ut scopum S. Regulæ semper præ oculis habeas? Voluntas propria omni adversatur legi. Dole ergo quod hucusque necessitatem abrenunciationis non melius perpenderis. Propone SS. Patrem sequi

1. In abrenunciatione
2. Ad finem, &
3. Ad scopum Regulæ obtinendum.

\*\*\*\*\*  
**DIES XII. ET II. INFR. OCT. SS. P. N.  
BENEDICTI.**

De unica sui ipsius cura.

Quare tu enarras justitias meas, & assumis testamentum meum per os tuum? Tu vero odisti disciplinam. Cap. 2. v. 10.

PUNCTUM PRIMUM.

**N**on longe ab ejus specu Monasterium fuit, cujus Pater defunctus est. Omnis igitur ex illo Congregatio ad Venerabi-

rabilem Benedictum venit, & magnis precibus, ut eis præesse deberet, petiit. Qui diu negando distulit, suis, illorumque Fratrum moribus se convenire non posse prædixit: sed victus quandoque precibus assensum dedit. Cumque in eodem Monasterio regularis vitæ custodiam teneret, aliqui inuito consilio venenum vino miscuerunt. Et cum vas vitreum signo Crucis confregisset, ad locum dilectæ solitudinis rediit, & solus in superni Inspectoris oculis habitavit secum. Noluit SS. Pater correctione Fratrum fatigari, sibi soli attendit. Noluit cura disciplinæ distrahi, sibi soli attendit. Noluit negotiis Monasterii vacare, sibi soli attendit. Quid enim prodest homini, si mundum universum lucretur, animæ vero suæ detrimentum patiatur. Sunt tamen quam plurimi, qui solum aliorum defectus observant, suos non curant. Sunt, qui in Fratris sui oculo festucam vident, & in suo trabem non vident. Sunt, qui dum alienam vitam discutunt, suam nesciunt. Vitiis propriis, & alienis jugiter inquinantur. Suspicionibus, & judiciis temerariis jugiter inquietantur. Detractionibus, & murmurationibus Fratribus molesti sunt. Merito his SS. P. objicit: *Quare tu enarras justitias meas, & assumis testamentum meum per os tuum? Tu vero odisti disciplinam. Tu ergo tibi soli attende. Te solum cura. Tuas iniquitates scrutare, ac emenda. Cæcus incede in Claustro, ut dempta consideratione ejus, quem tibi merito perfectionis ad imi-*  
tan-



tandum præposuisti, tanquam cæcus non videas, quæcunque tibi occurrerint minus ædificatoria. Sic non animaberis exemplo eorum, qui talia agunt, ad deteriora. Quietus compunctioni super tua, & aliena peccata vacabis. Et si Confratres tuos exemplo isto non meliorabis, nunquam verbo ædificabis. Cura ergo teipsum.

### PUNCTUM SECUNDUM.

**S**ANCTISSIMUS Pater N. noluit cura disciplinæ distendi; sibi soli attendit. Sunt tamen zelatores hujus quam plurimi; sed non zelo bono. Contingit subinde, ut hi, qui disciplinæ præsumt, ipsam disciplinam negligent. Regulæ observantiam non procurent. Transgressiones impunitas relinquant. Sic fit, ut ipsi subjectis noceant, qui prodesse debuerant. Quæ dum imperfecti conspiciunt, contra Superiores commoventur. Illos averfantur. Murmurant. Seipsum diu, noctuque inquietant. At his quid proficiunt? Deficiunt ipsi plurimum, & disciplinam non promovent. Perfecti vero cum aliquoties Superiorem de disciplinæ defectibus monuerunt, nec emendarunt, sibi ipsis attendunt. In se quieti sunt. Habitant secum. Interne per compassionem dolent. Lamenta coram Deo profundunt, & tanto sciunt de alienis damnis ingemiscere, quanto sciunt de propriis dolere. Timent enim semper, ne communis indisciplinationis correptione fatigati, minus suam curent disciplinam, & se forsitan

C. relin-

relinquant, & alios non invenient. Merito cuius ipsorum inde objiceret SS. Pater: *Quare tu enarras iustitias meas, & assumis testamentum meum per os tuum? Tu vero odisti disciplinam.* Tu ergo ante omnia tibi attende. Te solum cura. Mutus esto, dum admonendo eos, qui præsunt disciplinæ, non emendas. Decanta in corde tuo illud Psalmistæ: Dixi, custodiam vias meas. Obmutui, & humiliatus sum, & silui a bonis. Etenim si non ædificabis exemplo; non emendabis verbo tuo.

### PUNCTUM TERTIUM.

**S**ANCTISSIMUS Pater Noster noluit negotiis Monasterii distrahi, sibi soli attendit. Nihil sic communem quietem perturbat, & propriam inquietat, quam se negotiis Monasterii implicare. Feruntur varia iudicia contra Superiores. Taxantur Confratrum acta. Tempus otiose in cogitationibus futurorum eventuum transigitur. Indagatur in omnia, quæ intra, & extra Monasterium aguntur. Animus obligationem Professionis suæ relinquit. Totus distrahitur. Mille imperfectiones incurrit. Nunquam secum, semper alibi est, ubi esse non deberet. Quoties enim per cogitationis motum nimium extra se rapitur, & ipse est, & secum non est; quia semetipsum minime videns, per alia vagatur. Merito tali objicit SS. Pater: *Quare tu enarras iustitias meas, & assumis testamentum meum per os tuum? Tu vero odisti disciplinam.* Tu ergo tibi attende.

Te




Te solum cura. Cum SS. Patre habita tecum. Surdus esto, ut quidquid audieris de Monasterii negotiis internis, & externis, quod te non concernit, tanquam surdus pertranseas. Si oratione, & custodia S. Disciplina Deus placatus, Monasterium tuum non custodierit, in vanum cum cæteris laboraveris, quidquid egeris, dixeris &c.

PUNCTUM QUARTUM.

**A**N ergo, o Religiose! non scrutaris defectus Confratrum tuorum? Tuam trabem prius ejice. An non contra Superiores indiscrete commoveris propter ipsorum desidiâ in conservanda disciplina? Si verbo non potes, exemplo ædifica. An negotiis Monasterii, quæ te non concernunt, te immisces? Quid ad te, tu me sequere. Dole, quod hucusque omnibus aliis, soli tibi non attenderis, propone, te solum imposterum curare,

1. Relicta cura Confratrum,
2. Superiorum,
3. Negotiorum Monasterii.



**DIES XIII. ET III. INFR. OCT. SS. P.  
N. BENEDICTI.**

Quomodo Religiosus nulli injuriam facere,  
& factam patienter sufferre debeat.

Injuriam non facere; sed & factam patienter  
sufferre, Cap. 4. Instr. 30.

PUN.

## PUNCTUM PRIMUM.

**F** Lorentius vicinæ Ecclesiæ Presbyter invidia tenebris cæcatus, ad hoc usque perductus est, ut servo omnipotentis Dei infectum veneno panem quasi pro benedictione transmitteret. Quem vir Dei cum gratiarum actione suscepit, sed eum, quæ pestis lateret in pane, non latuit. Ad horam refectiois, cum more solito ex sylva corvus venisset, præcepit illi Vir Dei, ut panem istum tali in loco projiceret, ubi a nullo hominum possit inveniri. Quo facto post trium horarum spatium rediens de manu hominis Dei annonam, quam consueverat, accepit. Venerabilis autem Pater contra vitam suam inardescere Sacerdotis animum videns, illi magis, quam sibi doluit. Non fecit injuriam. Factam patienter portavit. Seipsum lædit, qui infert injuriam. Injuriam enim pati malum non est. Injuriam inferre hoc malum duntaxat est. Nonne Saul graves injurias David fecerat? At quanta mala inde sibi ipsi intulit? Spiritu malo vexatus est. A proprio Filio, & Filia impugnatus est. In manus David a Domino traditus est. Nonne David sibi ipsi nocuit, quando Uriæ injuriam fecit? Urias vel mortuus, & occisus domum illius universam depopulabatur. Sic qui injuriam faciunt, animam suam impugnant. Spiritu malo iræ, & odii corripuntur. Variis perturbationibus vexantur. A Deo hic, aut in futuro gravissime puniuntur. Hinc SS. Pater præcipit: *Injuriam non facere.*

PUN-

PUNCTUM SECUNDUM.

**S**ANCTISSIMUS Pater injuriam a Florentio sibi irrogatam tulit patienter; dum ad eam tacuit; nec ullo verbo eandem Florentio per nuncium exprobravit. Solum namque vir malus, cum injuriis laceffitur, injurias reponit ut ultro citroque vix finis fiat injuriarum. Vir vero probus nil molestiæ ex injuriis accipit; quia ad eas tacet. Et cum audire cogitur, quod non est; non tamen dicit convitianti, quod est. Quare? Salvatorem suum sequitur. Hic, cum ei Judæi improperebant: Dæmonium habes. Samaritanus es, & cum eum lapidare velent; aliud non reposuit; quam, ego gloriam meam non quæro; est qui quærat, & judicet & abscondit se. Illatas contumelias quamvis Pater omne ei judicium dederit, non vindicavit, sed Patris reservavit judicio. Exemplum reliquit nobis, quantum nos patientes esse debemus, dum se ulcisci non vult & ipse, qui judicat. Sane imitatione Dei gloriosus est injuriam tacendo fugere, quam respondendo superare. Sed contra hoc superbia dicit in corde: Turpe est, ut accepta injuria taceas. Quisquis conspicit, quia verbo, aut facto injuriam accipis, & taces, non putat, quia patientiam exhibes, sed crimen agnoscis. Unde vox ista in corde nostro contra patientiam nascitur? In imis cogitationem figimus. Dum in terra gloriam non quærimus, placere ei, qui nos de cælo conspicit, non curamus. *Factam ergo*



*ego injuriam, ut SS. Pater egit, & praecepit, patienter sufferamus.*

### PUNCTUM TERTIUM.

**S**ANCTISSIMUS Pater plus Florentio, quam sibi doluit. Scivit, quod Diabolus non tantum de vulnere humani corporis gaudeat, quantum in vulnere animæ delectatur. Doluit, quod injuriator suus victus fuerit a Diabolo. Scivit, quod Deus se sit vindicaturus ab hoste suo; quia per se vindictam non sumpsit. Doluit ob illius exitium, sicut Christus Dominus lachrymatus est super Judam, non quando ipse crucifigebatur, sed quando ille prodebat. O Religiose! injuria te, aut convitio quis affecit? Deum obsecra, ut statim illi propitius fiat. Iræ fræna; quoniam lethalem ille jam accepit plagam. Compatere; quoniam ipsum vulneravit Diabolus. Ne igitur, & tu præterea ferias, ne teipsum una cum illo dejicias. Dum enim tali condolendo non supercedes, potes te, & illum servare. Quod si injuriam injuriæ referens teipsum quoque dejeceris, quis tandem vos humi jacentes tollet? Certe haud quaquam poterit humi prostratus, an tu, qui una cum illo collapsus es? Qui tibi ipse manum porrigere nequisti, alteri poteris? Ita igitur generoso pectore, & mortuum illum e pugna [Frater tuus est] per lenitatem trahito. Vulneravit illum ira, ne vulneraveris, & tu, sed prior jaculum abjicito. Si ita egeris, condolendo vere ad mentem SS. Patris *injuriam factam patienter sufferes.*

PUN-

PUNCTUM QUARTUM.

**A**N ergo, o Religiose! injuriam non facis? Injuriator seipsum vulnerat, sicut qui ad stimulos calcitrat. An injuriam factam patienter tacendo suffers? Si ignem cum igne conjungis, major flamma accenditur. An injuriam factam patienter condolendo suffers? Frater tuus mortuus est. Dole, quod patientiam in injuriis non servaveris. Propone

1. Injuriam non facere;
2. Sed factam tacendo,
3. Et condolendo patienter sufferre.

*DIES XIV. ET IV. INFR. OCT. SS. P.  
N. BENEDICTI.*

De qualitate pœnæ scandalizantium.  
Propter scandalorum spinas. Cap. 13. v. 16.

PUNCTUM PRIMUM.

**F**Lorentius, quia Magistri corpus necare non potuit, se ad extinguendas Discipulorum animas accendit: ita, ut in horto cellæ, cui Benedictus inerat, ante eorum oculos nudas septem puellas mitteret, quæ diutius ludentes illorum mentes ad perversitatem libidinis inflammarent. Quod Vir Dei videns habitationem mutavit loci. Sic Vir Dei ejus odia humiliter declinavit, quem omni-

nipo-

nipotens Deus terribiliter percussit. Nam cum prædictus Presbyter stans in solario Benedictum discessisse exultaret, solarium cecidit, & Benedicti hostem conterens extinxit. Nullum enim vitium Deus velocius punit, quam scandalum. Ecce! Moysen amicum Dei, Prophetarum maximum, cui sicut amico Dominus loquebatur, repente ira Dei corripuit; quia scandalizavit eos, qui secum erant, apud aquam contradictionis. Mox equidem illi dictum est: Quia non credidisti mihi, ut sanctificares me coram Filiis Israël: propter hoc non introduces hos populos in terram, quam promisi eis. Si tantum virum mox Deus castigavit, quantum & nos timere debemus, ne ira Dei ascendant super nos? An non enim propter nos Nomen Dei blasphematur in gentibus? An non invicem scandalizamus, & scandalizamur? Toties namque aliquis teste S. Basilio in Regulis brevioribus: scandalizat, quoties dictis, factisve legem violat, & exemplo suo alium ad legis violationem inducit, ut serpens Evam, & Eva Adam. Numera modo, o Religiose! scandala, quæ contra S. Regulam dedisti. At time etiam *propter scandalorum spinas* legem coram aliis deinceps transgredi. Non enim te solum, & quos scandalizas; sed ipsum Deum lædunt, ut velociter vindictam sumat.

#### PUNCTUM SECUNDUM.

**N**ullum vitium irremissibilius punitur scandalò; morte namque repentina absque spatio



spatio pœnitentiæ multatus est Florentius. Quod enim cum damno aliorum fit, gravius judicatur. Unde & peccata, quæ occulte fiunt, veniam merentur. Quæ vero manifeste perpetrantur, absque venia plerumque puniuntur. Sic David jejuniis, contritione cordis, afflictione corporis pœnam adulterii, & homicidii evadere non potuit. Quare? Audi Nathan. Quia blasphemare fecisti inimicos Nomen Domini propter hanc rem. Merito ergo S. Paulus timuit præ omnibus aliis peccatum scandalizandi, ut si esca scandalizasset Fratrem suum, carnes non manducasset in æternum. Et tamen nos non timemus. Quoties enim leves sumus coram sæcularibus, qui tamen levitatem in Religioso sacrilegii condemnant? Quoties invicem nobis murmurando, contendendo, frangendo silentium &c. scandalo sumus? Fors non timeamus; quia parva sunt ista? At parvum non est, ex quo grave scandalum oriri potest. Time ergo *scandalorum spinas*, quæ lethaliter Fratrem tuum vulnerando, etiam tuam animam enecant. Imo Deus eo irremissibilis scandalum tuum puniet; quo propter professionem sanctitatis amplius alios scandalizasti.

### PUNCTUM TERTIUM.

**N**ullum peccatum gravius punitur scandalizandi morte namque temporali, & æterna punitus est Florentius. Est enim vitium gravius ipso homicidio. Per hoc corpus, alias periturum, interimitur. Per illud anima immortalis


talis vita gratiæ spoliatur. Est vitium diaboli-  
cum; quia Diabolus fuit homicida ab initio.  
Primum hominem non manu; sed suasu ad  
peccatum occidit. At sanguis scandalizati ut  
olim Abel contra scandalizantem jugiter cla-  
mabit vindictam. Veniet etiam sanguis ejus  
super eum. Ecce tibi Jeroboam! hic erigen-  
do idola peccare fecit Israël. Et hinc opera-  
tus est mala super omnes, qui fuerunt ante  
eum. Quomodo autem venit sanguis eorum  
super eum? Percipe Prophetam Achiam. Per-  
cutiam de Jeroboam mingentem ad parietem,  
& clausum, & novissimum in Israël. Sequere  
igitur consilium Pauli dicentis: Providentes  
bona non tantum coram Deo, sed etiam coram  
hominibus. Totis viribus adnitere, ne per te  
quis scandalizetur. Vita enim, etsi rectissima  
sit, si aliis erit scandalo, totum amittit. Et  
tamen plerumque contingit, ut, qui negligenter  
de se mala opinari permittunt, per semet-  
ipsos quidem nulla iniqua faciant, sed tamen  
per eos, qui se imitati fuerint, multiplicius  
delinquant. Hinc est, quod Paulus ejusmo-  
di exprobet. Et peribit infirmus in tua con-  
scientia Frater propter quem Christus mortuus  
est. Sic autem peccantes in Fratres, & percu-  
tientes eorum conscientiam infirmam, in Chri-  
stum peccatis. Exhorresce *scandalorum spinas*,  
quæ tam graviter feriunt.

#### PUNCTUM QUARTUM.

**A**N ergo, o Religiose! horres scandalum, quia  
velociter a Deo punitur? Dathan, & Abi-  
ron

ron ob commotam seditionem in momento a terra absorpti sunt. An horres scandalum, quia irremissibiliter plerumque a Deo punitur? Sanguis Fratris tui clamat ad me de terra. An horres scandalum; quia graviter a Deo punitur? Væ! homini illi, per quem scandalum venit. Dole, quod Transgressione S. Regulæ toties Confratres scandalizaveris. Propone neminem scandalizare

1. Ob repentinam,
2. Irremissibilem,
3. Gravissimam Dei vindictam.



*DIES XV ET V. INFR. OCT. SS. P.  
N. BENEDICTI.*

*De Necessitate Confidentiae spiritualis erga  
Patrem spiritualem in tentationibus.*

*Cogitationes malas cordi suo advenientes Se-  
niori spirituali patefacere. Cap. 4. Instr. § 1.*

*PUNCTUM PRIMUM.*

**C**Um Idolum quoddam æreum Fratres invenissent, & ad horam casu in coquinam projecissent, exire ignis repente visus est, atque in cunctorum Monachorum oculis, quia omne ejusdem coquinæ ædificium consumeretur, ostendit. Cumque jaciendo Fratres aquam ad ignem quasi extinguendo

D 2 per-



perstreperent, pulsatus eodem tumultu Vir Dei advenit. Qui eundem ignem in oculis Fratrum esse, in suis vero non esse considerans, eos, quos phantastico reperit igne deludi, vocavit. Fratres monuit, ut oculos suos signarent, ut & sanum illud coquinæ ædificium assistere cernerent, & flammæ, quas antiquus hostis finxerat, non viderent. Hoc Signo SS. P. Noster ostendit necessitatem ejus, quod docuit Cap. 4. *Cogitationes malas cordi suo advenientes Seniori spirituali patefacere*. Necessaria enim est ista confidentia erga Patrem spiritualem ad vitandas fraudes Diaboli. Nec enim valebit callidus hostis ignorantia ejus illudere, qui universas cogitationes in corde suo nascentes nequaquam abscondit. Non illum superabit, qui omnes cogitatus suos reprobabat; aut admittit maturo examine Seniorum. Serpens siquidem deterrimus virtute confessionis, quasi ex tenebroso, & subterraneo specu protractus ad lucem, abscedit dehonestatus, etiam antequam proferatur judicium discretionis de cogitatione sic patefacta. Tamdiu enim suggestiones ejus noxiæ dominantur in nobis, quamdiu celantur in corde.

#### PUNCTUM SECUNDUM.

**N**Ecessarium est *cogitationes malas cordi suo advenientes Seniori spirituali patefacere* ad obtinendam virtutem discretionis. Hæc enim virtus non nisi humilitate acquiritur. Hujus vero humilitatis prima probatio est,

si quis examini Seniorum, & Superiorum suorum universa, quæ agit, aut agenda occurrunt, reservat. Si nihil credit suo iudicio. Si per omnia acquiescit informationi Senioris sui spiritualis. Si illius instructione agnoscit, quid debeat judicare bonum, vel malum. Hæc siquidem institutio docebit, quemvis tramite recto incedere per veræ discretionis viam. Hæc institutio servabit illum illæsum ab universis tentationibus. Hæc institutio nullum sine quidquam ultra vires naturæ, aut gratiæ præsumptuose aggredi. Nullatenus enim decipi potest, qui vivit non suo iudicio, sed majorum exemplo.

#### PUNCTUM TERTIUM.

**N**ecessarium est *cogitationes malas cordi suo advenientes Seniori spirituali patefacere*, ad proficiendum, & perseverandum in vocatione sua. Nunquam enim rite proficiet, qui non secundum majorum institutionem profecerit. Sæpe, qui propriis advenientibus stare voluerit, dum se proficere credit, deficiet plurimum. Est velut civitas non murata, diruta, ac collapsa Hosti cuivis patet introitus. Patet ad prædam. Pro quod non expositus est incurisibus? Nunc tentatur contra Superiores. Nunc aversatur Confratres. Nunc flammis impuri Asmodæi succenditur. Nunc præ tædio vocationis suæ languet. Nunc immoderantia tristitia absorbetur. Nunc variis perturbationum atque passionum motibus concutitur.

Nunc præ tentationum vehementia vix non desperat. Hæc dum omnia secum concoquit, de die in diem magis crescunt. Et cum se humiliare negligit, nec Deus cum tentatione ejus facit proventum. Hinc sæpe contingit, ut cum illo antiquo Monacho de deferenda Religione secum deliberet. Quam & revera deferet, nisi cum eodem resipiscat, & tentationes suas humiliter, atque fideliter Seniori spirituali patefecerit.

#### PUNCTUM QUARTUM.

**A**N ergo, o Religiose! cogitationes malas cordi tuo advenientes Seniori spirituali patefacis ad vitandas technas Dæmonis? Senex Heron; quia propriis adinventionibus stetit, post admirabilem abstinentiam ex instinctu Dæmonis seipsum in puteum præcipitavit. An cogitationes malas cordi tuo advenientes Seniori spirituali patefacis ad obtinendam virtutem discretionis? Fame periit ille Frater Thebaidos, qui noluit a Marsitis cibum accipere, sed a solo Deo panem suum expectavit. An cogitationes malas cordi tuo advenientes Seniori spirituali patefacis ad proficiendum, & perseverandum in vocatione tua? Monachus quidam Mesopotamianus post inauditam ferme abstinentiam, diabolicis visionibus delusus, Judaïsmum suscepit. Dole, quod saluberrimum istud medium ad perfectionem tuam promovendam non adhibueris. Proponere confidentiam erga Patrem spiritualem semper habere



1. Ad vitandas fraudes Diaboli,
2. Ad obtinendam discretionem,
3. Ad proficiendum, & perseverandum in vocatione tua.



## *DIES XVI.*

### *INFEST. SS. SCAPULARIS B. V. MARIAE DE MONTE CARMELO.*

Sufficere credimus Monachis Scapulare propter opera. Cap. 55. v. 5.

#### *PUNCTUM PRIMUM.*

**C**UM Ordo B. V. M. de monte Carmelo graviter affligeretur, eadem B. V. beato Simoni Anglico pro tutela S. Scapulare tradidit, cum promissione, quod omnis, qui illud devote usque ad mortem gestaverit, pœnas inferni evasurus sit. Et qui abstinentiam modicam, precesque paucas præscriptas, nec non castitatem pro ratione sui status observarent, quantocius per ipsam e purgatorio cœlo inferendi sint. *Sufficiet igitur Monacho hoc S. Scapulare propter opus castitatis ad evadendum pœnas inferni.* Non enim perfectam castitatem Monachus possidet, si ab impura mentis, & corporis contagione solum abstinet. Perfectam castitatem habebit, si ab omni gravi peccato liber erit. Nunquam enim per castitatem cœlesti Sponso

copulabitur, quando cæteris vitiis fuerit inquinatus. Ut bonum pudicitiae divinae placationi sufficiat, non solum in candore corporis servari debet, sed in splendore internæ puritatis. Sicut enim Redemptori nostro placere non potest, qui luxuriæ inquinamenta non deserit: ita placere non potest, qui castitate quidem præeminet, sed necdum se per bona opera exercet. Cupis, o Religiose! juxta promissum B. Mariæ de monte Carmelo a poenis inferni liberari, porta Ejus *Scapulare propter opus castitatis*.

#### PUNCTUM SECUNDUM.

**S**ufficit Monacho hoc *S. Scapulare propter opus jejunii* ad evadendum poenas purgatorii. Jejunium enim purgat peccata. Caro quippe nos læta traxit ad culpam, sed afflicta reducit ad veniam. Per fructum ligni vetitici a Paradisi gaudiis cecidimus, ad hæc per abstinentiam resurgimus. Nihil namque sic placat Divinam Justitiam, sicut jejunium. Certe David, cum jam audisset poenam peccati sui æternam translatam esse a Domino, utique in temporalem, ad hanc quoque avertendam jejunavit. Imo ne Divina Justitia inveniat, quod puniat, jejunium facit. Quid enim inordinatos motus animi magis compescit, quam jejunium? Sicut enim corpus febricitans si accipit escam, aut potum, increfcit illi calor; ita & humana corpora, quæ sanguinis fervore utuntur, vehementer exardescunt, nisi fuerint absti-

abſtinentia gubernata. Igni enim ſi deeſt eſca, ſopitur. Et corpus, ſi cibis ſuperfluus ei ſubtrahitur, motus malos amittit. Cupis, o Religioſe! juxta promiſſum B. V. Mariæ de monte Carmelo velociter a pœnis purgatorii liberari, porta Ejus *Scapulare propter opus jejunii.*

PUNCTUM TERTIUM.

**S**ufficiet Monacho hoc *S. Scapulare propter opus orationis*, ut ſtatim, aut proxime per B. V. Mariam cœlo poſt mortem ſuam inferatur. Ipſius equidem Filius nobis promiſit omne illud dare, quod petierimus in nomine ejus. Pete igitur Deum, Beatitudinem tuam, & ſtatim dabit ſemetipſum tibi. Nonne ſtatim exauditus eſt, qui inquirebat Dominum? Inquiſivi Dominum, & exaudivit me. Non inquiſivit a Domino aurum, proſperitatem mundi, longævam ſenectutem; ſed Dominum, & exaudivit eum. Ita & te exaudiet. Adhuc te loquente, dicet; ecce! adſum. Quid eſt, ecce! adſum? Ecce! præſens ſum, quid vis? Quid a me quæris? Quidquid tibi dederò vilius eſt, quam ego. Meipſum habe, me fruiere, me amplectere. Cætera onera ego deponam, ut totus mihi inhæreas. Convertam enim hoc mortale ad immortalitatem. Cupis, o Religioſe! juxta promiſſum B. V. M. de monte Carmelo ſtatim cœlo poſt mortem tuam inferi? Porta ſacrum Ejus *Scapulare propter opus orationis.*



PUNCTUM QUARTUM.

**A**N ergo, o Religioſe! Scapulare B. Virginis portas, ut perfectam caſtitem ſervando a pœnis inferni libereris? Non dicet Tibi Sponſus: Nescio te. Clauiſa eſt janua. An Scapulare B. V. portas, ut jejunando pœnas purgatorii evadas? Jejunium extinguit peccatum. An Scapulare B. V. portas, ut orando poſt mortem cœlum ingredi poſſis? Oratio reſerat cœlum. Dole, quod te indignum promiſſi B. V. per neglectum caſtitiæ; abſtinentiæ, & orationis reddideris. Propone SS. Scapulare portare.

1. Cum caſtitate,
2. Cum abſtinentia,
3. Cum oratione.

(\*\*\*\*\*)

*DIES XVII. ET VII. INFR. OCT. SS.  
P. N. BENEDICTI.*

De Imitatione SS. P. N. Benedicti per obſervantiam S. Regulæ.

In omnibus omnes magiſtram ſequantur Regulam. Cap. 3. v. 6.

PUNCTUM PRIMUM.

**V**ir Dei Benedictus inter tot miracula quibus in mundo claruit, doctrinæ quoque verbo non mediocriter fulſit. Nam  
ſcrip-

scripsit Monachorum Regulam, discretionem præcipuam, sermone luculentam. Cujus si quis velit subtilius mores, vitamque cognoscere, potest in eadem institutione Regulæ omnes magisterii illius actus invenire: quia sanctus Vir nullo modo potuit aliter docere quam vixit. Imitaberis igitur SS. Patrem, habebis illius spiritum, si *in omnibus magistræ sequeris Regulam*. Cape ex his tribus tantum experimentum. Primo docuit, *Os suum a malo, & pravo eloquio custodire*. Hoc ipsum imprimis custodivit arcta solitudine, & silentio. Nihil locutus est, nisi ad instructionem, correctionem Monachorum, & conversionem gentium. Non enim illum latuit, illud Jacobi: si quis putat se Religiosum esse, non refrænans linguam suam, hujus vana est Religio. Non ignorabat illud Christi, quod pro quovis otioso verbo, tacendo, pro pravo & malo eloquio ratio sit reddenda in judicio. O Religiose! faceat igitur ab ore tuo omnis vani eloquii ineptia, & lingua, quæ immaculati Agni rubet sanguine, dedignetur otiosi sermonis sese facibus inquinare. Sequere SS. Patrem tuum. Sicut ad Regulam os suum ab omni malo, & pravo eloquio custodivit; ita & in cæteris omnibus fecit, quod scripsit.

PUNCTUM SECUNDUM.

**S**ecundo docuit, *verba vana, aut risui apta non loqui*. Quod & hujus observantissimus fuerit, testis est S. Gregorius ejus Discipulus,  
Vix,

Vix inquit communis ejus locutio a virtutis pondere erat vacua; quia nequaquam verba de ore ejus incassum cadebant. Pro risu cordis compunctioni vacabat. Pro vana locutione Deo loquebatur solus in oratione. Non eum latuit, quod Petrus monuit: si quis loquitur, quasi sermones Dei. O Religiose! Monachus es? Veste indutus es lugubri? Quid tibi cum vanis, & risum moventibus verbis? Quid tibi cum mundi vanitatibus, qui mundo mortuus es? Nunc tempus plangendi, non ridenti est. Tempus nunc est tribulationum, & lamentationum, non vanitatum. Quis Athletarum stadium ingressus, relicta solitudine cum adversario certandi facetiis & jocis utitur? Instat Diabolus, circuit rugiens, ut devoret, & tu sedeas, facetias effundens, quæque stulta sunt, & ad rem non faciunt effutians? Non hæc est Monachorum, non Sanctorum conversatio. Paulus pro Ephesiis die ac nocte lachrymatur; & tu pro anima tua minus sollicitus sis? Sequere S. Patrem tuum. Sicut ad Regulam nunquam verba vana, aut risui apta locutus est; ita in cæteris omnibus fecit, quod scripsit.

### PUNCTUM TERTIUM.

**T**ertio docuit SS. Pater: *Contentionem non amare.* Quantus ipse osor contentionis fuerit, testes sunt duæ illæ contentiosæ Sanctimoniales, quas excommunicavit, & primum post mortem ab excommunicatione absolvit.

Scivit



Scivit illud sapientis: Labia stulti miscent se-  
raxis, & os ejus jurgia provocat. Semper jur-  
gia quarit. Angelus autem crudelis  
mittetur contra eum. O Religiosi! quod si  
zelum amarum habetis, & contentionem in  
cordibus vestris, nolite gloriari. Etenim cum  
sint in vobis zelus, & contentio, nonne car-  
nales estis, & secundum carnem ambulatis?  
Unde namque lites in vobis? Nonne ex con-  
cupiscentiis? Ex his nascitur primo levis dis-  
fensio. Accedit gravior commotio. Sequitur  
verborum pugna. Ostendunt se signa aver-  
si animi. Negantur consueta humanitatis officia.  
Vindictæ cupido stimulat. Gliscunt odia. Fo-  
res Diabolo patent. Ex Monasterio fit tarta-  
rus. Ex Monachis dæmones. Fuge minimam  
contentionem. Sequere SS. Patrem tuum. Si-  
cut contentiones non amavit, sed conten-  
tiosum Florentium fugit; ita in cæteris omni-  
bus, quæ docuit verbo, fecit. Spiritu SS.  
Patris vives, si *in omnibus magistrum secutus  
fueris Regulam.*

PUNCTUM QUARTUM.

**A**N ergo, o Religiose! SS. Patrem imitatus es  
per observantiam SS. Regulæ in omnibus?  
Si non imitaris, degener Filius es, imo Fi-  
lius non es. An imitatus es juxta Regulam a  
malis, vanis, & jocosis verbis abstinendo?  
Aurum tuum, & argentum conflu, & verbis  
tuis facito stateram. An imitatus es juxta Re-  
gulam contentiones non amando? Non oportet

62 *Dies XVIII. & Octava SS. P. N. Ben.*

tet litigare, sed modestum esse ad omnes. Dole, quod SS. Patrem per observantiam Regulæ imitatus non fueris. Propone illum imitari in omnibus Regulis, & in hunc finem specialiter hodie

1. Os tuum a malo, & pravo eloquio custodire,
2. Verba vana, aut risui apta non loqui.
3. Contentiones non amare.



*DIES XVIII. ET OCTAVA SS. P.  
N. BENEDICTI.*

*De felice Morte.*

Mortem quotidie ante oculos suspectam habere. Cap. 4. Instr. 47.

*PUNCTUM PRIMUM.*

**V**ir Dei gratia, & nomine Benedictus ante sextum sui exitus diem aperiri sibi sepulturam jubet. Qui mox correptus febribus, acri cœpit ardore fatigari. Cumque per singulos dies languor ingravesceret, sexta die portari se in Oratorium a Discipulis fecit, ibique exitum suum Dominici Corporis, & Sanguinis perceptione munivit. Tandem inter Discipulorum manus imbecillia membra sustentans, erectis in cœlum manibus stetit, & ultimum spiritum inter verba orationis efflavit. Ut mors nostra sit felix, necesse est

est ad mentem, & exemplum SS. P. N., *mortem quotidie ante oculos suspectam habere*, & sic per vivam ejus meditationem crebro ante exitus diem nobis sepulchrum aperire. Cogita te in sepulchro jacentem, escam vermium, putredinem, foetorem intolerabilem, pulverem, ac cinerem. Quid tibi tunc proderunt honores, quos contra Professionem tuam tam solícite quæsisisti? Quid tibi tunc proderunt carnis commoda, quæ tibi contra Regulam, & statum tuum procurasti? Quid tibi tunc proderunt favor, & existimatio hominum, quæ contra abjectionem status tui tam anxie quæsisisti? Quid tibi tunc proderunt deliciæ in cibo, & potu, quibus tam cupide contra Regulam inhiasti? Ecce! hic jaces peripséma omnium viventium. Ecce! hic jaces desertus ab omnibus. Ecce! hic jaces, & tibi totus mundus periit. Si te vides ergo viventem, cogita & mortuum. Fors sex adhuc restant dies, & eris talis, qualem te descripsi. O vanitas vanitatum, & omnia vanitas! tu cum SS. Patre aperi ante mortem sepulturam tuam. Vere contemnes mundum, ad invisibilia te totum transferes, & sic feliciter morieris.

## PUNCTUM SECUNDUM.

UT felix sit mors nostra, necesse est *mortem quotidie ante oculos suspectam habere*, quatenus per vitam *patientiam amplectamur*, & sic patientes in illa lethali infirmitate inveniamur. Ita SS. Pater, quia in vita corpus suum



suum castigavit, atque in adversis patiens fuit, etiam in calore febrium patientissimus extitit. Impatientia quippe in morbis solum ex hoc provenit; quia nimis inordinate corpus nostrum diligimus. Quia animas nostras perdere timemus. Quia carnem nostram odio habere negligimus. Quia in adversis impatientes sumus. Quia peccata nostra non consideramus. Quia futuras pœnas, quæ nos manent, non pensamus. Sane omnes cruciatus hujus vitæ umbræ sunt, & somnium, qualescunque sint, tam ratione naturæ, quam brevitate temporis, respectu illorum, quæ peccatores manent in futuro. Quid enim valent esse, cum ad illa sævissima comparantur? Quid ad ignem inextinguibilem? Quid ad sæcula infinita? Pro his quis non eligat mille mortibus subjici? Non eligat centum annis pati intensissimos dolores? Tu cum SS. Patre tuo corpus tuum castiga. Futuras pœnas considera, & patiens eris in infirmitatibus. Patientia vero habebit opus perfectum. Feliciter morieris.

#### PUNCTUM TERTIUM.


**U**T felix sit mors nostra, necesse est *mortem* quotidie ante oculos suspectam habere; quatenus per dilectionis exercitium in morte. Amori immori mereamur. Hoc modo promouit SS. Pater Noster inter Discipulorum manus stans exspirare. Et quis aversionem erga Confratrem habeat, si cogitet hujus precibus adhuc hodie forsan in morte uti ad evadendum

dum horribiles tentationes inimici? Quis odium erga Confratrem foveat, si cogitet forsitan adhuc hodie indigere ejus consolatione. & auxilio ad superandas angustias mortis? Quis vindictam spiret, si cogitet forsitan adhuc hodie ab illo per mortem separandum esse? Nullus sane. Quivis dimittet ex corde, ut dimittatur ipsi. Quivis amabit ex corde, ut mereatur sub ejusquem dilexit adjutorio, & solatio morte obire. Non enim dignus ultimo hoc fraternæ charitatis obsequio erit; qui per vitam amorem Fratribus noluit impendere. Væ autem tali! etenim qui non diligit manet in morte. Tu cum SS. Patre tuo ama Fratres tuos. Et o quanto hoc tibi in morte erit solatio? Scies; quia de morte translatus es ad vitam. Inter manus illorum ad cælum pro te extensas expirabis. Feliciter morieris.

#### PUNCTUM QUARTUM.

**A**N igitur, o Religiose! sæpe ingrederis sepulchrum tuum, ut visibilia contemnas, & invisibilia jugiter suspires? Desiderium pauperis exaudiet Dominus. An ex consideratione mortis modo adversa sustines, ut in morte patiens inveniaris? Patientia tibi necessaria erit, ut reportes repromissiones. An modo Fratres tuos diligis, ut ex dilectione in Fratrum corona mori valeas? Dilectio operiet multitudinem peccatorum. Dole, quod ad felicem mortem te ad exemplum, & doctrinam SS. Patris tui non melius disposueris. Propone ex consideratione instantis mortis

1. Visibilia contemnere, & invisibilia solum suspirare.
2. Patiens esse ad obtinendam patientiam in morte.
3. Fratres diligere, ut inter eorum manus expirare merearis.



## DIES XIX.

Quomodo Religiosus obtineat confidentiam erga Superiorem.

Omnes cogitationes malas cordi suo advenientes, vel mala, a se absconfe commissa, per humilem confessionem Abbati non celaverit suo. Cap. 7. v. 55. & 56.

## PUNCTUM PRIMUM.

**I**Nter omnia plane media, quibus Religiosus in sua vocatione permaneat, valde necessarium, & efficacissimum est confidentia erga Superiorem. Hæc ab ea discedere, vel tantum in ea languere nunquam permittit. Unde statuit SS. Pater N. *Omnes cogitationes malas cordi suo advenientes, vel mala a se absconfe commissa per humilem confessionem Abbati non celaverit suo.* Ad istam confidentiam obtinendam considera, quod Deus non nisi per Superiorem ad Beatitudinem tuam te manuducere velit. Ipse enim caput est Monasterii; quia *Christi vices agere in Monasterio creditur.*



*ditur, in tantum, ut ibi cum ejus voluntate omnia agenda sint. Quæ aguntur contra ipsius voluntatem, contra voluntatem Dei aguntur. Qui vos audit, me audit.* Et hinc cum ipsius sit non tantum Religioso, quoad externum, sed etiam quoad internum statum prospicere, illum dirigere in viam salutis, quomodo prospiciet? Quomodo diriget, nisi ei internum, & externum statum aperuit? Quomodo rationem animæ ipsius in die judicii redditurus est, nisi prius ipse Abbati rationem de eadem in hoc sæculo reddiderit?

PUNCTUM SECUNDUM.

**U**T Religiosus omnes cogitationes malas cordi suo advenientes, vel mala a se absconfe commissa, per humilem confessionem Abbati non celaverit suo, Necessaria est continua cura, & vigilantia istius erga illum. Quomodo enim Religiosus confidentiam haberet erga Abbatem, si toto anno nunquam illum de statu interno interrogaret? Quomodo confidentiam haberet, si Abbas de profectu, vel defectu suo nullam curam gereret contra expressum mandatum SS. P. N., ut non solum detrimenta gregis sibi commissi, non patiatur; verum etiam in augmentatione boni gaudeat? Quomodo confidentiam haberet, si Abbatem raro & a longe solum videret, cum tamen juxta Regulam communibus exercitiis, quantum officii ratio permittit, teneatur interesse: Mandata Domini capacibus discipulis verbis proponat: simpli-

E 2                      cioribus

cioribus vero factis suis Divina Præcepta demonstret. Omnia vero, quæ Discipulis docuerit esse contraria, in suis factis indicet non agenda: ne aliis prædicans, ipse reprobus inveniatur, ne quando dicat illi Deus peccanti: Quare tu enarras iustitias meas, & assumisti testamentum meum per os tuum? Tu vero odisti disciplinam? Quomodo confidentiam haberet, si Abbas per annum vix semel, aut bis ei loqueretur, cum tamen juxta Regulam teneatur secundum illius qualitatem, & intelligentiam se ei conformare, modo suasionibus, modo increpationibus, modo blandimentis ipsius animam regere? Quomodo confidentiam haberet, si contra Regulam Abbas plus gereret sollicitudinem de rebus transitoriis, & terrenis, atque caducis, & non cogitaret; quia animas suscepit regendas, de quibus & rationem redditurus est? Vel ut ait S. Greg. Si dum eaderet asina, subleverat eam, cum periret anima, non reputaret? Quomodo confidentiam haberet? si Abbas regimen animarum totaliter aliis contra Regulam committeret?

#### PUNCTUM TERTIUM.

**N**E Religiosus omnes cogitationes malas cordi suo advenientes, vel mala a se absconfe commissa per humilem confessionem Abbati celaverit suo, oportet, ut omnem proprium amorem, & propriam existimationem deponat. Sola propria existimatio in causa est, ut confundi, & confundere nos erubescamus. At non me-

melius est modo confundi coram uno homine, quam in futuro coram omnibus. Solus amor proprius in causa est, ne confidentiam ad Superiorem habeamus. Timemus, ne ad illud aut istud officium, quod ambimus, vel habemus; assumamur, vel ab eo deponamur. Sed nonne si revera Deum, & animarum nostrarum salutem quæreremus, vel ideo confidentia erga Superiorem nobis habenda esset? Quid proderit nobis, si vel honorem, vel commodum corporis, quæ ex officio speramus, adepti fuerimus, & interim animæ detrimentum patiamur? Sequamur ergo voluntatem Dei, ordinationem Dei, vocationem Dei. Non aliter nos ad cœlum manuducet Deus, nisi per Abbatem. Ita omnes antiqui Patres, & cum ipsis SS. Pater Noster nobis asseverant.

#### PUNCTUM QUARTUM.


**A**N ergo, o Religiose! confidentiam habes erga Abbatem, quia Dei voluntas est? Vade ad Ananiam. An confidentiam habes erga Abbatem, quia ipse redditurus est rationem pro anima tua? Ipse pervigilat pro te, quasi redditurus rationem pro anima tua. An confidentiam habes erga Abbatem suppressa æstimatione propria, & amore proprio? Dixi: confitebor adversum me injustitiam meam Domino. Dole, quod hucusque nullam confidentiam erga naturalem Superiorem tuum habueris. Propone



1. Confidentiam habere; quia ita voluntas Dei est:

2. Quia Superior debet ita regere animam tuam, ut possit rationem reddere.

3. Quia melius est confundi, & juvari ab uno homine, quam coram toto mundo erubescere, & ab eo damnari.



## DIES XX.

Quibus mediis castus amor fraternitatis  
obteneatur.

Charitatem fraternitatis casto impendant amore. Cap. 72. v. 8.

### PUNCTUM PRIMUM.

**S**ignum Religiosi vere Benedictini est, si juxta præceptum SS. P. *Charitatem fraternitatis casto impendat amore*. In hoc cognoscent omnes, quia Discipulis SS. Patris est; si habuerit dilectionem ad Fratres. Porro ad hanc dilectionem ideo adstringimur, quia status Religiosus teste S. Basilio præcipue consistit in voto indivisibilis concordia. Hinc noster amor & concordia multo major esse debet, quam naturalis membrorum compago. Ad hanc vero perveniendi medium primum est bonum exemplum. Nam Religiosi conversatio in omnibus ita irreprehensibilis esse debet, & sancta, ut Confrater inde ad observantiam Regulæ proficiat.

ficiat. Ut se exemplo illius in suis angustiis consoletur. Ut ab exemplo illius omnes difficultates disciplinæ regularis superet. Ut lapsus exemplo illius erigatur. Ut erectus exemplo illius ferventius progrediatur. Ex hoc enim exemplo mox sequitur perfecta charitas fraternitatis. Erunt ita unum inter se, ut habeant cor unum, & animam unam. Idem semper agent negotium. Eidem Domino servient, & eodem modo. Eadem militia hostes suos superabunt. O quam meritorium est, sic Fratres habitare in unum!

#### PUNCTUM SECUNDUM.

**A**D *charitatem fraternitatis casto amore impendendam* alterum medium est, ut eandem opère, & servitiis comprobemus. Nam sicut exemplo, ceu quodam glutino animos nostros conglutinamus; ita servitiis hoc glutinum inseparabile conservamus. Nulla ergo nos occasio prætereat, qua servitia charitatis Fratribus exhibere omittamus. Qui communia officia Monasterii obeunt, tanta promptitudine, & benevolentia eadem peragant, ut & in responsis, & in servitiis meram charitatem spirent. Qui vero nulli officio deputati sunt, certatim honore, obedientia, atque obsequio se prævenire studeant, in tantum, ut quilibet sibi viliores, & graviores laborem eligat, & innocens pro alterius culpa libenter poenam subeat. O quam jucundum est, sic Fratres habitare in unum!

## PUNCTUM TERTIUM.

**A**D' *charitatem fraternitatis impendendam casto amore*, tertium medium est oratio, quam unus pro altero fundit. Nisi enim pro Fratribus nostris oremus, eos certe, nec ut nos ipsos amabimus, Ut vero ferventer pro ipsis intercedamus, necesse est, ut eorum necessitates nostras faciamus. Nec timendum, quod inde nobis de merito nostro quidquam decedat. Quisquis enim pro aliis intercedere nititur, sibi potius ex charitate suffragatur. Et pro semetipso tanto citius exaudiri merebitur, quanto magis devote pro aliis intercesserit. Deus quippe pacis, & concordiae Magister, qui docuit unitatem, sic orare unum omnibus voluit, quomodo ipse in uno omnes portavit. Sic tres Juvenes in fornace uno orant eandem orationem orabant, & ideo propter charitatis unitatem exaudiri meruerunt. Promissum æternæ Veritatis est. Si duo ex vobis consenserint super terram, quidquid petierint, fiet eis à Patre meo, qui in cœlis est. Quid ergo Pater cœlestis illis negabit, qui tam ferventer & perseveranter pro se orant? O quam proficuum est, sic Fratres habitare in unum!

## PUNCTUM QUARTUM.

**A**N ergo, o Religiose, ad charitatem fraternitatis obtinendam omnibus bono exemplo præluces? Væ illi, qui scandalizaverit unum de pusillis istis! An obsequia charitatis præstas? Filioli! non diligamus verbo, sed opere,




*Quibus mediis castus amor fratern. obtin. 73*

opere, & veritate, an oras pro Confratribus? Clamaverunt ad Dominum, cum tribularentur, & de necessitatibus eorum eripuit eos. Dole, quod ista media charitatis hucusque non adhibueris. Propone

1. Ad obtinendam charitatem fraternitatis omnibus bono esse exemplo.

2. Omnibus obsequia fraternæ charitatis impendere.

3. Pro omnibus orare.



## DIES XXI.

Cur votum stabilitatis tam arcte servandum sit.

Suscipiendus in Oratorio promittat de stabilitate sua. Cap. 58. v. 18.

### PUNCTUM PRIMUM.

**S**anctissimus Pater expertus malam vitam Gyrovagorum voto ad stabilitatem suos Monachos adstringit. *Suscipiendus in Oratorio promittat de stabilitate sua. Cur? Ut a sæculi actibus se faciat alienum.* Nihil enim Monacho sic contrarium est, quam conversatio cum sæcularibus. Monachus quippe ex Professione sua mundo, & omnibus actibus ejus mortuus esse debet. Unde S. Antonius in primis suis Discipulis præcipiebat, ut sæcularibus nullo modo commiscerentur, Rationem

E s red.

reddit. Quod est piscis extra aquam; hoc Monachus est extra cellam. Piscis extra aquam moritur. Et Monachus sæcularibus, aut eorum negotiis se immiscens, perdit spiritum vocationis suæ. Quis enim tetigit picem, & non inquinatus est? Neceſſe est eum, qui sæculum istud amat ejus actibus maculari. Quis amavit periculum, & in eo non periit? Neceſſe est eum, qui in mundo cum hominibus delicatis, superbis, atque carnalibus versatur delicatum, superbum, atque carnalem fieri.

#### PUNCTUM SECUNDUM.

*S*Uſcipiendus in Oratorio promittat de stabilitate sua. Cur? Ut se omni hora custodiat a vitiis cogitationum, oculorum, linguæ, manuum, ac pedum. Qui enim semel stabilitatem promissit, omnem cogitationem mundi, omnem aspectum mundi, omnem sermonem de mundo, omne negotium mundi, omnem regressum in mundum abjicere debet. Quot vitiis & tentationibus inquinabitur, & quot sanctas cogitationes perdet, qui de mundo libenter cogitat? Quot affectibus, & inordinatis passionibus torquebitur: qui rursus mundum respexerit? Quot labores necessarios vocationis suæ omittet, qui sæculi negotia tractaverit? Quot retrogressus in conversione morum suorum faciet, qui in mundo vagari præsumperit? Nil enim & cogitationibus, & affectionibus nostris tam proprium, quam cor nostrum rursus occupare, de quo semel ejectæ sunt.

sunt. Facillime in pristina vitia, & peccata labitur, qui pristinas occasiones, & pericula peccandi repetit. Impossibile est, ut Monachus eum, quem in solitudine retinet fervorem, in mundo conservet. Ubi vero vel parum de eo remiserit, sensum ad externa solatia, ab his ad minora, a minoribus ad maiora peccata defluet, donec ex principiis mundi in profundo peccatorum peccatum penitus contemnat.

### PUNCTUM TERTIUM.

*S*uscipiendas in Oratorio promittat de stabilitate sua. Cur ut opera bona vocationis suæ in claustro operetur. *Officina enim, ubi hæc omnia diligenter operemur, sunt claustra Monasterii, & stabilitas in congregatione.* Quis enim orationi, sine qua Monachus non est, intendet in sæculi strepitu? Quis puram atque perfectam in sæculo quod Deum non amat, possidebit charitatem? Quis tot obligationes vocationis in tumultu sæcularium negotiorum implebit, sine quarum tamen observantia non salvabitur. Imo quis vocationi suæ satisfaciet qui modernum strepitum negotiorum, & causarum in Monasteriis ipsis prudenter non declinauerit? O Religiose! o Monache! qui solitudini te semel addixisti, quomodo poteris illam sine votifragio deserere? Quomodo poteris opera vocationis tuæ sine contemptu Professionis tuæ relinquere, negligere, omittere, qui solemne eadem usque ad mortem constanter




ter, & usque ad minimum apicem perfecte explendi votum coram Deo, & Sanctis ejus vovisti? Cogita, *si aliter feceris, a Deo te damnandum, quem irrides: & stabilis eris.*

### PUNCTUM QUARTUM.

**A**N ergo, o Religiose! stabilitatem conservas, ne sæculi actibus inquineris? Fuge mundum; totus in maligno positus est. An stabilitatem servas, ne pristinis vitiis impliceris? Cum mundo perverso, perverteris. An stabilitatem servas, ne opera vocationis negligas? Mane in vocatione tua: non expedit tibi vagari extra claustrum. Dole, quod voto stabilitatis non penitus satisfeceris. Proponere stabilitatem servare,

1. Ad vitandos sæculi actus,
2. Ad vitanda sæculi vitia,
3. Ad explenda opera vocationis tuæ.



## DIES XXII.

### IN FESTO S. Mariæ MAGDALENÆ POENITENTIS.

De continua cordis compunctione.

Mala sua præterita cum lachrymis, vel gemitu quotidie in oratione Deo confiteri. Cap.

4. Instr. 58.

PUN.

PUNCTUM PRIMUM.

**E**Cce; mulier, quæ erat in civitate peccatrix, ut cognovit, quod Iesus accubisset in domo Pharisei, attulit alabastrum unguenti, & stans retro secus pedes ejus, lachrymis cœpit rigare pedes ejus. Tacita loquebatur compunctionem cordis sui. Ita & Religiosus juxta præceptum SS. Patris *mala sua præterita cum lachrymis vel gemitu cordis quotidie in oratione Deo confiteri debet.* Nam sicut prædicatio Evangelii Apostolis, ita Monachis peccata sua plangere proprium est. Et quis non libenter fleret eadem, cum etiam de propitiato peccato non possimus esse securi? Quis non continuo fleret, cum nesciat, qua hora Dominus ad judicium venturus sit? Quis non perseveranter fleret, cum certo sciat, se pœnam maximam vel in purgatorio, vel in inferno promeruisse, & tamen nesciat, an illam Dominus jam condonaverit? Quis non jugiter fleret per totam vitam, cum brevi luctu æternum luctum posset evadere? Quis non semper fleret, cum inde æternum consolandus sit? Ergo cum S. M. Magdalena continuo juxta statum tuum, qui alius non est quam poenitentiae, peccata tua flere satage.

PUNCTUM SECUNDUM.

**S**Tabant autem juxta crucem Jesu Mater ejus, Maria Cleophæ, & Maria Magdalene. Quis sensus compunctionis fuerit S. M. Magdalene, dum

dum se non parvam causam mortis dilecti sui Redemptoris, ac Dei esse cogitavit. An non commoriebatur cum Christo? Hoc & status tuus requirit a te. Nam Monachus mundo, & universis ejus desideriis debet esse crucifixus Hoc & SS. Pater a te requirit, dum dictis mox subjungit: *& de cætero se emendare.* Emendatione enim malarum affectionum Christo configimur in cruce. Et quis non eas libenter cum S. M. Magdalena emendaret, quando cogitat, illas mortem Salvatoris sui causasse? Quis non tota vita sua libens in emendatione malorum præteritorum laboraret, ne rursus Christum in semetipso crucifigeret? Hæc ergo cogitatio sit continua materia compunctionis tuæ. Ipsa vero compunctio configat omnes affectus tuos cruci Christi.

### PUNCTUM TERTIUM.

**B**Eata Maria Magdalena non contenta, quod semel in domo Pharisei peccata sua fleverit, quod mundo, & omnibus ejus desideriis sub cruce mortua fuerit, in horridam speluncam se abdidit, austerrimam pœnitentiam egit. Et quo ex motivo? haud alio sane, quam Christi sui crucifixi. Voluit Jesus omnia per vitam, & mortem suam pati, ut Divinæ Justitiæ satisfaceret. Idem tibi injungit SS. P. ut *satisfacias reus ex hoc*, quod deliquisti. Aspice ergo Jesum tuum pro te pœnitentem cum M. Magdalena,



lena, & sequere, En! corpus laboribus, solitudine, jejuniis, vigiliis, fame, siti, doloribus, morte mortificat. En! animum conturbat, & contristat excidio Jerusalem, & cujusvis animæ fidelis, agonia, & derelictione in cruce. En! animam omni injuriarum generi exponit, ut ferme semper sit positus in signum cui contradicatur. Et qua patientia, humilitate, & obedientia? Tu cogita, ut in perpetua animæ & corporis humiliatione, & compunctione vivas. Primam assequeris per humilitatem, patientiam, amorem injuriarum, recordationem mortis, judicii inferni. Alteram obtinebis silentio, solitudine, vili victu, & amictu, labore, vigiliis, pœnitentiis regularibus, correctionibus, doloribus corporis. Et cur non libenter, & continuo amore Justitiæ Divinæ hæc omnia, & multo plura perferres, quando JEsus tuus per totam vitam, & mortem tantam satisfactionem præstat? Cur non per vitam, & mortem Divinæ Justitiæ satisfacere studeres, cum B. M. Magdalena certa de remissione peccatorum in austerrima pœnitentia vivit, & moritur?

#### PUNCTUM QUARTUM.

**A**N ergo, o Religiose! juxta statum tuum hucusque continuis pœnitentiæ gemitibus peccata tua flevisi? Si modo non luges, lugebis in æternum. An juxta statum tuum per cordis

dis compunctionem jūgiter mala præterita emendasti? Nulla est pœnitentia, si plangis, & plangenda rursus committis. An juxta statum tuum compunctione interna & externa per vitam & mortem satisfacere studuisti? Deus justus justitias diligit. Dole, quod hucusque per spiritum compunctionis continuæ statui tuo non satisfeceris. Propone continuum fovere compunctionis spiritum

1. Per gemitus,
2. Per emendationem,
3. Per satisfactionem.



## *DIES XXIII.*

### De Pœnitentiis Regularibus.

Secundum modum culpæ, excommunicatio-  
nis, vel disciplinæ mensura debet extendi.

Cap. 24. v. 1.

### PUNCTUM PRIMUM.

**S**anctissimus P. N. mirus semper disciplinæ regularis amator extitit, ut tam ex Regula, quam ex vita ipsius constat. Plurima capitula de pœnitentiis regularibus præscripsit. Nullum ipsemet errorem sine correctione, & pœnitentia abire passus est. Fundavit enim SS. Ordinem suum super petram humilitatis. Impossibile autem est humilitatem implantare sine humiliatione. Humiliatio via est ad humili-  
tatem,

tatem, sicut patientia ad pacem, sicut lectio ad scientiam. Si ergo virtutem apperis humilitatis; viam non refugias humiliationis. Nam si non poteris humiliari; non poteris ad humilitatem provehi. Exercitio enim virtus acquiritur. Gaude igitur, o Religiose! dum juxta Regulam *secundum modum culpæ, excommunicationis, vel disciplina mensuram extendit* Superior, humiliter eam accipe. Hac, & non alia via veram acquires humilitatem.

## PUNCTUM SECUNDUM.

Vult SS. P. N., ut *secundum modum culpæ, excommunicationis, vel disciplina mensura debeat extendi*; quatenus sui Discipuli jugiter ut aurum probentur in camino patientiæ. Enim vero si Monasteria sunt paradisus charitatis, uti esse debent; paupum aut nihil patiendum occurreret Religiosis, nisi per pœnitentias regulares excercerentur. Quot non falsa humilitate, & patientia deciperentur? Putarent se humiles, putarent se patientes esse; sed tangeres montes, & fumigarent. Vix verbum correctionis objiceres, mox aut in murmura, aut in apertam contradictionem erumperent. Tumore, & impatientia pleni forent. Dum enim pace, & charitate fruebantur, ex occasione, & non ex propria virtute humiles fuerunt, ac patientes. Gaude igitur, o Religiose! dum tibi aliqua regularis pœnitentia injungitur. Exercitium habes patientiæ. Sine hac enim nunquam conglorificaberis Salvatori tuo.

Spir. S. Ben. P. III.

F

PUN-



## PUNCTUM TERTIUM.

**S**ANCTISSIMUS Pater demum præcipit, ut *secundum modum culpæ, excommunicationis, vel disciplinæ mensura extendatur*; quatenus sui Religiosi in duris, & contrariis rebus obedientiam præstare discant. Qui enim non continuo per adversa in obedientia exercetur, ad proprium, & non alienum placidum obedi-  
et. An non ipsemet Salvator per passionem factus est obediens usque ad mortem? Adversitas sola obedientiam a proprio judicio, & a propria voluntate purgat. Deo, & non homini obedire facit. Hinc vix unquam puram, atque perfectam obedientiam invenies, nisi in adversis Superiorum mandatis. Non vult SS. Pater aliquem recipere in numerum Filiorum suorum, nisi per patientiam in obedientia diutissime probatus fuerit. Bene prævidit contumaciam, superbiam, & animositatem eorum, qui duntaxat in gratis obedire consueverunt. Ad quamcunque graviorem obedientiam resistunt. Imo nonnunquam jugum obedientiæ penitus excutiunt. Gaude igitur, o Religiose! dum regulares pœnitentias accipis. Occasionem habes exercendi obedientiam. Etenim absque ista nunquam eris Filius SS. Patris.

## PUNCTUM QUARTUM.

**A**N ergo, o Religiose! ad exercendam humilitatem libenter pœnitentias regulares accipis? Humiliatio Mater est humilitatis. An ad exercendam patientiam libenter pœnitentias

tentias regulares suscipis? Confusio patientiam probat. An ad exercendam obedientiam libenter pœnitentias regulares sustines? Adversitas purgat, & perficit obedientiam. Dole, quod hucusque pœnitentias regulares tantum abhorrueris. Propone cum gaudio illas acceptare ad exercitium

1. Humilitatis,
2. Patientiæ, &
3. Obedientiæ.



## DIES XXIV.

### De Vigiliis.

Nocte surgamus ad confitendum Creatori nostro super judicia justitiæ suæ. Cap. 16. v. 7. & 8.

### PUNCTUM PRIMUM.

**S**Antiquissimo Patri Nostro & nihil antiquius, & suavius nihil erat, quam nocturnis instare vigiliis. Hinc promeritus est Creatorem ipsum facie ad faciem videre. Unde & nobis præcipit: *Nocte surgamus ad confitendum Creatori nostro super judicia justitiæ suæ.* Vigilandum igitur est ad confitendum Creatori Nostro. Nox etenim quieta opportunam se præbet orantibus. Animus carnalibus aspectibus expeditus est. Collectus sensus totum hominem divinis aspectibus sistit. Nullæ aliarum oc-

cupationum curæ, ac sollicitudines illum distrahant. At non proderunt vigiliæ devotioni, nisi mens etiam occasione utatur, & ad fervorem semetipsam excitet. Quomodo vero Religiosus ad vigilias non ferveat, qui vi Professionis suæ tam stricte, & ante omnia alia Ordinis exercitia ad decantandas *laudes Creatori super judicia justitiæ suæ* obligatur? Monachi summum negotium est, Deo puram orationem offerre.

#### PUNCTUM SECUNDUM.

**N**oste surgamus. Vigilandum enim est ad mortificationem corporis. Vigiliæ fervorem concupiscentiæ domant. Nocturna phantasmata, & illusiones prohibent. Cogitationes perversas tollunt. Affectiones naturales suprimunt. Castimoniam corporis perfectam pariunt, atque conservant. Sane SS. Patres non nisi cum timore, & tremore somnum capiebant; ne ab inimico tale quid pati deberent, unde per totam inde diem humiliati, & contristati ingrederentur. Ita sanctus Pachomius, cum graviter ab Angelo Sathanæ colaphizaretur, instanter a Deo gratiam vigiliarum postulavit. His armis munitus, semper se excitabat: persequar inimicos meos, & non convertar, donec deficient. Quomodo ergo Religiosus vigilias non amet, qui incessanter a corpore suo impugnatur? Non vincet hunc hostem, nisi vigilaverit.

PUN-




## PUNCTUM TERTIUM.

**N**octe surgamus. Vigilandum enim est poenitentibus. In vigiliis cogitatio Divini Iudicii amplius cor penetrat. Tenebrae nocturnae vivacius tenebras exteriores praesentant. Peccata praeterita & numerosius, & gravius animo obversantur. Lachrymae, & gemitus uberius obtinentur. Magna satisfactio per mortificationem somni Deo praestatur. Placatur Divina Iustitia, quae innumeris peccatis per noctem a mortalibus irritatur. Hinc S. Arsenius Monacho plus temporis ad somnum, quam horae spatium non indulgebat. Monachi quippe est sua, & aliena peccata plangere. Et quo tempore magis planget: quam eo, quo copiosius perpetrantur? Quomodo ergo o Religiose! in lecto stertas, dum Deus tuus tam immaniter offenditur? Monachi est pro se, & toto mundo Divinam mitigare Iustitiam.

## PUNCTUM QUARTUM.

**A**n ergo, o Religiose! media nocte surges ad confitendum Domino? Tunc erunt acceptabiles nostrae vigiliae, si sincera devotione ministerium nostrum divinis obtutibus offeratur. An nocte surges ad mortificationem corporis? Somnus mentem, corpusque inquinat. An nocte surges ad compunctionem cordis? Vigiliae compunctionem augent. Dole, quod hucusque S. Vigiliis ita abhorrueris. Propone ergo libenter vigilare.

1. Ad confitendum Domino,
2. Ad mortificandum corpus,
3. Ad compungendum animum.



## DIES XXV.

## IN FESTO S. JACOBI APOSTOLI.

De Patientia in persecutionibus pro  
justitia.

Persecutiones pro justitia sustinere. Cap. 4.  
Instr. 33.

## PUNCTUM PRIMUM.

**S**anctus Jacobus Major a Christo ad Apostolatam vocatus, omnia, bona, cunctaque mundi desideria reliquit. Amore ferventissimo in Magistrum ferebatur: unde præcæteris Divinorum Mysteriorum particeps fieri meruit. Summo autem zelo Evangelium in Judæa, & Samaria prædicavit. Hinc immensas illorum populorum persecutiones libenter pro justitia passus est, ad hanc quoque patientiam nos hortatur SS. P. N; dum ait: *Persecutiones pro justitia sustinere*. Nullus enim est qui pie velit vivere, qui persecutionem pati non debeat. Etiam Religiosi in claustris ab his exempti non sunt. Qui namque presse vestigiis SS. Patris insistere, & Regulam ipsius ad litteram observare voluerit, multa oportebit, eum pro Nomine Jesu pati. Inimici erunt dome-

domestici ejus. Alii eum ceu scrupulosum ridebunt. Alii singularitatis illum accusabunt. Rursus alii superbiae, ambitionis, aut cupiditatis placendi hominibus condemnabunt. Passim contemnetur, aut etiam injuriis, & contumeliis usque ad mortem lassescetur. Sed, o quam bonum est, sustinere persecutionem pro justitia! proxima, imo, eadem cum SS. Martyribus debetur ei corona. O Beatos, iterumque beatos illos Religiosos, qui persecutionem patiuntur propter justitiam; quoniam ipsorum est regnum coelorum. Libenter igitur cum S. Jacobo patere pro justitia persecutiones, ut gloriae Martyrum particeps fias.

#### PUNCTUM SECUNDUM.

**S**ANCTUS Jacobus Apostolus ab infidelibus in promulgatione Evangelii innumeras persecutiones cum gaudio passus est. Ad hoc nos SS. P. N. monet, dum asserit: *Persecutiones pro justitia sustinere.* Nunquid & ipse Salvator proposito gaudio sustinuit persecutiones? Sane si nullum esset praemium, solum exemplum idoneum foret ad persuadendum nobis, ut cum gaudio persecutiones pro justitia tolleremus. Si namque proximorum passionibus erigunt nos, quantam nobis alacritatem effecerint ipsius Domini persecutiones? Dum enim compatimur, conglorificabimur. Filii Dei erimus. Nullis affectuum passionibus succumbemus. Ipsi persecutoribus cum Filio Dei, atque coelesti ejus Patre mansuetudinem



exhibebimus. Modestia ista omni diademate se possidenti erit utilior. Quid enim beatius, quam intestino liberari bello? Nam quamvis plurima pace externa fruamur; intra nos vero turbulentia sit; nihil externa quies nobis proderit. Omne autem bonum, omnem gloriam possidebit, qui pacem habuerit internam. Veram ergo pacem internam acquires, si cum S. Apostolo didiceris, eum gaudio externas pro justitia persecutiones sustinere. Semper geres bellum internum cum cogitationibus tuis; quando persecutiones pro justitia pati recusaveris.

### PUNCTUM TERTIUM.

SANCTUS Apostolus Jacobus tam constanter persecutiones pro justitia passus est, ut prius mori quam persecutoribus cedere voluerit. Ad hanc constantiam etiam SS. Pater nos excitat. Dum dicit: *Persecutiones pro justitia sustinere*. Quomodo enim persecutoribus justitiæ cedat, qui Dei justitiam metuit? Quomodo persecutoribus justitiæ cedat, qui crimen gloriæ suæ inferre timet? Quomodo persecutores justitiæ formidet, qui novit imbecillitatem eorum? Hodie sunt, cras non comparebunt. Non plus persequi possunt, quam Deus permiserit. Et quid commodi asferre possunt, si persequi desistant? Favorem infamis, & imbellis hominis habebis, sed favorem omnipotentis amittes. Pacem habebis cum eo, qui odit pacem. Pacem amittes cum

eo,

eo, qui solus pacem, omnem sensum exuperantem, dat. Persecutionem illius, qui corpus solum potest occidere, evasisti. Persecutionem ejus, qui corpus & animam perdit in gehennam ignis, incurristi. Elige, cui servire velis. Si sapias, cum glorioso Apostolo Jacobo usque ad sanguinis effusionem pro iustitia constanter pati decernes.

PUNCTUM QUARTUM.

**A**N ergo, o Religiose! libenter persecutionem pro iustitia sustines? Minus pie vivis, si minus persecutionem pateris. An cum gaudio persecutionem pro iustitia sustines? Abominantur impii eos, qui in recta sunt via. An constanter usque ad mortem persecutionem pro iustitia sustines? Ambulans recto itinere, & timens Deum despicitur ab eo, qui infamigraditur via. Dole, quod hucusque persecutionem pro iustitia sustinere timueris. Propone

1. Libenter,
2. Gaudenter,
3. Constanter persecutionem pro iustitia pati.

---

**DIES XXVI. IN FESTO S. ANNÆ.**

De modis bene orandi.

Orationi frequenter incumbere. Cap. 4.  
Instr. 57.

## PUNCTUM PRIMUM.

**I** Neffabili favore Divina providentia S. Annam prævenit. Conjugem ei dedit sanctum, & Filiam Matrem Dei futuram. Quæris, unde has gratias promeruerit? Orabat frequenter & ferventer in horto suo. Oratio frequens Divinam misericordiam, & gratiam semper impetrat. Oratio frequens Divinum auxilium, quo ad perfectionem status nostri pervenire valeamus, jugiter consequitur. Etenim si quis gratiam vocationis vel non obtinet, vel perdit, ex eo non obtinet, aut perdit, quia arma orationis fortissima ad expugnandam Dei misericordiam projecit. Unde magnus Antonius suo Discipulo præcipit: ante omnia sine intermissione ora. Cassianus vult, ut Monachus totam suam perfectionem in eo ponat, quod sine intermissione oret, & internam quietem, & puritatem cordis conservet. SS. P. N. statuit, *orationi frequenter incumbere*. At quomodo? Non labiis, sed corde. Non speculatione, sed affectu. Nil prodest meditatio veritatum, si absit amor, & executio veritatum. Bene oravit, qui dixit: Concaluit cor meum intra me, & in meditatione mea exardescet ignis. Ut eum sequi possis, distractionem, & teporem evita. Voluntaria namque distractio ex insensibilitate cordis provenit, cujus intellectus obcæcatus, & voluntas obdurata est. Etenim si ingentia inde provenientia damna, multipliciter scilicet malarum cogitationum, & curarum, te-



porem omnium exercitiorum, amissionem gratiæ sensibilis, fervoris, ac devotionis consideraret, cum SS. Moyle, Macario, Climaco etiam involuntarias distractiones summopere desleret, & detestaretur. O si hic modus orandi in omnibus Monasteriis ad nostra usque tempora illæsus pertransisset, in primo fervore & flore totus Ordo adhuc staret, & floret!

### PUNCTUM SECUNDUM.

**A**ngelicam virtutem SS. Anna possidere debuit, ut Reginam Angelorum digne educare potuerit. Ejus fides, spes, charitas tam insignes fuerunt, ut omnes Antiquæ Legis foeminas longe post se reliquerit. Unde vero tantam Sanctimoniam adepta est? Illud Eccl. 18. v. 12. jugiter observabat. Non impediaris orare semper. Qui enim se ante orationem non preparat, est quasi homo, qui tentat Deum. Hinc Sancti semper ante orationem se recolligebant. S. Basilius se super omnia visibilia, & invisibilia elevabat, atque ante conspectum magni Dei sistebat, ne propria conscientia condemnaretur. S. Climacus coram Deo magno cum timore apparuit, ne ejus supplices preces rejicerentur. SS. P. N. se sistebat ante conspectum Dei, & SS. Angelorum. Sicut autem, qui tentat Deum, nil impetrat: Ita nihil impetrat, qui se ex oratione non emendat. Nihil impetrat, qui non prius remittit Fratri suo ex corde suo. Nihil impetrat, qui non Fratrem offensum prius sibi recon-

reconciliat. Ut *frequenter ergo orationi incumbas* cum fructu Sanctimoniae esto sine peccato saltem gravi. Vocationi tuae satisfacere stude. Omnia terrena, vel alia negotia relinque ante orationem. Deo soli te uni per fidem, spem, & charitatem.

### PUNCTUM TERTIUM.


**M**ensura gloriae correspondet mensurae gratiae. Ex hoc collige, quantam gloriam S. Anna in coelis adeptae fuerit. Una praeter omnibus Sanctis praerogativa pollet; quia Mater Mariae est. Per Filiam a Filio Dei omnia nobis impetrare potest. Unde hanc gratiam obtinuit? Semper in terris pure orare consuevit. Oratio enim si pura, & casta fuerit, coelos penetraat & vacua non redibit. Velut fidelis nuncius mandatum peragit, & penetraat, quo caro non pervenit. Nam oratio est dulcis, & amica confabulatio cum Deo. Ex hoc concludere, quam pura, sine affectione terrena debeat esse oratio. Hinc Aegyptiaci Monachi, ut Cassianus testis est, saepissime, sed & brevissime orabant, ne quidquam contra puritatem orationis Daemon suggerere posset. Eadem mens est SS. Patris, dum jubet nos *frequenter orationi incumbere*. O sancta Anna! impetra & mihi a Filia tua gratiam bene orandi, quatenus gloriae tuae confors fieri merear. Amen.

PUN-

PUNCTUM QUARTUM.

**A**N ergo, o Religiose! frequenter orationi incubuisti plus corde, quam ore orando? Sine intermissione orat, qui crebro & fervide cor ad Deum levat. An frequenter orationi ut incumberes, impedimenta orationis removisti? Non est speciosa laus in ore peccatoris. An ut frequenter orationi cum fructu incumberes, in puritate cordis orasti? Antequam sic invocaveris eum, dicet tibi: adsum. Dole, quod ad exemplum S. Annæ hucusque non rite oraveris. Propone orationi frequenter incumbere

1. Corde, plus, quam ore,
2. Remotis semper impedimentis, atque
3. Maxima cum puritate animæ.



*DIES XXVII.*

De Necessitate, utilitate, & merito  
laboris.

Occupari debent Fratres in labore. Cap. 48.

v. 2.

PUNCTUM PRIMUM.

**N**ihil antiquius fuit SS. Patribus, quam laborare. Christus ipsemet. SS. Apostoli, Monachi omnes nobis exemplo sunt. Hinc & SS. Pater ait: *Occupari debent Fratres in labore.* Necessarius enim labor est ad animæ salutem. *Otiositas namque inimica est*



*est anima.* Ubi semel animam Monachi occupavit, totum otiosum, & acediosum reddit. Deo, & sibi inutilis in cella sedet, aut vario ex prætextu hinc inde discurret. *Alios extollit*, seu impedit. Semper in desideriis est. Perdit debitam observantiam, & reverentiam S. Regulæ. Amittit lumen oculorum, S. Inspirationes. Consolationem S. Spiritus non sentit. Hinc passionibus & pravi motus animi suscitantur. Tentationes crescunt, ut ex tædio, & subtractione gratiæ de uno ad aliud vitium miserrime ruat. Constans proinde Ægyptiorum Patrum assertio fuit: si Monachus laborat ab uno; si otiosus est, ab innumeris dæmonibus impugnatur. Semper igitur aliquid operis facito, ut Diabolus te semper inveniat occupatum. Ad hoc ipsa te quoque SS. Professio astringit, quatenus cum Apostolo dicere possis, in laboribus, in jejuniis, in vigiliis &c. *Tunc enim veri sunt Monachi, si labore manuum vivant.*

#### PUNCTUM SECUNDUM.

**O**ccupari debent Fratres in labore. Utilis est labor ad spirituales profectum. Nam qui semper legere, orare, aut psallere veller, statim desidiosus fieret. Varietas exercitiorum devotionem generat, miro modo auget, & semper conservat. Hinc studiose cuivis cavendum, ne exteriora exercitia omittat. Internæ namque, ac præstantissimæ virtutes vix, aut difficulter sine externis pœnitentiæ operibus

bus obtinentur. Unde Apostolus docet: Non prius quod spirituale, sed quod animale. Sicut nec Jacob speciosam Rachel, figuram contemplationis, adeptus est, donec prius se cum Lia, per quam externa exercitia intelliguntur, copulaverit. Unde Patres Ægyptii fervorem devotionis de studio laboris metiebantur. Neminem suscipiebant ad sua Monasteria, nisi qui laborare vellet. Experientia didicerant, nullum Professioni suæ satisfactorum; qui non laboraret. *Tunc enim veri sunt Monachi, si labore manuum vivant.*

### PUNCTUM TERTIUM.

**O**ccupari debent Fratres in labore. Laborare siquidem valde meritorium est. Per laborem cor compungitur. Cur enim laboramus, nisi in satisfactionem peccatorum nostrorum? Per laborem mens nostra humiliatur? Cur enim laboramus, nisi quia nos indignos ac ineptos ad jugem contemplationem agnoscimus? Per laborem corpus nostrum in servitutem redigitur. Cur enim laboramus, nisi ut salubri fatigatione irritamenta carnis, desideria mala, fastum, & delicias vitæ præsentis frangamus? Per laborem S. Paupertas exercetur. Cur enim laboramus, nisi ut contemptis sponte oblatis eleemosynis, more pauperum propriis manibus nobis victum procuramus? Per laborem charitas proximis exhibetur. Cur enim laboramus, nisi ut cum Apostolo sic laborantes suscipiamus infirmos? Per labo-

laborem S. Obedientia impletur. Cur enim laboramus, nisi ut Præceptum Domini, & SS. Patris Nostri adimpleamus? Ecce! quam meritorius labor sit? S. Augustinus ait: Unicuique suspirium illius, qui Divinum laborandi præceptum implet, citius exauditur, quam decem millia orationum ejus, qui illud contemnit. Et quid impedit servum Dei manibus operantem, vel etiam studentem, saltem subinde per elevationem mentis in lege Domini meditari, & psallere Nomini Domini Altissimi? *Tunc enim veri sunt Monachi, si labore manuum vivant.*

#### PUNCTUM QUARTUM.

**A**N ergo, o Religiose! laboras ad vitandum otium? Semper aliquid faciendum est operis non tam propter victum, quam propter animæ salutem. An laboras ad proficiendum? Nullus proficiet, nisi ad laborem ferveat. An laboras ad augendum meritum? Quo labor erit humilior, & major; eo meritum, & merces erit uberior. Dole, quod ad laborem non majori diligentia incubueris. Proponere laborare

1. Ad vitandum otium,
2. Ad proficiendum in S. Regula, & ejus exercitiis,
3. Ad augendum meritum, & coronam in cœlis.

**DIES**





## DIES XXVIII.

Quomodo Præceptum Divini Amoris  
impleatur.

Imprimis Dominum Deum diligere ex toto  
corde, tota anima, tota virtute. Cap. 4.  
Instr. 1.

### PUNCTUM PRIMUM.

**P**ROponit nobis SS. Pater statim ab initio  
omnium Instrumentorum bonorum ope-  
rum mandatum maximum, & primum,  
*inprimis Dominum Deum diligere ex toto cor-  
de, tota anima, tota virtute*, ut ostenderet,  
omnia in verbo, & in opere, omnia ex amore  
Dei facienda esse. Tunc enim *ex toto corde di-  
ligimus Deum*, cum omnes ejus motus, affe-  
ctus, & desideria Deo soli consecramus, &  
per ea nos ei unimus. Tunc *ex tota anima di-  
ligimus Deum*, cum ejus præsentia jugiter re-  
cordamur, & perfectiones ipsius meditamur.  
Tunc *ex tota anima diligimus Deum*, cum om-  
nes ipsius, ac etiam corporis vires ad ipsius  
beneplacitum & servitium impendimus. Ubi  
namque thesaurus noster est, ibi & cor no-  
strum erit. Si Deus revera thesaurus noster  
erit, cordis nostri amor, & cogitatio jugiter  
apud ipsum erunt. Et cur non thesaurus no-  
ster sit? Tota Beatitudo nostra est, hinc & fi-  
nis omnium desideriorum nostrorum esse de-

*Spir. S. Ben. P. III.*

G

bet

bet. Unde Deum, ceu centrum omnium affectuum & cogitationum eligere debemus. Et si eum amissimus negligentes, ad eum tendamus reeligentes, ut perveniendo requiescamus. Ideo Beati; quia illo fine perfecti. O bone Deus! sic nec primum præceptum tuum adimplere studui.

### PUNCTUM SECUNDUM.

**D***ominum Deum ex toto corde, ex tota anima, & tota virtute diligimus, si mandata ejus, & S. Regulam non tantum externe observamus, sed ex interno motu Divini amoris, qui vita bonorum operum est, adimplemus. Nullus Professioni suæ, nec Regulæ, nec statutis satisfaciet, etsi exacte omnia servet, nisi ex implicito saltem motivo Divinæ charitatis observet. Nullus suis jejuniis, vigiliis, oratione, psalmodia, labore, mortificatione Deo placebit, nisi comitante amore omnia ista peragat. Amor semper in corde Religiosi utpote Filii ardere debet, & affectum suum opere probare. Et cur non omnia ex amore agas? Breve præceptum tibi præcipitur. Dilige, & fac, quod vis. Sive taceas, dilectione taceas. Sive clames, dilectione clames. Sive emendes, dilectione emendes. Sive parcas, dilectione parcas. Radix sit intus dilectionis. Non potest de illa radice, nisi bonum existere. Bone Deus! summum & unum bonum meum! quot non perdidi opera, & actus virtutum; quia te amare non studui?*

PUN-

PUNCTUM TERTIUM.

**D**ominum Deum, ex toto corde, ex tota anima, ex tota virtute diligimus, si omnem alienum amorem corde, & anima excludimus, atque tota virtute Deum juxta obligationem status nostri illum colimus, & amamus. Cor amore creaturarum occupatum Deum plene amare non potest. Omnis ejus affectus rapiatur ad id, quod amat. Anima mundanis cogitationibus, & affectionibus delusa, Deum plene amare non potest. Omnis ejus cogitatio, & affectio in terra, quam amat, & cogitat, semper versatur. Cor, & anima, quæ se aliis, quam vocationis suæ negotio applicant, non totis viribus amare possunt. Semper ad diversa dispergitur conatus eorum. Ad amorem perfectum oportet, ut omnia visibilia & cogitatione, & affectione relinquamus. Oportet, ut nihil amplius sciamus de hoc mundo, & iis, quæ in mundo geruntur; Oportet, ut nulla affectione rei terrenæ occupemur; quia hoc amoris *plurima destructio est*. Oportet, ut exercitio S. Regulæ ex amore jugiter omnes vires nostras impendamus; quia hoc unum est necessarium. Verbo, si quid aliud diligendum occurrit in animam, ad Deum, quo totus impetus recurrit, rapiatur. O bone Deus! non miror tepiditatem amoris mei. Cor meum plenum est terrenis affectionibus.



## PUNCTUM QUARTUM.

**A**N ergo, o Religiose! Deum ex toto corde, tota anima, & ex omnibus viribus amasti? Hoc mandatum primum, & maximum est. An Regulam, & statuta, cæteraque opera virtutum ex motivo Divini amoris observasti? Major horum est charitas. An ob charitatis Divinæ acquisitionem omnibus creaturis renunciasti? Nemo potest duobus Dominis servire. Dole, quod hætenus præceptum charitatis non studueris adimplere. Propone

1. Deum ex toto corde, ex tota anima, & ex totis viribus diligere.

2. Regulam, statuta, cæteraque opera virtutum ex puro Divini amoris motivo observare.

3. Ob Divinæ charitatis obtentum omnibus creaturis nuncium mittere.



## DIES XXIX.

De Exercitio S. Paupertatis.

Nec quidquam liceat habere, quod Abbas non dederit, aut permiserit. Cap. 33. v. 6.

## PUNCTUM PRIMUM.

**S**I teste S. Bernardo non paupertas sola, sed amor paupertatis vere pauperem facit. Et sicut dives de obtentis divitiis gaudet, ita verus paupertatis amator de omni occasione, qua pauperior fiat gaudet: Ideo merito quivis Religiosus exacte studebit hoc, quod

SS.

SS. Pater monet opere implere: *Nec quidquam liceat habere, quod Abbas non dederit, aut permiserit.* Primo igitur in suppellectili nihil vanum, pretiosum, aut superfluum habebit. Religiosus namque se ad solum usum necessitatis per votum S. Paupertatis astringit. Quidquid ultra necessitatem quærit, aut appetit, vanitati, & superfluitati adjudicandum est. Quare enim Religiosus rebus temporalibus renunciat? Certe non ex odio rerum temporalium, quæ in se bonæ sunt; sed odio concupiscentiæ sine qua non possidentur. Hinc certum est, quod nihil tale aut concupiscere, aut retinere valeat, quod affectionem, aut concupiscentiam in ipso excitare possit. Scrutare ergo, o Religiose! cellam tuam. Quidquid cum affectu possides, ejice. Quidquid necessarium non habes, ejice. Quidquid vile non est, sed pretiosum, ejice. Quidquid cum permissione Superioris non habes, ejice. Secus pauper non es. Voto non satisfacis.

## PUNCTUM SECUNDUM.

**N***Ec quidquam liceat habere, quod Abbas non dederit, aut permiserit.* Secundo igitur Religiosus nihil vanum, pretiosum, aut superfluum habebit in vestitu. Enimvero si vestimenta molliora, aut pretiosiora, vel ad vanitatem composita gestet, aut appetat, nonne cor gerit sæculare, ac vanum? Nonne opere affectum ad temporalia omnibus probat? Nonne sacræ Professioni renunciat? Ordo

enim noster abjectio est. Ordo noster humilitas est. Ordo noster voluntaria paupertas est. Disquire ergo o Religiose! vestitum tuum. Si plura cæteris vestimenta habes, abjice. Si pretiosiora vestimenta habes, abjice. Si ad vanitatem composita vestimenta habes, abjice. Si ad arcendum frigus, aut æstuum commodiora vestimenta habes, abjice. Si aliquid in vestitū habes, quod Abbas non dederit, aut permiserit, abjice. Si contra, aut supra communem Monasterii tui usum quidquam habes, abjice. Nec nimiam infirmitatem, tenellam, & delicatam complexionem, conversationem cum viris potentibus præendas. Status tuus, status poenitentiae est. Status mortificationis est. Non scandalizabis sæculares paupertate. Sciunt, te illi adstrictum esse. Scandalizabis autem plurimum, si contrarium egeris. Quem enim alium te judicabunt, quam transgressorem voti sollemnis?

### PUNCTUM TERTIUM.

**N***Ec quidquam liceat habere, quod Abbas non dederit, aut permiserit.* Tertio igitur Religiosus nihil delicatum, aut superfluum habebit in victu. Nam si Monachus non contentus sit communibus cibis, quæ in conventu apponuntur. Si delicatiora sibi procuret. Si superflua appetat. Si extra communem mensam se generoso potu ingurgitet, & bellariis se satiet. Quomodo pauper erit? Pauperes pane, & aqua victitant. Quomodo SS.



Patrem sequetur? A Romano præter panem nullum alium accepit cibum. Quomodo Regulam servabit? Duo cocta pulmentaria pro universorum infirmitatibus præscribit. Quomodo Professioni satisfaciet? Ordo noster, Ordo abstinentiæ, & castigationis corporalis est. Si ergo o Religiose! potum specialem, aut delicatiora fercula procurasti, pro futuro communibus utere. Si extra tempus quidquam sumpisti, emenda te. Si quid sine præscitu, & licentia Superioris manducasti, aut bibisti; deinceps abstine. Secus pauper non es. *Scius te damnandum ab eo, quem sic irrides.*

#### PUNCTUM QUARTUM.

**A**N ergo, o Religiose! paupertatem exerces in suppellectili cellæ tuæ? *Omni extremitate contentus sit Monachus.* An paupertatem exerces in vestitu? *Omni vilitate contentus sit Monachus.* An paupertatem exerces in victu? *Omni extremitate, & vilitate contentus sit Monachus.* Dole, quod votum paupertatis hucusque exercere neglexeris. Propone hodie abjicere omnem vanitatem, delicias, superfluitatem

1. In suppellectili.
2. In vestitu.
3. In victu.




## DIES XXX.

De Solitudinis prærogativis.


Solus sit ad opus injunctum, persistens in pœnitentiæ luctu. Cap. 25. v. 3.

## PUNCTUM PRIMUM.

**S**emper SS Patribus, & maxime B. Patri nostro solitudo pars pœnitentiæ, sed satisfactionis fuit. Unde ipsemet tamdiu solitudinem sublacensem incoluit. Unde & in Regula gravioris culpæ noxa inquinatum ad solitudinem condemnat. *Solus sit ad opus sibi injunctum, persistens in pœnitentiæ luctu.* Prima ergo solitudinis prærogativa est, quod ad pœnitentiam disponat, & satisfaciat pro peccatis. *Persistens in pœnitentiæ luctu.* In solitudine enim agnoscimus peccata, quæ foris sub tumultu passionum agnoscere non potuimus. In solitudine grandia nobis apparent peccata, quæ foris sub libertate, sensuum parva esse duximus. In solitudine innumera se produnt peccata, quæ gessimus, & foris nulla esse reputavimus. Hinc spiritu compunctionis repleti diu, noctuque peccata nostra, quæ foris extra cellam perpetravimus, defleamus. Insatiabili desiderio Deo pro tot peccatis satisfaciendi accendimur. Nullius alterius, quod foris audivimus, recordatio nobis remanet, quam peccatorum nostrorum, ut eadem instar turturis in solitudine gementes lachry-

chrymis, & suspiriis nostris abluamus.  quam in periculoso statu versantur illi Religiosi, qui sine scrupulo mundi conversationem ambiunt. Ejus actibus se immiscunt. Ejus moribus se conformant. Non agnoscunt peccata sua. Non deplorant. In peccatis suis moriuntur. Cum hoc mundo damnantur!

## PUNCTUM SECUNDUM.

**A**Ltera prærogativa solitudinis est, quod simplicitatem cogitationum, & affectionum causet. Unde SS. P. ait: *Solus fit.* In solitudine enim Monachus separatur a mundo, ejusque actibus, ut nulla cogitatio de ipsis incidere possit. Aures, oculi, lingua ejus nihil percipit novitatis, aut delectationis eorum. Intellectus tantum occupatur in agnitione, & voluntas in amore Dei. Hinc passionnes cordis quoque supprimuntur, ut in tali anima solitaria præter pacem, gratiam, & dulcedinem S. Spiritus aliud nihil reperiatur. O quam exæcati sunt illi Religiosi, qui etiam intra Monasterium solitudinem fugiunt. Qui cum in solitudine gemere deberent, omnes suas cogitationes, & affectiones ad recreationes, risus, sensualitates effundunt. Qui dum in solitudine perpetuæ abnegationi vacare deberent, terrena bona, terrenos honores quaerunt. Qui dum in solitudine unum negotium animæ suæ agere deberent, inutilibus laboribus se occupant. Qui dum silentio vacare deberent, sponte sua ad inutiles discursus de-  
 fluunt,



fluunt. Qui dum in solitudine sua omnibus hominibus bonum exemplum præbere, jugiter mediatores inter Deum, & peccatores existere, ac in cœlis habitare deberent, omnibus scandalo sunt, suis peccatis magis, quam ipsimet sæculares Deum ad iram provocant, suam vocationem relinquunt, & spiritum mundi in sua Monasteria inducunt!

### PUNCTUM TERTIUM.

**T**ertia prærogativa solitudinis est, quod vocationis implendæ medium sit ferme unicum. *Solus fit ad opus injunctum.* Et ad quodnam opus injunctum? Utique quod maxime, & ante omnia opera injunctum est, nempe ad satisfaciendum vocationi suæ. Regula etenim nostra multis, imo plurimis abundat præceptis, quæ sine solitudine impleri nequeunt. Quomodo enim *se a sæculi actibus faciet alienum*, qui se quotidie sæculi actibus inquinat? Quomodo *mortem quotidie ante oculos suspectam habebit*, qui totus ad terrena solatia, & externas occupationes effusus est? Quomodo *actus suæ vitæ omni hora custodiet*, qui raro, imo vix vespere, & mane propter amorem mundi per diem se recolligit. Quomodo *in cogitationibus suis, & in omni loco Deum se pro certo respicere sciet*, qui cum sæcularibus, aut etiam Confratribus diu, notaque confabulatur? Quomodo *frequenter orationi incumbet, aut Lectiones sanctas libenter audiet*, qui propter effusionem cordis ad sensua-

sensualitates S. Exercitia aut penitus abhorret, aut non nisi cum tædio, & acedia peragit. Quomodo *timorem Dei jugiter sibi ante oculos ponet, aut se omni hora Divino judicio representandum credet*, qui cogitationibus, & affectionibus terrenis plenus vivit sine timore, sine metu, hinc inde S. Regulam transgreditur? Reliqua multa, & magna imo maxima SS. Regulæ præcepta omitto, quæ sine solitudine impleri nequeunt. O obduratum cor illorum Religiosorum, qui aliud, quam suum negotium agere volunt. Qui contenti sunt, si externa & quotidiana exercitia distracte, & tepide obeant. Manet, ah! manet sua veritas S. Bernardi effato. Omnia S. Benedicti instituta exceptis nonnullis non profitentibus monita sunt, profitentibus in præcepta, prævaricantibus in crimina fiunt. Interna magis, quam externa servanda sunt. Et quomodo sine solitudine servabis? In testem voca cor tuum.

## PUNCTUM QUARTUM.

**A**N ergo, o Religiose! uteris solitudine ad compunctionem cordis obtinendam? Monachi officium est plangere. An solitudine uteris ad obtinendam simplicitatem affectionum tuarum? Sine hac nunquam sequeris Christum. An solitudine uteris ad satisfaciendum vocationi tuæ? Absque solitudine nunquam obtinebis perfectionem vocationis tuæ. Dole, quod prærogativis solitudinis juxta Professio-

nem Regulæ tuæ hucusque usus non fueris.  
Propone

1. Solitudine uti ad compunctionem,
2. Ad simplicitatem affectionum tuarum,
3. Ad obtinendam perfectionem tuam.



## DIES XXXI.

### Recollectio Menstrua.

**Ita ei omni tempore de bonis suis in nobis parendum est, ut non, ut iratus Pater, aliquando Filios suos exhæredet. Prolog. §. I. v. 4.**

### PUNCTUM PRIMUM.

**S**anctissimus Pater Noster relictis omnibus, secessit in solitudinem Sublacensem, ut uni Patri cœlesti omni tempore de bonis suis pareret. Hoc ipsum nobis persuadet, dum ait: *Ita ei omni tempore de bonis suis in nobis parendum est, ut non, ut iratus Pater aliquando Filios suos exhæredet.* Mèretur enim exhæreditari, qui Patris bona dissipat. An non & tu dissipasti gratias amoris, & servitii Divini? An amorem erga Deum exerces per relictionem creaturarum, & observantiam S. Regulæ? Si charitatem non habes, nihil es. An Deum plus corde, quam ore pregaris? Si ne intermissione orat, qui crebro, & fervide cor ad Deum elevat. An Deum jugi pœnitentia placare satagis? Si modo non luges; lugebis



bis in æternum. Dole, quod gratiis, quas tibi Deus ad servitium suum impendit, abusus fueris. Propone, saltem modo iis uti. O quantajactura est, gratia Dei spoliari!

PUNCTUM SECUNDUM.

**A**N gratias dissipasti, quas Deus tibi contulit ad satisfaciendum Religioni tuæ? An per observantiã Regulæ SS. Patri tuo assimilari studes? Non aliter scripsit, quam vixit. An amore castitatis perfectæ cor mundas ab omni nævo imperfectionis? Omni custodia custodi cor tuum. An stabilitatem servas, ut opera vocationis tuæ impleas? Mane in vocatione tua, non expedit tibi vagari foras. An paupertatem exerces in suppellectili, vestitu, & victu? Sine exercitio paupertatis, pauper nunquam eris. An omnibus abrenuncias, ut finem, & scopum S. Regulæ obtineas? Nisi quis renunciaverit omnibus, non potest meus esse Discipulus. An propter confessionem Domini, mortificationem corporis, compunctionem animi libenter vigilas? Media nocte surgebam ad confitendum tibi. An libenter laboras? Otium est pulvinar Diaboli. An solitudini vacas pro obtinenda vocatione tua? Solitudo Monachum facit. An silentio incumbis ad abnegationem passionum tuarum? In multiloquio non effugies peccatum. An propter humilitatis, patientiæ, & obedientiæ exercitium gratanter subis poenitentias regulares. An officium servitoris magna charitate ad exemplum

emplum Jesu peragis ; Quo major charitas, eo major merces erit. An abjectis scientiis infructuosis ad scientiam Sanctorum duntaxat incumbis ? Scientia vana , & sæcularis inflat. Dole, quod gratiis ad statum tuum implendum abusus fueris. Propone iis uti, *ne ut iratus Pater, aliquando te exheredet.* O quanta jactura est filiatione Dei spoliari !


### PUNCTUM TERTIUM.

**A**N gratias ad conversationem charitatis fraternæ concessas dissipasti ? An officia charitatis exerces ? Caritas otiosa non est. An malum pro malo non reddis ? Charitatem amittis. An non dolosus es ? Fraudulentus concinnat dolos ad perdendos mites in sermone mendacii. An nulli injuriam facis ? Injuriator seipsum vulnerat. Dole, quod gratiis ad conservationem charitatis fraternæ abusus fueris. Propone iis uti, *ne, ut iratus Pater, aliquando te Deus exheredet.* O quanta jactura est gloria cœlesti privari.

### PUNCTUM QUARTUM.

**A**N gratias tibi concessas dissipasti ? An non primum fervorem, deseruisti ? habeo aliquid adversum te ; quia primam charitatem reliquisti. An persecutiones pro justitia libenter , gaudenter , & constanter sustines ? Abominantur impii eos, qui in recta sunt via. An curam animæ tuæ solum curas ? Quid proderit tibi, si mundum universum lucreris, ani-

mæ vero tuæ detrimentum patiaris. An sæpe ingrederis sepulchrum tuum, ut visibilia contemnas, patiens sis in infirmitatibus, & charitatis studiosus? Ita sepulchrum tuum erit gloriosum. Dole, quod gratiis tibi concessis abusus fueris. Propone deinceps iis uti, *ne Deus, ut iratus Pater, aliquando te exbaredet.* O quanta jactura est ipsum Deum amittere!



AUGUSTUS.  
DIES I.

Cur Judicium Divinum semper cogitandum sit.

Reum se omni hora de peccatis suis existimans, jam se tremendo judicio Dei repræsentari æstimet. Cap. 7. Gr. 12. v. 82. & 83.

PUNCTUM PRIMUM.

**S**anctissimus Pater N. statuit, ut Religiosus reum se omni hora de peccatis suis existimans jam se tremendo judicio Dei repræsentare æstimet. Cur? Ad removendam obdurationem, & insensibilitatem. Nam qui omni momento incertus est, qua hora Dominus ad judicandum venerit, quomodo cor ejus timore non tangatur? Qui omni hora expectat judicium, in quo illi æternum felix, aut infelix æternitas decernetur, quomodo cor illius



lius de peccatis præteritis non compungatur, & tepida voluntas ad fervorem, & emendationem non accendatur? Qui incessanter cogitat illud S. Pauli; omnes nos manifestari oportet ante tribunal Christi, ut referat unusquisque propria corporis, prout gessit sive bonum, sive malum, quomodo in securitate, & libertate vitæ vivet? Quomodo non per mortificationes continuas satisfaciet? Quomodo non omnes motus internos ita componet, ut mox possit de quocunque rationem reddere? Quomodo non sensus omnes mortificabit? Quomodo non omnibus, sibi que ipsi morietur? Quomodo non omnes Regulæ observantias exactissime præstabit? O qui ita viva fide iudicium Divinum intueretur non de longinquo; sed ut in proximo est; anne ita insensibiliter, obdurate in sua vocatione vivere posset?

#### PUNCTUM SECUNDUM.

**S**ANCTISSIMUS Pater N. præcipit, ut Religiosus *reum se omni hora de peccatis suis existimans, jam se tremendo iudicio Dei repræsentari æstimet. Quare? Ad acquirendum spiritum compunctionis. Et quis non compungatur? Sancti compunguntur. S. Gregorius Nazianzenus nec diu, nec noctu quietem a timore iudicii habebat. S. Ephrem nullum ad obtinendam compunctionem efficacius remedium esse asserbat, quam meditationem iudicii. S. Ammonis constans doctrina, & vita erat, quod Monachus similis reo esse debeat,*  
qui

qui continuo flet, & interrogat: ubi Iudex? Quando veniet? Quam merito ergo Religiosi jugiter cogitabunt judicium, quorum officium juxta omnes Patres est, & sua, & aliena peccata sine intermissione plangere? Quam merito plangent, quando ex testimonio SS. PP. constat. primum, imo unicam esse ruinam, & perditionem Monachi dissolutionem, & oblivionem Divini judicii? Quam merito incessanter flebunt, cum sine lachrymis vocationi suae nunquam satisficient? O Deus meus! quis dabit mihi lachrymas, ut praeveniam diem lachrymarum, quando ad judicandum veneris?

PUNCTUM TERTIUM.

**S**ANCTISSIMAS P. N. jubet, ut Religiosus *reum se omni hora de peccatis suis existimans, jam se tremendo judicio Dei representari astringet.* Qua de causa? Ut perfectionem Religiosam assequatur. Hæc enim cogitatio Divini judicii necessaria est peccatoribus, ut convertantur, Nihil namque sic peccatorem a peccatis absterret, quam timor judicii. Nihil sic sperare in Dei misericordia cogit, ut terror judicis. Hæc cogitatio necessaria est proficientibus. Sicut enim peccatori gratiam obtinuit, ita illum confirmat, neamittat. Facit cautum in cogitatione, in verbo, & opere, ut vivat in omnibus juxta Regulam. Aufert tædiosam vitam, contemptum divinarum scilicet inspirationum. Aufert distractiones in oratione, acediam, & teporem in Divino servitio. Aufert murmur erga superiores, impatientiam erga Confratres.

Aufert sensualitatem in cibo, potu, somno, amictu &c., & effusionem cordis ad externa solatia. Domat passiones. Generat tædium omnium terrenorum. Sibi soli, & non aliis facit attendere. Virtutes omnes implantat cum ineffabili dulcedine Spiritus S. Hæc cogitatio necessaria est perfectis. Quamdiu enim sumus in hac vita, sine tentatione esse non possumus. Timor judicii omnes tentationes elidit. Quamdiu vivimus, in periculo sumus amittendi gratiam. Nihil autem efficacius est ad retinendam gratiam, quam semper præsentiam Divini judicis timere. Manifesta enim fraus Diaboli est, si quis ita perfectum se reputet, ut timore amplius non indigere videatur. Si enim occultissimum judicium timent magni, ut David, Hilarion, Arsenius; quantum nos ad illius examinis memoriam convenit trepidare?

#### PUNCTUM QUARTUM.

**A**N ergo, o Religiose! cogitasti semper judicium ad removendam obdurationem? Hodie igitur si vocem judicis audis, noli amplius obdurare cor tuum. An cogitasti semper judicium ad acquirendam, aut retinendam compunctionem cordis? Monachus non es, si non semper plangis. An cogitasti semper judicium ad obtinendam perfectionem? Timor locum præparat charitati. Dole, quod meditationem Divini judicii abjeceris. Propone semper illud cogitare



1. Ad removendam obdurationem.
2. Ad obtinendam compunctionem.
3. Ad acquirendam perfectionem.



## D I E S II.

### De Patientia in infirmitatibus.

Infirmi superfluitate sua non contristent Fratres suos servientes sibi. Cap. 36. v. 6.

#### PUNCTUM PRIMUM.

**D**Um SS. P. N. infirmis præscribit: *Ne superfluitate sua contristent Fratres suos servientes sibi*, patientiam ipsis summo opere recommendat. Patientiam istam exhibet Religiosus, si cum jugi gratiarum actione dolores supportet. Et quare non hoc modo patiens sit? Nullus dolor sive corporis sive animi nobis accidit, nisi ex Divinæ providentiæ dispositione. Quidquid autem ex hac provenit, summe nobis utile, imo necessarium est. Quidquid ex hac nobis provenit, summe meritorium est. Licet enim jejuniis, vigiliis, laboribus, orationibus multum mereamur; plus tamen patientia meremur in infirmitatibus. Patere ergo cum humilitate. Et enim si Deo placuerit, te eripiet brevi tempore. Si illi non placuerit, cum S. Job lauda Nomen ejus benedictum in sæcula. Semper autem gratus esto; quia secundum multitudinem

dolorum tuorum consolationes aut hic, aut in futuro lætificabunt animam tuam.

### PUNCTUM SECUNDUM.

**I***nfirmi superfluitate sua non contriscent Fratres suos servientes sibi.* His commendat nobis patientiam in defectu medicinæ & victus. Secutus est S. Basilium; qui ait: usus medicinæ licitus est; quia virtutem sanandi Deus ipsi contulit. At Christianos dedecent ea medicamina, quæ non nisi magno labore, aut sumptu præparantur. Non convenit ipsis, ut vitam suam in delicata cura corporis traducant. Quid ad ista objicis, qui speciales & delicatos cibos exquiris, vitæ vero puritatem negligis! Hypocrates docet, quomodo vitam longo tempore traducas; sed Christus docet, qualiter animam tuam perdas. Cujus Discipulus eris? Quid te juvabit, sæculi voluptatibus renunciasse; si quotidianam mutationem naturæ, & ciborum qualitatem, atque effectus tam accurate discutis? Cogita te pauperem Religiosum, non medicum esse. Non judicaberis de dispositione naturæ tuæ, sed de observantia Regulæ tuæ. Contentus igitur esto medicinis, & victu communi. Spem tuam potius Deo committe in omnibus; sine cujus auxilio nulla medicina, nullus medicus tibi proderit ad sanitatem. Spem tuam Deo committe, qui te sine omni medicina curare potest.

PUN.

PUNCTUM TERTIUM.

**I***nfirmi superfluitate sua non contriscent Fratres suos servientes sibi.* His SS. Pater infirmos monet, ne a communis Regulæ observantia discedant, sed patienter ferant jugum Regulæ. Nunquam enim natura ad relaxationem ejus promptior est, quam in infirmitate. Sed nunquid perdet Religiosus brevi tempore, quod multis annis collegit? Nunquid se effundet ad omnia solatia externa? Nunquid Religiosæ mortificationis penitus obliviscetur? Nunquid spiritum compunctionis abjiciet? Nunquid ab exercitio virtutum in S. Regula præscripto cessabit? Nunquid omnem orationem ceu noxiam fugiet? Religiosus non solum vivere, sed & mori secundum Regulam promisit. Non solvitur infirmitate Professio, usque ad mortem obligat. O si Religiosus sincere cognosceret multitudinem, & magnitudinem peccatorum suorum, nihil omitteret de Regulari observantia. Semper tantum ageret pro satisfactione peccatorum suorum, quantum posset, & Superiores permetterent. Eo enim ferventior currere debet in via mandatorum Dei, quo propior accedit ad terminum.

PUNCTUM QUARTUM.

**A**N ergo, o Religiose! patiens es in infirmitate gratias agendo? Gratiarum actio animam, & corpus lætificat. An patiens es in defectu medicinæ, & victus? Jesus propo-



sito sibi gaudio sustinuit crucem. An patiens es servando Regulam, quantum potes, & licet? Scias te sub lege Regulæ constitutum, nec tibi licere collum excutere de subjugo Regulæ. Dole, quod tam impatiens fueris in infirmitatibus. Propone patientiam amplecti

1. Pro doloribus Deo gratias agendo.

2. Communi victu, & medicina te contentando.

3. S. Regulam pro possibili, & licentia Superiorum observando.



### *DIES III.*

De vitandis transgressionibus minimarum Regularum.

In omnibus omnes magistram sequantur Regulam, neque ab ea temere declinetur a quoquam. Cap. 3. v. 6.

#### PUNCTUM PRIMUM.

**S**ANCTISSIMUS Pater prævidens plurimos Religiosos futuros esse, qui sine timore Regulas minoris momenti transgrederentur, hoc expresso mandato eorum temeritatem repressit: *In omnibus omnes magistram sequantur Regulam, neque ab ea temere declinetur a quoquam.* Et merito. Nam primo talis Religiosus continuo Divinæ voluntati repugnat. Deus illum ad perfectionem vitæ monasticæ voca-

vocavit. Ipsius sanctissima Voluntas est, ut incessabili conatu ad illam tendat. Imo Religiosus ipse voto solemni ad eandem se obstrinxit. Nunc autem Divinæ vocanti, & præcipienti voluntati contrariam semper habet voluntatem. Et quod caput est. Votum suum summa cum infidelitate violat. Væ generationi huic miseræ ab imperfectione sua, cui sufficere videtur insufficientia, imo inopia tanta! quis enim ad eam perfectionem, quam Scripturæ, & Regulæ tradunt, aspirare videtur? Quis vocationi suæ satisfacere nititur? Quis voluntati Dei obedire conatur? Nonne Petro sancte, & humiliter, uti videtur ad lotionem pedum reluctanti, propter hanc minimam inobedientiam dictum est. Nisi laveris tibi pedes, non habebis partem mecum in æternum?

#### PUNCTUM SECUNDUM.

**O***Mnes in omnibus magistram sequantur Regulam, neque temere ab ea declinetur a quoquam.* Et juste. Minimæ transgressionis disponunt ad majores; majores vero ad maximas. Imber guttatim cadit. At sæpe cadendo arbores, ac domos devastat. Et venialia multiplicata mergunt in profundum malitiæ. Qui enim non curat minora vitare peccata, in grandem incidit tepiditatem, ut exinde parvi pendat, majora perpetrare flagitia. Qui non curat minora perpetrare peccata, paulatim totus ab amore evacuatur. Qui non curat minora præcepta S. Regulæ transgredi, inadvertenter

tenter ad tantam assurgit temeritatem, ut etiam maxima violare non erubescat. Timor quippe, & verecundia Deum offendendi peccando tamdiu minuitur, donec successive omnis evanescat. Hinc dantur Religiosi, qui distractiones in Psalmodia parvi faciunt. Dantur, qui de oblivione præsentiæ Divinæ non contristantur. Dantur, qui ob amorem terrenarum rerum non dolent. Sed pro dolor! quod eveniunt? Desendam incidunt accediam. Amissa vero consolatione Divini amoris, & perditio timore Domini, nulla est Regula, quam transgredi non audent. Nullum votum, quod violare non præsumant.

#### PUNCTUM TERTIUM.

**O**Mnes in omnibus magistram sequantur Regulam, neque temere ab ea declinetur a quoquam. Et recte. Quævis Regularis transgressio, maximam poenam in purgatorio meretur. Iniquitas namque omnis, parva, magna ve sit, puniatur, necesse est, aut ab ipso homine poenitente, aut a Deo vindicante. Quod si Divinæ Nemese punienda relinquatur, centupliciter, quæ hic neglecta fuerit, reddetur usque ad novissimum quadrantem. Qui enim venialiter peccaverit, salvus erit, sic tamen quasi per ignem. Veritas ista de fide est. Et quid de futuris poenis dico? Nonne Moyses vix non ab Angelo interfectus est, quia Filium suum circumcidere distulit? Nonne, quia David numerare populum suum præcepit, septua-



tuaginta millia Israëlitarum moriebantur? Nonne S. Abbas Moyſes, quia S. Macario parum contradicere auſus, a Dæmone obſeſſus fuerat? Ex magnitudine poenæ ſaltem diſce timere, ne vel in minimo S. Regulam transgrediaris.

PUNCTUM QUARTUM.

**A**N ergo, o Religioſe! times minimam Regulam transgredi, quia voluntati De repugnas? Voluntas Dei ſanctificatio tua eſt. An times minimam Regulam transgredi, quia ad votorum violationem diſponit? Qui ſpernit modica, paulatim decidet. An times minimam Regulam transgredi; quia ſummopere caſtigaberis à Deo hic, & in futuro? Ipſe ſalvus erit, ſic tamen quaſi per ignem. Dole, quod hucusque Regulam in minimis violare non erubueris. Propone

1. Timere, Regulam in minimis transgredi, quia repugnat Divinæ voluntati;
2. Quia diſponit ad violationem votorum,
3. Quia acerrime a Deo punitur hic, & in altera vita.



*DIES IV.*

De perfectione Obedientiæ.

Pro Dei amore omni obedientia ſe ſubdat majori imitans Dominum, de quo dicit Apoſtolus: Factus eſt obediens uſque ad mortem. Cap. 7. Gr. 3. v. 34. & 35.

H 5

PUN-

## PUNCTUM PRIMUM.

**P**erfecta obedientia est, ut simpliciter in omnibus quis obediat, quæ non sunt contra Regulam, aut contra Deum. Hinc SS. Pater suo Religioso injungit: *Pro Dei amore omni obedientia se subdat majori, imitans Dominum, de quo dicit Apostolus: Factus est obediens usque ad mortem. Omni, ait, obedientia se subdat majori.* Ad quod non sufficit, ut ad imperium Superioris nihil mali agas, sed etiam ut nihil boni, quantumvis sanctum sit, sine ejus præscitu, & consensu facias. Nihil enim bonum esse potest, quod ab obedientia non provenit. Nam qui potestati resistit, Deo resistit. *Omni obedientia se subdat majori* non solum in internis, sed etiam in externis, ut nullum amplius motum nisi ab obedientia habeat. Non enim est Monasterium, non Religiosi, non Monachi, ubi subditis obedientia erga Prælatum deest. *Omni obedientia se subdat majori*, ut etiam impossibilia peragere, & in iis obedire contendat. Ita statuit SS. Pater: *Si cui Fratri aliqua forte gravia, & impossibilia injunguntur, suscipiat cum omni mansuetudine, & obedientia jubentis imperium.* Cogitet illud Apostoli, non sunt condignæ passionibus hujus temporis ad futuram gloriam. Et nondum usque ad sanguinem resististis. *Omni obedientia se subdat majori*, ut nec de uno momento vitæ suæ disponat, sed usque in, & ad mortem obediat. Sic solum re-  
vera

vera imitatur Dominum, de quo dicit Apostolus: Factus est obediens usque ad mortem. O me infelicem! quod hisce temporibus vivo, ubi nulla ferme religio, quia nulla fere obedientia est. O me miserum! qui hucusque juxta principia moderni sæculi obligationem obediendi ad gravitatem materiæ, ad præceptum Superioris in virtute S. Obedientiæ duntaxat dimetiebar; cum tamen juxta omnes sanctos Patres in omnibus, excepto uno solo manifesto peccato, usque ad ipsam mortem obedire tenear.

## PUNCTUM SECUNDUM.

**O**mnis obedientia se subdat majori, ut nunquam imperium discutiat, sed totaliter alieno imperio, & arbitrio ambulet. Nam discussio imperii provenit ab intolerabili superbia, magna sui æstimatione, fide mortua, & spe infirma. *Omni obedientia se subdat majori*, ut nullum amplius habeat velle, aut nolle, sed sicut instrumentum ab artifice, ita ipse a Superiore omnem motum accipiat. Ex quo enim Monasterium ingressus est, omne jus volendi, & nolendi Christo in Superiore tradidit, ut sine sacrilegio illud in minimo violare non auserit. *Omni obedientia se subdat majori*, ut simpliciter ad instar parvuli, sine contradictione instar mortui, cum abnegatione judicii, & voluntatis propriæ, cum tolerantia omnis difficultatis, repugnantix naturalis, usque ad sanguinem, usque ad mortem obediat. Vere  
siqui-



siquidem obediens nihil novit difficile, nihil injustum. *Omni obedientia se subdat majori*, ut animo resignato, indifferenti, ac parato ad omnia, & animo hilari, cum omni velocitate obediat. O sancta Obedientia! tu mors es naturæ; & ego hucusque judicio, voluntati, passionibus meis mori nolui. O S. Obedientia! tu vita gratiæ es, & ego juxta tuum instinctum vivere nolui. O S. Obedientia! tu gloria Religionis es! & ego te contempsi. O S. Obedientia! tu liberas a Divino judicio, & ego libentius per inobedientiam huic, quam tibi me subdere volui.

#### PUNCTUM TERTIUM.


**O***Mni obedientia se subdat majori tanquam Deo.* Hinc oritur meritum. Sine hoc obedientia Religiosa mera politia est. Hinc oritur plena fides & devotio in obedientia, confidentia erga Superiorem quo ad internum, & externum statum, maxima reverentia, & amor. Sine hoc statim prætenditur impossibilitas imperii, omittitur debita confidentia, Superior contemnitur, ejus imperia discutuntur, detractantur, amor omnis in eum languet. Hinc perfecta obedientia in omnibus usque ad mortem oritur. Qui enim Deum in Superiore aspicit, omnia credit justa, omnia agit. Confidit namque in Deo, qui præcipit, & omnia potest. Non includit intra limites professionis obedientiam, sed eam supergreditur. Amor præcipientis Dei omnia levia illi facit,

facit, & accepta. Et hæc mens est SS. Patris. *Quod si post suggestionem suam in sua sententia Prioris imperium perduraverit, sciat junior ita sibi expedire, & ex charitate confidens de adjutorio Dei obediat.* Sine hoc omnis obedientia vilis est, & imperfecta. Hinc oritur, ut nemo non sibi Abbatem præesse desideret. Sine hoc obedientiæ jugum nemo non ceu intolerabile excutere nititur. OSS. Pater! quamdiu adhuc patieris hanc unam, & unicam Religionis tuæ virtutem ab Ordine tuo exulare. Ecce! modo Superiores quasi per præscriptionem non amplius audent præcipere nisi ea, quæ subito grata esse vel præsciunt, vel prius interrogarunt, an grata sint. Sic jacet Religiosa obedientia, sine qua perfectio Religiosa obtineri non potest. Eja! Pater sancte! excita Spiritum tuum! mitte nobis tales Superiores, qui sciant suos in Spiritu sanæ Obedientiæ dirigere ad vitam æternam. Amen.

## PUNCTUM QUARTUM.

**A**N ergo, o Religiose! hucusque in omnibus etiam impossibilibus obedisti? Vir obediens loquetur victorias. An penitus iudicium, & voluntatem tuam deseruisti? Sunt viæ, quæ videntur hominibus rectæ, quarum finis deducit ad interitum. An Superiori tanquam Deo obedisti? Qui vos audit, me audit. Dole, quod ad perfectionem S. Obedientiæ non debitam diligentiam adhibueris. Propone

1. In omnibus quoad internum, & externum statum tuum obedire.
2. Judicium, & voluntatem tuam penitus deferere.
3. Superiori tanquam Deo ipsi obtemperare.



## DIES V.

## De vitanda Somnolentia.

Non somnolentum. Cap. 4. Instr. 37.

## PUNCTUM PRIMUM.

**Q**UAM SS. P. N. a Somnolentia alienus fuerit, constat, quod totas noctes precibus, aut colloquiis sacris traduxerit. Unde & suis Discipulis præcipit, *non esse somnolentum*. Ad quod præceptum implendum tria requiruntur. Primum est, ne diutius, quam necessarium, & præscriptum est, quis dormiat. Quot enim non ex mero otio, aut pigritia per totum ferme meridiem somno indulgent? Quot non ante præstitutam horam somnum capiunt? Quot non subinde ultra horas assignatas stertunt in lecto? Quot non, cum excitantur, adhuc hinc inde se volutant, & præ gravedine somni vix e lecto se proripere queunt? O ridiculum plane rigorem Monachicum dulce, longiori somno, temperate otium! stertere, dum tot Fratrum millia in labore sudant! somniare, dum alii laborant  
orare!



orare ! blandiri corpori, quod alii in tantum mortificant. Eheu ! indigna permutatio, solatium tantillum Dei permutare colloquio, & tot millum Fratrum consortio ! O quæ tam gravis causa Monachum teneat, & quam invitum in lectulo, qui pensat, quanto quiescat, & quam utili a negotio ! vix credibile, quod in cæteris dure se habeat, qui corpusculum suum tam molliter collocat, e molli strato tam ægre librat.

## PUNCTUM SECUNDUM.

**A**lterum, *ne somnolentus sis*, requiritur ; ut *subtrahas corpori tuo de somno*. Quod fit, *si sacro signo absque mora surgens festines alios prævenire ad opus Dei*. Si nunquam vel ad matutinum, aut ad primas edormias. Sane amor Dei, devotio in servitio Divino, fervor disciplinæ nec ad momentum ultra tempus obedientiæ in lecto manere permittent. Gauderis, si dormire per noctem non possis, vel surgere rursus valeas. Dormiens etenim homo nullius est pretii, aut certe non majoris, quam qui non vivit. Nimium infra dignitatem suam se abjicit homo, qui ad instar pecoris tempus somno terit. Suspecta semper res est somnus, & magna ex parte ebrietati similis. Rationem tollit. Sensus ligat. Hominem Somnolentiæ deditum pigrum, acediosum reddit, atque otiosum. Pro ! quam multi virtutum actus per somnum perduntur ! quam ineffabilis merces, & gloria in coelis amittitur ! cogi-

ta illud Theodori Abbatis, quo Joannem Cassianum a Somnolentia dehortatus est. Quam multi o Joannes in hac hora Deum in præcordiis suis tenent, ac contemplantur, & tu lumine tanto privaris inertis resolutus sopore? Cogita illud Scripturæ: qui mane vigilaverint ad me, invenient me; & cum gaudio S. Spiritus subtrahes corpori tuo de somno, ac offeres Deo.

### PUNCTUM TERTIUM.


**T**ertium, *ne somnolentus sis*, requiritur, ut cum omni modestia concessum, & necessarium somnum capias. Hinc SS. Pater præscribit: *Vestiti dormiant, & cincti cingulis, aut funibus*. Licet enim dormientibus non imputandum videatur, quod nescii faciunt, vel patiuntur, tamen indecens est homini Religioso, si vel incompositus jaceat, aut potestatem habeat manus huc illuc in nudo corpore circumducendi. Et cum Monachi officium sit semper orare, semper debet *paratus esse ad surgendum pro oratione cum omni modestia & gravitate*. O quanto cum timore SS. Patres somnum capiebant, ne forte ab inimico *per somnium vulnerentur* in puritate! & tu per immodestiam jacendi inimico potestatem facias pro libitu suo corpori tuo illudendi? O quanta cum devotione somnum capiebant, ut etiam dormientes Psalmos somniarent! & tu vanis, otiosis cogitationibus inimico ad somnia impura præludas. O quanto fervore evigilantes

antes semper mentem ad Deum levabant! & tuiisdem vanis, & otiosis, aut etiam impuris, quos somniaſti, affectibus jugiter expurgaris. Certe vel ſomnus miſerum inveteratæ tepiditatis tuæ ſtatum tibi aperit.

#### PUNCTUM QUARTUM.

**A**N ergo, o Religioſe! ad vitandam ſomnolentiam ſomno conſeſſo tantum uteris? Ne patiare totius diei, aut vitæ medium nullo tuo fructu tibi præripi. S. Baſil. An ad vitandam ſomnolentiam de ſomno corpori tuo ſubtrahis? Sufficit Monacho unum dormire horam, ſi tamen pugnator eſt. S. Arſen. An ad vitandam ſomnolentiam modeſte ſomnum neceſſarium capis? Quotieſcunque evigilaveris, ſtatim occurrat tibi memoriam Dei cum gratiarum actione; quia ipſe vigilat ſuper nos, ut cuſtodiat nos. S. Bern. Dole de tua Somnolentia. Propone

1. Somno conſeſſo tantum uti,
2. De ſomno tibi ſubtrahere,
3. Semper neceſſarium ſomaum cum modeſtia capere.



#### DIES VI.

De Reconciliatione diſcordantium.

Cum diſcordantibus ante ſolis occaſum in pacem redire. Cap. 4. Inſtr. 71.

*Spir. S. Ben. P. III.*

I

PUN-



## PUNCTUM PRIMUM.

**S**ANCTISSIMUS Pater hujus Instrumenti *cum discordantibus ante solis occasum in pacem redire.* Fuit observantissimus. Vix nefarii illi Monachi venenum ei obtulerant, statim, prior, & toto affectu veniam ipsis indulgit. Misereatur vestri Fratres omnipotens Deus. *Statim in pacem cum discordantibus redeundum est:* quia discordia cum tempore crescit; & quia Deus tamdiu nullum opus bonum a nobis acceptat, quamdiu in discordia vivimus. Si discordia etiam levis in corde foveatur, necesse est, ut in apertas inimicitias, & odia prorumpat. Dum namque sub cinere occulta aversionis gliscit, ad turbinem verbi injuriosi inextinguibile incendium causat. Plerumque enim discordia per silentium clausa, intra mentem vehementius æstuat, & clamorosas tacita voces format. Verba sibi, quibus exasperetur, objicit; & quasi in causæ examine posita durius exasperata respondet. Sicque fit, ut perturbatus animus majorem strepitum sui silentii sentiat, eumque gravius causa discordiæ flamma consumat, donec se maximo impetu foras proripiat, & fere sine fine inter contentiones flagret. Et quodnam bonum opus tunc Deo placebit, qui præcipit: Si recordaris, quod Frater tuus habet aliquid adversum te; relinque munus tuum ante Altare, & vade prius reconciliari ei? Cum igitur Frater tuus aut tu habetis discordias, statim reconciliamini. Sol non occidat super iracundiam

diam vestram, ne in vanum opera Religionis peragatis, & discordia in immensum crescat.

PUNCTUM SECUNDUM.

**Q**uatenus cum discordante ante solis occasum in pacem redeas; oportebit, sæpius, ut prior, & innocens a discordante veniam petas. Prior cum illo loquaris. Prior satisfactionem præstes. Prior obsequia fraterna offeras. Sæpe namque, imo plerumque, qui discordiæ Author est, acriori ira perturbatur. Et hoc cur non agas? Animam Fratris salvas. Tuam redimis ab ingenti odii, atque vindictæ periculo. Nam etsi modo pacem habere videaris, dum alter in pacem redire recusat, tu quoque pacem amittes. Facile vero discordantem tibi reconciliabis, si cum alienos excessus aspicias, tua, quibus in aliis excessisti, delicta cogitas. Considerata quippe infirmitas propria, mala tibi excusabit aliena. Libenter namque discordiam Fratris tollit, qui meminit, quod fortasse & ipse habeat, in quo debeat reconciliari. Et quasi aqua ignis extinguitur, cum surgente furore animi, sua cuique ad mentem culpa revocatur; quia erubescit peccata non parcere, qui vel Deo vel proximo se recolit parcenda peccasse. Sol igitur non occidat super discordiam Fratris tui. Prior accede, ut reconcilietur tibi.

PUNCTUM TERTIUM.

**D**emum toto cordis affectu cum discordantibus ante solis occasum in pacem redeundum

*est.* Nihil enim prodest exterius concordiam procurare, & interius discordiam fovere. Non diu simulata concordia durat. Quovis verbo, imo quavis suspicione rumpitur. Ex corde pax redintegranda est. Hinc Christus docens injuriam condonandum esse: exemplum illius Domini proponit, qui nobis tam facile, tam magnifice decem millia talenta condonavit. Qui namque sua cogitat, ad dandam conservo veniam, ad restituendam concordiam non ore solum, sed corde facilius est. Perspice, quot & quanta lucreris, si discordantem tibi reconciliaveris. Primo quod maximum est, remissionem peccatorum. Deinde patientiam, atque perseverantiam laudabilem. Tertio mansuetudinem, & humanitatem: Nam qui sibi inimicos reconciliat; multo magis amicis erit commodior. Quarto, quia procul ab ira semper tranquillo vives animo: nam qui nescit odisse, nec tristari cognovit; sed continuo gaudens, bonis suis perfruitur. Sol igitur non occidat super discordiam vestram o Fratres mei! Toto cordis affectu pacem restituite. Certissime sciatis; quia quantumlibet virtutibus quis vestrum polleat, spiritualis fieri nullatenus possit, si uniri per concordiam Confratribus negligat. Scriptum quippe est: Fructus autem Spiritus est charitas, & pax. Qui ergo servare pacem non curat, ferre, ac referre fructum Spiritus recusat.



PUNCTUM QUARTUM.

**A**Nigitur, o Religiose! statim cum discordante in pacem redis? Ira in sinu stulti requiescit. An prior discordantem pacificas? Soliciti, servare unitatem in vinculo pacis. An toto cordis affectu discordantem tibi reconcilias? Pacem habete, & Deus dilectionis, ac pacis erit vobiscum. Dole, quod hucusque discordias seminaveris, foveris, neque in pacem post tot solis occasus redieris. Propone

1. Cum discordante statim,
2. Prior,
3. Toto cordis affectu in pacem redire.



DIES VII.

Quod non liceat Monachis extra  
Clastrum vagari.

Non sit necessitas Monachis vagandi foras;  
quia omnino non expedit animabus eorum.  
Cap. 66. v. 8.

PUNCTUM PRIMUM.

**S**anctissimus Pater N. severe statuit, ut  
*Monasterium ita construatur, ut non sit  
necessitas Monachis vagandi foras; quia  
omnino non expedit animabus eorum.* Hinc non  
licet 1. Monachis vagari extra Clastrum ex  
causa tristitiæ. Porro duplex est tristitia. Alia  
naturalis. Hæc mala est. Provenit ex inordi-

nata affectione, quæ aliquid appetit, & quod appetit obtinere non potest. Provenit ex eo, quod quis contra voluntatem aliquid pati debeat. Vana est. Vehementissimis suis motibus nihil obtinet, nihil effugit. Mortifera est. Vehementia passionum, nisi per gratiam Dei moderetur, aut supprimatur, lethalia vulnera & animæ, & corpori infligit. Nulla locorum mutatione curatur. Ille curare eam debet, qui ea affligitur. Et quomodo? Tristitiam longe repellata se abnegatione infrunitæ concupiscentiæ, patientia, & subjectione. Altera sancta est, quæ suis lachrymis sordes peccatorum abstergit. Hæc Religiosum nec pusillanimum, nec cupidum vagationis reddit; quia abundat cœlesti consolatione. Imo sicut cera mel, ita ipsa dulcedines cœli includit.

#### PUNCTUM SECUNDUM.

**N**on sit necessitas Monachis vagandi foras; quia non expedit animabus eorum. Ita præcipit SS. P. N. Hinc non licet Monachis vagari foras, propter melancholiam. Alii sunt melancholici, quia Deus ipsis subtraxit gratiam. Ad ideo foras vagari non debent. Resignent se Divinæ voluntati. Statu suo contenti vivant. Per fidem, spem, & charitatem ambulant. Secus crux ista ipsis duplicabitur. Alii sunt melancholici ex natura. At propterea minime vagari debent. Non licet mediis uti, quæ a vocatione mentem, animumque abstrahunt, quamvis finis intentus bonus sit. Orent igitur,

igitur, cum tristantur. Alii demum sunt melancholici; quia sunt acediosi. Claustrum ipsis carcer est. Disciplina mancipatus est. Religio mater quietis & consolationis, nutrix est tædii, ac perturbationis. At hac de causa Monachi vagari non debent. Pœnitentiam agant; quia vocationem suam neglexerunt, & Divinæ gratiæ resisterunt. Sic perfecta conversione ad Deum quietem animæ, & animi obtinebunt. O Religiose! si una, aut altera ex his melancholia tangeris, noli te effundere ad solatia externa. Nihil juvant. Post horam majorem senties tristitiam. Utere mediis, quæ te ad cor, & ad Deum revocant.

#### PUNCTUM TERTIUM.

**N**on sit necessitas Monachis vagandi foras; quia non expedit animabus eorum. Sic jubet SS. P. N. Hinc non licet vagari foras propter infirmitatem. Nunquam enim magis concupiscentia vagandi foras, vel sensualiter nos delectandi excitat, quam dum animo, aut corpore infirmamur. Verum & tunc maxime refrenanda est, ne nos a vocatione nostra, vel a Deo abducat. Deinde nonne ideo vivimus, ut bene moriamur? Nonne ideo Monasterium ingressi sumus, ut feliciter moriamur? Nonne ideo sæculo per professionem mortui sumus, ut cum desiderio beatam mortem expectamus? Quomodo ergo ea media appetamus, quæ malæ mortis causa sunt? Nonne ideo Monasterium ingressi sumus, ut pœnitentiam




tiam agamus? Nonne ideo Monasterium ingressi sumus, ut pro peccatis nostris satisfaciamus? Quomodo ergo libertatem sensuum, aut carnis appetere possimus? Nonne potius cum S. Augustino optemus. Hic ure, hic seca: tantum in æternum parcas.

#### PUNCTUM QUARTUM.

**A**N ergo, o Religiose! nunquam vagandi cupidus fuisti ob tristitiam? Solitudo, & labor utilis omnem tristitiam pellit. An non vagandi cupidus fuisti propter melancholiam? Bona conscientia est jube convivium. An non vagandi cupidus fuisti propter corporis imbecillitatem? Magna satisfactio pro peccatis est jugis infirmitas corporis. Dole, quod cupiditatem vagandi foras spiritu, ac fervore mentis non refrænaveris. Propone non vagari

1. Ob tristitiam, nec
2. Ob melancholiam, neque
3. Ob infirmitates corporis.



#### DIES VIII.

De Zeli malitia.

Zelum non habere. Cap. 4. Infr. 65.

#### PUNCTUM PRIMUM.

**Z**elus, quem SS. Pater non habere præcipit, est cupiditas inimicitiae, odiumque exercendi erga illos, qui feliciorem

rem habent successum. Porro hic zelus non habendus est in donis naturæ, in donis gratiæ, & in bonis externis. Non habendus est in donis naturæ. Omnia enim dona naturæ a Deo collata sunt, qui unicuique dedit tot, & tanta, quot, & quanta ad Dei gloriam & salutem propriam necessaria erant. Diabolicum proinde est, zelari Confratrem ob præstantiora naturæ talenta. Dolens quippe Diabolus ob præclara dona homini concessa, quando Deo nocere non valuit, ipsum hominem insidiis petiit. Quid iniquius, quam adversari ipsi Authori naturæ? Quid magis ingratum, quam suis talentis contentum non esse? Quid perniciosius, quam innocentem persequi, & opprimere? Quid magis inquietum, quam diu noctuque anxia æmulum despectum reddendi cura fatigari? Non enim zelator habebit requiem; donec æmulum contemptum aspexerit. O quot ex hoc zelo nascuntur peccata? Nullum finem zelus habet peccandi.

## PUNCTUM SECUNDUM.

**Z**elum non habere oportet in donis gratiæ.

Quod enim peccatum gravius esse possit? Neque enim qui hunc zelum habet cum Fratrem tantum, sed & cum Dei voluntate depugnat, qui dedit unicuique secundum mensuram donationis Christi. Id genus homo una cum Diabolo iusto bellum infert. Fortasse etiam & multo pestilentius. Iste invisibiliter tentat. Ille visibiliter a bono Confratrem retra-

here, & impedire satagit. At cur quæso te impallefcis? cur tremis? Cur formidolosus es? Quid tandem mali accidit? Quod ob accuratam Regulæ observantiam, & quotidianum in virtute profectum bene audiat, omnes ædificet Confrater tuus? Igitur oportet læticia exilire, Deumque glorificare, quod membrum tuum relucens, & illustre factum est. An tibi dolet, quod Deus glorificatur? Vides, quo bellum ipsum pertineat? Dices; non mihi molesta est Dei gloria, sed Fratris. Verum per hunc Fratrem gloria ad Deum ascendit. Nec hoc, inquis, mihi dolet, sed vellem Deum per me glorificari. Igitur Fratrem bene ambulante, & audiente, gaude, imitare illum, ac tunc per te etiam Deus glorificabitur.

### PUNCTUM TERTIUM.

**Z**elum non habere oportet in bonis externis. Quare enim zeleris Fratrem ob famam, honores, commoditates temporales? Si verus Religiosus est, ipsemet ab eis abhorrebit, libenterque tibi cedit. Si malus Religiosus est, cedent ei in ruinam. Et tamen isto zelo inter Religiosos nullus extat frequentior. Ambo priores ex hoc plerumque nascuntur. Hinc odia, discordiæ, detractiones, iræ, rixæ, inimicitix, murmura, tristitiæ, malum omne. O quam perversi sunt ejusmodi zelatores! zelantur alios in malum, & zelum salutis suæ nullum habent. Obliti vivunt vocationis suæ, quæ




quæ ad aliud, quam ad constantem humilitatem, & mortificationem non vocat. O quam miseri sunt ejusmodi zelatores! nullo tempore quiescunt. Nunquam & alios quiescere sinunt. Semper perturbantur, & alios turbant. O quam omnium sceleratissimi sunt! si enim Fratrem zelaris, omnium malitiam excessisti, quod vel inde constat: Scortatus quidam apud Corinthios brevi vitam emendavit. Cain Fratrem zelando nunquam odium posuit. Tu igitur, o Religiose! nihil terrenum juxta vocationem tuam appete. Nullum zelaberis.

#### PUNCTUM QUARTUM.

**A**N ergo, o Religiose! Confratrem non zelaris propter ampliora dona naturæ? Eja! æmulare charismata meliora. An Confratrem non zelaris ob ampliores gratias? Bonum æmulare in bono semper. An Confratrem non zelaris propter bona externa? Saul zelatus est David; quia Victoria contra Goliath ipsi adscribebatur. Tu sectare charitatem. Dole, quod zeli hujus flamma vix non absumpserit animam tuam. Propone.

1. Zelum non habere erga Confratrem ob ampliora dona naturæ,
2. Ob ampliora dona gratiæ,
3. Ob ampliora bona externa.



## DIES IX.

De Mercede cœlestis Gloriæ.

Merces nobis a Domino recompensabitur,  
quam ipse promisit. Cap. 4. v. 73.

## PUNCTUM PRIMUM.

**E**Cce hæc sunt instrumenta artis spiritualis: quæ cum fuerint a nobis die, noctuque incessabiliter adimpleta; illa merces nobis a Domino recompensabitur, quam ipse promisit: Quod oculus non vidit, nec auris audivit, nec in cor hominis ascendit; quæ præparavit Deus his, qui diligunt eum. Ita SS. Pater nos ad jugem amorem spei adhortatur. Nil quippe fortius nos ad exercitium bonorum operum impellit, quam iste amor. Quis enim non diu noctuque incessabiliter instrumenta artis spiritualis adimpleat, qui considerat horum mercedem esse gloriam cœlestem omni labore, & dolore carentem? Revera ibi erit requies illa, ubi fugit dolor, tristitia, & gemitus. Ubi neque sollicitudines, neque labores; neque agones, neque timores obstupescere facient animam. Non illic invidia, non zelus, non ullum peccandi periculum est. Non est ibi fatigari, neque fastidium capere, sed semper in desiderio bonorum perseverabimus. Non est ibi morbus, neque mors corporis, neque illa, quæ est animæ.

mæ. Non sunt ibi tenebræ, neque nox; sed perpetua claritas. Vis, o Religiose! ut dem tibi similitudinem? Suspice in cœlum, quando nulla se interponit nubes, & clara est omnis ejus corona; sic beatitudo tua erit sine dolore, & labore serena. Nunquid ergo brevem dolorem superabis in coercendis vitiis? Nunquid brevem & momentaneum laborem tolerabis in exercendis virtutibus? Post brevem dolorem sequetur voluptas æterna sine dolore. Post momentaneum laborem sequetur requies sine labore.

## PUNCTUM SECUNDUM.

**Q**uis non diu, nocteque incessabiliter instrumenta artis spiritualis adimpleat, qui considerat horum mercedem esse gloriam cœlestem æternam duraturam? Tanta siquidem est jucunditas lucis æternæ, ut etiamsi non liceret amplius in ea manere, quam unius diei mora; propter hoc solum innumerabiles anni hujus vitæ pleni deliciis, & circumfluentia temporalium bonorum recte, meritoque contemnerentur. Non enim falso dictum est: quoniam melior est dies una in atriis tuis super millia. O Religiose! nunquid non contemnes & tu omnia visibilia, ut sine impedimento instrumenta artis spiritualis adimpleas? Non una tantum dies æternæ Beatitudinis; sed incommutabilitas æternitatis, & æternitas felicitatis, tibi retribuetur.

PUN-



## PUNCTUM TERTIUM.

**Q**Uis non diu, noctuque incessabiliter instrumenta artis spiritualis adimpleat, qui considerat horum mercedem esse gloriam cœlestem omnem cognitionem, & sensibilitatem humanam excedentem? Videbit tunc oculus tuus, quæ nullius hominis oculus in terris videre potuit. Audiet tunc auris tua, quæ auris nulla per sonum hausit. Sentiet tunc cor tuum, quæ cor humanum nec intelligere, nec sentire potuit. Infinitæ enim rei, quis erit finis? Immensa, qua mensura metieris. Potius totum mare in arctissimo vasculo includeres, quam gaudiorum, & gloriæ, quibus beatorum animæ sine fine potiuntur, minorem intelligeres particulam. Hic non quæras, quæ non alibi, nisi quo tam feliciter properas, inveniri possunt. Hic satage, talia exercere opera, ut ea, quæ hic aliquantulum intelligere cupis, in æternum habeas. O Religiose! ista accurate discute. Verba sunt S. Patris de cœlo apparentis. Et si discusseris quid aliud deinceps diu noctuque ages, quam ut opere incessabiliter instrumenta bonorum operum adimpleas?

## PUNCTUM QUARTUM.

**A**N ergo, o Religiose! libenter sustines laborem, & dolorem in exercitio virtutis, ut Beatitudinem sine labore, & dolore obtineas? Non amplius erit neque clamor, neque dolor erit ultra. An visibilia momentaneæ delectatio-

lectationis contemnis ad removenda impedimenta in exercitio virtutum occurrentia, ut æternam Beatitudinem obtineas? Regni ejus non erit finis. An opere, & incessanter opera bona exerces, ut gloriam omnem captum excedentem obtineas? Satiabor, cum apparuerit gloria tua. Dole, quod te amore Beatitudinis ad exercitium bonorum operum non excitaveris. Propone ad obtentum Gloriæ cœlestis

1. Laborem, doloremque in exercitio virtutis superare,

2. Exercendæ virtuti contemptis visibilibus incumbere.

3. Actu, & incessanter bona opera peragere.



*DIES X.*

*IN FESTO S. LAURENTII, M.*

*De Fortitudine Religiosa.*

Si quid paululum restrictius processerit, non illico pavore perterritus refugas viam salutis. Prolog. 34.

*PUNCTUM PRIMUM*

**S**anctus Laurentius magna fortitudine sæculum sprexit; quia fortius semetipsum superavit, quando amore Christi amorem dilectissimi Patris sui Xisti reliquit. Opus est

est fortitudine, & magna fortitudine ad victoriam sui ipsius. Hac de causa SS. P. N. hortatur: *Si quid paululum restrictius propter emendationem vitiorum processerit; non illico pavore perterritus refugias viam salutis.* Fortitudo namque in hoc præcipue spectatur, ut seipsum quis vincat, & externa omnia pro minimis habeat, & quasi superflua despicienda magis, quam expetenda ducat. Quid enim tam præclarum, quam ut iram contineas, nullis illecebris inflectaris, non adversis perturbetur, non extollaris secundis, nulla rerum mutatione muteris? Quid tam gloriosum, quam ut neque divitias, neque voluptates, neque honores in maximis constituas, sed ex animo contemnas? Hæc vera, ac necessaria fortitudo Religiosi athletæ est, ut sic legitime certando vincat seipsum, & sæculum cum S. Laurentio, atque vincendo coronetur. Sine hac quippe fortitudine semper pavidus erit. Semper cuivis pravo affectui succumbet. Pro varietate objectorum mutabitur. Refugiet viam salutis.

#### PUNCTUM SECUNDUM.

**S**anctus Laurentius magna fortitudine virtutes sibi comparabat. Aspice fortitudinem ejus in fide, qua non obstante furore gentilium Evangelium Christi annunciavit. Aspice fortitudinem in amore proximi, qua contemptis jussis Principis terreni, thesauros Ecclesiæ pauperibus distribuit. Aspice fortitudinem



nem zeli ipsius, quo inter furentes gentiles quam plurimos ad fidem Christi convertit. Opus namque est fortitudine ad acquirendam virtutem. Unde SS. Legislator noster monet: *Si quid paululum restrictius processerit, non illico perterritus, refugias viam salutis; processu conversationis inenarrabili dilectionis dulcedine curritur via mandatorum Dei.* Fortitudinis quippe est, ut ea, quæ summa sunt omnesque res, in quibus honestas virtutis refulcet, præclara animi intentione usque ad effectum prosequatur. Fortitudinis est, ut propter nullam difficultatem, metum, aut ignaviam occasionem virtutis exercendæ negligat, aut deferat. Fortitudinis est, ut gratia præparet animum, exerceat mentem, constabiliat ad constantiam, quatenus nullis molestiis, nec longitudine temporis a virtutis exercitio deficiat, vel non proficiat. Fortitudinis est, ut minores molestiæ formidinem semper metu æternorum suppliciorum vincat. Fortitudinis est, ut futura prospiciat adversa, & prætendat, nec quasi contra opinionem accidisse arbitretur. Sic nunquam in adversis deficiet. Fortitudinis demum est, judicium suum rationi conformare, ut quæ virtuosa non sunt, ceu inhonesta constanter contemnat, & quæ virtutis Religiosæ sunt, ceu summe æstimanda amplectatur. Nisi ita fortis fueris cum SS. Laurentio, nunquam ad virtutem ascendes. Modo proficies, modo deficies. Nunquam dilatabitur.

*Spir. S. Ben. P. III.*      K      bitur.

bitur cor tuum. Nunquam inenarrabilem illam dilectionis dulcedinem experieris.

### PUNCTUM TERTIUM.

**S**ANCTUS Laurentius maxima fortitudine ad bravium vocationis suæ contendit. Inde enim Tyranno in craticula positus insultavit: Assatum est, jam versa, & manduca. Hac gloriam Martyrii obtinuit. Opus namque est fortitudine ad præmium vocationis acquirendum. Ideo SS. P. N. suadet: *Si quid paululum restrictius processerit, non illico pavore perterritus refugias viam salutis, quæ non est nisi angusto initio incipienda.* Hoc suo quoque exemplo confirmat Apostolus. Persequor autem bravium supernæ vocationis Dei in Christo JESU. Quid enim est persequi bravium supernæ vocationis, nisi omni fortitudine currere viam Mandatorum Dei juxta vocationem suam. Non enim sufficit, & quam maxime Religioso, minimis observantiis Regulæ contentum vivere. Obligatur vi conversionis morum ad sublimia vocationis suæ præcepta implenda contendere. Sat damnationis habet, & si gravius peccatum non committat; si ad anteriora se extendere omittat. Qua igitur fortitudine opus non est Religioso, ut tam sublimis sublimæ vocationis suæ bravium adipiscatur?

PUNCTUM QUARTUM.

**A**N ergo, o Religiose! fortis es ad vincendum temetipsum? Accinge fortitudine lumbos tuos. An fortis es ad acquirendam virtutem? Robora brachium tuum. An fortis es ad obtinendum bravium vocationis tuæ? Non coronaberis, nisi legitime certaveris. Dole, quod hucusque tam perterritus viam salutis refugeris. Propone cum S. Laurentio fortis esse

1. Ad vincendum temetipsum.
2. Ad acquirendam virtutem.
3. Ad obtinendum bravium vocationis tuæ.



*DIES XI.*

De Motivis obediendi sine mora.

Obedientia sine mora convenit his, qui nihil sibi a Christo charius aliquid existimant propter servitium sanctum, quod professi sunt, seu propter metum gehennæ, vel gloriam vitæ æternæ. Cap. 5. v. 1. & 2.

PUNCTUM PRIMUM.

**T**Ria SS. P. N. fortissima obedientiæ sine mora motiva proponit: *Hæc, inquit, convenit his, qui nihil sibi a Christo charius aliquid existimant, propter servitium sanctum, quod professi sunt, seu propter metum gehennæ, vel gloriam vitæ æternæ. Pro-*



*pter servitium sanctum, quod professi sunt.* O quanta alacritate, & promptitudine non obediet, qui agnoscit gravitatem voti, quo obedire in S. Professione promisit? Qui votum istud non servat, Deo mentitur. Deo omnis ipsius religio accepta non est. Accelerata morte ab eo punietur. O quanta animi, & vultus hilaritate obediet, qui agnoscit, quod sine obedientia primum, & maximum illud mandatum implere non possit? Qui obedientiam vovet, Deum super omnia diligit. Abnegat etenim propriam voluntatem, & Divinæ solummodo inhæret. Plenitudo siquidem legis est dilectio, & hæc est charitas Dei, ut mandata ejus custodiamus. O quanta velocitate obediet, qui a Christo nihil aliquid sibi charius existimat? Etenim si Jacobo plurimorum annorum labores paucorum videbantur dierum præ magnitudine amoris, quo Rachel amabat; quam dulces & breves homini professio erunt labores SS. Obedientiæ, queis Christum lucrifaciat?

#### PUNCTUM SECUNDUM.

**O**bedientia convenit bis, qui nihil sibi a Christo charius aliquid existimant, seu propter metum gehennæ. Quis namque ad obedientiam etiam impossibilem non gestiat obedire, si perpendat pœnas, inobedientibus in inferno præparatas? Ibi semper patientur, quod nolent. Ibi semper ipsis negabitur, quod volent. Et quia semper obdurarunt voluntatem suam

suam contra Dei, SS. Regulæ, & Superiorum præcepta; hinc cum obdurato Pharaone non in rubro mari demergentur, sed in pelagus ignis intrudentur. O pelagus impertransibile, atque magnitudine acerbissimum! O ignem sævissimum, qui ignes nostri calorem ineffabiliter superat! hujus flamma montium instar ascendit, & maximam conficit abyssum. Pro! si sensibilis iste, atque materialis ignis eos, qui extra fornacem erant, quasi in momento absorpsit, quid iste ignis faciet inobedientibus? Ista, o Religiose! pensa, & nulla obedientia tibi dura, gravis, aut impossibilis videbitur. Sine mora obedies. Hoc namque modo, & non alio ignem illum terribilem evades. Cesset etenim propria voluntas, & infernus non erit.

### PUNCTUM TERTIUM.

**O** *Bedientia convenit his, qui nihil sibi a Christo charius aliquid existimant, vel propter gloriam æternæ vitæ.* Nemo sane non obedi-  
et sine mora, qui contemplatur gloriam æternæ vitæ, quam Deus dabit facientibus voluntatem suam. Ibi habebunt, quidquid volent. Ibi non habebunt, quidquid nolent. Ibi Deus semper faciet voluntatem eorum, qui hic ipsius fecerunt voluntatem. Quidquid desiderabunt, erit eis. Quidquid delectabit, eveniet ipsis. Omnes divitias, omnes delicias, omnes honores, omnem requiem, omne solatium, omne gaudium possidebunt. Amore

summi boni inebriabuntur. Concordia, & charitate Sanctorum omnium fruuntur. Nonne mille annos sub durissimo obedientiae jugo pro una hora vitae aeternae libenter vivere debes? Sed nunquid non paucos annos sub suavi SS. Obedientiae jugo traduces, ut vitam viuas aeternam?

#### PUNCTUM QUARTUM.

**A**N ergo, o Religiose! propter servitium sanctum, quod professus es, prompte obedis? Displicet Deo stulta promissio. An propter metum gehennae absque mora obedis? Quid ibi ardebit, nisi propria voluntas? An propter gloriam vitae aeternae alacriter obedis? Ubi ego sum, illic sit & minister meus. Dole, quod tam parum obedire hucusque studueris. Propone absque mora obedire,

1. Propter servitium sanctum, quod professus es.
2. Propter metum gehennae.
3. Propter gloriam vitae aeternae.



#### *DIES XII.*

##### De Paucitate Salvandorum.

Angusta via est, quae ducit ad vitam. Cap.  
5. v. 6.

PUN-



## PUNCTUM PRIMUM.

**M**Oysi dictum est in divisione hæreditatis. Pluribus majorem partem dabis, & paucioribus minorem. Hæc divisio speciem tenet futurorum bonorum, quæ a fidelibus sperantur. In hac beatiores sunt, qui pauci sunt, quam qui plures. Nam plures per viam latam, & spatiosam, quæ ducit ad infernum, iter agunt. Pauci vero per angustam, & arctam viam pergunt, quæ ducit ad vitam. Unde in aliis dicitur: Quam pauci sunt, qui salvantur. Et iterum in aliis: Ubi multiplicabitur iniquitas, refrigescet charitas multorum. Hinc terram plures hæreditantur. Pauci vero Dominum pro hæreditate accipiunt. Ne putes, quod ista solum de hominibus sæcularibus intelligenda sint; Abbas quidam ab extasi in se reversus cum gemitu exclamavit: O quam multos etiam ex nostro ordine vidi descendere in infernum; dum homines sæculares ipsis gloriam cœlestem præripiunt! At si eo tempore, quo vigeat maxime disciplinæ austeritas, hic S. Vir tot vidit Monachos damnari, quid de Monachis hujus temporis, in quo mera disciplinæ est laxitas, ediceret. Sane ex centum vix unum salvandum esse pronuntiaret. Tu ergo semper Disciplinæ *angustam viam*, ut monet SS. Pater, *arripe. Angusta enim est via, quæ ducit ad vitam.*

## PUNCTUM SECUNDUM.

**I**N arca Noë, ubi mensuræ cœlitus dantur, in inferioribus trecentorum cubitorum ponitur longitudo, & quinquaginta latitudo. Ubi vero tectum ejus ad summitem confurgit, in unius cubiti spatium consummatur. In inferioribus bestię, pecudes, & aves collocantur. Summitatem homo rationalis inhabitat. Hinc, quæ sit differentia inter paucos, & multos collige. Pone enim omnem humani generis numerum. Ex universis gentibus elige fideles, sine dubio pauciores erunt, quam sint universi. Ex fidelium numero elige meliores, certum est, quod multo inferior numerus remanebit. Ex his rursus elige perfectiores, & pauciores iterum reperies. Pauci ergo solum in summitate cœli constituendi sunt; reliqui autem in inferioribus partibus terræ collocabuntur. Tu, o Religiose! unum aut duos, qui ad summitem cœli aspirant, duntaxat sequere. Multitudinem fuge. *Angusta enim est via, quæ ducit ad vitam.* Pauci solum eam incedunt.

## PUNCTUM TERTIUM.

**P**AUCI sunt, qui salvantur. Multi quidem sunt vocati; sed pauci electi. Multi sunt vocati; sed quia non faciunt justitiam vocationis suæ, Regnum Dei transfertur ad paucos, qui faciunt justitiam ejus. Hinc S. Chrysostomus Hom. 40. ad pop. Tom. 5. ait: Quot esse putatis in civitate nostra, qui salvi fient? Infestum quidem est,


est, quod dicturus sum, dicam tamen: Non possunt in tot millibus centum inveniri, qui salventur; quin & de his dubito. Quanta enim in juvenibus; quæso, malitia? Quantus in senibus torpor? Quis ad ista non expavescat? Quis non gratiam vocationis suæ bonis operibus certam reddere conetur? Quis non studiosè talentum suum duplicare totis viribus nitatur, ne coronam sibi præparatam in alterum transferat? Ah! sequere igitur paucos, qui talenta sua bene impendunt: *Angusta enim est via, quæ ducit ad vitam.*

## PUNCTUM QUARTUM.

**A**N ergo, o Religiose! arctam viam disciplinæ ingrederis, ut cum paucis salveris? Contendite intrare per angustam portam. An unius, aut duorum solum exempla sequeris, ut cum paucis salveris? Domine si pauci sunt, qui salvantur? An gratiam vocationis tuæ tibi cum paucis certam facis, ne corona tua alteri, secundum eam digne ambulanti, detur? Regnum Dei transferetur ad populum alterum, facientem iustitias ejus. Dole, quod hucusque nimia securitate delusus, non contenderis per angustam portam cælum intrare. Propone

1. Per angustam disciplinæ viam incedere,
2. Unius, aut duorum tantum exemplum sequi,
3. Vocationem tuam bonis operibus certam facere, ut cum paucis salveris.





## DIES XIII.

## De Contradictione.

Obedientia, si cum responsione nolentis efficiatur, pœnam incurrit. Cap. 5. v. 8. & 12.

## PUNCTUM PRIMUM.

**I**Nter omnes inobedientiæ species perniciosissima sane est contradictio. Unde & SS. Pater eandem severe hisce prohibet: *Obedientia, si cum responsione nolentis efficiatur, pœnam incurrit.* Ex quibus triplicem contradictionem intellige. Prima est; si obedientiam verbo, sed non opere præstes. Provenit ista inobedientia a iudicio proprio. Dum enim quis præceptum Superioris aut inutile, vel indifcretum, aut superfluum iudicat, omittit agere, quod præceptum est. At non agendo pœnam contradicentium incurrit. Quantas enim pœnas non dabit, qui ipseus Dei iudicium contemnere in Superioris iudicio non veretur? Tu, ne iudicio proprio, & opere neglecto, vel *trepide, tarde, tepide*, aut imperfecte, illud peragendo Superiori contradicas, obtempera simpliciter. Noli, ut multi solent, post præcipientis imperium multas facere quæstiones. Cur? Quare? Quamobrem? Inde querelæ. Inde murmuratio. Inde amaritudo. Inde neglectus præcepti. Ah! noli errare, Deus non irridetur. Contradicis Prælato? Elevat manum suam ad prosternendum te dextera Dei.

PUN-

## PUNCTUM SECUNDUM.

**O**bedientia, si cum responsione nolentis efficiatur, pœnam incurrit. Altera contradictio enim est, si opus quidem præstes, sed verbis contradicas. Provenit ex voluntate propria. Dum namque velle tuum subicere recusas, & tamen propter pœnam opus omittere times, ex repugnantia voluntatis contradicis, & ex metu disciplinæ obedis. Verum absque merito. Deus quippe cor respicit obedientis. Et quas pœnas non dabit, qui cum responsione nolentis obediendo alios quoque ad inobedientiæ crimen pertrahit? Inde namque frequens excusatio. Inde simulatio impossibilitatis. Inde advocatio amicorum. Inde verba indignationem, & aversionem redolentia. Tu, ne pœnam scandalosorum contradictorum incurras, velociter obtempera. *In auditu auris obedi. Vicino obedientiæ pede, jubentis vocem factis sequere, ut veluti uno momento prædicta magistri jussio, & perfecta tua opera in velocitate timoris Dei, ambæ res communiter citius explicentur.*

## PUNCTUM TERTIUM.

**O**bedientia, si cum responsione nolentis efficiatur, pœnam incurrit. Ex hoc intellige tertiam contradictionem, si videlicet & contradicas, & opus non efficias. Provenit ex temeraria, & intolerabili superbia. Dum etenim prudentiorem, doctiorem, aut perfectio-

ctiorem te aestimas Superiore tuo, quid aliud sequi potest, quam ut crebro *cum illo intus, vel foris Monasterium contendas*, imperia illius *cum responsione nolentis* contemnas? At quas pœnas pro contemptu, quo Deum in Superiore spernis, dabis? Nonne qui spernis, & ipse sperneris? Nonne qui contemnis, & ipse contemneris? *Rebellio judicaberis. Prævalens tibi pœna erit ipsa mors.* Tu, ne tam terribiliter a Deo puniaris, semper crede; *quia obedientia, quæ majoribus præbetur, Deo exhibetur. Ipse enim dicit: Qui vos audit, me audit.* Ergo cum bono animo obedi. *Hilarem namque datorem diligit Deus.*


#### PUNCTUM QUARTUM.

**A**N igitur, o Religiose! verbo obedis, & opere contradicis? Maledictus homo, qui facit opus Dei fraudulenter. An verbo contradicis, & opere obedis? Quod si audire nolueris vocem Domini; venient super te omnes maledictiones. An verbo, & opere contradicis? Qui autem superbierit, nolens obedire imperio, morietur homo ille, & auferes malum de Israël. Dole, quod & tu non simpliciter, & cum bono animo Superiori tuo tanquam ipsi Deo hucusque obedieris. Propone

1. Nec opere,
2. Nec verbo,
3. Neque verbo, & opere simul contradicere.

**DIES**





## DIES XIV.

## De Humiliationibus externis.

Nisi satisfactione ibi coram omnibus humiliatus fuerit, majori vindictæ subjaceat Cap. 45. V. I.

## PUNCTUM PRIMUM.

**T**Res humiliationes externas SS. Pater requirit. Primam/exigit ab eo, qui fallitur in Oratorio. *Si quis, dum pronunciat Psalmum, Responsorium, aut Antiphonam, vel Lectionem fallitur: nisi satisfactione ibi coram omnibus humiliatus fuerit, majori vindictæ subjaceat.* Merito gravius luct; quippe qui noluit humilitate corrigere, quod negligentia deliquit. Grandis sane Patribus antiquis negligentia semper visa est, si quis vel minimum errorem in psallendo admisisset. Ratio eorum prima erat; quoniam cum tepore, & negligenter oraret. Altera vero; quia impediret alterum, qui intentius psallit. Tanti æstimabant opus Dei. Viva fide in psalmodia Universorum Domino assistebant. Angelos quoque præsentem indubitato credebant. Ceu Angeli ipsimet excessivo, atque intolerabili fervore Spiritus sancti accensi, non ex alieno, sed ex proprio sensu, & affectu psalmos decantabant. Hinc non immerito nec minimam negligentiam patiebantur. O Religiose! si Pa-

trum

trum devotionem in psallendo assequi non vales, saltem dum erras, eorum humilitatem sectare. Humilitate corrige, quod per negligentiam deliquisti.

### PUNCTUM SECUNDUM.

**A**lteram exigit ab eo, qui tardius occurrunt ad Officium Divinum, vel mensam, aut alias in quibuslibet rebus delinquant. De Prioribus enim asserit. *Quod si quis tarde occurrerit, non stet in ordine suo in Choro; sed ultimus omnium stet, aut in loco, quem talibus negligentibus seorsum constituerit Abbas, ut videatur ab omnibus, & vel pro ipsa verecundia sua emendetur.* De aliis ait. *Ad mensam, qui ante versum non occurrerit, si non usque ad secundam vicem emendaverit, non permittatur ad mensæ communis participationem.* De ultimis demum jubet: *Si quis quid excesserit, & non veniens continuo ante Abbatem vel congregationem ultro satisfecerit, majori subjaceat emendationi.* O humilitas, quam grata, & accepta es Deo, & hominibus! non solum Divinam justiciam placat, sed etiam humanæ satisfacit. Tollit culpam. Pœnam mitigat, aut penitus aufert. Procurat vitæ emendationem. Scandalum suo exemplo delet. Unde qui vim humilitatis agnoscit, & qui vere in se humilis est, nunquam ejusmodi humiliationes externas spernet, aut omittet. Sibi ipsi enim displicet. Cognoscit suum temporem in opere Dei, accediam in obedientia, delidiam in observantia

tia S. Regulæ. Ipse proinde non humilis, sed vilis per ejusmodi humiliationes externas cupit ab omnibus reputari. Vult suas transgressiones acriter castigari. Et quo magis inde despicitur, eo profundius humiliat semetipsum. Hoc vero modo S. Regulæ etiam errando satisfaciat, eamque observat. O Religiose! deficiis in pluribus SS. Regulæ præceptis? Juxta SS. Regulam saltem te humilia. Humilitate corriges, quidquid per negligentiam deliquisti.

PUNCTUM TERTIUM.

**T**ertiam exigit ab eo, qui Priorem aliquem offendit: *Si quis Frater pro quavis minima causa ab Abbate, vel quocunque Priore suo corripitur, quolibet modo, vel si leviter senserit animum Prioris cujuscunque contra se iratum, vel commotum quamvis modice, mox sine mora tamdiu prostratus in terra ante pedes ejus jaceat satisfaciens, usque dum benedictione sanetur illa commotio.* O potentiam humilitatis! omnem mansuefacit iram. Quem admodum enim Solis jubar, ut primum apparet, fugat tenebras, ita humilitas sua humiliatione omnem commotionem componit, & animum tranquillum reddit. Porro quod in corporibus nostris nervi, hoc est humilis Frater in Monasterio. Quia sicut nervi dispersa, & separata jungunt; ita humiliatio dissidentes animos conciliat. Quis enim tam commoti animi est, ut humilitate offendentis non emolliatur? Sane humiliatio oleum lilii est, quod om-



omnem iram, & vindictam lenit, ac sup-  
 mit. Tu ergo, ne a terra surgas, ne humili-  
 are te desinas, donec charitatem Superiorum,  
 aut Fratrum restitueris. Humilitate corrige,  
 quod contra charitatem deliquisti.

PUNCTUM QUARTUM.

**A**N igitur, o Religiose! te ob errores in Cho-  
 ro humilias? Humiliatio Deo satisfacit. An  
 te humilias ob defectus Regulæ? Humiliatio  
 disciplinam integram conservat. An te humi-  
 lias ad sedandam commotionem Fratrum? Hu-  
 miliatio charitatem redintegrat. Dole, quod  
 defectus tuos humilitate corrigere neglexeris.  
 Propone

1. Humiliatione defectus in Choro,
2. In Regulari disciplina,
3. In commotione Priorum corrigere.

\*\*\*\*\*

*DIES XV.*

IN GLORIOSA ASSUMPTIONE B. V.  
 MARIÆ.

De Humilitatis Exaltatione.

Qui se humiliat, exaltabitur. Cap. 7. §. I. v. I.

PUNCTUM PRIMUM.

**S**I unquam hoc Divinæ Veritatis effatum,  
 quod SS. Pater Noster nobis proponit:  
*Qui se humiliat, exaltabitur*, adimple-  
 tum,

tum, in B. V. M. gloriosa Assumptione suum effectum sortitum est. Humiliavit se B. V. infra omnes creaturas; dum cogitavit, qualis esset ista salutatio. Indignissimam quippe se reputabat, quæ assumeretur in Matrem Dei. Et ecce! hodie exaltata est super omnes puras creaturas, super omnes homines, & Angelos sanctos. Sicut enim nec in terris locus dignior est humili uteri virginalis templo, in quo Filium Dei Maria suscepit, ita nec in cœlis regali folio, in quo Mariam hodie Mariæ Filius sublimavit. Hinc S. Ecclesia evangelicam lectionem recitat, in qua Benedicta in mulieribus excepsisse intelligitur Salvatorem, ut ex hac inæstimabili susceptione aliquatenus æstimemus inæstimabilem illam susceptionem. Super omnem quippe creaturam a Filio exaltata est cum eo honore, quo tanta Mater digna fuit, & cum ea gloria, quæ tantum decuit Filium. Quanto enim humilior fuit in terris, tanto sublimior facta est in cœlis. Cupis & tu exaltari in cœlis super ceteros, *omnibus te inferioriorem, & viliorem non solum tua lingua pronuncia, sed etiam intimo cordis crede affectu.*

## PUNCTUM SECUNDUM.

**B**Eata Virgo turbata est in sermone Angeli. Indignam se reputavit, ut tam sublimia sibi annuntiaret. Et ecce! turbantur, & stupent Angeli in gloriosa ipsius Exaltatione. Præ admiratione clamant: Quæ est ista, quæ ascendit de deserto, deliciis affluens? Ac si ma-

Spir. S. Ben. P. III.

L

nise-

nifestius dicant: Quanta est hæc, & undeci de deserto mundi ascendenti affluentia tanta deliciarum, & gloriæ? Nec enim pares inveniuntur vel in nobis, quos in civitate Domini lætificat fluminis impetus, qui a vultu gloriæ voluptatis gloria potamur. Quæ est ista, quæ de sub sole [ ubi nihil est nisi labor, & dolor, & afflictio spiritus ] ascendit deliciis spiritualibus affluens? Quid ni delicias dixerim virginitatis decus cum munere fecunditatis, humilitatis insigne, distillantem charitatis favum, misericordiæ viscera, plenitudinem gratiæ, prærogativam gloriæ singularis? Ascendens igitur de deserto Regina mundi etiam Angelis sanctis, ut canit Ecclesia, speciosa facta est, & suavis in deliciis suis; quia prius coram Angelo se humiliavit. Cupis, & tu exaltari ad Angelorum consortium, turbare de eorum consortio in terris; quia *ab Angelo tibi deputato quotidie, die, noctuque Domino factori tuo opera tua nunciantur.*

### PUNCTUM TERTIUM.

**B**Eata Virgo profundissime se coram Deo humiliat, dum se ancillam Domini confitetur. Proxima hinc collocatur ad thronum gloriæ Filii sui. Quantum enim humilitatis, & gratiæ in terris possedit præ cæteris, tantum & in cœlis obtinet gloriæ singularis. Quod si oculus non vidit, nec auris audivit, nec in cor hominis ascendit, quæ præparavit Deus diligentibus se: quod gloriæ pondus præparavit humili




humili Matri suæ gignenti se, & præ omnibus super omnia diligenti se? Optimam plane partem gloriæ consecuta est Maria in cœlis; quia infimam sortem ancillæ Domini sibi elegit in terris. Cupis & tu exaltari ad gaudium Domini tui, prius *reum te omni hora de peccatis tuis existima*, & jam *te tremendo Judicio Dei representari æstima*.

PUNCTUM QUARTUM.

**A**N igitur, o Religiose! infra omnes creaturas te humilias? *Qui se humiliat, exaltabitur*. An omni hora coram Angelo Custode propter negligentias tuas te humilias? *Qui se humiliat, exaltabitur*. An omni hora te propter peccata tua coram Deo iudice humilias? *Qui se humiliat, exaltabitur*. Dole, quod cum gloriosa Regina cœli, & terræ te humiliare non curaveris; quatenus etiam cum eadem ad gloriam cœlestem exaltari merearis. Propone

1. Infra omnes te abjicere,
2. Coram Angelis omni hora de negligentia tua confundi,
3. Coram Deo iudice tuo omni hora reum te de peccatis tuis agnoscere, ut saltem etiam assumaris per humilitatis meritum ad gloriam Dei.



DIES XVI. PRO FESTO SS. JOACHIMI PATRIS B. V. MARIAE.

Quod celebratur Dom. infr. Oct. Assump. B. V.  
Quomodo Religiosus in tribulatione sub-  
venire debeat.

In tribulatione subvenire. Cap. 7. Instr. 18.

PUNCTUM PRIMUM.

**S**ANCTISSIMUS Patriarcha Joachim omnibus  
virtutibus clarere debuit ; quia Parens  
Deiparae effici promeruit. Inter alia SS.  
Patres commemorant , quod facultates suas  
in tres partes distribuerit. Primam Ecclesiae,  
alteram pauperibus, & tertiam propriae su-  
stentationi assignavit. Mihi ex omnibus ejus  
donis gratiae hodie placet misericordia in pro-  
ximos ; quia & ad hanc nos SS. P. N. obligat ;  
dum ait : *In tribulatione subvenire*. Ut sub-  
venias , viscera misericordiae , & intimae com-  
passionis assumere debes. Non enim subve-  
niet in tribulatione , qui nescit compati. O  
quam magna fuit ista compassio in Sanctis !  
Isaias Propheta omnes jubet recedere a se , ut  
amare flere posset. Non vult admittere con-  
solatorem super vastitate filiae populi sui. Je-  
remias optat aquam capiti suo , & oculis suis  
fontem lachrymarum , ut ploret die , ac nocte  
interfectos populi sui. Paulus eundem , in quo  
tribulatus versatur , statim induit. Quis in-  
firmatur , & ego non infirmor ? Quis scanda-  
liza-

lizatur, & ego non uror? Semper namque Sancti proximorum miseriam propriam faciebant. Tantum illis, quantum sibi succurrebant; quia sicut semetipsos omnes diligebant. Si eorum vestigiis & tu insistes, in omni tribulatione proximis tuis subvenies.

### PUNCTUM SECUNDUM.

**U**T proximis *in tribulatione subvenias*; ora pro ipsis. Oratio etenim efficacissimum remedium est, sublevandi omnem proximi tribulationem. Si namque oras pro tribulato, consentis cum ejus oratione. Omnia juxta Divinum promissum levamina tribulationis illi impetras. Nullum quippe munus Deo acceptabilius est, quam oratio prolata ex radice veræ dilectionis. Quanto fervore non oravit Daniel ad avertendam desolationem templi? In sacco, & cinere postulat impleri, quod promiserat Deus, Non quod esset incredulus, sed ne in bono alieno curando negligens inveniretur. Ad hunc orationis zelum ipsemet Salvator noster nos instruit, quando orationem Dominicam nos docuit. Non enim jussit, unumquemque pro se solo orare, sed pro omnibus, sicut pro semetipso. Non dixit: libera me a malo; sed: libera nos a malo, ut pro malis alienis sicut pro nostris oremus.

### PUNCTUM TERTIUM.

**U**T proximis *in tribulatione subvenias*, consilio, & auxilio adjuva. Dum enim alie-



nam salutem sive corporis, sive animæ curas, tuam procuras. Siquidem Deus cum omnes invicem colligare vellet, talem rebus utilitatem imposuit, ut in proximi utilitate etiam alterius colligata sit. Itaque si piger fueris in cura Fratris tui, intellige nulla prorsus ratione te salutem consecuturum. Considera, si quando domum aliquam contingat exuri, & vicini nullo consilio, aut auxilio juvent; quantam jacturam faciant. Ignis quoque eorum domos, & universas facultates comburet. Haud secus si salutem proximi tui despicias, & tuam perdes. Econtra si promoveas, & tuam in tuto collocabis. Omnia siquidem Deus ita ordinavit, ut nemo in propriam veniat salutem, nisi per alienam transeat. Verum oportet, non hinc, sed divina voluntate ad id adduci: nemo suum quærens commodum, ut id inveniat commodum. Tu igitur tanto studiosius auxilio, & consilio proximis *in tribulatione subveni*, quanto ardentius a propria tribulatione cupis liberari.


#### PUNCTUM QUARTUM.

**A**N ergo, o Religiose! viscera misericordiæ, & compassionis assumis, ut proximo subvenias? Deduc quasi torrentem lachrymas per diem, & per noctem super tribulationem Fratrum tuorum. An oras, ut in tribulatione subvenias? Leva ad eum manus tuas pro anima parvulorum tuorum. An auxilio, & consilio juvas, ut in tribulatione subvenias?

Pau-

Paulus non solum aliorum calamitatibus participavit; sed etiam maximas ipse subiit, ut cæteri bene haberent. Dole, quod hucusque proximis in tribulatione subvenire neglexeris. Propone cum S. Joachimo

1. Viscera misericordiæ induere, & in tribulatione subvenire.
2. Per orationem, atque
3. Per consilium, & auxilium.



## DIES XVII.

### De tribus Motivis Conversionis Morum.

Cavendum est omni hora, Fratres, sicut dicit in Psalmo Propheta, ne nos declinantes in malo, & inutiles factos aliqua hora aspiciat Deus. Cap. 7. §. 2. v. 28.

#### PUNCTUM PRIMUM.

**U**T nos SS. Paternoster ad jugem morum nostrorum conversionem excitaret, *cavendum est*, ait, *omni hora, Fratres, sicut dicit in Psalmo Propheta, ne nos declinantes in malo, & inutiles factos, aliqua hora aspiciat Deus.* In his quippe duobus omnis morum conversio consistit, ut declinemus a malo, & faciamus bonum. Ad istem vero morum conversionem primum motivum est, jugis memoria Divinæ præsentiae. Unde SS. Pater vult, ut semper illud Prophetæ animo

nostro revolvamus: *Oculi Domini speculantur bonos, & malos. Dominus de cælo semper respicit super filios hominum, ut videant, si est intelligens, aut requirens Deum.* Quis enim tam obdurati cordis, ut non omni hora a malo declinet, & faciat bonum, si viva fide credat, Deum vel ad remunerationem, vel ad poenam semper omnes suas cogitationes verba, & opera perscrutari? Deus namque totus tibi inest, si bene agis. Adest semper per majorem gratiam, ut abundantior in cœlis retribuat pro bono gloriam. Adest & tibi, si male agis, per vindictam; quamvis longe sit ab iniquis cogitationibus tuis. Intus quippe est, qui judicat. Et licet, quod in corde delinquimus, lateat homines; non tamen latet judicem nostrum. Ipso teste, ipso iudice peccamus. Omnia enim nuda, & aperta sunt oculis ejus. Et magis intrinsecus illi, quam extrinsecus hominibus conspicabiles sumus. Hinc si metuimus coram iudice terreno inordinati apparere, quando magis timeamus Divinum Judicem, aut male, aut inutiliter agendo offendere? Hæc cogita omni hora. Semper converte mores tuos in melius.

#### PUNCTUM SECUNDUM.

**A**lterum motivum est præsentia SS. Angelorum. Hinc SS. Pater serio ad illam nos hortatur, dicens: *Ab Angelis nobis deputatis quotidie die, nocteque Domino factori nostro opera nostra nunciantur.* Quis enim non declinet



clinet a malo? Quis bonum non agat, si firmiter sibi præsentem credat Angelum suum Custodem? Quis audeat Angelo præsentem, quod vidente homine non auderet? Quis non sequatur Angelum suum Custodem? Jugiter Creatori suo adhæret. Rectum iter ad Creatorem demonstrat. Ne offendas in via, in manibus portabit te. O quantum contristaberis eum, si opera mala tantum Creatori referre possit! o quantum lætificabis eum, si operaduntaxat bona illi nunciare valeat! vidit hoc Abbas Paulus simplex; quando intrantes Fratres in Ecclesiam accuratius intuebatur. Angeli cum gaudio omnes comitabantur. Unum solum fornicarium Dæmones missō fræno in naribus ejus trahebant. Angelus vero ipsius a longe sequebatur totus tristis. Vide ergo, ne & tu Angelum tuum Custodem contristes, ut te coram Deo judice aliqua hora accusare debeat. Jugiter converte mores tuos in melius.

PUNCTUM TERTIUM.

**T**ertium motivum est tempus conversionis semper prætervolans. Pro quo SS. P. N. suadet: *Et parcendo nobis in hoc tempore, quia pius est, & expectat nos converti in melius, ne dicat nobis in futuro: Hæc fecisti, & tacui.* Quodvis enim momentum temporis aut novam gloriam, aut novam pœnam in æternitate promeretur. Quomodo igitur quis vel momentum in malo impendat? Quomodo quis non omni momento mores suos convertat in melius?


melius? Tempus etenim sine intermissione volat. Sane si Cœlites doloris capaces forent, hoc unum dolerent, quod tempus in bonis operibus non studiosius traduxissent. Et damnati centuplum multiplicatas pœnas usque in diem iudicii libenter sustinerent, si vel unum momentum gratiæ de deperdito tempore recuperare possent. Et tu quot dies, & annos in malo, in otio, & negligentia non perdis? Ah! cogita omni hora: Ubi de hac vita migravero, omnis mihi benefaciendi facultas præcisa erit. Hoc ipsum solum tempus, quod hic vivo, ad emendationem dierum malorum, atque ad ea, per quæ gratiam ejusineam, facienda Deus præfinivit. Ergo dum tempus habes, operare bonum. Mores tuos converte in melius: *Ne dicat tibi in futuro: Hæc fecisti, & tacui.*

#### PUNCTUM QUARTUM.

**A**N igitur, o Religiose! convertis mores tuos ob præsentiam Dei? Deus scrutatur renes, & corda. An convertis mores tuos ob præsentiam Angelorum? Angelis suis Deus mandavit de te. An convertis mores tuos ob concessum tempus emendationis? Ecce! nunc tempus acceptabile. Dole, quod ista motiva convertendi semper mores tuos non melius perpenderis. Propone omni hora breviter, sed serio ad convertendos mores tuos

1. Vel præsentiam Dei,
2. Vel præsentiam Angelorum,
3. Vel tempus conversionis jugiter prætervolans cogitare.

*DIES*



## DIES XVIII.

## De Indifferentia in S. Obedientia.

Si qua requirenda sunt a Priore, cum omni humilitate, & subjectione reverentiæ requirentur. Cap. 6. v. 7.

## PUNCTUM PRIMUM.

**N**emo perfectam obtinebit obedientiam, nisi indifferentia iudicii, & voluntatis hoc est, *omni subjectione* præ omnibus claruerit. Enimvero si illud duntaxat bonum, vel malum judicare non paratus sit, quod discretionem Superioris tale cognoverit; nunquam perfecte alieno arbitrio viveret. Et si illud solum non volet, quod Superiori placuerit; nequaquam aliena voluntate ambulabit. Oportet igitur Religiosum indifferentem esse quoad munia ab obedientia injuncta; ita, ut pro libitu Superioris ea relinquere semper paratus sit. Hoc requirit SS. Pater, quando ait de Præposito: *Ideoque nos prævidemus expedire, in Abbatis pendere arbitrio ordinationem Monasterii sui.* Quamdiu enim aliquid agitur, aut retinetur magis ex propria voluntate, quam ex obedientia; imperfectum est, imo non nunquam omni merito evacuatur. Perfecta namque obedientia nihil debet habere de suo, sed omnia ex alieno iudicio, & voluntate. Si equidem aliquid habebit de suo; quam



quam ægre dimittet, quod semel illi injunctum est? Nonne clare patet, quod suo arbitrio, suæ voluntati ob commodum, gloriam propriam, vel convenientiam operis injuncti ad genium suum vixerit, quam judicio, & voluntate Superioris pro Dei gloria, & amore steterit? Verus obediens in omnibus semper manet indifferens.

### PUNCTUM SECUNDUM.

**O**Portet Religiosum indifferentem esse quoad munia ab obedientia injungenda. Hoc requirit SS. Pater Noster, quando de Cellenario ait: *Omnia, quæ ei injunxerit Abbas, ipsa habeat; à quibus prohibuerit, non præsumat.* Ita nempe indifferens ad omnia opera obedientiæ esse debet, sicut indifferens est instrumentum in manu artificis ad usum, vel non usum. Quam primum aliquid ex proprio motu exquisierit, aut egerit; proprium erit suæ voluntati, & judicio; sed non Superioris. Displicet autem ubique Deo proprietas. Quid enim sic Deus punit in homine, quam judicium proprium, & voluntatem propriam? Hinc sancti Patres constanter asseriebant: verum obedientem sine omni propria electione, & exquisitione solum debere attendere ad mandata Superioris sui. Quomodo vero attendit mandatis Superioris sui, qui propria electione, & exquisitione eadem prævenit? Quomodo alieno judicio, & imperio vivit, qui suum ubique exquisirit? An non sibi ipse potius im-

imperat, quam Superior? Verus obediens ad omnia est indifferens.


PUNCTUM TERTIUM.

Oportet Religiosum indifferentem esse, quoad petenda a Superiore. Hoc requirit SS. Pater Noster, quando de taciturnitate ait: *Si qua requirenda sunt a Priore, cum omni humilitate, & subiectione reverentia requirantur.* Voluit enī SS. Pater eradicare omnem proprietatem voluntatis. Quæ sine subiectione, seu indifferentia, utrum concedantur, nec ne, petuntur, & obtenta, & denegata plurimum nocent. Etenim si obtinentur, ad quid deserviunt, nisi ad implendam propriam voluntatem? Si autem denegantur, quid aliud causant, quam tristitiam mentis, aut aperta contra Superiorem murmura? Insatiabilis etenim est voluntas propria. Semper ea appetit, quæ aut vana, aut voluptuosa sunt. Vanitate, & voluptate nunquam expletur. O si Monachus ille suis importunis precibus licentiam abeundi ex Monasterio a SS. Patre non extorsisset, nunquam Draconem infernalem ad devorandum se jamjam paratum in via offendisset! tune ergo tam nociva animæ tuæ, quæ Diabolus tibi per voluntatem propriam petenda suggerit, similiter assiduis precibus extorqueas? Verus obediens est indifferens pro omnibus.

## PUNCTUM QUARTUM.

**A**N igitur, o Religiose! indifferens es in omni obedientia. Domine, quid me vis facere? An indifferens es ad omnem obedientiam? Paratus sum. An indifferens es pro omni obedientia? Verumtamen non mea, sed tua voluntas fiat. Dole, quod hucusque proprietatem voluntatis, & iudicii tui in omnibus ferme secutus fueris. Propone

1. Indifferens esse in omni obedientia,
2. Ad omnem obedientiam,
3. Pro omni obedientia.



## DIES XIX.

## De Religiosa Modestia.

Festinent invicem se prævenire ad opus Dei; cum omni tamen Modestia. Cap. 22. v. 9.

## PUNCTUM PRIMUM.

**N**ihil sic ædificat, quam modestia. Unde Apostolus hortatur. Modestia vestra, nota sit omnibus hominibus. Et SS. Pater nec minimum quid contra modestiam in suis admittit, dicens: *Festinent invicem se prævenire ad opus Dei, cum omni tamen modestia.* Tria vero ad hanc modestiam requirit. Primum consistit in moderamine oris. Vult etenim, ut *linguam ad loquendum prohibeat Monachus; & taciturnitatem habens*



*bens usque ad interrogationem non loquatur : nam loqui , & docere magistrum condecet ; tacere , & audire discipulo convenit. Vult , ne sit facilis , ac promptus in risu , & clamorosus in voce. Vult , ut cum loquitur Monachus , leniter , & sine risu , humiliter cum gravitate , vel pauca verba , & rationabilia loquatur. Quid enim aliud clamor , risus , & multiloquium denotant , quam intolerabilem mentis tumorem ? Quid aliud denotant , quam cor compunctione , & contritione vacuum ? Quid aliud denotant , quam animum status , & vocationis suæ immemorem , atque sub habitu Religioso sæcularem ? O quantum ædificantur homines hujus sæculi , cum Monachum lenem , humilem , & parcum in verbis conspiciunt ! quam bene de ipso , imo & de tota Religione sentiunt ! imitare ergo SS. Patrem. Ecce ! in adventu Regis Totilæ non nisi pauca , & salubria verba loquitur.*

## PUNCTUM SECUNDUM.

**A**Lterum consistit in compositione corporis. Vult equidem SS. Pater , ut *non solum corde Monachus , sed etiam ipso corpore humilitatem videntibus se semper indicet ; ubicunque inclinato sit semper capite , defixis in terram aspectibus. Vult , ut se custodiat a vitiis manuum , ne eas hinc , inde indecore jactet , iis gesticuletur , sed sub scapulari intra manicas compositas retineat. Vult , ut se custodiat a vitiis pedum , ne sedens unum genu alteri super-*

superimponat, aut gradiens nimis concitato, vel nimis lento gressu incedat. Et merito. Impudentis animi signum est, fixo aspectu aliquem intueri. Dissoluti cordis indicium est, oculis jugiter vagari. David plane; quia incustoditus fuit in oculis, peccatum adulterii, & homicidii incurrit. Incompositæ quoque mentis præsagium est, si gressus sit festinator, aut manus dissolutior. Ex hujusmodi Juliani immodestia quanta mala universo orbi ex vero non præfagiit S. Basilus? Et quanta scandala mundo non infert Religiosus immodestus? Passim male de ipso, & de ordine sentitur. Imitare ergo SS. Patrem tuum. Ecce! talem te cupit esse per Regulam suam, qualis ipse fuit per vitam suam.

### PUNCTUM TERTIUM.

**T**ertium consistit in humili conversatione. Vult namque SS. Pater, ut *nulli liceat in appellatione nominum alium puro nomine appellare; sed priores juniores suos Fratres; juniores autem priores suos Nonnos vocent.* Vult, ut *ubique sibi obviant Fratres, junior a priore benedictionem petat.* Vult, ut *transeunte majore, minor surgat, & det ei locum sedendi; nec præsumat junior consedere, nisi præcipiat ei senior suus.* Superbiam, & intolerabilem plane proterviam redolet; quando Junior debitam reverentiam Seniori exhibere renuit. Caret humilitate, & Religiosa modestia, qui, quando Senior est, juniores pas-

sim

sim contemnit. Ex his vero dissolutio in lo-  
quela, in disciplina, in omni Monasterii ordi-  
ne oritur. Charitas læditur. Obedientia con-  
temnitur. Ædificatio unius ad alterutrum de-  
ficit. Et cum nimia familiaritas immodestia  
conversacionis teneatur, contemptus ad in-  
vicem nascitur: vel cum nimia gravitas su-  
perbia vitæ custodiatur, amor fraternitatis,  
ac confidentia ad invicem læditur. Ascende  
ergo in cœlum, cujus conversatio esse debet  
in cœlis. Disce ab Angelis modestiam, & cun-  
ctis eris mitis & humilis.

## PUNCTUM QUARTUM.

**A**N ergo, o Religiose! modestiam oris ob-  
servas? Sapiens verbis innotescit paucis.  
An observas modestiam corporis? Sapientum  
oculi in capite eorum; stultorum autem in  
fines terræ. An observas modestiam conver-  
sationis? Discite a me; quia mitis sum, &  
humilis corde. Dole de tua immodestia, Pro-  
pone

1. Modestiam oris,
2. Corporis,
3. Conversationis jugiter observare.

(XXXXXXXXXXXXXXXXXXXXXXXXXXXXXXXXXXXX)

DIES XX.

IN FESTO S. BERNARDI

ABBATIS.

De Zelo bono.

Spir. S. Ben. P. III.

M

Est



Est zelus bonus, qui separat a vitiis, & ducit ad Deum, & ad vitam æternam. Cap. 72.

v. 2.

### PUNCTUM PRIMUM.

**I**Nter omnes virtutes S. Bernardi eminet admirabilis in eo zelus bonus, de quo SS. Pater Noster ait: *Est zelus bonus, qui separat a vitiis, & ducit ad Deum, & ad vitam æternam.* Habuit enim *zelum bonum, qui separat a vitiis.* Quo enim zelo non efferbuit in carnem suam? Vix aliquando curiosius aspiciendo defixos in mulierem oculos aliquamdiu tenuit, mox stagno aquarum gelidarum tamdiu se immerfit; donec omnis carnalis affectus in eo totus refriguit. Quo zelo non castigavit corpus suum? Videns non videbat. Audiens non audiebat. Gustans non gustabat. Sentiens, nihil sentiebat. Ita totus absorptus erat ad coelestia. Sic per integrum annum, quo fuit in domo Novitiorum ignoravit; an domus ipsa haberet testudinem. Sic ad cibum fumendum, quasi ad tormentum accessit. Sic vigilavit ultra naturæ possibilitatem; quia nullum se tempus magis perdere, quam somni conquestus est. Semper fuit infensissimus hostis sui corporis; & ideo vitia carnis omnia subjugavit. Quo zelo mundi inquinamenta fugit? Universas mundi vanitates, & fallacias contempsit, imo & dignitates Ecclesiasticas respuit; ne vitiis ipsius vel a longe obnoxius foret. Zelo zelatus est in his SS. Patrem

trem suum Benedictum. Omni fervore Spiritus ejus vestigia secutus est. Et tu nunquam a vitiis securus eris, nisi hunc zelum, *qui separatur a vitiis*, assumes. Vis vi repellitur.

## PUNCTUM SECUNDUM.

SANCTUS Bernardus habuit *zelum bonum, qui ducit ad Deum*. Quo namque zelo ad finem Regulæ, seu ad charitatem non contendit? Semper corpore cum infirmus esset, nihilominus remissionem de communi labore, vel opere nunquam admisit. Alios quippe sanctos esse arbitrabatur, & perfectos; se vero non perfectorum indulgentiis, sed novitio fervore, & disciplinæ rigore indigere putabat. Quo zelo ad perfectionem charitatis non eucurrit? Quotidie se ad novum fervorem hisce exstimulavit: Bernarde! ad quid venisti? Quo zelo charitatem in omnibus non exercuit? Jugiter aut orabat, aut legebat, aut meditabatur. Ad orandum, si se solitudo offerret, ea utebatur: sin autem, ubicunque seu apud se, seu in turba esset, solitudinem cordis ipse sibi efficiebat, & ubique solus cum solo Deo erat. Zelo zelatus est SS. Patrem suum. Sequere & tu per exactam communis Regulæ observantiam, per novum fervorem, & per jugem orationem. Sic & non aliter finem S. Regulæ obtinebis. In meditatione exardescit ignis charitatis.

## PUNCTUM TERTIUM.

**S**ANCTUS Bernardus habuit *zelum bonum, qui ducit ad vitam æternam*. Quo equidem zelo per viam crucis ad cœlum non perrexit? Summa patientia multas infirmitates toleravit. Quarum periculosior quidem in meatu arctissimi gutturis, nil poenitus siccum, vix solidum aliquid admittentis; molestior erat defectus stomachi, viscerumque corruptio. Hæ continuæ illi, præter alias sæpius incidentes. In istis maximo ei solatio fuit; quod levi, ac momentaneo dolore æternum gloriæ pondus promereri posset. Quo zelo per viam crucis ad cœlum non tetendit? Injurias, & calumnias admirabili patientia, atque mansuetudine supportavit, ut cum Christo per crucem ad gloriam transiret. Quo zelo cœlum non jugiter suspiravit? Lege ipsum ad Arnaldum bonæ vallis Abbatem sic scribentem: Orate Salvatorem, qui non vult mortem peccatoris, ut tempestivum jam exitum non differat, sed custodiat. Sectatus est SS. Patrem suum. Ni & tu per patientiam, & juge desiderium ad cœlum contendas, non intrabis. Oportuit enim Christum pati, & ita intrare in gloriam suam.

## PUNCTUM QUARTUM.

**A**N ergo, o Religiose! habes *zelum*, qui se parat a vitiis? Sine zelo nunquam superabis vitium. An *zelum* habes, qui ducit ad Deum? Sine zelo, & fervore paulatim *charitas*



ritas refrigescit. An habes zelum, qui ducit ad vitam æternam? Desiderium cœlestis Patriæ præcedit fruitionem æternæ beatitudinis. Dole, quod hucusque zelum bonum non habueris. Propone cum S. Bernardo exercere zelum bonum

1. Qui separat a vitiis, &
2. Qui ducit ad Deum, &
3. Qui ducit ad vitam æternam.



## DIES XXI.

### De Bona Consuetudine.

Universa absque ullo labore velut naturaliter ex consuetudine incipiet custodire. Cap. 7.

v. 88.

### PUNCTUM PRIMUM.

**H**isce, Ergo omnibus humilitatis gradibus ascensis, Monachus mox ad cbaritatem Dei perveniet illam, quæ perfecta foras mittit timorem: per quam universa, quæ prius non sine formidine observabat, absque ullo labore, velut naturaliter ex consuetudine incipiet custodire; non jam timore gebennæ, sed amore Christi, & consuetudine ipsa bona, & delectatione virtutum. Hisce, inquam, SS. P. N. vim, utilitatem, & modum acquirendæ consuetudinis bonæ nobis proponit. Primo igitur ait: Absque ullo labore velut naturaliter incipiet custodire. Tanta

vis consuetudinis est, ut ea, quæ sibi prius quis impossibilia arbitrabatur, nunc naturalia per multiplices virtutum actus fiant. Tanta vis consuetudinis est, ut ea quæ prius non nisi cum magna difficultate, & horrore laboris quis perfecit, nunc sine omni molestia, sicut quodcunque aliud opus naturale agat. Tanta vis consuetudinis est, ut nonnunquam etiam nolens ea faciat, quibus semel assuetus est. Quas enim malas animi passiones non supprimit consuetudo? Quænam virtus non assiduitate obtineatur? Quodnam exercitium Regulare non usu perficiatur? Quænam austeritas disciplinæ usu, & consuetudine non dulcescat? Primitus enim importabile tibi videbitur Regulæ jugum. Processu temporis, si assuescas, judicabis non adeo grave. Paulo post & leve senties. Demum non solum non senties, sed etiam te delectabit. Cur igitur non in principio aliquam vim tibi inferas, ut vi consuetudinis bonæ delectationem virtutum acquiras? Nulla delectatio dulcior, & diuturnior est, quam virtutis.

#### PUNCTUM SECUNDUM.

**S**ecundo ait: *Non jam timore gehennæ, sed amore Christi, & delectatione virtutum incipiet custodire.* Consuetudo bona equidem magnam parit delectationem virtutum, ut delectationes carnis horrore sint, ac nausæ. Consuetudo bona deducit ad amorem Christi; ut amplius non timeat gehennam; quia ex ipso

ipso usu virtutis peccare desit. Consuetudo bona cor ad divinas illuminationes, & affectiones supernaturales sensibile & penetrabile reddit. Consuetudo bona ad ferventiores & sublimiores actus virtutum trahit. Consuetudo bona ita obligat mentem, ut suo modo non possit deficere a rectitudine virtutis. Tentatur ad illicita; sed mox ipsa assueta virtus sine difficultate omnia tentamenta abjicit. Imo eo frequentius, & facilius exercetur, quo crebrius quasi ab extrinseco tantum infestatur. Ipsa quippe delectatio consuetudinis bonæ etiam insensibiliter ad virtutem trahit. Cur igitur non ad has bonæ consuetudinis utilitates obtinendas omni contentione allabores? Ecce! peccata, quamvis magna, & horrenda, cum in consuetudinem venerint, aut parva esse, aut nulla creduntur. Ecce! usitata culpa ita cor obdurat, ut semetipsum amplius non sentiat, nec exhorreat. Et si quando conatur assurgere, mox labitur: quia ubi diu sponte perstitit, & ibi cum noluerit, quasi coacta cedit. Ecce! tenent pravæ consuetudines, quem semel ceperunt, atque quotidie duriores existunt: & non nisi cum peccatoris vita finiuntur. Et tu loco malæ, bonam consuetudinem tibi non facias?

## PUNCTUM TERTIUM.

**T**ertio ait: *Omnibus humilitatis gradibus ascensis, Monachus mox ad charitatem perveniet illam, quæ foras mittit timorem. Uno,*



aut altero actu consuetudo bona non acquiritur. Quo consuetudo mala fuit diuturnior, eo longius erit per frequentatos actus consuetudo bona recuperanda. Hinc primitus timore gehennæ cessandum a vitiosa consuetudine; ex consideratione namque pœnarum horror peccati inducendus est. Deinde per concupiscentiam Patriæ coelestis amor virtutis acquiritur; ut frequenter eandem quamvis difficulter exerceamus. Et quoniam inolita malitiæ consuetudo adhuc semper ad malum nos tentat, necesse est a Patre spirituali tamdiu remedia virtutis expetere, donec consuetudine ipsa bona penitus extirpetur. Quod revera eo citius fiet, quo diligentior, & constantior eris in virtutum exercitio. Et cur non omni perseverantia diligentia virtutis consuetudinem obtinere satagas? Per hanc *ad charitatem pervenies illam quæ foras mittit timorem.* Ah! ne mireris, quod SS. Pater tuus semper in oculis superni Inspectoris potuerit habitare secum. Consuetudine bona jugem contemplationem, & amorem Dei præsentis obtinuit. Mirarer ego, quod tu eandem gratiam non haberes, nisi negligentiam tuam in acquirenda bona consuetudine scirem. Sed quamdiu angustiaberis? Maxima nonne angustia est, a mala consuetudine exurgere velle, nec exurgere; desiderio ad superna tendere, sed adhuc actu in infimis hære; præire corde, nec sequi opere; a semetipso contradictionem pati?

## PUNCTUM QUARTUM.

AN ergo, o Religiose! perpendis vim bonæ consuetudinis? Est quasi altera natura. An consideras utilitates bonæ consuetudinis? Ducit ad perfectam charitatem. An per frequentatos actus bonam consuetudinem tibi facis? Bonum est viro, cum portaverit jugum ab adolescentia sua. Dole, quod ad obtinendam bonam consuetudinem tam negligens fueris. Propone in hunc finem

1. Sapius perpendere vim consuetudinis bonæ, &
2. Ejus utilitates; atque ideo
3. Ad eam obtinendam per frequentatos actus continuo incumbere.



## DIES XXII.

De Modis procurandi Attentionem in  
SS. Psalmodia.

Surgamus ad confitendum ei. Cap. 16. v. 8.

## PUNCTUM PRIMUM.

ELix eris, si in Psalmodia attentus fueris. Immensam quippe suavitatem, pacisque gratiam, quam in se continet, percipere mereberis. Hinc SS. P. N. serio hortatur, ut non solum corpore sed & mente jugiter *surgamus ad confitendum ei*. At hanc vero attentionem obtinendam cupit, ut ante

M 5. Psal.

Psalmodyam nos recolligamus, atque mysterii illius, in cuius honorem hora illa psallimus, memores simus. Ait enim *Matutina, Prima, Tertia, Sexta, Nonæ, Vesperæ Completorii*que tempore nostræ servitutis officia persolvamus. Qualem ergo exigit cum SS. PP. recollectionem ante Matutinum? Ut memor sis, quomodo Dominus noster Iesus Christus natus de Virgine dignatus est suscipere incrementa humanæ infantiae; quatenus ex hujus exemplo in gratia, & sapientia coram Deo, & hominibus proficere studeas. Qualem exigit ante Primam? Ut memor sis, quomodo Evangelicus Paterfamilias conducat operarios suos in vineam suam; quatenus per præviam orationem te ad laborem viriliter accingas. Qualem exigit ante Tertiam? Ut memor sis quomodo Spiritus sanctus super orantes Discipulos descenderit; quatenus eundem, ut & in te descendat, enixe exores. Qualem ante Sextam? Ut memor sis, quomodo Dominus noster Iesus Christus hora sexta immolatus est Patri hostia immaculata pro peccatis nostris; quatenus & tu, quod passionibus ejus deest, in temetipso suppleas. Qualem ante Nonam? Ut memor sis, quomodo Iesus descenderit ad inferos; quatenus & te ipsum infra omnes humilies. Qualem ante Vesperas? Ut memor sis, quomodo Iesus captivitatem Sanctorum transvexit ad cœlum; quatenus & tu omni concupiscentia spirituali vitam æternam concupiscas. Qualem ante Completorium? Ut me-



memor sis, quomodo Evangelicus Paterfamilias denarium singulis operariis suis pro mercede largiatur; quatenus Divinam remunerationem jugiter ante oculos tibi ponas. O me miserum, quod istam recollectionem ante horas neglexerim, cum tamen SS. P. ex hoc motivo voluerit me a labore ad primum signum separari! sane non ita distractus fuisssem, in ipsis horis. Talis enim quis erit in oratione, qualis fuit ante orationem.

### PUNCTUM SECUNDUM.

**N**ON audit Deus illum, qui seipsum non audit. Hinc SS. P. N. quatenus nos intra horas attentos conservaret, primo præscribit; ut *præmittatur inprimis versus Deus in adiutorium meum intende, Domine ad adjuvandum me festina.* Quis enim Dominum Deum præsentem cogitet, atque ad adiutorium nostrum paratum, quin non humili hac oratione Divinam gratiam in conspectu Dei & SS. Angelorum psallendi impetrat? Secundo præscribit; ut *ad Gloria mox omnes surgant ob honorem, & reverentiam sanctæ Trinitatis.* Quis namque reverentiam ad gloriam, quod in fine cujuslibet Psalmi cantatur, SS. Trinitati exhibeat; quin non inde ad novam attentionem, & fervorem sequentium Psalmorum accendatur? Tertio præscribit, ut *in matutinis legantur Lectiones tam veteris Testamenti, quam novi Divinæ Authoritatis; sed & expositiones earum, quæ a nominatissimis; Do-*  
ctori-

*floribus orthodoxis, & catholicis Patribus factæ sunt: Ut Abbas legat Lectionem de Evangelio cum honore & tremore stantibus omnibus. Ut in quavis hora Lectio una recitetur. Quis equidem finem harum Lectionum, scilicet fructum emendationis, aut profectus observet, quin non ad singula verba attentus sit? Quarto præscribit, ut ultimo recitetur oratio. Quis etenim agnoscat certum Christi promissum de exauditione precum nostrarum, & propriam, atque Ecclesiæ totius indigentiam; quin non omni attentione, ac confidentia in singulis horis suas petitiones Domino Deo proponat? O me negligentem, qui istos modos attendendi ex S. Regula non didici, cum tamen SS. P. plura capita in iis docendis insumat? Plane non ita distractus sine fructu Psalmos decantassem. Necessè est, ut mens diutius evagetur, nisi certa loca habeat, in quibus ad se redeat.*

### PUNCTUM TERTIUM.

**N**E in attentione deficias, siue ob somnolentiam, siue ob teporem, siue ob longitudinem Divini Officii, SS. P. Exemplum antiquorum Monachorum tibi proponit: *Omni-modis id attendatur, ut omni hebdomada Psalterium ex integro numero centum quinquaginta Psalmorum psallatur: Quia nimis iners devotionis suæ servitium ostendunt Monachi, qui minus a Psalterio cum Canticis consuetudinariis per Septimanæ circulum psallunt: cum legamus*

*gamus sanctos Patres uno die hoc strenue im-  
pleſſe, quod nos tepidi utinam ſeptimana inte-  
gra perſolvamus.* Alii equidem talem nume-  
rum Pſalmorum quotidie decantabant, ut-  
menſuram fragilitatis humanæ exceſſerint.  
Alii ſtatis quidem horis paucos Pſalmos ca-  
nebant; at inter laborandum a meditatione  
Pſalmorum non vacabant. Alii ita Pſalmodiæ  
aſſuefacti ſunt, ut Pſalmos quoque ſomnia-  
rent. Omnes autem tanto fervore, attentio-  
ne, & reverentia in conſpectu Dei, & SS. An-  
gelorum pſallebant, ut graviffimum crimen ſe  
commiſiſſe crederent, ſi vel per unam cogi-  
tationem diſtracti fuiſſent. O ſi hæc vivida  
SS. Patrum exempla ſecutus fuiſſem, nun-  
quam ſane me attentio gravaret! gratia S.  
Spiritus animæ attentæ ſe infundit, ut a pſal-  
lendo vix ceſſare poſſit.

#### PUNCTUM QUARTUM.

**A**N igitur, o Religioſe! ante quamvis ho-  
ram te per meditationem Myſterii brevi-  
ter ad attentionem recolligis? Ante oratio-  
nem præpara animam tuam, ne ſis ſicut homo  
tentans Deum. An dictis locis in Pſalmodia  
te recolligis ad attentionem? Deus peccato-  
res non audit. An exemplo SS. Patrum tæ-  
dium attentionis ſuperas? S. Iſidorus die, ac  
nocte ſine intermiſſione pſallebat. Dole, quod  
tam parum curaveris attendere. Propone.

1. Ante quamvis horam per meditationem  
ejus myſterii, &

2. In



2. In quavis hora per dicta loca, nec non

3. Per exempla SS. PP. ad attentionem te  
recolligere.

\*\*\*\*\*

### DIES XXIII.

De Obedientia erga Superiorem  
Juniorem.

Decani non eligantur per ordinem, sed secundum vitæ meritum, & sapientiæ doctrinam. Cap. 21. v. 4.

#### PUNCTUM PRIMUM.

**S**æpe obedientia negligitur; quia qui præest, Junior est. At huic malo medetur illud SS. P. N. Benedicti: *Decani non eligantur per ordinem, sed secundum vitæ meritum, & sapientiæ doctrinam.* Provenit iste SS. Obedientiæ neglectus ex superbia, ex ambitione, ex invidia. Vincitur vero per humilitatem, contemptum terreni honoris, & charitatem. Ut ergo in humilitate libenter obedias; cogita, quia etsi Junior sit, qui præest, tamen *vitæ merito, & sapientiæ doctrina* te præstat, atque canitie sensuum Senior, & venerabilior extat. Nisi enim quemvis ex animo quoad *vitæ meritum, & sapientiæ doctrinam* tibi præponas, humilis non es. Cogita; quia, qui præest, onus gravissimum in se suscipit, quod vix Angelis portabile est, & revera indignum te ad istud senties. Cogita; quia si Juniori non æque ac Seniori obedire paratus sis,

sis, meritoriam obedientiam non habes. Vera equidem, ac meritoria obedientia Deum in Superiore, & non hominem respicit. Cogita; quia Filius Dei incarnatus hominibus factus est obediens usque ad mortem. Cogita; quia SS. P. N. *ob vitæ meritum, & sapientiæ doctrinam* Juvenes illos S. Maurum, & Placidum cæteris præfeciit. Pudeat te non obedire ultimo ex Congregatione; quando per tot annos nondum didicisti *omnium infimum ex toto cordis affectu te credere.*

PUNCTUM SECUNDUM.

UT cum contemptu omnis terreni honoris libenter, ac prompte Juniori Superiori obedias; considera, quod Superior talis esse debeat, *in quo securus Abbas partiatur onera sua.* Et quæ onera? Utique *de quibus ipse redditurus est rationem Deo.* Quomodo igitur ad istorum onera aspirabis, quibus erit iudicium durissimum; quia præsumunt? Etenim si sancti Ordinis nostri hæc de causa omnem præsentiam vel fugerunt, vel abdicarunt, vel non nisi per obedientiam coacti susceperunt; quomodo tu, qui de anima tua reddere rationem non potes, aliquam præsentiam affectabis? An ignoras; quia Deo præire gestit, qui vel uni præesse desiderat? An nescis; quia omnis ambitio, Diaboli negotium est? An te latet; quia major est, qui ministrat? O perversitas! o abusus Religiosorum hujus temporis! solemnem Professione abjectionem, & subjectionem professi

fessi sunt; & paulo post professionem eos honores, quos nec in sæculo sperare potuissent, omni contentione insequuntur. Semper parati ad honores ipsis etiam Angelis formidandos. Time si vel ultimum ex Congregatione tibi præesse non desideras. Quia si cum Lucifero te exaltas, nunquam amplius invenietur locus tuus in cœlo. Ubi deinde?

### PUNCTUM TERTIUM.

**U**T Superioribus Junioribus libenter, prompte, atque hilariter obedias, pensa, quod *electi, sint Fratres boni testimonii, & sancta conversationis, qui sollicitudinem gerunt super Decanias suas in omnibus secundum mandata Dei, & præcepta Abbatis sui.* Quis enim non libenter sublit; si gaudeat de alterius promotione? Quis non prompte obediat; si lætetur de bona conversatione Superioris sui? Quis non hilariter se subjiciat, si sanctum reputet Superiorem, eique intime *de vita merito, & sapientia doctrina* congratuletur? Ne dicas: Imo si talis esset, libenter & ego obedirem. Unde scis, quod talis non sit? Contra præceptum SS. Patris tui *festucam vides in oculo Fratris tui.* Si solum cum SS. illis antiquis Monachis virtutes Superioris attenderes, ac de ipsis gauderes; & cum eis Superiorem tuum sanctum crederes, hilariterque illi obedires. Erubescere, si vel ultimo ex congregatione obedire tardas; quia per tot annos charitatem, quæ de alterius

*et in omni vicia*




vitæ merito, ut de suo gaudet, nondum affectus es.

PUNCTUM QUARTUM.

**A**N igitur, o Religiose! Superiori etiam Juniori obedire paratus es? Humilis abjectionem ubique quærit. An Superiori Juniori obedire paratus es? Contemptor mundi honores fugit. An Superiori Juniori obedire paratus es? Amator Fratrum de alieno bono, ut de suo gaudet. Dole, quod per tot annos S. Professionis tuæ nondum perfecte te subji- cere studueris. Propone

1. Ex humilitate,
2. Ex contemptu honoris,
3. Ex charitate etiam Superiori Juniori obedire.



*DIES XXIV.*

PROFESTO S. BARTHOLOMÆI AP.

De Prudenti Simplicitate.

Curiose intendat, si revera Deum quærit. Cap.  
58. v. 8.

PUNCTUM PRIMUM.

**C**Reditur S. Bartholomæus fuisse ille Nathanael, cui Salvator istud elogium dedit. Ecce verus Israelita, in quo dolus non est. Et quia simplex, & rectus coram  
*Spir. S. Ben. P. III.*      **N**      **Deo**

Deo incedebat, promeruit in numerum Apostolorum cooptari. Nec SS. Pater alium ad Ordinem suum suscipit, nisi simplicem. Hinc precipit Novitiorem Magistro, ut *curiose intendat, si revera Deum quærit*. In hoc namque primo consistit simplicitas, ut Deum in omni opere revera quæramus. Ipsemet Sponsus præ omnibus aliis prærogativis in Sponsa sua laudat simplicitatem. Quam pulchra es amica mea, quam pulchra! oculi tui columbarum. Et bene ab oculis orditur; nam si oculus intentionis simplex fuerit, totum corpus lucidum erit. Si revera Deum in omni actu quæris, totum conversationis tuæ corpus simplicitas intentionis serenabit. Si solum ex parte Deum quæris, & ex parte teipsum; jam habet admixtam aliquam partem tenebrarum. Si denique ex toto teipsum, tuum commodum, tuum honorem quæris, totum tenebrosus est. Ex simplicitate ergo actionis, qua Deum quæris, judica; an Sponso cœlesti placeas, vel displiceas.

#### PUNCTUM SECUNDUM.

**S**ecundo consistit simplicitas in eo, ut *reveram Deum quærat* in obedientia ergo Superiores, & in charitate erga Proximos. Si enim mandata Superiorum discutis, simplex non es. Si imperia Superiorum judicas, simplex non es. Si non ad instar parvuli Superioribus in omnibus credis, simplex non es. In actu cordis, & non in auditu auris obedis. Si Confratres tuos

non

non sincere, & ex corde diligis unice propter Deum; simplex non es. Si eorum vitam discutis, aut dijudicas, simplex non es. Si de bono Fratrum tuorum male suspicaris, aut ipsa mala, quantum potes, in meliorem partem non interpretaris, simplex non es. Non es verus Israëlita, in quo dolus non est. Quomodo autem te amicam Sponsi, o anima Religiosa! jactabis, quæ nescis oculos habere columbæ? Quomodo amica Sponsi eris, quæ pulchra non es? Imo quomodo non inimica eris, quæ malignaris in sancto? Malignaris enim in bono obedientiæ, & in bono charitatis. Sane oculi tui non sunt Columbinæ simplicitatis; sed Milvinæ duplicitatis.

## PUNCTUM TERTIUM.

**T**ertio consistit simplicitas in eo, ut *revera Deum quærat* secundum S. Vocationem suam. Quidquid enim ages extra vocationem tuam, simplex non est. Quidquid supra, vel infra vocationem tuam facis, simplex non est. Quidquid juxta vocationem tuam facis, hoc unum simplex est. Unum Deo placet. Amat quippe Deus simplicitatem; quia natura Divinitatis suæ simplex est. Quid ergo turbaris erga plurima? Porro unum est necessarium. Hoc unum, ut vocationem tuam adimpleas, a te exigit Deus. Sic & non aliter pulchra erit anima tua in conspectu Sponsi. Sic & non aliter amica erit Sponsi. Sic & non aliter oculi tui erunt columbarum. En! solum vocationi suæ intendit SS. Bartholomæus. Vocatus



est ad Apostolatū; munia Apostoli duntaxat peregit. Vocatus est ad Martyrium; patientiam, & fortitudinem, munia videlicet Martyris perfecit; dum se sine contradictione palo alligari, & excoriari permisit. Et quantum hac simplicitate non placuit? gloria & Apostoli, & Martyris Sponsus cœlestis eum circumdedit. Sequere simplicitatem illius, & te ad gloriam suam invitabit. Surge, propera amica mea, columba mea, formosa mea, veni, & accipe coronam.

#### PUNCTUM QUARTUM.

**A**N ergo, o Religiose! simplex es erga Deum? Estote simplices sicut columbæ. An simplex es erga Superiores, & Proximos? Sitis sine querela, & simplices Filii Dei sine reprehensione. An simplex es in vocatione tua? Qui ambulat simpliciter, salvus erit. Dole, quod simplicitatem Religiosam hucusque averſatus fueris. Propone simplex esse

1. Erga Deum,
2. Erga Superiores, & Proximos,
3. In vocatione tua.



#### DIES XXV.

Quod non plus loquendum, quam expedit.

Ne videatur plus loqui, quam expedit. Cap.

6. v. 7.

PUN-

PUNCTUM PRIMUM.

**A**Urea plane est hæc Regula SS. P. N., *ne videatur plus loqui, quam expedit.* Et si servaretur, o quam proficua foret Superioribus, Officialibus, & cæteris Religiosis. Superioribus quidem. Etenim cum tota subinde die nunc petendo licentiam, nunc consulendo &c. inquietentur; vix illum momentum ipsis pro necessaria recollectione supererit, si superfluis discursibus vacare voluerint. Necessè est, ut Spiritus devotionis, & compunctionis in ipsis evaporet; dum operculum oris semper patet. Ita aqua quamvis calidissima sine operculo tandem frigescit. Et quem fructum deinde talis referet Superior? Erit velut æs-sonans, & cymbalum tinniens. Cum sonitu admonitio, aut correctio evanescet. Semen est verbum Dei; si ordinate profertur, prolem rectæ cogitationis edit. Si per multiloquium vitiatur, ad immunditiam solum audientium transit. Quomodo tot obligationibus suis quoad curam animarum satisfaciet? Nisi ipse prior totus ignitus sit, nullos ad fervorem disciplinæ accendet. Atqui fervor obtinetur in solitudine. Ibi solitarius levabit se super se. Ibi loquetur ei Dominus ad cor, quid ad salutem suam, & subditorum illi conducat. Ergo *ne plus loquere, quam expedit*; quam necessarium est ad honorem Dei, ad salutem petentis, consulentis &c. Reddes enim rationem Domino de omni verbo otioso. Reddes rationem Domino, si quid minus utilitatis Pater-

familias in concredito grege invenerit. Reddes rationem, si non morbidis ejus ovibus omnem curam adhibueris.

### PUNCTUM SECUNDUM.

**I**sta Regula, *ne videatur plus loqui, quam expedit*, proficua, imo necessaria est Officialibus. Etenim si superfluas locutiones passim miscere voluerint; quænam horæ aut administrationi officii sui, aut spiritualibus exercitiis remanebunt? Nec voluntati Abbatis satisfacient, nec animam suam custodient. A statu vocationis suæ depereunt; dum per superflua verba dilabuntur. Humana etenim mens aquæ more & circumclusa ad superiora colligitur; quia illud repetit, unde descendit, & relaxata deperit; quia se per infima inutiliter spargit. Et qui murum silentii non habet, ejus civitas mentis patet inimici jaculis. Cum equidem se per verba extra semetipsum ejicit, apertam se adversario ostendit. Quam tanto ille sine labore superat, quanto & ipsa, quæ vincitur, contra semetipsam per multiloquium pugnat. Ergo *non plus loquere quam expedit*. Reddes rationem Deo de omni verbo otioso, quod locutus fueris. Reddes rationem de neglectis obligationibus officii tui. Reddes rationem præ omnibus de neglecta custodia animæ tuæ.

### PUNCTUM TERTIUM.

**I**sta Regula, *ne plus videatur loqui, quam expedit*, proficua est cuivis Religioso. Etenim  
si vel



si vel apud Superiorem petendo licentiam, consulendo &c. vel apud Patrem spirituales manifestando interiora sua &c. vel apud alium Confratrem necessaria interrogando &c. ad superfluos discursus dilabi velit, quot horas otiosis fabulis teret? Quam speciosis hisce prætextibus sacrum silentium franget? Quam egregie suæ loquacitati, acediæ, & tepori satisfaciet? Nonne ex illis Fratribus unus est, *qui vacat fabulis, & non solum sibi inutilis est, sed etiam alios extollit.* At quantas gratias perdit? Dum silentium oris non custodit, mentem ad cœlestia desideria elevare non potest. Quod vitia incurrit? Semper magis vagus, & instabilis redditur, ut in cella solus nec per diem consistere queat. Desipit ei lectio, & oratio. Labor levissimus eum supra vires gravat. Hinc vel otiositate, quæ est inimica animæ, torpet, vel per multiloquium in varia incidit crimina. Ergo *non plus loquere, quam expedit.* Reddes rationem de omni verbo otioso, quod locutus fueris. Reddes rationem de quovis momento, per otium deperdito. Reddes rationem, & quidem gravissimam de scandalo, per multiloquium dato.

#### PUNCTUM QUARTUM.

**A**N igitur, o Religiose Superior! plus loqueris, quam expedit? Vir immundus es; quia semen verbi Dei ad immunditiam effundis. S. Greg. An, o Religiose Officialis! plus loqueris, quam expedit? Siquis putat se Re-

ligiosum esse, non refrænas linguam suam, sed seducens cor suum, hujus vana est Religio. Jac. 1. An o Religiose! non plus loqueris, quam expedit? Plus est, quod aut ratione justæ necessitatis, aut intentione piæ utilitatis caret. S. Greg. Dolo, quod hanc auream SS. P. Regulam non secutus fueris. Propone

1. Si Superior,
2. Si Officialis, aut
3. Si simplex Religiosus es, non plus loqui, quam expedit.

(\*\*\*\*\*)

## DIES XXVI.

De vitando Otio.

Otiositas est inimica animæ. Cap. 48. v. 1.

### PUNCTUM PRIMUM.

**Q**uāntus osor otiositatis fuerit SS. P. N. Benedictus, patet ex eo, quod ipse met cum Fratribus ad agrorum labores exierit. Unde & suis sequacibus, ut odium ejusdem instillaret, ait: *Otiositas est inimica animæ*. Quare? Quia tentationes ferre non potest. Antiquus namque hostis mox ut otiosum aliquem invenerit, ad eum sub quibusdam rationibus locuturus occulte venit. Quædam ei sæpe de gestis præteritis ad memoriam reducit. Audita quondam verba indecenter cogitationi resonat. Si qua turpiter jam dudum acta sunt, eorum species oculis apponit, ut quem de

de præsentibus non valet inquinare, de malis transactis violet. Et decepta mens sæpe inde delectationem reparat, unde diu jam se per poenitentiam afflixit. Merito dein cum Psalmista dicit: Còmputruerunt, & deterioratæ sunt cicatrices meæ a facie insipientiæ meæ. Cicatrix quippe figura est vulneris, sed sanati. Cicatrix ergo ad putredinem redit, quando peccati vulnus, quod jam per poenitentiam sanatum est, in delectatione sui animum concutit. Sæpe quoque quæ nunquam fecimus, per callidi hostis insidias cordis oculis otiosi videmus. Cumque sensibilibus in hoc delectatio surripit, quamvis jam plangat, quæ fecerat; tædet tamen infelicem animum quædam non fecisse, quæ plangat. Et quanto securius ab externis actionibus cessat, tanto latius immundæ se cogitationes per otium ingerunt. Cumque laborem, quo animum ab eis avertat, non habeat, libens illis immoratur, ac immorando perit. Sic verum est, quod otiosus a multis dæmonibus; operans vero ab uno vexetur.

#### PUNCTUM SECUNDUM.

**O**tiōitas est inimica animæ; quia ad omnia vitia maximæ impudiciæ perducit. Qui enim in otio degunt, quidnam non loquuntur? Quid absurdi non auscultant? Otium, Dei metu si careat, præceptor vitiorum iis est, qui tempore sibi indulto, non norunt uti. Ab eo quippe, quod nihil habent, quo occupentur, oritur peccatum. Sicut ter-



ra non occupata semente, aut consitione quamlibet herbam producit; ita anima, cum cessat occupari in bono, pravis actionibus semet tradit. Anima otiosa esse non potest. Aut bene, aut male operatur. Et quia laborando carnem non castigat, opera carnis perficit. Unde David ad momentum tantum otiosus lapsus est in adulterium. Et Euphrania, de qua in vitis Patrum legitur à tentatione carnis quam otiosæ Dæmon suggererat, aliter nisi per continuum laborem, orationem, ac lectionem liberari non potuit. Et tu a peccatis securus non eris, quamdiu otiositatem amaveris.

### PUNCTUM TERTIUM.

**O**tiotas est inimica animæ; quia perdit mercedem laboris. Paterfamilias semper vocat operarios in vineam suam. Qui renuunt laborare, mercedem non acquirunt. Laborantibus, non otiosis merces cœlestis gloriæ promissa est. Adam positus est in Paradiso, ut operaretur eum; & nos positi sumus super justitiam colendam. Si neglexerimus, projiciemur de ea, sicut & Judæi projecti sunt. Mercenarius positus in vinea, si neglexerit eam, non solum nullam mercedem habebit; sed etiam desertæ vineæ exigetur ab eo damnum. Et nos si neglexerimus justitiam nobis commissam diu, noctuque operari, non solum nullam habebimus mercedem, sed etiam dissipatæ justitiæ dabimus rationem. Si ergo ille non est impunis in die Judicii, qui otiosus stetit

tit in foro, & nullam justitiam operatus est, quid fiet illi in die Judicii, qui peccavit, & mniam suam perdidit? Tu labora, ut salvus fias. Aliud medium non est. Sic sancto Antonio inter tentationes ad Dominum clamanti: Domine volo salvus fieri, & non permittunt me cogitationes meæ; Angelus apparuit; sedit, atque plectam de palmis fecit. Deinde ad orationem surrexit. Post orationem rursus sedit, & operatus est. Peracto iterum opere denud precatus est. Demum ait: Sic fac, & salvus eris.

#### PUNCTUM QUARTUM.

**A**N ergo, o Religiose! otiositatem fugis, ne in tentationes incidas? Cum dormirent homines venit inimicus. An otiositatem fugis, ne pecces? Hæc fuit iniquitas Sodomæ, & origo excidii ejus? Superbia, saturitas panis, abundantia, & otium ipsius, & filiarum ejus. An otiositatem fugis, ne perdas mercedem laboris? Servus piger, & inutilis, qui noluit laborare cum talento sibi commisso, ejicitur in tenebras exteriores. Dole, quod & tu per multum tempus otio vacaveris cum detrimento animæ tuæ. Propone sedulo omnem vitare otiositatem,

1. Ut laborando tentationes vincas,
2. Ut laborando peccata evites,
3. Ut laborando gloriam cœlestem acquiras.



## DIES XXVII.

## De vitanda Contumacia.

Si Frater contumax repertus fuerit, admonetur semel, & secundo secrete; objurgetur publice coram omnibus; excommunicationi subiaceat. Cap. 23.

## PUNCTUM PRIMUM.

**S**umme SS. Pater Noster contumaciam averfatur; unde præcipit Cap. 33. per totum: *Si quis Frater contumax repertus fuerit, admoneatur semel, & secundo secrete; si non emendaverit, objurgetur publice coram omnibus; si vero nec sic correxerit, excommunicationi subiaceat.* Porro contumacia oritur ex proprio judicio; unde quis suum judicium alieno subicere recusat. Oritur ex voluntate propria; unde quis alterius voluntatem sequi detrectat. Oritur ex superbia; unde quis se humiliare nescit. Pro! quantam cæcitatem non causat ista contumacia? Nulla ratione, nulla adhortatione, nulla correctione frangitur. Imo quo magis ad obedientiam compellitur, eo magis obdurat cervicem suam. Pharaon exemplum esto. Nec Divinis Monitis, nec prodigiis, & portentis nec plagis adduci potuit, ut Dei jussioni ad dimittendum populum Israëliticum consentiret. O Religiose! favillam in cinere extingue. Contumaciam in ortu frange. Radices exscinde.

PUN.



## PUNCTUM SECUNDUM.

**N**on subito ad contumaciam pervenitur; habet suos gradus. Patet hoc ex verbis SS. Patris: *Si quis Frater contumax repertus fuerit, admoneatur semel, & secundo secrete; objurgetur publice coram omnibus.* Quot enim sunt gradus correctionis, tot sunt contumaciæ. Primo enim quis simpliciter inobediens est. Secundo adhibitas juxta Regulam correctiones spernit. Tertio castigantem Superiorem contemnit. Hoc gradus denotat SS. P.; dum ait: *Si inobediens, contrarius existens sanctæ Regulæ, & Seniorum suorum contemptor repertus fuerit.* Per primum autem gradum admittit gratiam Dei. Ubi enim obedientia, ibi gratia. Ubi inobedientia, ibi peccatum. Per alterum scandalizat Confratres. Nihil quippe male contentos ad inobedientiam sic allicit, quam pravum exemplum. Per tertium contristat Superiores. Deum namque, & non se sperni dum cernunt, merito lugent. O Religiose! time, vel primum gradum ascendere. Unum peccatum post se aliud trahit; donec peccator in profundum veniens peccatorum contemnat.

## PUNCTUM TERTIUM.

**F**inis demum contumaciæ est improbitas, quam SS. Pater hisce indicat: *Si autem improbus est, vindictæ corporali subdatur.* Improbus enim dicitur, qui obstinate in peccato suo perseverat. Dæmones imitantur, qui  
tales


tales sunt. Nam & hi nunquam super propria iniquitate dolent. Nunquam super propria damnatione compunguntur. Hinc semper luunt; & quo plus luunt, eo obstinatiores fiunt in peccato. Ita tumidi hi colles cum Dæmonibus incurvantur ab itineribus felicis æternitatis. Per anfractus suos, & distorta non tam itinera, quam præcipitia contumaciæ in infernum corruunt. *Prævalens enim erit talibus inobedientibus ipsa mors.* O Religiose! merito a nullo vitio sic abhorrebis, quam ab obstinatione. Omnia alia cordis compunctione sanantur. Hoc unum medicum, & medicinam respuit. Insanabile est.

#### PUNCTUM QUARTUM.

**A**N ergo, o Religiose! causas contumaciæ tollis? Nunquid & nos inobedientes faciemus omne malum grande, ut prævaricemur in Deo nostro. An primum gradum contumaciæ ascendere vereris? Qui autem verba ejus, quæ loquitur in nomine meo, audire noluerit. Ego ultor existam. An times finem contumaciæ? Qui superbierit, nolens obedire Sacerdotis imperio, morietur homo ille, & auferes malum de Israël. Dole, quod hucusque non studiosius contumaciam præcaveris. Propone

1. Contumaciæ causas extirpare.
2. Nec primum ejus gradum conscendere, sed semper
3. Ab illius fine abhorreere.

*DIES*



## DIES XXVIII.

De Lectore Hebdomadario.

Lecturus tota hebdomada, Dominica ingreditur. Cap. 38. v. 3.

### PUNCTUM PRIMUM.

**T**Ria SS. Pater noster a Lectore mensæ requirit. Primum est pura intentio honoris Dei. Jubet enim; *lecturus tota hebdomada, Dominica ingreditur. Qui ingrediens post Missas, & Communionem petat ab omnibus pro se orari, ut avertat ab ipso Deus spiritum elationis: & dicatur hic versus in oratorio tertio ab omnibus, ipso tamen incipiente: Domine labia mea aperies, & os meum annuntiabit laudem tuam.* Sine merito legit, qui suam, non Authoris quærit gloriam. Proprium tamen elatis est, ut ex ipso modo legendi se supra alios efferant. Non patiuntur se corrigi. Si quem errorem commiserunt, lectionem repetere erubescunt. Ita miseri, dum alios per S. Doctrinam sanant, seipsos per superbiam vulnerant. Humilitas magistra virtutum est. Hæc si deficit, inaniter clamat, qui prædicat. Vera intentio honoris Dei corda solummodo accendit. Qui hoc igne non ardet, quomodo corda aliorum accendet? Ex hix collige, quam ferventer die Dominicæ pro avertendo spiritu elationis orare debeas?



as: qua puritate intentionis legere te oporteat. Cave, ne te SS. Pater a ministerio lectionis, ut olim illum Monachum a ministerio lucernæ, propter elationem removeat.

### PUNCTUM SECUNDUM.

**A**lterum est bene legendi sollicitudo. Hinc ait: *Nec fortuito casu, qui arripuerit codicem, legere audiat ibi. Item. Fratres autem non per ordinem legant, aut cantent, sed qui ædificent audientes.* Etenim si Lector verba non scite pronunciet, aut omittat, nonne fastidium pariet audientibus? Si varios in Lectione errores committat, nonne tædium, aut risum movebit auditoribus? Si nimis prope-  
ranter legat, nonne fructum apud audientes tollet? Pro! quanta inde detrimenta Spiritus sequuntur? Frangitur silentium. Datur occasio de ipsa lectione, aut aliunde quidquam requirere. Datur ansa per varias, & inutiles cogitationes evagandi. Sæpe tunc, ubi interior homo verbo Dei quoque pasci deberet, solum exterior ob nauseam legentis reficitur. Et quia animus non delectatur cibo spiritali; delicias in corporali amplectitur. Ex istis con-  
clude, qua sollicitudine ad mensam legere debeas. Enimvero vel merito, vel transgressionibus, vel præmio, vel pœnæ audientium pro qualitate lectionis tuæ communicabis.

### PUNCTUM TERTIUM.

**T**ertium est lectio ædificatoria. Unde asserit: *Ædificent audientes.* Quid enim proderit,

rectam legendi habere intentionem, ac solitudinem, nisi ea legerit, quæ ædificent? Sane vana, curiosa, sæcularia potius destructioni serviunt, quam ædificationi. Si namque *referre, quæ foris viderit, aut audierit, plurima destructio est*; nunquid & talia prælegere destructio erit? Si *Lex divina coram bonis legenda est, ut ædificetur*; nunquid & coram incola Monasterii legenda erit, quatenus ædificetur? Vah! quoties contingit, quod ob negotia plures, qui mensæ assident, pro eo die nil adhuc spirituale legerint? Quoties contingit, ut per alias curas parum legerint? Quoties contingit, ut etiam ii, qui legerunt, nullum fructum ex lectione sua hauserint? Refectione igitur spiritus pro eo die fraudantur; dum nil, quod ædificet, ad mensam audiunt. Solet etiam teste Gregorio strictius cor viva vox trahere, quam simplex lectio per transitum. Ex his cogita; quanti momenti sit, ad mensam Lectiones sacras legere.

#### PUNCTUM QUARTUM.

**A**N ergo, Religiose Lector! puram semper legendi habes intentionem? Qui gloriatur, in Domino gloriatur. An cum magna solitudine ad mensam legis? Dispensas verbum Dei. An ea legis, quæ ædificant? Vivere debet homo non de solo pane, sed de omni verbo, quod procedit de ore Dei. Dole, quod huic officio hucusque non rite satisfeceris. Propone

*Spir. S. Ben. P. III.*



*I. Pu-*

1. Puram ante lectionem formare intentionem.
2. Magnam in legendo adhibere sollicitudinem.
3. Ea solum legere, quæ ædificationis, non destructionis sunt.



## DIES XXIX.

De tribus modis Divinæ Præsentiae.  
Deum credamus semper esse præsentem. Cap.  
7. v. 23.

### PUNCTUM PRIMUM.

**P**rimus modus, quo Deum jugiter habemus nobis præsentem, est exercitium fidei circa Dei præsentiam. Ita nos docet SS. P., dum ait: *Deum credamus semper esse præsentem*. Facillimus iste modus est, & utilissimus. Facillimus; quia uno actu intellectus sine forti imaginatione phantasie completur. Utilissimus quoque; quia dum per fidem Deum præsentem agnosco, simul etiam omnia alia ejus attributa faciliter mihi repræsentor. Ex quibus immensa animæ utilitas promanat. Et enim si Deum præsentem credo, etiam infinitam ejus potentiam præsentem habeo. Et quis inde non timeat? Deus præsens est, qui tangit terram, & præ timore tabescit. Si Deum præsentem credo, etiam infinitam ejus misericordiam præsentem agnosco. Et quis inde non  
spe-



speret? Deus præsens est, qui tam misericors est, ut nec in ira sua contineat misericordias suas. Si Deum præsentem credo, etiam summam ejus in me providentiam cognosco. Et quis inde se totum illi non relinquat? Deus præsens est, qui a dextris meis est, ne commovear. Ecce! quantæ utilitatis sit, Deum præsentem credere.

### PUNCTUM SECUNDUM.

**A**Lter modus est, quo Deum in nobis, & nobiscum operantem consideramus. Ad hunc nos hortatur SS. P. N. hisce verbis: *Qui timentes Dominum ipsa in se bona non a se posse, sed a Domino fieri existimantes, operantem in se Dominum magnificant.* Deus equidem ita nobis, & in nobis præsens est, ut multo nobis, quam nos nobis ipsis præsentior sit. Deus ita omnia in nobis, per nos, & nobiscum operatur, ut sine ejus auxilio nec oculum movere, nec quidquam boni agere possimus. Ita ipsemet testatur, quando dicit: Sine me nihil potestis facere. O qui ita consideraret, an peccare auderet? / Quomodo Deum immensam illam puritatem rursus in peccatis sibi servire cogeret? An superbire auderet. Nunquid artifici potius, quam instrumento bonum opus adscriberet? An non motui Spiritus sancti in omnibus consentiret, ne distortum, aut imperfectum quidquam faceret?

## PUNCTUM TERTIUM.

**T**ertius modus, quo Deum nobis præsentem habeamus, est ejusdem recordatio in omni loco. Sic nos instruit SS. P. N. *In omni loco Deum se respicere, pro certo scire.* Enimvero si in Oratorio, in Refectorio, in Musæo, in Cella &c. primitus mihi occurrat Divina præsentia, quantam Domino Deo universorum in oratione exhibebo reverentiam? Quanta alacritate delicias cibi præ deliciis spiritus contemnam? Quanto studio, & cordis contritione ad laborem incumbam? Quibus affectibus jugiter Deo summo, & unico bono meo inhærebo? Qua modestia ubique coram Deo meo incedam? Qui enim in hoc loco est, scrutatur renes, & corda. Qui in hoc loco est, contemplatur bonos, & malos. Qui in hoc loco est, respicit super filios hominum, ut videat, si est intelligens, & requirens Deum. Qui in hoc loco est, me judicio suo mox præsentandum expectat. O qui hoc exercitium Divinæ præsentia sibi compararet, quam magnum Sanctitatis gradum cum SS. Patre conscenderet. Etenim, quia in conspectu superni inspectoris habitavit secum, culmen sanctitatis ascendit,

## PUNCTUM QUARTUM.

**A**N ergo, o Religiose! actum fidei crebro de præsentia Dei elicis? Accedentem ad Deum oportet credere, quia est. An Deum in teipso, & in actibus tuis præsentem consideras? Operatur omnia in omnibus. An Deum præsentem

in

in omni loco veneraris? In omni loco dominationis ejus benedic anima mea Domino. Dole, quod oblitus fueris Dei tui. Propone

1. Sæpe actum fidei circa præsentiam Dei elicere.

2. Crebro Deum in te, & tuis actionibus præsentem considerare.

3. In omni loco Deum præsentem venerari.



### *DIES XXX.*

De vitando Excommunicato.

Nullus ei Fratrum in ullo jungatur consortio, aut colloquio. Cap. 25. v. 2.

#### *PUNCTUM PRIMUM.*

**M**erito jubet SS. Pater, ut excommunicato *nullus Fratrum in ullo jungatur consortio, aut colloquio.* Consortium equidem, aut colloquium excommunicatum in malitia sua confirmat. Dantur enim subinde, qui iniqua compassione non tam excommunicatos, quam etiam quosvis tentatos contra Superiores magis exasperant. Sane hi non sunt *occulti illi consolatores, qui fluctuantem Fratrem ad humilitatis satisfactionem provocant.* Non sunt Angeli pacis, qui contumaces, & inobedientes ad subjectionem incitant. Potius malos genios sequuntur, qui ad suam damnabilem contumaciam homines quoque omnes pertrahere nituntur. Imo his eo



gravius nocent; quò blandius per affectum compassionis virus inobedientiæ instillant. Et tanto validius tentatum contra Superiores in sua pervicacia consolidant; quanto iniquius Superiorem injustitiæ arguunt. O quam magnæ poenæ istorum erunt in aternitate, qui secuti sunt Apostatas Angelos in iniquitate!

### PUNCTUM SECUNDUM.

**C**onsortium, & colloquium communicantem cum excommunicato facile pervertit. Hinc merito jubet SS. P. N. ; ut *nullus Fratrum ei in ullo jungatur consortio, aut colloquio*. Non solum autem excommunicati, sed quilibet inobedientes, aut murmuratores studiose fugiendi sunt. Nihil equidem sic ad inobedientiam, & murmurationem provocat, ut communicatio cum inobedientibus, & murmurosis. Vide enim. Murmurat unus coram altero, mox murmurabit & alter. Convenit tertius, murmurabit similiter; donec murmurent omnes. Ita hæc lues per totum Monasterium grassatur. Respectus namque humanus erga murmurantem, vel aversio erga Superiorem ferme semper rumpit Regulam non murmurandi. Inobediens quoque alterius inobedientia animosior fit. Si vis ab inobedientia, aut murmure liber esse; fuge inobedientium, & murmurantium consortia, atque colloquia.

## PUNCTUM TERTIUM.

**C**onfortium, & colloquium cum excommunicato similem pœnam promeretur. Ita statuit SS. Pater. *Si quis Frater præsumpserit quolibet modo Fratri excommunicato se jungere, similem sortiatur excommunicationis vindictam.* Et merito. Qui enim se excommunicato inobedienti, aut murmuratori sociat, vitium ejus approbat, vel saltem male de se suspicandi occasionem præbet. Alii namque vitam nostram non perferunt, sed a sociis, & consuetudinibus dijudicant. Meretur similem pœnam; quia negligit hanc sacram Regulam. Qui enim legem contemnit, nec sub tam gravi pœna transgredi veretur; similis contumaciæ se reum facit. Meretur similem pœnam; quamvis duntaxat Fratrem ad emendationis satisfactionem provocaverit, si ab Abbate ad hoc missus non est. Idem quippe præsumit, quod, qui in periculo morbi gravissimi, artis omnis expertus suscipit personam medici. Si ergo malas suspensiones, & similem pœnam incurrere non vis, *Fratri inobedienti, murmuratori, contumaci, excommunicato in nullo jungere consortio, aut colloquio.*

## PUNCTUM QUARTUM.

**A**N ergo, o Religiose! fugis consortium excommunicati, ne illum confirmes in sua contumacia? Væ tibi! si illi te socias, Damoni te socias; quia traditus est in potestatem Sa-

thanæ in interitum carnis. An vitas consortium excommunicati, ne eodem vitio inquineris? Qui tangit picem, inquinabitur ab ea. An vitas consortium excommunicati, ne similem pœnam incurras? Gravissime peccat, qui in tanto periculo tantum præsumit. Dole, quod hucusque contra hanc Regulam sæpius peccaveris. Propone fugere consortium excommunicati, inobedientis, aut murmuratoris,

1. Ne eum in sua malitia confirmes.
2. Ne ejusdem vitio inquineris.
3. Ne eandem pœnam incurras.



## DIES XXXI.

### Recollectio Menstrua.

Reum se omni hora de peccatis suis existimans jam se tremendo judicio Dei repræsentari æstimet. Cap. 7. gr. 12. v. 82. & 83.

### PUNCTUM PRIMUM.

**Q**ua sententia S. Regulæ hunc mensem incepti, ea quoque eundem finire placet. Æstimo enim SS. Patrem in solitudine sua Sublacensi hoc præ cæteris egisse, ut reum se omni hora de peccatis suis existimans jam se tremendo judicio Dei repræsentari æstimaverit. Ex eo namque omnes status sui obligationes perfecte adimplevit. Tu saltem hodie illum sequere. Primo considera, an satisfeceris obligationi tuæ erga Deum. An crebro



bro actum vivæ fidei de præsentia Dei elicuisti? An Deum in teipso, & in actibus tuis præsentem credidisti? An in omni loco Deum præsentem coluisti? Accedentem ad Deum oportet credere. Pro! qualem rationem reddes, quod ex oblivione Divinæ præsentiae Dei tot actus virtutum Theologicarum, ac timoris Dei hoc mense omiseris?

## PUNCTUM SECUNDUM.

**R***Eum te existima de peccatis tuis, & jam te tremendo judicio Dei præsentari existima,* atque proinde considera, an obligationi erga Religionem satisfeceris. An timuisti minimas Regulas transgredi? Qui spernit modica, paulatim decidet. An perfecte obediens fuisti? Vir obediens loquetur victorias. An motiva obediendi jugiter præ oculis habuisti? Quid ibi ardebit, nisi propria voluntas. An nec verbo, nec opere contradixisti? Qui superbierit, nolens obedire, morietur homo ille. An nullum gradum contumaciæ conscendisti? Qui noluerit audire, ego ultor existam. An nullum desiderium vagandi habes? Vagari foras non expedit animabus Monachorum. An motiva convertendi mores tuos crebro recolis? Ecce nunc dies salutis. An humiliationes externas pro defectibus in Choro, in regulari disciplina, in commotione Superiorum non omittis? Humilitas omnia supplet. An modos procurandi attentionem in S. Psalmodia observas? Mens, ni habeat, quo se recolli-

gat, semper evagabitur. An officium Lectoris ad ædificationem audientium peragis? Sic vivere facies hominem de verbo Dei. Pro quantam rationem habes, quod obligationi erga Religionem nec satisfeceris, nec ex ea profeceris!


### PUNCTUM TERTIUM.

**R***Eum te existima de peccatis tuis, & jam te tremendo judicio Dei præsentari aestima,* atque considera, an obligationi erga proximum satisfeceris. An cum discordante statim in pacem rediisti? Sollicitus esto servare unitatem in vinculo pacis. An nullum zelum malum habes? Æmulare charismata meliora. An in tribulatione subvenis? Quod uni ex minimis meis fecistis, mihi fecistis. An non te jungis male contentis cum Superioribus? Similem poenam, & afflictionem incurres. Pro quantum te accusabunt proximi tui, quod juxta statum tuum eos non adjuveris!

### PUNCTUM QUARTUM.

**R***Eum te existima de peccatis tuis, & jam te tremendo judicio Dei præsentari existima,* atque considera, an obligationi erga teipsum satisfeceris? An patiens fuisti in infirmitatibus? Patientia habet opus perfectum. An fortitudinem Religiosam colis? Accinge fortitudine lumbos tuos. An vere te humilias? Exaltaberis. An modestiam Religiosam in omnibus observas? Modestia vestra nota sit omnibus hominibus.

minibus. An zelum bonum habes? Sine zelo bono refrigescet charitas. An consuetudinem bonam tibi procuras? Est quasi altera natura. An otium vitas? Hæc fuit iniquitas Sodomæ superbia, & otium ejus. An plus loqueris, quam expedit? Vana est religio tua. An non somnolentus es? Ne patiaris totius vitæ medium tibi sine fructu præripî. Pro quam multæ, & magnæ sunt rationes tuæ! Dole, quod obligationibus status tui ex timore Divini judicii non satisfeceris. Propone emendationem, & satisfacere stude, ne sententiam maledictionis potius, quam benedictionis incurras.



S E P T E M B E R.

D I E S I.

De Perfectione Paupertatis.

Nullam omnino rem habere. Cap. 33. v. 2.

PUNCTUM PRIMUM.

**S**emper sanctis Monachis sacra Paupertas totus divitiarum thesaurus fuit. Ipsa hominem in eum constituit statum, ut nullius indigeat. Qui enim aliquid adhuc desiderat, etsi ditissimus Rex sit, eget, pauper est. Unde David ait: Divites eguerunt, & esurierunt. Qui vero nihil concupiscit nisi Dominum, omnia possidet, & plus quam desiderare potest, habet. Inquirentes enim Dominum non minuentur omni bono. Unde SS. P. præcipit, ut  
*nullam*



*nullam omnino rem habeamus.* Ad quod requiritur primo, ut quis totam mundi substantiam, dilectionem inordinatam, ac confidentiam Parentum, cognatorum, & omnium hominum, amorem quoque propriæ vitæ cum omni affectu, aut delectatione relinquat. Sic Matthæus telonium, Joannes, & Jacobus navim, rete, Patrem relinquere debuerunt, ut sequerentur Christum. Ita verum est, quod nisi quis omnem terrenorum curam, & amorem reliquerit, Christum sequi non possit. Ita certum est, quod si quis rursus ad ea, quæ semel reliquit, affectu redierit, regno Dei aptus esse non possit. Hanc veritatem docent nos Israelitæ. Corpore egressi erant Ægyptum, sed affectu redierant. O bone Deus! propter hanc unam infidelitatem Deum ipsum Factorem suum dereliquerunt, & Deos Ægyptios adoraverunt. Time, o Religiose! & quæ semel abjecisti, reassumere expavesce.

#### PUNCTUM SECUNDUM.

**A**D impletionem præcepti SS. P. N. *nullam rem omnino habere* requiritur secundo, ut quis semel relictis omnibus curis, & affectionibus rei cujuscunque terrenæ omnem suam sollicitudinem in Deo constituat. Omnia necessaria vitæ temporalis, & spiritualis ab ipso solo speret. Hinc quamvis ab hominibus eleemosynam corporalem, vel spiritualem accipiat, non tamen quasi ab ipsis, sed a solo Deo tanquam per ministros suos missam suscipiat.

Con-

Contentetur omnibus. Et quia omnia ceu munera Dei accipit, vilia quæcunque pretiosa reputet. Defectum necessariorum sine tristitia patiatur; nam semper eorum supplementum certo a Deo opportuno tempore sperare debet. Sequantur SS. Patrem, qui in egestate tritici Fratres ita consolatus est: Hodie quidem minus est, sed die crastina abundanter habebitis. Hæc perfectio paupertatis ita necessaria est, ut nemo sine hac perfecte leges Evangelii observare possit. Nemo sine hac interna, & externa abrenunciatione spiritum compunctionis, internæ, & externæ humilitatis, ac patientiæ, imo perfectæ abnegationis omnium naturalium passionum ad vitam Evangelicam requisitum obtinere possit. Ad hanc autem perfectionem paupertatis nemo teste S. Syncretica pervenit, qui non per corporis castigationem, jejunia, vigiliis, & humicubationes ad eam contendit. Tam magna enim, ut ait, perfectio Evangelicæ paupertatis est, ut eam solum ii, qui in omni virtute exercitati sunt, penitus assequantur.

### PUNCTUM TERTIUM.

**A**D omnimodam demum impletionem præcepti SS. P. N. *nullam omnino rem habere*, requiritur, ut nullam amplius de terrenis cogitationem habeamus, sed nostra conversatio in cœlis sit. Quod si aliqua subito incidat, statim rejicienda est. In hoc summa paupertatis perfectio sita est. Ad hanc efficaci voluntate conari

nari omnes obligamur. Quod si eam non obtineamus, atque subinde voluptate rerum temporalium capiamur, adhuc pauperes sumus; dummodo vere poeniteamus, ac serio nos emendemus. O Religiose! sequere! ah! sequere! SS. Patrem tuum. Ita absorptus est in supremum Inspectorem, in cujus conspectu habitat secum, ut nihil de terrenis cogitet. Ea ac si non essent, aspiciat. Ut stercorea reputet. Nunquam autem ad hanc gratiam pertinges, nisi instantissima oratione eius auxilium jugiter imploraveris. Imo nisi ingens desiderium eum actuali conatu omnium virium tuarum eam consequendi semper in corde tuo foveris.


#### PUNCTUM QUARTUM.

**A**N ergo, o Religiose! omni affectui ad res terrenas renuntiasti? Qui non renuntiaverit omnibus, non potest meus esse discipulus. An totam sollicitudinem tuam in Deum projecisti? De vestimento quid solliciti estis? An nunquam amplius de terrenis cogitasti? Veritatem diligite, ait Dominus omnipotens. Dole, quod hactenus ad perfectionem paupertatis juxta normam SS. Patrum, & formam Professionis tuæ obtinendam nullum ferme conatum adhibueris. Propone

1. Omni affectui ad res terrenas renunciare.
2. Totam spem tuam in Deo collocare.
3. De terrenis, ac si non essent, nil deinceps cogitare.

*DIES*





## DIES II.

## De Æternitate Gehennæ.

Gehennam expavescere. Cap. 4. Instr. 4s.

## PUNCTUM PRIMUM.

**S**ANCTISSIMUS Pater Noster, dum nos *Gehennam expavescere* docet, maxime sempiternitatem ejusdem nobis considerandam proponit. Magna quidem pœna esset, vel ad momentum beatifica visione destitui. Magna pœna esset, ad breve tempus in Sanctorum Choro non constitui. Magna pœna esset, per aliquot annos, ab ineffabili cœli gloria prohiberi. Magna pœna esset, per sæculum, aut millia millium annorum a cœli gaudiis excludi. At tolerabilis, licet in se intolerabilis, foret ista pœna, si aliquando spes redemptionis damnatis affulgeret. Nunc, quia finem non habet, plane incomprehensibilis est, & immensa. Numerus quippe annorum ejus inæstimabilis. Considera sempiternitatem inferni per sæcula, post sæcula per centena millia, & millia annorum, & tamen necdum medium, ne dicam finem attigisti. Verbo. Semper est. Semper consortio Dei, Sanctorum, & cœlestium bonorum privat. Hæc cogita, & libenter breves carnis voluptates spernes, ut æternas pœnas effugas.

PUN-

## PUNCTUM SECUNDUM.

**G***Ebennam expavescere* facit æternitas. Si tenebræ essent, & stridor dentium. Si ignis ureret, & non combureret. Si frigus cruciaret: Si jugis gemitus, & dolor. Si nullus qui consolaretur, sed omnes omnes affligerent. Si poenæ, & tormenta omnia inferni Deus millecuples multiplicaret, & tantum intenderet per suam Omnipotentiam, quantum possunt; adhuc damnatis tolerabilia viderentur; dummodo spem liberationis aliquando haberent. At quia spe carent; prorsus incomprehensibilia sunt. Cogita. Dies, & anni hominis a diebus, & annis discrepant æternitatis: quia vitam nostram, quæ tempore incipitur, tempore finitur, dum intra sinus sui latitudinem format, æternitas devorat. Cujus nimirum immensitas, quia ultra, citraque nos tenditur, sine inchoatione, & termino ejus æternum esse dilatatur. Æternitati namque nec transacta prætereunt, nec adhuc ventura, quasi quæ non appareant, defunt. Verbo: Semper erit infernus. An non brevitatem gloriæ hujus mundi spernes, ut æternas inferni poenas effugas?

## PUNCTUM TERTIUM.

**G***Ebennam expavescere* facit æternitas. Erit enim ibi mors sine morte. Finis sine fine. Defectus sine defectu. Ibi mors semper vivet. Finis semper incipiet. Defectus deficere nesciet. Mors perimet, & non extinguet. Dolor cruciabit, & pavorem non fugabit. Flamma com-


comburet, sed non exuret. Sine fine equidem damnati in cruciatu vivent. Sine spe veniæ, & misericordiæ cruciabuntur, quod est miseria super miseriam. Meditare. Si enim post tot millia annorum, quot capillos habuerunt omnes, quicunque fuerunt, & erunt, pœnas suas finire sperarent, multo levius eas sustinerent. Sed quia spem non habent, nec habebunt, desperatione deficient, & ad tormenta non sufficient. Verbo: Peccata detegentur. Rei punientur. Et totum hoc erit perenne. Quis non a quovis peccato, cujus concupiscentia brevis, & momentanea est, ceu a facie colubri fugiat, ne æternas inferni pœnas sustinere cogatur?

#### PUNCTUM QUARTUM.

**A**N ergo, o Religiose! consideras æternitatem gehennæ, ne brevi carnis voluptate capiaris? Ite maledicti in ignem æternum. An consideras æternitatem gehennæ, ne brevi mundi gloria extollaris? Ite maledicti in ignem æternum. An consideras æternitatem gehennæ, ne brevi concupiscentia peccati alliciaris? Ite maledicti in ignem æternum. Dole, quod hucusque æternitatem gehennæ non consideraveris. Propone eandem sæpe meditari

1. Ad abjiciendam brevem voluptatem carnis,
2. Ad contemnendam brevem gloriam mundi,
3. Ad fugiendam concupiscentiam peccati.





## DIES III.

De Compassione erga delinquentes.

Pastoris boni imitetur exemplum, qui relictis nonaginta novem ovibus in montibus, abiit unam ovem, quæ erraverat, quærere : cujus infirmitati compassus est. Cap. 27. v. 9. & 10.

## PUNCTUM PRIMUM.

**N**E rigidi nimium censores essemus defectuum Confratrum nostrorum, SS. Pater nobis proponit exemplum pii Pastoris. *Pastoris boni imitetur exemplum, qui relictis nonaginta novem ovibus in montibus, abiit unam ovem, quæ erraverat, quærere : cujus infirmitati in tantum compassus est, ut eam in sacris humeris suis dignaretur imponere, & sic reportare ad gregem.* Vult ergo, ut intimo cordis affectu delinquentibus compatiatur. Acris quippe delinquentium censura provenit ex superbia, qua quis *propriam infirmitatem suspectam non habet.* Sanesi cogitaret illud : qui stat, videat, ne cadat ; quomodo ob quosvis defectus in proximum exasperari posset ? Nunquid timeret, ne paulo post eosdem committeret ? Nunquid eundem compassionis affectum illi exhiberet, quem & sibi post lapsum exhiberi cuperet ? Ita Samuel compatitur Sauli ob crimen inobedientiæ. Sic Paulus luget ob fornicationem Corin-

rinthios. Sequere ; secus in eadem vitia cades, propter quæ in proximos exasperaris.

PUNCTUM SECUNDUM.

**C***Ujus infirmitati in tantum compassus est, ut eam in sacris humeris dignaretur imponere.* His vult Almus Pater, ut per compassivam correctionem portemus delinquentem Fratrem. Ita enim sublevamus onus peccati illius, quando illud tollimus. Non vero tollemus, nisi cum omni compassionis affectu eum corrigamus. Asperitate verborum magis exasperabitur. Etenim peccatum peccato non tollitur, sed charitate. Hanc charitatem SS. Patrem habuisse, ostendunt satis verba illius, quibus correctionem delinquentis Fratris præcipit : *Abbas debet immittere consolatores Seniores, qui consolentur eum, ne abundantiori tristitia absorbeatur.* Præterea jubet, ut *adbibeat unguenta adhortationum, & medicamina Scripturarum.* Quibus plane affectum Patris, & medici, si Filium suum curaret, & curatio sine cruciatu adhiberi non posset, satis superque exprimit. Et qualis hic affectus esset? Teste S. Basilio plenus foret compassione, lenitate, & misericordia. Simili & tu Fratrem tuum delinquentem corripe, considerans, ne & tu tenteris,

PUNCTUM TERTIUM.

**C***Ujus infirmitati in tantum compassus est, ut eam dignaretur reportare ad gregem.* Hisce vult SS. Pater, ut ex compassione ore-

mus pro Fratre delinquente. *Confirmetur, inquit, in eo charitas, & oretur pro eo ab omnibus.* Ec. *Abbas adhibeat, quod majus est, suam, & omnium Fratrum pro eo orationem.* Oratione quippe portatur ad gregem. Nil potentius namque est ista oratione. Quomodo enim non exaudiat Deus eum, qui tam fervide ob zelum honoris sui orat pro Fratre suo? Quomodo non exaudiat eum Pater cœlestis, qui cum unigenito Filio suo tam ardentem orat pro salute Fratris sui? Sane si exaudiendi sunt duo consentientes super terram, quanto magis exaudiendus erit, qui consenserit cum Filio Dei Advocato nostro apud Patrem, ac jugiter interpellante pro nobis? Si ergo verum zelum erga delinquentem Fratrem habes, compateri ei, obsecra, & compassive argue eum. His, dum nihil proficis, si reprobis non est, ora pro eo, & salvabis animam ejus a morte.

#### PUNCTUM QUARTUM.

**A**N igitur, o Religiose! compateris Confratri delinquenti? Ergo peribit Frater tuus infirmus, pro quo Christus mortuus est? An compassive arguis Fratrem delinquentem? Instrue eum in spiritu lenitatis. An compassive oras pro Fratre delinquente? Orate pro invicem, ut salvemini. Dole, quod hanc compassionem non exercueris. Propone

1. Cum delinquente compassionem habere.
2. Delinquentem compassive arguere.
3. Pro delinquente ex compassione orare.

**DIES**





## DIES IV.

## De Probatione veræ Humilitatis.

In ultimo gradu recipiatur, ut ex hoc ejus humilitas comprobetur. Cap. 29. v. 2.

## PUNCTUM PRIMUM.

**N**Il rarius vera humilitate. Hinc SS. Pater præcipit Superiori, ut Discipulorum suorum humilitatem maxime delinquentium crebro probet. Primam probam ponit in hoc, ut *in ultimo gradu recipiatur*. Etenim si quis veraciter *omnibus se inferiorem, & viliozem, non solum sua lingua pronunciet, sed etiam intimo cordis credat affectu*, gaudebit plane, dum omnibus postponitur. Nec verbo, nec signo tristitiam inde prodet; sed & ad hunc ultimum Servorum Dei gradum indignum se judicabit. Falsa vero humilitas est si tristetur; quando alii quovis modo sibi præferuntur. Ficta humilitas est, si dum alii laudantur, ipse indigne fert. Fucata humilitas est, si aliis cum quocunque modo proponitur, inde conturbatur. O sancta Humilitas! omnes te habere volunt. Omnes te habere simulant. Omnes tuo splendore splendere cupiunt. At nemo te exercere appetit. Quivis humilis apparere gestit, sed vilis esse refugit.

## PUNCTUM SECUNDUM.

**A**lteram probam humilitatis ponit SS. P. N. *si quis pro Dei amore omni obedientia se subdat majori.* Etenim nisi ad omnia, quæ sibi injunguntur, velut operarium malum, & indignum se judicet, veram humilitatem non possidet. Nisi vilia servitia obire lætetur, veram humilitatem non habet. Nisi correctiones, & pœnitentias regulares hilariter recipiat, humilitatem veram non tenet. Nisi Superiori imperfecto, æque ac perfecto obediat, vera humilitate præditus non est. Humilis enim ad omnia, & in omnibus affectum habet tractabilem. Humilitas de charitate profluens nihil molestiæ ex abjectione, & villipensione patitur. Ultro ad imum tendit. Imo cum apprehenderit inferiora, quiescit. O sancta Humilitas! quam paucis innotescis? Multi humiles dici curant; at humiliari prorsus dedignantur.

## PUNCTUM TERTIUM.

**T**ertiam probam humilitatis ponit SS. P. N. *si in quibuslibet irrogatis injuriis tacita, conscientia patientiam amplectatur.* Etenim sicut aurum in fornace, ita humilitas in officina patientiæ probatur. Impossibile quippe est, eum, qui non sibi persuasit, se omnium opera indigere, omniumque se esse novissimum, unquam posse contemptum, convitium, aut quamlibet injuriam perferre. Solus ille, qui prius sibi conscius est propriæ vilitatis

litatis, animo non commovetur, dum probrosis ignominia verbis laceffitur. Vix equidem se injuriari advertit, mox omni contemptu, & probro dignum se judicat. Econtra falsa humilitas, dum verbulo offenditur, statim irascitur. Pro uno injurioso verbo centum reponit. Aut si quavis de causa se vindicare non audet, rancorem in corde conservat. O S. Humilitas! quam multi se humiles jactant; at adversitas probat, quantum a vera humilitate distent. Tu SS. Patrem sequere. Vide, quanta patientia injurias ab iniquis illis Monachis, qui veneno illum extinguere attentarunt, supportaverit. Vere humilis fuit. Dignum se morte judicavit.

PUNCTUM QUARTUM.

AN igitur, o Religiose! aliis postponi gaudes? Vere humilis ponit se ad infimum locum. An in vilissimis muniis æque libenter, ac in splendidis obedis? Vere humilis semper abjecta sibi seligit. An de contemptu, & injuria lætaris? Vere humilis cum Salvatore opprobriis saturari appetit. Dole, quod has veræ humilitatis probas necdum sustinere possis. Propone,

1. Aliis libenter primum locum in omnibus cedere.
2. In contemptibiliori munere gaudenter obedire.
3. Opprobriis te dignum judicare.





## DIES V.

## De Vitanda Turbulentia.

Non turbulentus. Cap. 31. v. 2.

## PUNCTUM PRIMUM.

**T**urbulentia ista, quam SS. Pater hisce, *non sit turbulentus*, prohibet, ex nimis animi passionibus provenit. Oritur enim ex præcipitantia, qua sine consideratione perturbate juxta concupiscentiæ motus in objecta præsentia fertur. Oritur ex nimio fervore iræ, per quam, quidquid agit, perturbate agit. Oritur ex multitudine & magnitudine passionum, in quibus animus cæcò, & perturbato modo per omnia incedit. O quot inde errores nascuntur! prò quot vitia inde pullulant! tu cum consideratione, & longanimitate omnia age. Rationem equidem ideo a Deo possidemus, ne secundum naturæ inordinatæ instinctum, aut objectorum motum belluarum more agamus. Ideo & fidei lumine nos instruxit, ut si ratio per peccatum originale obscurata cæcutire vellet, per hoc illuminaretur. Ideo quoque longanimitatem Salvator nobis commendat, ut patienter passionum, & concupiscentiæ tumultum sustinentes, secundum rationem, & fidem operemur. O si ita egisses, nunquam tam turpiter a via salutis aberrasses. Cave ergo a turbulentia.

lencia. Ex hac & primum Angelorum peccatum ortum est. Nunquam enim peccassent, si peccati gravitatem considerassent.

#### PUNCTUM SECUNDUM.

**N***on turbulentus.* Turbulentia provenit ex variis, & multis objectis. Dum enim animus vel inconstans est, vel amore nimio in negotio fertur, aut varia, aut multa negotia tractat. Nulli satisfacit. Omnia perturbate agit. Certe non bene facit, qui diversa facit. Non bene facit, qui multa facit. Solum ille bene facit, qui unum perfecte facit. Ejusmodi recte objicitur illud Salvatoris. Martha, Martha sollicita es, & turbaris erga plurima. Vix enim unum agere cæperunt, jam vel amore, vel sollicitudine alterius afficiuntur. Porro unum tamen est necessarium. Et quodnam est illud unum? Ut id agant, quod Regula, vel Abbas hic, & nunc agere jubet. Ut id rite agant, quod præsens est. Ut id, quod ex obedientia semel ad Dei honorem inceperunt, nisi ab obedientia rursus prohibeantur, ad finem usque perficiant. Non enim opus coronatur, nisi ad finem usque deducatur. Pro! quam imperfecta, nullius meriti, nullius frugis sunt illorum opera, qui varia, & multa agere volunt? Tu ergo unum ex obedientia, & magna charitate age, & varia, & multa, & magna, & omnia fecisti.

## PUNCTUM TERTIUM.

**N**on turbulentus. Turbulentia provenit ex subitaneis, & improvisis casibus. Vix enim quidpiam adversi nobis accidit, mox perturbamur. Præ perturbatione nec consilio, nec auxilio nobis esse possumus. Et quo diutius ejusmodi turbulentia inhaeremus, eo majus incrementum capit. Imo quaecunque media arripimus, ad finem non conducunt. Tu in ejusmodi casu mox ad Divinam providentiam te converte. Cogita : sic Divina providentia super unam animam intendit, sicut super multitudinem generis humani. Qui enim disponit universa, disponit unum; quia, qui omnia administrando implet, regit etiam implendo. Quidquid igitur accidit, non casu, sed Deo disponente aut permittente accidit. Et quod a Deo venit, non potest esse nisi bonum, & ad salutem Electorum suorum. Resigna ergo, & relinque omnia Divinae providentiae. Ora pro auxilio, & consilio, & utrumque aderit.

## PUNCTUM QUARTUM.

**A**N ergo, o Religiose! non es turbulentus ob passiones tuas? Discite a me, qua mitis sum, & humilis corde. An non es turbulentus ob multa, & varia negotia? Qui sibi nequam, cui bonus? Unum est necessarium. An non es turbulentus propter incidentes adversitates? Ipse solus est, & nemo potest avertere



tere cogitationem ejus. Dole, quod hucusque adeo turbulenter vixeris. Propone

1. Non esse turbulentus ex passione,
2. Nec ex plurimis, aut variis negotiis,
3. Neque ex improvisis casibus.



## DIES VI.

### De Fugienda Tarditate.

Non tardus. Cap. 31. v. 2.

#### PUNCTUM PRIMUM.

**T**Riplicem SS. P. N. tarditatem damnat. Primam quidem ad obsequia fraterna prohibet: *Non tardus*. Qui enim pro obsequio fraterno exoratus tardat, ipsa tarditate charitatem se non habere demonstrat. Fratrem contristat. Et si obsequium *cum mora, aut aliquo typo offerat*, saepe eum etiam scandalizat. Vera equidem charitas nescit moram. O quanta hilaritate, & promptitudine Agapito Diacono ipsum, quod solum supererat oleum, petenti largitus est! quam graviter castigavit propterea tardantem Cellarium? Tu ergo *memor divini eloquii, quid mereatur, qui scandalizaverit unum de pusillis*, hilariter, & prompte obsequia fraterna ob: *Si quis forte a te aliqua irrationabiliter postulat; non spernendo eum contrista, sed cum humilitate, & sermone responsionis bono denega.* Sermo quippe bonus super datum optimum.

Quan-

Quantum inde splendet charitas tua ! quam acceptabilis erit Deo , & hominibus ! quam bonum gradum acquires in cœlis , si sic velociter charitatem administraveris in terris !

### PUNCTUM SECUNDUM.

**A**lteram tarditatem prohibet SS. P. N. ad obedientiam. *Non tarde.* Si enim obedire tardas , quid aliud innuis , quam quod iudicio tuo , & propriæ voluntati adhuc nimium innitaris ? Si moras nectis , quid aliud innuis , quam quod vel mandata Superioris discutias , aut ob magnam voluntatis resistantiam illa aggredi timeas ? Sane qui perfectam obedientiam præstare conantur , *moram pati nesciunt in faciendo. Statim relinquunt , quæ sua sunt. Statim voluntatem propriam deserunt. Mox exoccupatis manibus , & quod agebant , imperfectum relinquunt. Vicino obedientiæ pede iubentis vocem factis sepuuntur , Cur ? Ut ob auditu auris obediant Domino.* Nunquid Christus suam vocationem contemptui haberi existimasset , si Apostoli retia sua relinquere tardassent ? Horum velocem igitur obedientiam antiqui Patres semper imitati sunt. Et o quam grata fuit Deo & hominibus ! Marcus discipulus Abbatis Silvani testis sit. Plus suis condiscipulis ideo ab eo diligebatur. Quare reliqui contristati Senes ad eum miserunt , ut parem omnibus exhiberet amorem. At Abbas singulorum cellas pulsans , proprio quèmq; nomine vocavit. Et cum nullus veniret ,  
Mar-

Marcus mox ad vocem Senis relicta adhuc imperfecta littera foras egressus est. Hinc Senes dixerunt: In veritate, quem tu diligis, & nos jam diligimus: quia & Deus eum propter suam obedientiam diligit. Sequere, & dilectus eris Deo, & hominibus.

## PUNCTUM TERTIUM.

**T**ertiam tarditatem prohibet. SS. P. N. ad opera communia. Unde *iis, qui ad opus Dei, vel ad mensam tarde occurrunt*, poenitentiam præscribit. Et merito. Tarditas etenim tam conveniendi ad opera communia, quam exercendi eadem magnam redolet acediam. Ubi enim fervor, ibi & velocitas, ut *perfecta discipuli opera citius explicentur*. Contra acedia ad illa accedere horret. In ipsis pigritat, & vix non dormitat. Nullam patitur alacritatem. In omnibus, & ad omnia tardio animum afficit, ut nec orare, nec legere, nec laborare jam libeat. Hinc displicet Deo summo opere; quia hilarem datorem diligit. Displicet & hominibus; quia inde conturbantur, contristantur, & scandalizantur. Tu, ut Deo placeas in bono, & ad bonum Confratribus, esto velox in omni opere tuo.


## PUNCTUM QUARTUM.

**A**N ergo, o Religiose! non tardus es ad obsequia fraterna? Qui cito dat, bis dat. An non tardus es ad obedientiam? Abraham ea nocte surrexit ad immolandum Filium, quæ  
præ-



præceptum accepit. An non tardus es ad opera communia? In operibus tuis esto velox. Dole, quod & tu tardus sis in his omnibus. Propone non tardus esse

1. Ad obsequia fraterna,
2. Ad obedientiam.
3. Ad opera communia.



## DIES VII.

De Negligentia in usu rerum Monasterii.

Nihil ducat negligendum. Cap. 31. v. 14.

### PUNCTUM PRIMUM.

**Q**uod hic SS. Pater Cellerario præcipit, cuivis quoque Religioso injungit: *Nihil ducat negligendum, ne aliquid perdat.* Cur? Quia nullam omnino rem propriam habet. Quo utitur, suum non est, sed Christi patrimonium. Ad ipsum pertinet, quidquid per fidelium vota Monasterio oblatum est. Sacrum est. Unde ex hac ratione SS. Pater vult, *ut omnia vasa Monasterii, cunctamque substantiam, ac si Altaris vasa sacrata conspiciamus.* O quam præclarum hac in re SS. Patres nostri nobis exemplum reliquerunt! minimas quasvis reculas, ne perirent, collegerunt. Ita viva fide, & magna devotione cunctam Monasterii substantiam tractabant. Omnia sacra ta aspiciabant. Omnia magni aestimabant.

Quare

Quare tu vestigiis eorum non insistis? Tua, non Christi ea, quibus uteris, esse existimas?

PUNCTUM SECUNDUM.

**N**ihil ducat negligendum ne aliquid frangat.  
Cur? Quia pauper est. Sane pauper, cui res angusta domi est, *de omnibus curam gerit*. Sollicitus est, ne vel minimum, quid deterioretur. Hoc quippe si caruerit, ipsa extremitate, & necessitate carebit. Hanc paupertatem, ni sequamur, vere pauperes non sumus. Illud S. Regulæ, *omni vilitate, & extremitate contentus sit Monachus*, non implemus. Potius divitum more non curamus perdere, & frangere, quæ nobis ad usum conceduntur. Parvi æstimamus deteriorare res Monasterii, securi, quod pro deterioratis meliora nobis restituantur. Revera hoc non est colere S. Paupertatem, sed divitum superfluitatem. O quantam rationem exiget Salvator noster, ab iis, qui tam parvam curam gesserunt de rebus suis! si enim tam austere requirit talenta, & mnas extraditas, quam severe castigabit omnino deperditas. Tu, ne aliquid contra paupertatis votum de substantia Monasterii deteriores, semper cogita illud SS. Patris tui: *quia pro his omnibus in die iudicii rationem redditurus es*.

PUNCTUM TERTIUM.

**N**ihil ducat negligendum, nec sordide, aut negligenter res Monasterii tractet. Cur?  
Quia

Quia omnia in Monasterio Deo sacra sunt. Magnum ergo piaculum est, res Deo dicatas sordide, aut negligenter tractare. Sane Balthasar ille, quia vasa templi inquinavit, malitiam suam complevit. Servus, qui talentum suum sordide subtus terram suffodit, in tenebras exteriores missus est. Et merito. Qui enim res Dei sordide tractando contemnit, ipsi Deo debitam denegare reverentiam convincitur. Hinc SS. Patres nec minimam sorditiem in vestibus, in paupere suppellectili, & in toto Monasterio pati valuerunt. Omnia munda ob reverentiam Dei, ad quem spectant, esse volebant. Horum exemplum secutus SS. Pater Noster, & ipse præcipit septimanariis, ut *Sabbatho munditias faciant*. Cur tu tam sordide res ad usum tibi concessas tractas? Parvam de Deo, rebusque sacris æstimationem habes.

#### PUNCTUM QUARTUM.

**A**N ergo, o Religiose! nihil negligis perdendo? Christi rem perdis. An nihil negligis deteriorando? Si speras bonorum abundantiam, non habes paupertatis observantiam. An nihil negligis sordide tractando? Sordes in rebus divinis totam Religionem dehonestant. Dole, quod contra votum paupertatis quam plurima in rebus Monasterii neglexeris. Propone nihil negligere

1. Perdendo,
2. Deteriorando,
3. Sordide tractando.

*DIES*



*DIES VIII.*

IN NATIVITATE B. V. MARIÆ.

De triplici obligatione vocationis  
Religiosæ.

Amice, ad quid venisti ? Cap. 6o. v. 4.

PUNCTUM PRIMUM.

**N**ata est hodie B. V. Maria, ut gloria Dei quam maxime ex ipsa resplenderet. Ubi enim maiorem gloriam Deus accepit, quam cum hominem ex ea assumpsit ? Et tu o Religiose ! ad Dei gloriam promovendam quam maxime vocatus es. Nonne S. Pater tuus ab initio Regulæ suæ mox ad istam te hortatur : *Qui timentes Dominum de bona observantia sua non se reddunt elatos : sed ipsa in se bona, non a se posse, sed a Domino fieri existimantes, operantem in se Dominum magnificant illud cum Propheta dicentes : Non nobis Domine, non nobis ; sed nomini tuo da gloriam ?* Vocatus quidem eras per creationem ad gloriam Conditoris. At quia tuam inordinate quærebas, vocavit te Deus ad statum Religionis. Hic aliud non est, quam status objectionis, & vilificationis propriæ. Hic aliud non est, quam continua glorificatio Dei. Percurre singula capita S. Regulæ, singula ad hunc finem tendere reperies. Sæpius igitur

*Spir. S. Ben. P. III.*

Q

quæ-

quære ex temetipso , *amice ad quid venisti*,  
ut sequaris natam Virginem.

### PUNCTUM SECUNDUM.

**N**ata est hodie B. V. ad salutem hominum.

Nonne ipsa jugis mediatrix , & advocata fuit Redemptionis nostræ ? Et tu o Religiose ! vocatus es ad promovendam hominum salutem ? Nonne SS. Pater tuus jubet, ut jugiter *pro amicis*, & *inimicis ores* ? Nonne status Monachi requirit , ut puram offerat Deo orationem ? Quid autem magis exaudit Deus, quam talem orationem ? Quo magis placatur, quam tali oratione ? Nonne Moyses avertit iram Dei a populo suo per orationem ? Crebro igitur ex te quære, *amice ad quid venisti* ? Sequere juxta statum tuum natam Virginem. Esto per puram orationem Mediator, & Advocatus hominum. Avertes ab ipsis iram Dei. Reconciliabis eos Deo. Salvabis animas illorum. Ita Spiritus sanctus & hortatur , & promittit. Orate pro invicem, ut salvemini.

### PUNCTUM TERTIUM.

**N**ata est hodie B. V. ad salutem propriam.

Quis enim magis salutem suam per indefinentem virtutum profectum promovit quam B. V. ? Et tu o Religiose ! ad salutem tuam unice per virtutum profectum promovendam vocatus es. Quoties SS. Pater tuus hujus te admonet ? *Currite, dum lumen vitæ habetis*,

*ne tenebræ mortis vos comprehendant. Et. Cur-*  
*rendum, & agendum est modo, quod in perpetu-*  
*um nobis expediat.* Hoc plane unicum negoti-  
um tuum est, ut salutem tuam in tuto colloques.  
Quid enim proderunt alia negotia omnia, si  
animæ tuæ detrimentum patiaris? Quid pro-  
derunt omnes labores, si per hos æternum glo-  
riæ pondus non adaugeas? Quid proderunt  
omnes curæ, ac sollicitudines, si pro animæ tuæ  
salute curam non habeas? Manet veritas Sal-  
vatoris. Qui sibi nequam, cui bonus erit. Quæ-  
rite primum regnum Dei, & iustitiam ejus. U-  
num est necessarium. Omnia ergo ad salutem  
tuam facere debes. Quæ ad istam non condu-  
cunt, tanquam noxia penitus contemnas. Sæ-  
pius in hunc finem tibi objice: *Amice, ad quid*  
*venisti?* Sequere natam Virginem, & de om-  
ni momento proficies. Omne enim, quod ad  
profectum tuum impenderis, immensum glo-  
riæ pondus tibi operabitur. Et quod ad salu-  
tem tuam non impenderis, minuet immensum  
istud gloriæ pondus.

#### PUNCTUM QUARTUM.

**A**N ergo, o Religiose! juxta vocationem Di-  
vinæ gloriæ promovendæ unice studes? *Ut*  
*in omnibus glorificetur Deus, præceptum SS.*  
P. N. est. An juxta vocationem tuam salutem  
hominum per orationes promotes? *Frequen-*  
*ter pro amicis, & inimicis orare, jussio SS. P.*  
N. est. An juxta vocationem tuam salutem pro-  
priam promotes? *Ut ad eum per obedientiæ la-*



*borem redens, a quo per inobedientiæ desidi-  
am recesseras, tota SS. Regula hortatur. Dole,  
quod hisce vocationis tuæ obligationibus non  
satisfeceris. Propone juxta vocationem tuam*

1. Dei gloriam,
2. Salutem hominum, &
3. Propriam semper promovere.



## DIES IX.

De grandi Murmurationis malo.

Ante omnia, ne murmurationis malum pro  
qualicunque causa in aliquo qualicunque  
verbo, vel significatione appareat. Cap. 34.  
v. 5.

### PUNCTUM PRIMUM.

**G**rande malum est murmuratio, ita, ut SS.  
P. N. vetet, *ante omnia, ne murmurati-  
onis malum pro qualicunque causa ap-  
pareat.* Nullam murmurandi causam, quan-  
tumcunque iusta appareat, admittit. Murmur  
quippe rursus patientis Salvatoris renovat do-  
lores. Lancea est lingua murmuratoris, qua  
Dominicum latus denuo crudeliter foditur. Pe-  
rimit enim illum, qui loquitur. Spinas merito  
quoque dixeris linguam murmuratoris. Pun-  
gunt illum, qui eam libenter audit. Clavos ap-  
pellaveris linguam murmuratoris. Transfi-  
gunt illum, de quo loquitur. Onesandum sce-  
lus!

lus! crudelius in Salvatorem sævit, quam omnis tortura sævientium Judæorum. Nisi enim JESUS vitam gratiæ in corpore, quod a murmuratore nunc cruciatur, vitæ corporis sui prætulisset nunquam istam per ignominiam crucis perdidisset.

### PUNCTUM SECUNDUM.

**G**Rande malum est murmuratio, ita, ut SS. P. N. prohibeat, *ante omnia, ne murmurationis malum in aliquo qualicunque verbo appareat.* Minimum quodvis murmuris verbum excludit. Et quod majus est, nec internum murmur patitur. Minatur enim, si *in corde murmuraverit, quod penam murmurantium incurrat.* Murmur quippe graviter affligit illum, contra quem effunditur. Nemo tam stupidus est, qui animo nullam sentiat molestiam; dum incidit in ora ad murmurandum procliva. Licet enim justis non multum curæ sit favor, aut gloria hominum. Deo vivunt, non hominibus. In cœlo cives sunt, non super terram. Illic præmia, & laudes expectant, non hic. Attamen linguis murmurantium, vel quia quiete Deo servire non possunt, vel quia inimicorum suorum sortem deplorant, graviter cruciantur. Tu, ne Confratrem, aut Superiorem unquam affligas, quodvis murmurationis verbum sumopere devita.

PUNCTUM TERTIUM.

**G**Rande malum est murmuratio, ita, ut SS. P. N. districte inhibeat, *ante omnia, ne murmurationis malum in significatione appareat.* Neque signum murmuris admittit. Murmur namque præ omnibus nocet murmuranti. Exemplo sint Maria, & Aaron. Murmurabant contra Moysen, quod Æthiopissam duxerit. Et ecce! Maria facta est leprosa sicut nix. Moyses vero laudes ipse Dominus enarravit. Haud secus & conscientiam, & famam propriam maculant, qui vel leviter murmurant. Glorificabitur a Domino, qui fideliter permanebit cum illo in tentationibus murmurantium. Ne tibi ipsi noceas, ab omni penitus murmure abstine.

PUNCTUM QUARTUM.

**A**N igitur, o Religiose! pro qualibet causa non murmuras? Neque murmuraveritis, sicut quidam eorum murmuraverunt, & perierunt ab exterminatore. An non murmuras in qualicunque verbo? Omnia facite sine murmurationibus, & hæitationibus. An non murmuras in qualicunque significatione? Ortum est murmur populi, & accensus est in eos ignis Domini. Dole, quod hanc sacram Regulam toties transgressus sis. Proponere

1. Pro qualicunque causa,
2. In qualicunque verbo,
3. Vel significatione non murmurare.

**DIES**



## DIES X.

## De Discretionē.

Testimonia Discretionis, matris virtutum, sumens, omnia temperet. Cap. 64. v. 25.

## PUNCTUM PRIMUM.

**S**anctissimus Pater N. nullo elegantiori eloquio nobis S. Discretionem commendare potuit, quam cum dixit: *Testimonia Discretionis matris virtutum sumens omnia temperet.* Tu ergo, ut hanc Discretionem obtineas, disce medium tenere. Neque ad dexteram, neque ad sinistram declina. Ad dexteram autem declinabis, si nimium virtuti e. g. abstinentiæ insistis. Virtutem namque perdis, dum ita abstinentiam sequeris, ut alia tibi auxilia de carne subtrahas. Ad sinistram pergis, cum remissius in virtute agis. Quando enim tepescis, paulatim solum tibi remanet vitium. O quam necessaria est virtus Discretionis. Discretio est lucerna, quæ universas nostras actiones dirigere debet. Discretio est oculus, qui totum vitæ spiritualis corpus lucidum reddit. Quod si fuerit nequam, totum tenebris vitiorum scatebit.

## PUNCTUM SECUNDUM.

**U**t *testimonia Discretionis matris virtutum sumens, omnia temperes, veram humi-*

militatem disce. Cujus humilitatis hæc erit probatio. Si examini Seniorum, aut Superiorum reservas universa, quæ agis, aut agenda occurrunt. Si in nullo tuo judicio acquiescas. Si per omnia informatione illorum agnoscas, quid debeas judicare bonum, vel malum. Sic semper recta incedes via. Nunquam aberrare poteris. Cur enim Saul ad sinistram declinavit? Suis adinventionibus potius, quam Samuelis præceptis credidit. Cur teste S. Antonio magno tot Anachoretæ, qui jejuniis, & vigiliis, solitudini, & perfectæ abrenunciationi, operibus misericordiæ, & orationi insistebant, in fine decepti sunt? Suo non aliorum judicio credebant. Discretionem caruerunt. O quam secuta est Discretio! non immerito toties eandem a nobis exigit in Regula sua Discretionem præcipua SS. P. N.

### PUNCTUM TERTIUM.

**U**T testimonia Discretionis matris virtutum sumens, omnia temperes, qualiter animam salves, discenibilis agere, nisi quod communis Monasterii Regula, vel Majorum cohortantur exempla. Dum pergis communis Regulæ via, proculeris & ab excessu, & a defectu. Et si Majorum exemplis insistis, semper Discretionem comite viam mandatorum Dei cures. Utroque modo ignoranti non decipieris. Non nimis fervore a virtutis profectu lassaberis. Non concupiscentiam, sed necessitatem in omnibus attendes. Nec serpens infernalis sub specie Angeli

geli lucis tibi illudet. Sine perturbatione, sine tristitia, sine gravi labore, sine errore vocationis tuæ satisfacies. O quantam pacem parit Discretio! sequere igitur exempla Majorum. En! ipsemet SS. Pater tuus proponit exemplum Patriarchæ Jacob. *Opera discernat, & temperet, cogitans Discretionem sancti Jacob dicentis: Si greges meos plus in ambulando fecero laborare, morientur cuncti una die.*

### PUNCTUM QUARTUM.

**A**N ergo, o Religiose! ad obtinendam Discretionem medium tenes? Prudentia carnis mors est; prudentia autem spiritus vita, & pax. An ad obtinendam Discretionem totus pendes ab arbitrio Patris spiritualis? Omnia fac cum consilio, & post factum non poenitebis. An ad obtinendam Discretionem Seniorum exempla sequeris? In Senibus prudentia. Dole, quod hoc donum Spiritus sancti tamdiu obtinere neglexeris. Propone ad obtinendam Discretionem

1. Medium tenere,
2. Arbitrio Patris spiritualis te subicere,
3. Exempla Majorum sequi.





## DIES XI.

De Silentio post Completorium.

A Completoriis nulla sit licentia denuo cuiquam loqui aliquid. Cap. 42. v. 6.

## PUNCTUM PRIMUM.

**T**Ria SS. P. N. pro nocturno Silentio, a Completoriis nulla sit licentia denuo cuiquam loqui aliquid, requirit. Primum est, ut a Completoriis nulla sit licentia loqui aliquid. Omnem licentiam loquendi tollit. Etiam utilia loqui prohibet. Nocte quippe cum Examini nocturno, recollectioni spiritus, nec non quieti corporis vacandum sit, merito tam strictum indicitur silentium. Necessitas, & charitas hoc suadent. Charitas quidem, ne unius garrulitate, strepitu, aut quovis tumultu alterius quies turbetur. Necessitas autem, ut in silentio spiritus per varia de die negotia dispersus recolligatur. Impossibile namque est, quin mens per resolutionem linguæ, aut per diversos labores non dispergatur. Nocturnæ autem horæ, & quies aptissimæ sunt ad recuperandum spiritum devotionis. Quis ergo tam temerarius sit, ut hanc S. Regulam prævaricare ausit?

## PUNCTUM SECUNDUM.

**A**Lterum est, ut nulla sit licentia loqui cuiquam. Quibus neminem a silentio nocturno

no excipit, nisi illum, qui cum supervenienti hospite, aut interrogante Abbate loqui debet. *Quod tamen & ipsum cum summa gravitate, & moderatione honestissime fiat.* Plus enim homines ædificantur religiosa taciturnitate, quam multo, ac longo discursu. Atque alias cum Superiore plus loquendum non est, quam expedit. Et cur noctu nimium loquamur? Tempus nocturnum, & ipse somnus ipsius est imago mortis. Quis in tam tristi imagine ausit loqui, qui nescit an ea nocte non sit moriturus.

### PUNCTUM TERTIUM.

**T**ertium est, ut *qui inventus fuerit prævaricari hanc taciturnitatis regulam, graviore vindictæ subjaceat.* His absterret a nocturni silentii fractione. Et quis non timeat vel minimo nutu nocturnum violare silentium? Nunquam magis quam de nocte dominatur princeps tenebrarum. Aliis illudit somniis. Alios spectris inquietat. Alios perturbat, & terret. In quos vero majus jus sibi vendicet, quam qui hanc taciturnitatis regulam ausi fuerint prævaricari? Tu ergo non tam timore regularis disciplinae, quam potestatis tenebrarum time nocturnum frangere silentium.

### PUNCTUM QUARTUM.

**A**n ergo, o Religiose! nocturno tempore non loqueris? Si non ex necessitate, ex charitate saltem tace. An nocturno tempore moderate ex obedientia loqueris? Fors hac nocte  
repe-

repetent a te animam tuam. An times ob potestatem tenebrarum vel minimo nutu nocturnum violare silentium? Nox est potestas tenebrarum harum. Dole, quod toties nocturnæ taciturnitatis regulam transgressus fueris. Propone

1. Nocturnum servare silentium ex charitate.
2. Ex obedientia moderate noctu loqui.
3. Timere violare nocturnum silentium ob potestatem tenebrarum.



## DIES XII.

De Lectione spirituali ante Completorium.

Dicta Vespera parvo intervallo mox accedant ad lectionem collationum. Cap. 42. v. 4.

### PUNCTUM PRIMUM.

**P**rimo de hac Lectione SS. P. N. statuit:  
*Dicta Vespera parvo intervallo mox accedant ad lectionem collationum, vel vitas Patrum, aut certe aliquid, quod ædificet audientes. Nihil quippe sic spiritum recolligit ad orationem. Nihil sic cor disponit ad compunctionem. Nihil sic animum imbuat sanctis ante somnum cogitationibus. Nihil sic somnum sancti-*



sanctificat, quam Lectio sacra. Unaquæque si-  
quidem dies suam cum animo afferat caliginem  
ex variis negotiis, & curis; noctes quoque  
diurnas curas excipientes, per easdem rerum  
species imposturam menti facitabunt. At qui  
per Lectionem sacram omnes aliæ imaginatio-  
nes, & curæ facile eliduntur, ut mens super se,  
& terrena omnia elevata in Deo solo stabiliatur.  
Talis autem revera cum Propheta dicere po-  
test: In pace in idipsum dormiam, & requie-  
scam. O quam purum & sanctum oportet il-  
lum esse somnum, qui cum tanta cordis pace  
capitur.

#### PUNCTUM SECUNDUM.

**S**ecundo de hac S. Lectione SS. P. N. statuit,  
ut *per hanc moram lectionis si quis forte in  
assignato sibi commissio fuerit occupatus, oc-  
currat.* Tanti hanc sacram Lectionem æsti-  
mat, ut neminem, quovis in negotio fuerit oc-  
cupatus, ab ea velit exemptum. Hac in re si-  
cut in cæteris omnibus secutus est antiquos Pa-  
tres. Ipse quippe ad exemplum illorum totas  
noctes divinis sermonibus, & lectionibus in-  
sumpsit. Hujus testes sunt Servandus Diaconus,  
& SS. Soror ejus Scholastica. Voluit &  
nos eorum vestigiis saltem a longe insistere, ut  
ex prævia lectione ante somnum ædificare-  
mur. O quanta animi devotione hi sanctissimi  
Viri de rebus cœlestibus per integras noctes  
conferebant! necessarij somni obliviscebantur.  
Ita cœlesti abundabant consolatione.

Quan-

Quantum inde virtutum profectum hauriebant! de die in diem acriorem contra vitia pugnam inibant, & de virtute in virtutem gradiebantur. Tu si totam noctem sacris lectionibus, & meditationibus adhuc insumere non vales, saltem nunquam hanc sacram Lectionem ante Completorium intermitte.

### PUNCTUM TERTIUM.

**T**ertio SS. P. N. de hac sacra Lectione statuit, *ut omnes in unum positi compleant.* Hicce SS. Pater nobis inculcat, ut non solum spiritum, sed etiam cor recolligamus. Dignum enim est, ut, qui unam sub uno Domino militiam tota die sustinuerunt, etiam omnes in unum positi stipendia sui laboris expectent. Iustum est, ut ii, qui forte per scandalorum spinas de die charitatem expunxerunt, ad Vesperas per illam Dominicam sponsonem sicut & nos dimittimus debitoribus nostris in se reversi, charitatem in unum positi opere compleant. Dignum, & iustum est, ut ii, qui omnes in Christo unum sunt, omnes pariter in unum positi & per lectionem spiritum, & per affectum orationis charitatem simul compleant. Dignum, & iustum est, ut qui tota die simul contra spirituales nequitias decertarunt, etiam in unum positi victoriam contra nocturnas inimici insidias unitis precibus sibi obtineant. Væ illi, qui tantas gratias negligit! non visitabit eum Dominus. Ibi solum est, ubi duo, aut tres sunt in nomine ejus congregati.

PUN-

PUNCTUM QUARTUM.

**A**N igitur, o Religiose! spiritum recolligis per Lectionem ante Completorium? Semper magni habita fuit ista Lectio a sanctis Ordinis nostri. An non propter Officium, aut functiones tuas eam omittis? SS. Pater expresse statuit, ut etiam ob ista non intermittatur. An etiam cor per istam Lectionem ad charitatem recolligis? Charitas operit multitudinem peccatorum, quæ de die commisisti. Dole, quod tam faciliter istam sacram Lectionem omiseris. Propone

1. Ad recolligendum spiritum, &
2. Cor,
3. Nulla obstante functione Lectioni ante Completorium interesse.



*DIES Xlii.*

De Jejunio Autumnali.

Ab idibus autem Septembris usque ad caput  
Quadragesimæ ad Nonam semper reficiant.  
Cap. 41. v. 5.

PUNCTUM PRIMUM.

**T**Rinum SS. P. N. nempe Quadragesimale, Æstivale, & Autumnale indicit Jejunium. De quo ultimo præcipit:



pit: *Ab idibus autem Septembris usque ad caput Quadragesimæ ad Nonam semper reficiant.* Ita amans Jejunii fuit, ut ferme per totum annum jejunaverit, & suos jejunare voluerit. Et cur? Jejunium carnis robur edomat. Desideria carnis extinguit. Impuros humores exsiccat. Et dum debilitatur corpus, anima vegetatur. A passionibus malis liberatur. A noxiis cogitationibus purgatur. A desideriis perversæ voluntatis præservatur. Hos Jejunii effectus non sentiunt illi, qui uno quidem die jejunant, sed altero satiando se ita explent, ut esca vix sequenti die digeratur. Illi igitur bene jejunant, qui communibus contenti alimentis etiam modum quotidie prandentium non excedunt. Tu ergo si juxta consuetudinem Monasterii tui non permittis ab hac die usque ad caput Quadragesimæ jejunare, saltem in diebus Jejunii istam S. Petri Damiani de Jejuniis Regulam observa.

#### PUNCTUM SECUNDUM.

**A***B idibus Septembris usque ad caput Quadragesimæ ad Nonam semper reficiant.* Et cur tam diuturnum SS. Pater nobis injungit Jejunium? Jejunium mentem ad Deum levat. Castitatem perfectam gignit. Orationem puram procreat. Consolationem sancti Spiritus meretur, ut sine impedimento cum inenarrabili gaudio ad spiritualia exercitia incuinbamus. Hinc est, quod SS. Pa-  
tres

tres Ordinis nostri hoc Jejunium tam severe custodierint usque ad Pascha, ut se jejunasse teste S. Petro Damiano minime crediderint, si præter panem cum sale, & aqua aliud quid gustassent. Tu si hoc Jejunium observare vel non audes, vel non vis, saltem ita corpus semper refice, ut a mensa sine difficultate S. Exercitiis intendere possis.

PUNCTUM TERTIUM.

**A**B idibus Septembris usque ad caput Quadragesimæ ad Nonam semper reficiant. Et cur tam longum SS. Pater noster præscribit Jejunium? Jejunium Monachum officii sui, quod est sua, & aliorum peccata plangere, jugiter admonet. Nonne Ninivitæ jejunarunt, ut digne peccata sua plangerent? Nonne populus Bethulix humiliavit animam suam in Jejunio, ut veniam peccatorum suorum mereretur, atque ab obsidione Holofernis liberaretur? Nonne David jejunavit, ut Deus illi remitteret poenam peccati sui, ac infantem vivum conservaret? Semper sanctis Patribus Jejunium pars poenitentix fuit. Tu ergo, ut officio quoque tuo satisfacias, si non vales hoc Jejunium pro semper observare, saltem cum debes jejunare, Jejunium ama, atque in memoriam hujus Jejunii de omni cibo, & potu aliquam abstinentiam facito.

## PUNCTUM QUARTUM.

**A**N ergo, o Religiose! ab idibus Septembris usque ad Pascha jejunas, aut saltem strictius Jejunia consueta in Monasterio tuo observas? In omnibus exhibeamus nos, sicut Dei ministros in Jejuniis &c. An saltem ita moderate corpus ab hoc tempore reficis, ut statim a mensa spiritualibus exercitiis vacare possis? Ministrantibus illis Domino, & jejunantibus dixit Spiritus sanctus. An saltem aliquam abstinentioniam de omni cibo, & potu facis? Nunc ergo dicit Dominus, convertimini ad me in toto corde vestro, in Jejunio, & fletu, & planctu. Dole, quod de isto Jejunio vix cogitaveris. Proponere saltem in memoriam illius.

1. Consueta Jejunia strictius observare.
2. Moderatius solito corpus reficere.
3. Aliquam saltem abstinentioniam de victu facere.

\*\*\*\*\*

## DIES XIV.

Quomodo Religiosus operi Dei nihil præferre debeat.

Nihil operi Dei præponatur. Cap. 43. v. 1.

## PUNCTUM PRIMUM.

**P**Ræcipuum officium Monachorum suorum SS. Pater Noster voluit esse Psalmodyæ sacræ



cræ incumbere : dum ait ; *nihil operi Dei præponatur*. Secutus est Patres antiquos , qui & ipsi statuerunt ; Monachi officium esse , puram Deo orationem offerre. Porro ad mentem SS. Patris *nihil operi Dei præponit*, qui super omnia alia negotia , & exercitia opus Dei æstimat. Et quis ita non æstimet ? Omnis quidem Scriptura divinitus inspirata est utilis ; at unus Psalmorum liber omnem utilitatem , & medelam animarum complectitur. Leges quippe sancit vitæ sanctius instituendæ , atque cuius agenda præscribit , & submonet. Vulnere peccatorum per sanat , quantalibet vetustate occalluerint. Vulneri recens inflicto celerem , citamque adfert emendationem. Quod integrum , & incolume est , tuetur , ac servat. Hoc vero totum agit , cum amæna quadam deductione , ac moderata jucunditate animorum , quæ menti honestas inserit cogitationes , & puros virtutis affectus. An ergo poteris aliquod sacrum exercitium Psalmodiæ antepone ?

PUNCTUM SECUNDUM.

**O**peri Dei nihil præponit , qui ad horam Divini officii , mox ut auditum fuerit signum , relictis omnibus , quælibet fuerint in manibus , summa cum festinatione currit. Etenim cum digne , & super omnia quis æstimaverit sacram Psalmodiam , merito omni festinatione , & cordis desiderio ad eam festinabit. In cujusque corde amor , & fervor laudis Divinæ exarserit , tardare ad opus Dei nunquam poterit.

Sicut cervus ad fontes aquarum, ita ad cantum Psalmodiarum ipse desiderabit. Et quem delectat meditatio Mysteriorum Creationis, Redemptionis &c., quomodo ad Psalmodiam non curat? Aut cui quotidianus in virtute profectus cordi est, cur non toto mentis affectu ad Psalmodiam anhelet? Qui tristis est, tentatus, aut quavis adversitate oppressus, quare S. Psalmodia non libenter intendat, in qua verum obtinebit solatium? Qui beneficiis Dei lætatur, quo potius quam S. Psalmodia se gratum ostendat? An ergo poteris aliquod pium exercitium S. Psalmodia præponere?

#### PUNCTUM TERTIUM.

**O**peri Dei nihil præponit, qui nullam horam omittit in Choro, & quavis de causa impeditus, *ingreditur intus, ut nec totum perdat.* Ingens sane jactura est, quantumvis parvum a communi Psalmodia perdatur. Christus in medio Psallentium est. Christus uberrime suas gratias illis communicat. Christus hac concordia Psalmodia multo magis, quam privata oratione honoratur. Et sæpe fit, ut qui negligenter, & tepide psallit, alterius fervore, & charitate ad devotionem accendatur. Væ illis, qui levi ex causa Chorum devitant! væ illis! qui somno, otio, aut fabulis libentius, quam S. Psalmodia vacant! steriles, atque aridi in omni suo exercitio, & negotio manent. Non solum nil merentur, quævis etiam agant, sed pro inobe-

inobedientia sua poena digni sunt. Tu operi Dei nihil præpone.

PUNCTUM QUARTUM.

**A**N ergo, o Religiose! nihil operi Dei præponis illud super omnia æstimando? In Psalmis reconditus est Divina Sapientiæ thesaurus. An operi Dei nihil præponis statim Chorum accedendo? Ex festinatione ad opus Dei colligitur fervor devotionis. An operi Dei nihil præponis Chorum nunquam negligendo? In Psalmodia promptuarium omnium bonorum invenitur. Dole, quod operi Dei quævis prætuleris. Propone operi Dei nihil præponere

1. Super omnia illud æstimando.
2. Statim Chorum accedendo.
3. Nunquam illum negligendo.

---

DIES XV.

Quod Religiosus extra communem Refectionem nihil cibi, aut potus sumere debeat.

Nec quisquam præsumat ante statutam horam, vel postea quicquam cibi, vel potus sumere. Cap. 43. v. 10.



## PUNCTUM PRIMUM.

**N**Unquam homo Religiosus fiet, qui extra tempus cibum, aut potum sumere consueverit. Inordinata hac cupiditate paulatim omnem mortificationem amittet. Hinc SS. Pater Noster statuit: *nec quisquam præsumat ante statutam horam, vel postea quicquam cibi, vel potus sumere. Nec ante statutam horam.* Solet quippe Dæmon nonnunquam tam intempestiva esurie vexare, ut vix superari posse videatur. Nonnunquam delicias cibi, aut potus proponit, ut iis inescemur. Ex eo namque, quo primos Parentes nostros per gulam superavit, nos quoque per eandem vincere nunquam desistit. Et quidem ante statutam tanto vehementius nos impugnat, quanto acrius ipsa natura illo tempore cibum exigit, aut potum. Scit per prævaricationem hujus regulæ, & in leges temperantiæ, & obedientiæ peccatum iri. Tu sequere illum Eremicolam. Dic tentatori: Post horam comedes. Elapsa hora solum adhuc per horam expectabis; donec statuta hora advenerit.

## PUNCTUM SECUNDUM.

**N**Ec quisquam præsumat ante statutam horam, vel postea quicquam cibi, vel potus sumere. *Vel postea.* Nimis intemperans sit, qui communi refectioe contentus non est. Valde deliciis cibi, & potus addictus sit, qui præter

præter communem victum aliunde gulam suam satiare contendit. Nonne talis immortificati Religiosi Deus venter est? Audi, quam terribiliter ejusmodi gulosus luat. Narrat S. Petrus Dam. Monachus quidam prurientis gulæ stimulo agitatus, frixuram quandam cum extra tempus comedisset, tanto mox luxuriæ ardore exarsit, ut quod eatenus non fecerat, contra puritatem ageret. Sic una concupiscentia trahit post se aliam. Et qui vocationis suæ legibus contradicit, legem membrorum suorum rationi, & voluntati suæ contrariam experiri debet. Time ergo hanc regulam transgredi. Etenim si SS. Pater Valentiniani Fratrem, quia extra statum tempus corpus refecit, tam dure increpavit, qualiter Religiosum Regulam suam professum in judicio accusabit?

### PUNCTUM TERTIUM.

**N**Ec quisquam præsumat ante statutam horam, vel postea quicquam cibi, vel potus sumere. Duos tantum casus excipit, in quibus statutam horam prævenire concedit. Primus est: Si cui offertur aliquid a Priore & accipere renuerit: hora, qua desideraverit hoc, quod prius recusavit, aut aliud omnino nihil percipiat usque ad emendationem congruam. Obedientia namque semper melior, quam victimæ abstinentiæ. Alter est. Ut senes præveniant horas canonicas, ita tamen, ut & Regulæ auctoritas eis prospiciat. Ipsa


*equidem natura humana trahitur ad misericordiam in hac ætate. Vide ex his, quanti SS. Pater faciat obedientiam. Vult, ut eam jejunio, & abstinentiæ præponamus. Exigit, ut etiam senes, & infirmi sine obedientia S. Regulæ nihil præsumant. Quæ enim opera ex obedientia ortum non habent, merito careant. Quid ad ista Religiosus, qui furtive passim deliciis cibi, & potus inhiat?*

#### PUNCTUM QUARTUM.

**A**N igitur, o Religiose! ante statutam horam nunquam corpus reficis? Jonathas; quia ante statutam horam parum mellis gustavit, sententiæ mortis se obnoxium fecit. An postea nihil cibi, aut potus percipis? Filii Israel fastidiendo manna per concupiscentiam carnis iram Dei provocaverunt. An ex obedientia duntaxat extra statas horas comedis? Elias, quia ex jussu Angeli comedit panem subcinericium, ambulavit in fortitudine cibi illius ad montem Dei. Dole, quod hanc legem temperantiæ toties violaveris. Propone

1. Ante statutam horam,
2. Vel postea,
3. Nisi ex obedientia cibum, aut potum non sumere.





## DIES XVI.

### De Officio Cantoris.

Cantare autem, aut legere non præsumat, nisi qui potest ipsum officium implere, ut ædificentur audientes. Cap. 47. v. 3.

#### PUNCTUM PRIMUM.

**D**Um SS. Pater Noster illum, qui, cantare, aut legere non potest, ab Officio Cantoris hisce arcet; *Cantare autem, aut legere non præsumat, nisi qui potest ipsum officium implere, ut ædificentur audientes*: Ei, qui cantare, aut legere potest, tria pro ædificatione audientium præscribit; *Quod cum humilitate, & gravitate, & tremore fiat, & cui jusserit Abbas*. Primum est, ut *fiat cum humilitate*. Licet enim Monachus scite cantet, non ædificabit audientem, nisi etiam humilis fuerit. Non placuisset Sponso vox dulcis Sponsæ, si decorem humilitatis in facie non præsetulisset. Ait quidem; sonet vox tua in auribus meis; vox enim tua dulcis: at mox subdit; & facies tua decora. Scandalo patet, qui voce dulcedinem, facie vero superbiam spirat. Nihil enim sic oculos astantium offendit, quam notata in homine humilitatem professo superbia. Tu indignum te reputa, ut cantes,

R 5

aut

aut legas, etsi possis; tunc cantus tuus ædificabit audientes. Consolabitur namque tristitia corda; mentes hominum lætificabit; fastidiosos oblectabit.

### PUNCTUM SECUNDUM.

**A**lterum est, ut fiat cum gravitate, & tremore. Dominus Deus universorum enim præsens est. Astant Angelici Spiritus, ut inde recreentur. Adest populus fidelis, ut ædificetur. Magna igitur gravitas, magnus tremor merito Cantorem occupet, ne Deum & Angelos offendat, aut audientes scandalizet. Nonne cantus ipsius plenus erit gravitate, ut nec lasciviam resonet, nec rusticitatem? Nonne sic suavis erit, ut non sit levis? Nonne sic mulcebit aures, ut moveat corda; tristitiam levabit; iram mitiget; sensum litteræ non evacuet, sed fecundet? Non est levis jactura gratiæ spiritualis levitate cantus abduci a sensuum utilitate: & plus sinuandis intendere vocibus, quam insinuandis rebus. Tu semper cum gravitate, & tremore canta, aut lege; & sicut cibus in ore comedentium, sic psalmus sapiet in corde audientium.

### PUNCTUM TERTIUM.

**T**ertium est, ut fiat cum obedientia, id est, cui jussèrit Abbas. Ex obedientia namque cantandum est; secus cantus nec Deo gratus, nec hominibus fructuosus erit. Non enim

enim studium bonæ actionis, nec otium sanctæ contemplationis, nec lachrymæ poenitentis vel utilia mortalibus, vel accepta poterunt esse illi, qui tanti habuit obedientiam, ut vitam, quam ipsam perdere maluerit, factus obediens usque ad mortem pro salute hominum. Hæc duntaxat omnem actionem facit meritoriam, & ad cœlestem vitam proficuum. Unde SS. Patri nec Psalmodia placet, nisi eam sancta condierit obedientia. Quare? *Quia quod sine permissione Patris spiritualis fit, præsumptioni deputabitur, & vanæ gloriæ, non mercedi.* Tu si fructuose pro tua, & audientium salute legere, aut cantare vis, Officium Cantoris imple ex obedientia.

#### PUNCTUM QUARTUM.

**A**N ergo, o Religiose! cantas cum humilitate? Humilis non audiri appetit. An cum gravitate cantas? Cantus, nisi ecclesiasticam redoleat gravitatem, audientibus offensivus est. An cum obedientia cantas? Obedientia Psalmodiæ, devotionis conciliat saporem. Dole, quod hætenus Officio Cantoris non ad ædificationem audientium functus fueris. Propone

1. Cum humilitate,
2. Cum gravitate, & tremore,
3. Cum obedientia legere, aut cantare.



## DIES XVII.

## De servando Ordine Diei.

Omnia horis competentibus compleantur.

Cap. 47. v. 1.

## PUNCTUM PRIMUM.

**O**rdinis plane amantissimus fuit SS. Pater Noster, unde non solum ad vitandam otiositatem singulis temporibus, & horis sua exercitia præscripsit; sed secundum hunc ordinem exacte vixit. Testis est rusticus ille, qui sibi filium suum a morte resuscitari petiit. Offendit ipsum revertentem cum Fratribus de agro. Testis est Gothus ille, qui rusticum brachialoris adstrictum ante equum suum usque ad Benedictum impulit. Offendit ipsum solum sedentem, & legentem. Servavit namque illud: *Omnia horis competentibus compleantur.* Necessarium hoc est ad profectum quotidianum. Quomodo enim proficiet, qui semper aliud agit, quam quod voluntas Dei, S. Regula, Statuta Ordinis, & Superiorum mandata requirunt? Plane ad Dei amorem seu finem Regulæ tendere non possunt, quæ ex ipso non proveniunt. Omnia equidem; quæ ex Deo sunt, qui charitas est, ordinata sunt. Et sine ordine ad eam non pervenitur. Sic Sponsa cœlestem suum Sponsum laudat, quod  
in

in se ordinaverit charitatem. ¶ Quare non proficis? Exercitia tua non ordinatim peragis; multa turbatim agere cum sollicita Martha gestis; ab uno ad aliud volas; nihil absolutum agis; verbo; unum illud Mariæ Magdalenaë necessarium pro unaquaque hora relinquis. Custodi ordinem, ut ipse te custodiat a quotidiano defectu.

## PUNCTUM SECUNDUM.

**N**ecessarium est, ut omnia horis competentibus compleantur, ad discretionem obtinendam. Qui enim voluerit uni tantum exercitio omnes horas consecrare, necesse est, ut tali exercitio lassatus limites discretionis transgrediatur. Hinc est, quod SS. Pater asserat; *certis temporibus occupari debent Fratres in labore manuum, certis iterum horis in Lectione divina, & certis horis in opere Dei.* Hac de causa per duo capitula singulas horas, quibus quid agendum, assignat. Ideo tam exactam exigit operis obedientiam ad quamlibet horam, ut *relictis omnibus, quælibet fuerint in manibus, summa cum festinatione curratur ad opus obedientiæ.* Unde in labore tantam desidiam, in oratione tepiditatem, in Lectione nauseam sentis? Diutius iis immoraris. Sanè S. Antonius magnus hoc ipso tædio laboravit; donec ab Angelo didicit, certis quodvis opus horis absolvere. Custodi Ordinem, ut ipse te custodiat ab excessu, & defectu in bono.

PUN-

## PUNCTUM TERTIUM.

**N**Ecessarium est, ut *boris competentibus omnia compleantur*, ad acquirendam Perseverantiam. Quocunque enim rerum occur-  
su ad alia, & alia mutabitur animus, nisi cer-  
to, & constanti diei ordine immutabilis con-  
servetur. Pro! quantum salutis periculum  
illi non incurrunt, qui omnem regulæ com-  
munis Monasterii sui ordinem invertunt, &  
evertunt? Qui perseveraverit in finem, sal-  
vus erit. Virtus nimirum boni operis per-  
severantia est. Huic soli redditur corona  
justitiæ. Quid enim prodest esse bonum, ni-  
si perseveraveris bonus esse usque in finem?  
Bonus erat Saul, & optimus, quia docet  
Scriptura, quod non erat vir melior eo in  
populo Israel. Sed ad quid devenit? Ceci-  
dit, cecidit, & reprobus factus est. De  
quantis legimus in vitis Patrum, viris po-  
tentibus in vigiliis, & in jejuniis, in labori-  
bus supra humanum modum, imo & in mi-  
raculis coruscantibus, qui misere ceciderunt;  
quia non perseverarunt. Finis, non pugna  
coronat. Nemo vero coronabitur, nisi qui  
legitime, id est, ordinate certaverit. Cu-  
stodi ergo Ordinem, ut ipse te custodiat ab  
instabilitate.

## PUNCTUM QUARTUM.

**A**N ergo, o Religiose! Ordinem servas ad  
proficiendum? Voluntas Dei sanctifica-  
tio



tio nostra est. An Ordinem servas ad obtinendam Discretionem? Ordo in actionibus defectum, & excessum declinat in bono. An Ordinem servas ad obtinendam perseverantiam? Laudatur navigantis felicitas cum ordinatim navigando venerit ad portum. Dole, quod tam parvi æstimaveris ordinem diei invertere. Proponere eundem diligentissime custodire

1. Ad profectum,
2. Ad Discretionem,
3. Ad perseverantiam obtinendam.



### DIES XVIII.

Quod nullus Fratrum accedere debeat  
alium Fratrem tempore incompetentem.

Neque Frater ad Fratrem jungatur horis incompetentibus. Cap. 48. v. 19.

#### PUNCTUM PRIMUM.

**M**erito SS. Pater Noster præcipit: *Neque Frater ad Fratrem jungatur horis incompetentibus.* Otium illud prescribit præceptum. Otiosi namque est hinc indediscurrere, alios invisere, & tempus otioso circuitu transigere. Verum quis otiositatem istam non fugiat? *Inimica est animæ; pulvinar Diaboli; omnium malarum cogitationum sentina; cunctorum desideriorum infelix mater; universorum scelerum origo.* Quicumque  
autem

autem in cella persistere nequit, otatur. Et qui in cella opus injunctum non agit, neque in ea subsistet. Otium mox illum foras vagari coget. Tu non solum hoc age, ut diem cum delectatione sine excursu in cella transigas, sed ut etiam peracta diæta ad profectum mentis semper aliquid resideat. Nec enim ea die bonus cellita se vixisse debet æstimare, in qua nil eorum se egisse recolit, propter quæ in cella vivitur.

#### PUNCTUM SECUNDUM.

**N***Equæ Frater ad Fratrem horis incompetentibus jungatur.* Otiosas fabulas lex ista prohibet. Qui enim tota die discurrunt, quid aliud agunt, quam ut otiose fabulentur? Consolari quærent per ejusmodi fabulas; at dum hora transit, anxietas, & desolatio prior redit, aut adhuc gravior. Qui tota die discurrunt, quid aliud agunt, quam ut quo in hac vita plus valent, eo sibi linguæ fræna audacius relaxent? loquuntur perversa quælibet, nullumque de verbis suis damnum metuunt. Istum contumeliis feriunt, illum maledictionibus jaculantur. Nunc de Superioribus mûrmurant, nunc de aliis conqueruntur. Etsi omni tempore in multiloquio peccatum non effugitur, plane peccatum est multiplex, cum ita extra licentiam quis confabulatur. Sede ergo tanquam passer solitarius in tecto; ita tu in cella tua. Opus tuum age, & securus valde eris in judicio; ubi homines de quoeunque verbo, quod locuti fuerint, reddent rationem.

PUN-

PUNCTUM TERTIUM.

**N***Equ* Frater ad Fratrem boris incompeten-  
tibus jungatur. Talis quippe non solum  
sibi inutilis est, sed etiam alios extollit. Dum  
otiosus alios invisit, ipsos quoque otiosos red-  
dit; & quia cum Christo in cella confabula-  
ri reuit, foris silentium frangere non vere-  
tur. Non timet scandalizare Fratrem. Et tamen  
quale malum scandalum non est? Omnis cul-  
pa vere poenitentis oblato sacrificio deletur.  
At malum scandali nisi refarcitum aut re aut  
voluntate non aufertur. Ab eo enim, qui scan-  
dalizavit Fratrem suum, sacrificium Dominus  
non acceptat, nisi fuerit eidem reconciliatus.  
Quale, & quam multiplex scandali peccatum  
non est? Unus quidem otium, & fabulas in-  
choat; sed paulatim imitando, quam plurimi  
subsequuntur. Ejus tamen principaliter culpa  
est, qui sequentibus se exempla peccandi præ-  
buit contra Regulam. Ne tali vitio inquineris,  
libenter incole cellam tuam. Nullibi talem  
reperies pacem.

PUNCTUM QUARTUM.

**A**N ergo, o Religiose! alium Fratrem ex otio  
non accedis? Multa mala docuit otiositas.  
An non ex pruritu confabulandi Fratrem acce-  
dis? Qui nescit linguam suam refrænare, hu-  
jus vana est religio. An non accedendo Fratrem  
eum scandalizas? Mittet Filius hominis An-  
gelos suos & colligent de regno ejus omnia  
*Spir. S. Ben. P. III.* S scan-



scandala. Dole, quod tuo discursu per cellas,  
& Monasterium sæpius & tibi inutilis, & aliis  
scandalosus extiteris. Propone horis incompe-  
tentibus Fratri te non jungere,

1. Ut otium vites,
2. Ut fabulas declines,
3. Ut neminem scandalizes.



## DIES XIX.

### De Die Dominico.

Dominico die Lectioni vacent omnes. Cap. 48.  
v. 20.

### PUNCTUM PRIMUM.

**S**emper celebris fuit SS. Patri Nostro dies  
Dominicus. Hinc specialem a suis Disci-  
pulis requirit in eo devotionem. Primo  
equidem exigit, ut *Dominico die temperius*  
*furgatur ad vigiliis*. Cur? Ut orationibus,  
& psalmis magis, quam aliis diebus insistant.  
Hæc est enim dies, in qua amplissima a Deo  
beneficia adepti sumus. In hac Dominus Crea-  
tionem mundi incepit. Quis igitur os suum  
non aperiat ad laudandum Creatorem super  
judicia justitiæ suæ? Plane cuncta hæc Crea-  
torem omnium Deum fatentur; ejus potesta-  
tem concorditer promulgant; & ipsius Mag-  
nificentiam laudant. Quis non per creaturas  
Deum

Deum Creatorem cognoscere, & amare studeat? Omnis creatura respecta dat vocem attestationis, quod per ostensam speciem Creatori suo quasi vocem confessionis reddat. O me tepidum, qui hoc Divinum beneficium diebus Dominicis laudando Creatorem meum recognoscere non studui! necesse est, ut qui ab invisibilibus per visibilia male electa cecidi, per visibilia bene considerata ad invisibilia rursum redeam, atque ex visibilibus Deum laudare, & amare discam.

## PUNCTUM SECUNDUM.

**S**ecundo exigit, ut meditemur; dum ait: *Si quis vero ita negligens, & desidiosus fuerit, ut non velit, aut non possit meditari; injungatur ei opus, quod faciat, & non vacet.* Cur vult, ut meditemur? Hae die Christus natus est, & gloriose resurrexit a mortuis. Unde amplissimam nobis meditandi praestat materiam. Quid enim utilius, quam meditari in vita, passione, & gloria D. N. J. Christi? Utilis est Psalmodia; utilis aliarum Scripturarum pia ruminatio; utilis creaturam consideratio, si ad Creatorem referantur: At utilissima, & unice necessaria est humanitatis Christi memoria. Ipsa enim est praesens passionum, & inordinatarum affectionum exterminatio. ipsa est opportunum tentationum refugium. Ipsa est suave angustiarum refrigerium. Ipsa est omnium virtutum fons. Ipsa denique totius perfectionis est absolutissimum exemplar. O quam

male habebunt ingrata illa, & infelicia corda, quæ tanta beneficia, tanta amoris insignia diebus saltem Dominicis, quibus eorum recordatio ab universa Ecclesia recolitur, rememorare negligunt!

#### PUNCTUM TERTIUM.

**T**ertio præcipit, ut *Dominico die lectioni vacent omnes*. Et quare? Spiritus sanctus in lectione loquitur ad cor. Hac quippe die venit hic Divinus Spiritus in Apostolos; eorum intellectum suo lumine illustravit, & corda ipsorum suo charitatis igne accendit. Hinc merito SS. Pater requirit, ut in memoriam hujus mysterii lectioni vacemus. In hac quippe ex Divini Spiritus instinctu, & igne charitatis ipsius plurimam anima jucundatur. Ex hac ipsi dulcescunt quævis spiritualia. Per hanc munda conservatur; tranquilla redditur; contra tentationes roboratur; & eximium virtutum decorem accipit. Plane SS. Patres, & Eremiticæ hoc quoque modo dies Dominicos celebrant. Conveniebant simul ad Ecclesiam. Vacabant Psalmis. Audiebant, & prælegebant verbum Dei. Reversi in cellas suas meditabantur. O quam infructuose hucusque Dominicos dies impendi! potius requiei corporis, quam sacro animæ otio consecravi.

#### PUNCTUM QUARTUM.

**A**N ergo, o Religiose! dies Dominicos Creatori consecras per sacram Orationem, &  
Psal-



Psalmodiam? In principio creavit Deus cœlum & terram. An dies Dominicos Redemptori consecras per piam meditationem humanitatis ejus? Natus ex Maria Virgine, & Homo factus est; Crucifixus etiam pro nobis, passus, & sepultus est, & resurrexit tertia die. An dies Dominicos consecras Sanctificatori tuo per sacras Lectiones? Cum complerentur Dies Pentecostes, factus est repente de cœlo sonus, tanquam advenientis Spiritus vehementis. Dole, quod tam parvam devotionem in diebus Dominicis habueris. Propone

1. Dies Dominicos Creatori per orationem,
2. Redemptori per meditationem,
3. Sanctificatori per lectionem consecrare.



## DIES XX.

Quomodo Opus Dei, extra Chorum, & in via peragendum sit.

Agant ibidem Opus Dei. Cap. 50. v. 2.

### PUNCTUM PRIMUM.

**Q**UOD SS. Pater Noster revera nihil Operi Dei præposuerit, satis patet ex summa ejus sollicitudine, qua præcipit primo; ut *Fratres, qui omnino longe sunt in labore, & non possunt occurrere hora competen-*

*ti ad Oratorium, & Abbas hoc perpendit, quia ita est, agant ibidem Opus Dei, ubi operantur.* Sunt enim quidam ita inordinate suis laboribus & negotiis in itinere, ac extra Chorum intenti; ut vel nimium propterea horas differant, vel nimium anticipent. At satis dant intelligi, & quod a Spiritu SS. P. longe distent, & quod ferme omnia alia Operi Dei præponant. Plane multum devotionis perdunt, qui ita in Opere Dei negligentes existunt. Dum enim tempora observantur, nunquam non singularis gustus, & fructus percipitur. Unde sancti Ordinis nostri hujus Regulæ fuerunt observantissimi. S. Aichadrus, dum in tonsura recordatus horam Canonicam se præterisse, etiam semirasus occurrit. Et cum in itinere ita horas suas persolveret, audire cœlestes Spiritus meruit suavissima voce occinentes illud Psal. Ibunt Sancti de virtute, in virtutem. Sequere. *Nec te prætereant horæ constitutæ.* Ideo Prima, Tertia, Sexta, &c. vocantur. Propter mysteria, quæ eo tempore acta sunt, horæ canonicæ assignatæ fuerunt.

#### PUNCTUM SECUNDUM.

**S**ECUNDO præcipit, ut *agant ibidem opus Dei, ubi operantur, cum tremore Divino flectentes genua.* A paucis sane ista Regula observatur. Nunc sedent. Nunc stant. Nunc ambulant. Si vere se sisterent ante conspectum Dei, & Sanctorum Angelorum, profecto genua flecterent. Quia vero mentem suam ad Divinam præ-

præsentiam cum Davide erigere negligunt, dicendo: Quo ibo a Spiritu tuo? Quo a facie tua fugiam? Ideo etiam tremorem Divinum non habent. Distracti, tepidi remanent. Nec ullam fidei vivæ de Divina præsentia correspondentem reverentiam Deo exhibent. Alii sancti Patres genuflexiones istas observarunt. Senex quidam ob continuam genuflexionem in oratione plusquam digitorum quatuor tabulam excavaverat. Nimis delicatus est, qui ob reverentiam Divinæ Majestatis hanc mortificationem corporis abhorret. Ad istam te semper excita illo versiculo Psalmistæ. Benedic anima mea Domino, in omni loco Dominationis ejus.

#### PUNCTUM TERTIUM.

**T**ertio præcipit, ut *similiter, qui in itinere directi sunt, non eos prætereant bona constituta: sed ut possunt, agant sibi, & servitutis pensum non negligant reddere.* Hisce vult, ut omni possibili interna, & externa reverentia Opus Dei itinerantes peragant, nec ullum consuetum Religionis exercitium omittant. Magna profecto negligentia, vel uni non satisfaciant. Sanctus quidam Abbas pro negotiis maximis, in aula cæsarea versatus, cum unam solum horam consueto tempore recitare negligeret, maximas pœnas in purgatorio sustinere coactus est. Pro dolor! si nec ipsa necessitas excusat a plena S. Regulæ observantia, quanta tormenta sustinebunt, qui animi solum





relaxandi causa Opus Dei, & exercitia sua negligunt? Tu cum timore, & tremore tantum semper age, quantum potes. Fors semper adhuc minus ages, quam possis. Ad hoc cogita. Si hora ista transierit, quid nisi tristitiam super tristitiam habuero; quando neglexero debitum servitutis pensum. Benedic ergo anima mea Domino in omni tempore.

### PUNCTUM QUARTUM.

**A**N ergo, o Religiose! extra Chorum horas canonicas suo tempore recitas? Septies in die laudem dixi tibi. An genua flectis? Adorate Dominum in aula sancta ejus. An etiam in itinere debitum servitutis pensum non negligis? Maledictus, qui facit Opus Dei fraudulenter. Dole, quod toties istam sacram Regulam non observaveris. Propone

1. Extra Chorum horas canonicas suo tempore recitare.
2. Ad illas genuflectere.
3. Nec in itinere debitum servitutis pensum negligere.





DIES XXI.

IN FESTO S. MATTHÆI APOST.  
ET EVANGEL.

De Abnegatione Vitæ.

Abnegare semetipsum sibi, ut sequatur Christum. Cap. 4. v. 10.

PUNCTUM PRIMUM.

**S**ANCTUS Matthæus Apostolus, & Evangelista præprimis Christum secutus est; dum ad unum verbum, sequere me, se bonis vitæ abdicavit, telonium reliquit, atque omnibus mundi divitiis, & deliciis nuncium misit. Idem a Te SS. Pater exigit; *Abnegare semetipsum sibi, ut sequatur Christum.* An secutus es hanc vocem SS. Patris? Quomodo paupertas, & abdicatio cum bonorum hujus vitæ studio concordant? Pauper non eris, quamdiu ita pauper esse volueris, ut nihil de bonis vitæ tibi desit. Pauper non eris, quamdiu sic diliges paupertatem, ut nullam inopiam patiaris. Pauper non eris, quamdiu in egestate tristis, & pusillanimis invenieris. Si semel omnibus hujus vitæ bonis renunciasti, quomodo eadem rursus resumes? Perfecta abdicatio est, frigus, & æstus, esuriem, & sitim, atque omnia hujus vitæ incommoda

constanter tolerare. Et quis Religiosorum in hoc non sequatur S. Matthæum? Magna quædam penna est paupertatis, qua tam cito volatur in regnum cœlorum. Aliis virtutibus promissio futuro tempore indicatur; paupertati, & abdicationi non tam promittitur, quam datur; dum in præsentī tempore enunciantur. Beati pauperes; quoniam ipsorum est regnum cœlorum.

# PUNCTUM SECUNDUM.

**A** *B*negare semetipsum sibi, ut sequatur Christum, est quieti vitæ hujus renunciare. Et hoc egregie præstitit S. Matthæus. Omnibus quippe voluptatibus, & repausationibus abstinuit. Laboribus Apostolicis unice intentus erat. Ubique verbum Dei seminavit. Idololatrias convertit, aqua salutare abluit infideles. Et quantas proinde a Barbaris gentibus persecutiones non tulit? Qui quietem in hac vita quærit, in altera requiem non inveniet. Facile omnem laborem sustinebit, qui infelicem consideravit æternitatem. Ita respondit Senex quidam magnus Fratribus, qui eum interrogaverunt: Quomodo contentus es hic Abba, & sustines laborem hunc? Respondit: Totus labor temporis mei, quem hic sustineo, non est idoneus comparari ad unam diem tormentorum, quæ peccatores sustinent in futuro sæculo. Sine labore, & conatu multo, nunquam perfectionem Religiosam obtinebis. Sed o quam exigua difficultates te  
a vir-



a virtute non absterret? *Statim refugis viam salutis, quæ non nisi angusto initio incipienda est.*


## PUNCTUM TERTIUM.

**P**erfectio abnegandi semetipsum sibi, ut sequatur Christum demum est, ut quis ipsius vitæ cupiditate se abneget. Ita mori cupidus erat SS. Matthæus. Quotidie cupiebat dissolvi, & esse cum Christo. Nemo explicabit gaudium, quo in eadem ara, in qua antea Agnum immaculatum Deo obtulit, suam quoque sacrificium consumavit. Inspiciens sit, qui hujus vitæ cupiditate teneatur. Quis enim est, quem non excruciet dolor, sollicitudo non urgeat, non subruat timor? Risus fletum sequitur, gaudium tristitia comitatur. Esurieci succedit saturitas, saturitatem iterum excludit esuries. In nocte dies optatur, in die nox quæritur. In algore calor, in æstu refrigerium, ante cibum suspiria, post cibum tribulatio, iræ, indignationes exagitant, & innumerabiles miseros homines motus perturbant. Quis amet præsentem vitam? Vita hominis est tentatio super terram. Vix ad summa appetenda se erigit, mutabilitatis lubricæ impulsu protinus cadit. Vult in contemplatione stare, sed non valet. Cogitationis gressum figere nititur, sed infirmitatis suæ lapsibus enervatur. Hæc est vallis, quam Sancti exire semper disponunt, & ad illud inæstimabile bonum ascendere, quod nec in cor hominis ascendit.

PUNCTUM QUARTUM.

**A**N ergo, o Religiose! renunciasti bonis vitæ? Nisi quis renunciaverit omnibus, non potest meus esse Discipulus. An renunciasti quieti vitæ? Regnum Dei vim patitur, & non nisi violenti rapiunt illud. An renunciasti cupiditati vitæ? Homo natus de muliere, brevi vivens tempore repletur multis miseriis. Dole, quod cum S. Matthæo non penitus te abnegaveris. Propone

1. Bonis Vitæ,
2. Quieti Vitæ,
3. Cupiditati Vitæ perfecte renunciare.



DIES XXII.

Quod foris non liceat manducare.

Non præsumat foris manducare. Cap. § I. v. 2.

PUNCTUM PRIMUM.

**S**Evere statuit SS. Pater Noster, ut *Frater*, qui pro quovis responso dirigetur, & ea die sperat reverti ad Monasterium, non præsumat foris manducare; etiamsi a quovis rogetur; nisi forte ei ab Abbate suo præcipiatur. Solent quippe ejusmodi convivia rursus pristinis sæculi actibus implicare. Quid enim facies ad convivia sæcularium, nonne hoc ipsum,

ipsum, quod sæculares faciunt? Jactantiam, verba scurrilia, cupiditatem, & libidinem eorum in omnibus sequeris. Ecce! ad convivia sæcularium ministrat Diabolus, qui circuit quærens, quem devoret. Ad mensam Religiosorum ministrant Angeli, qui olim in Ere- mo Christo inservierunt. Noli nimis tibi cre- dere. Noli esse securus. Ut pisces esca, ita tu cibo, & potu sæcularium capieris; rursus af- fectu ad sæculum redibis. O Monasterium, dul- cissime Deo fruens! Quamdiu Religiosum fu- mosarum urbium carcer delectabit. Quamdiu venenatæ ciborum deliciæ illum ad convivia sæcularium allicient? Tu mente Paradisum in Monasterio obambula. Quam primum cum columba in arcam revertere. Cœlestibus deli- ciis pro transitoriis frui.

PUNCTUM SECUNDUM.

**N***on præsumant foris manducare.* Qui enim vel semel præsumpserit, haud secus, ac corvus ille ex arca emissus semper redibit ad sæculum; donec amplius non revertatur. Fastidiet frugalem domi mensam, & lautam in sæculo quæret; ubi fercula ferculis apponun- tur. Cumque prioribus fuerit satiatus, si se- cunda attigerit, non videbitur sibi gustasse priora. Venter ibi nescit, dum oneratur; nam varietas tollit fastidium. Ipsa ibi rerum quali- tas deforis apparere curatur, ut non minus oculus, quam gustus delectetur. At quid hoc ig- navia est, o Religiosi milites! sociis in san- guine,



guine, & cæde versantibus, vos delicatos apud sæculares cibos diligitis? Aliis, inquam, jejunio addictis, & corpus austere macerantibus, vos illud ciborum deliciis pascitis? An dicitis pax, & non est pax? Cur non verecundamini ad exprobrationem Apostolicæ sententiæ? Nondum enim restitistis usque ad sanguinem? Gulam nisi prostraveritis, omnibus vitiis expositi patebitis. An ignoratis illud Prophetæ; adhuc escæ erant in ore ipsorum, & ira Dei ascendit super illos?

### PUNCTUM TERTIUM.

**N**on præsumant foris manducare; nisi forte eis ab Abbate suo præcipiatur. Quod si aliter fecerint, excommunicentur. Spiritu laboret, necesse est, qui foris manducare esurit, aut bibere sinit. Signum evidens est, quod spiritus mortificationis in eo sit extinctus. Etenim revera nihil foris est, quod Monachum verum satiet. Sola mortificatio, & quam consequitur, cœlestis consolatio, Religiosum satiant. Aliud si quærat, tribulationem, super tribulationem habebit. Fieri namque non potest, quin carne reindutus revertatur e sæculo, qui cibo foris reficitur absque Abbatis sui imperio. Solum illud imperium facit, ut mox concoquat, quod sine hoc ingerens ori, secum pestem Spiritus reportat. Hinc est, quod SS. P. N. culpæ poenitentiam præceperit illis Fratribus, qui absque licentia apud Religiosam foeminam comederant. Ni velis spiritum extinguere

guere, & castigari, hanc Regulam sedulo observa.

PUNCTUM QUARTUM.

**A**N ergo, o Religiose! non foris manducas ad vitandos sæculi actus? Commixti sunt inter gentes, & didicerunt opera eorum. An non foris manducas ad refrænandam gulam? Flamma combussit peccatores. An non foris manducas ad conservandum spiritum? Non in solo pane vivit homo, sed in omni verbo, quod procedit de ore Dei. Dole, quod toties hanc sacram Regulam transgressus fueris. Proponere sine licentia foris non manducare.

1. Ne sæculi actibus inquineris.
2. Ne gulæ incendio conflagreris.
3. Ne spiritu mortificationis priveris.



DIES XXIII.

De Bono usu Temporis.

Currendum, & agendum est modo, quod in perpetuum nobis expediat. Prolog. v. 32.

PUNCTUM PRIMUM.

**C**urrendum, & agendum est modo, quod in perpetuum nobis expediat, ut hortatur SS. Pater. Primo ob brevitatem temporis. Motus quip-

quippe est tempus, ut statum non habeat mansionis. Quia enim per ventura tendit ad esse, semper ex præteritis festinat non esse. Haud aliter & homo transit. Primus quidem homo ita conditus fuit, ut manente illo decederent tempora. At ubi vetitum contigit, mox offenso Creatore coepit ire cum tempore. Statu videlicet immortalitatis amisso, cursus eum mortalitatis absorbit. Cujus nos quia de propagine nascimur, radicis amaritudinem, quasi in virgulto retinemus. Eo ipso quotidiano momento, quo vivimus, incessanter a vita transimus, & vivendi spatium, unde crescere creditur, nobis decrescit. Solicite ista, qui considerat, semper bonum operabitur. Tempus enim, dum transit; etiam spatium merendi pertransit.

#### PUNCTUM SECUNDUM.

**C**urrendum; & agendum est modo, quod in perpetuum nobis expediat, quia tempus bene agendi amplius non erit. Tempus namque sementis est præsens vita, quam currimus. In hac licet nobis, quod volumus seminare. Cum ista vita transferit, operandi tempus aufertur. Unde Salvator dicit: Operamini, dum dies est; veniet nox, quando jam nullus poterit operari. Ortus est nobis Dei sermo, Sol verus, & congregatæ sunt bestiarum recedentes in cubilia sua. Procedamus ut homines ad opus nostrum, & usque ad vesperam laboremus. Hoc ipsum enim, quod dico,



co, quod scribo, quod lego, de tempore meo mihi aut crescit, aut deperit. Condemnabit nos in iudicio Titus filius Vespasiani. Hic, cum quadam nocte recordaretur, quod nil boni ea die fecisset, dixit: diem perdidit. Nos putamus non perire nobis horam, diem, momenta, tempus, ætates, cum otiosum verbum loquimur, pro quo rationem redditori sumus in iudicio?

### PUNCTUM TERTIUM.

**C**urrendum, & agendum est modo, quod in perpetuum nobis expediat ob instantem æternitatem. Damnati totum, si haberent mundum, darent pro eo tempore, quod tu perdis. Coelites æternum gaudent de quovis momento, quod bene impenderunt. O Religiose! saltem modo disce tempus bene impendere. A mane enim usque ad vesperam succiditur peccator; dum a vitæ suæ exordio usque ad terminum iniquitatis perpetracione vulneratur. Omni namque momento per augmentum malitiæ contra se ictus ingeminat, quibus succisus in profundum ruat. De talibus bene per Psalmistam dicitur: Viri sanguinum, & dolosi non dimidiabunt dies suos. Dies quippe dimidiare, est tempus vitæ malæ in voluptatibus ductum ad poenitentiae lamenta dividere, atque hoc ad bonum usum partiendo reparare. Sed iniqui dies suos nequaquam dimidiant; quia perversam mentem nec in extremo tempore immutant. Quod contra

*Spir. S. Ben. P. III.*      T      bene

bene Paulus nos admonet, dicēns: Redimētes tempus; quoniam dies mali sunt. Tempus quippe redimimus, quando ante aeternam vitam, quam lasciviendo perdidimus, flendo reparamus.

### PUNCTUM QUARTUM.

**A**N ergo, o Religiose! tempus bene impendis; quia breve est? Suis spatiis transeunt universa sub cœlo. An tempus bene impendis; quia post mortem bene agere non poteris? Fili! conserva tempus, & evita a malo. An tempus bene impendis; quia instat æternitas? Non defrauderis a die bono, & particula diei bonæ non te prætereat. Dole, quod hucusque tempus tam male impenderis. Propone modo currere, & agere quod in perpetuum tibi expediet considerando

1. Brevitatem temporis,
2. Expirationem temporis,
3. Instantem æternitatem.



## DIES XXIV.

## De Hospitibus suscipiendis.

Omnes supervenientes hospites tanquam Christus suscipiantur. Cap. 53. v. 1.

## PUNCTUM PRIMUM.

**T**Ria pro hospitibus suscipiendis requirit SS. Pater. Primum est, ut *omnibus congruus honor exhibeatur, maxime domesticis fidei, & peregrinis.* Item ut *pau-perum, & peregrinorum maxime susceptioni cura solícite exhibeatur: quia in ipsis magis Christus suscipitur: nam divitum terror ipse sibi exigit honorem.* O! quantus honor cuivis hospiti exhibendus non est; quando in ipso non homo, sed Deus homo honorandus est? *Ipse dicturus est; hospes fui, & suscepistis me.* Hinc *Omnes viventes, sive discedentibus hospitibus inclinatio capite vel prostrato omni corpore in terra, Christus in eis adoretur, qui & suscipitur.* Ingens demissio, sed quanto major, tanto convenientior Monacho. Imo, quantilla cenferi debet erga talem, tantumque hospitem? Fides sane tibi defecerit, nisi omnem ei honorem exhibueris. Porro si hominem duntaxat in hospite honoraveris, meritum tuum exiguum, aut fere nullum erit.



Si Christum honorificabis in hospite, honorificabit & te Pater ejus, qui est in cœlis. Ne & tu, o Religiose! qui hospitibus excipien-  
dis non deputaris, tanto honore defrauderis,  
exacte illud observa, ut semper *salutatis ho-*  
*spitibus humiliter, & petita benedictione per-*  
*transeas, si obviaveris, aut videris* Sic tam  
grandi retributione non carebis.

### PUNCTUM SECUNDUM.

**A**Lterum est, ut cum *nunciatus fuerit ho-*  
*spes occurratur ei a Priore, vel a Fra-*  
*tribus cum omni officio charitatis: Ut omnis*  
*ei exhibeatur humanitas: Ut jejunium fran-*  
*gatur propter hospitem; nisi sit præcipuus dies,*  
*qui non possit violari.* Hisce SS. Pater non  
solum affectum, sed etiam opus charitatis  
erga hospites commendat. Secutus est an-  
tiquos Patres, qui summo charitatis affectu  
adventantes ceu Christum ipsum susceperunt.  
Unde quidam amore hospitem sex, vel sep-  
ties comedebat propter hospitem de die, vel  
potius se comedere simulabat. Tanti æsti-  
mabant hoc opus charitatis, ut jejniis, &  
cæteris suis sacris exercitiis semper prætule-  
rint. Aiebant enim, charitatem non propter  
reliquas virtutes, sed reliquas virtutes pro-  
pter charitatem implendas esse. O quanta  
charitate ergo excipiendus hospes non est,  
quando in hospite agnoscitur sui centrum amo-  
ris, & vox, ac vultus agnoscitur intus pul-  
santis, & vicissim invitantis. Per istam cha-  
rita-

ritatem tantum quidam placuit, ut Angelorum Dominus ad hospitium ejus diverterit, dicens: Cæteris diebus me in membris meis, hesterno autem die me in memetipso suscepiſti. Ad mensas ergo nostras ante judicium Christum, si non semper actu, saltem affectu suscipiamus, ut ab eo suscipi ad æterna convivia valeamus.


## PUNCTUM TERTIUM.

**T**ertium est, ut *legatur coram hospite Lex divina, ut ædificetur.* Plane ædificatio omni utilior honore, omni lautior erit convivio. Hospes non in corpore solum, sed & in anima reficiendus est. Et sane vix facilius quis convertitur, seu compungitur, quam quando verbis res ipsa jungitur, & charitate seu liberalitate animus præoccupatur. O quando nihil audiunt hospites in cœnobiis, quam de Deo, quam saluari sæpe sæculi tanguntur fastidio! & o quot millia ejusmodi Hospitalitas a sæculo abstraxit, in quibus ante prædicatorum sedulitas frustra laboravit! quam multum profecit Torila ex colloquio, & hospitio SS. Patris? Tibi, si non licet verbo, exemplo silentii ædifica. *Hospitibus nullatenus sociare: neque colloquere, dicens, non licere tibi colloqui cum hospite.* Sequeris Abbatem illum, qui plus suo silentio, quam alii verbo adventantes hospites ædificavit.

## PUNCTUM QUARTUM.

**A**N ergo, o Religiose! in hospite Christum adoras? Et factum est, dum recumberet cum eis, cognoverunt eum. An in hospite Christum affectu, & opere amas? Quod uni ex minimis meis fecistis, mihi fecistis. An hospitem verbo, & exemplo ædificas? Lucerna pedibus ejus erit verbum tuum. Dole, quod hoc opus misericordiæ affectu, & opere exercere crebro omiseris. Propone

1. Christum in hospite adorare;
2. Christum in hospite amare;
3. Hospitem verbo, & exemplo ædificare.



## DIES XXV.

## De Fastidio rerum spiritualium.

Videant, ne forte inveniatur Frater accidiosus. Cap. 48. v. 17.

## PUNCTUM PRIMUM.

**N**on immerito SS. Pater Seniores spirituales deputat, ut *videant ne forte inveniatur Frater accidiosus*. Acedia enim est fastidium rerum spiritualium. O fastidium, rinea cordium, rubigo mentium, languor pessimus animarum! O fastidium, abominari facis bonum Dei verbum, contem-  
nere



nere cœleste donum, fastidire manna conti-  
nens omnem saporem Divinæ dulcedinis!  
Quæ enim lues tam tam pestifera, quis mor-  
bus tam lethalis, qui sic faciat hominem im-  
memorem suæ salutis, ridentem, ac male  
securum appropinquare usque ad portas mor-  
tis? Nunc divinis interest laudibus, & odio-  
sa, vel etiam perniciosa mente pertra-  
ctat. Nunc sedet ad librum, & oscitat.  
Nunc verbum exhortationis audit, & ipso  
audito laborat: Verbo, quæ sancta sunt, ac  
salubria, fastidit. Et tamen male securus in-  
teritum, qui illi instat, non considerat. Læ-  
tus exspectat Judicem; quia gravia non per-  
petrat scelera. Sed nunquid sat grave scelus  
est, fastidire, quæ spiritum salvant? An vi-  
vere poterit, qui quotidie fame moritur.

PUNCTUM SECUNDUM.

*V*ideant, ne inveniatur *Frater accidiosus.*

Et unde inveniatur? Quomodo, qui  
spiritu cœpit, carne consummetur? Cur nunc,  
qui voluptuosè vescabatur, in viis intreat?  
ah! cœpit esurire ollas carniū; sequi car-  
nis sensualitatem; scurrilitate stultiloquii dis-  
solvi. Quomodo gustum spiritualium rerum,  
quo, tam ubere reficiebatur, amittat? Cœ-  
pit libidinis, iræ, impatientiæ, superbiæ, &  
similium raptari furore passionum; atque lin-  
guam in verba ociosa, & detrahentia laxare.  
Quomodo in pascuis uberrimus esuriat? Cœ-  
pit minima spernere; hanc vel illam Regulæ

transgressionem non curare ; sensum, non rationem, non fidem, non statum suum attendere. Et quid mirum, quod sola vox plangentis, si tamen plangere velit, illi relicta sit : percussus sum, ut fœnum, & aruit cor meum : quia oblitus sum comedere panem meum ? Non potest calicem Domini bibere, & calicem dæmoniorum. Non potest mensæ Domini particeps esse, & mensæ dæmoniorum.

### PUNCTUM TERTIUM.

*Videant, ne inveniatur Frater accidiosus.*

Remedia quantocius ei præscribenda sunt, ne pereat. Primum sit mortificatio inordinati amoris. Dici equidem non potest, quantum hic Amor Divini amoris dulcedinem imminuat. Solus quippe Deus, qui est summum, & perenne bonum, tamdiu non satiabit te, quamdiu a bonis infimis satiari cupies. Alterum sit mortificatio passionum. Hæ rationem obnubilant ; Spiritum vero Sanctum qui solus est cordis gaudium, contristant, expellunt. Deinde necesse est, ut per ignem, & aquam transeas in refrigerium. Tertium sit fidelitas in minimis. Qui enim spernit modica, paulatim decidet. Et quo plus de gratia quotidie perdit, eo plus saporis amittet. O miserum Monachum, qui ista contra fastidium rerum spiritualium media non semper ad manum habet ? Etiam nesciens sæpe in  
nauseam

nauseam earum declinabit. Primum vulnus deteget, cum vix vulneri remedium erit. Principiis obsta, sero medicina paratur, cum mala per longas invaluere moras.

PUNCTUM QUARTUM.

**A**N non & tu, o Religiose! fastidis res spirituales? Anima nostra arida est, nihil aliud respiciunt oculi nostri, nisi Man. An agnoscis causas hujus fastidii? Desiderabat ventrem impleri siliquis porcorum. An media adhibes contra hoc fastidium? Euge! serve bone; quia in pauca fuisti fidelis, supra multa te constituam, intra in gaudium Domini tui. Dole, quod in hoc fastidio plerumque tempus Religionis tuæ miserrime transegeris. Propone

1. Non fastidire res spirituales;
2. Causas hujus fastidii bene agnoscere,
3. Media contra illud semper in promptu habere.







## DIES XXVI.

De Triplici Religiosorum periculo.  
Memor periculi. Cap. 2. v. 21.

## PUNCTUM PRIMUM.

**N**ullibi in hac vita securitas. Ubique pericula. Hinc monet SS. Pater Noster, ut quis sit *memor periculi*. Tria autem sunt præcipua pericula. Primum est, si Religiosus se æquare velit alteri. Per hanc superbiam votum obedientiæ contemnitur. Superiores vilipenduntur. Regula violatur. Dum enim audaciam in superbia sua assumit, nullum est præceptum, quod non transgredi præsumat. Contra hoc periculum jugiter orandum est cum Propheta: Ne veniat pes superbiæ: quoniam ibi ceciderunt, qui operantur iniquitatem. Semper humilitas obedientiæ exerceri debet, nisi quis velit a gratia Dei, & hominum excidere. Obedientia quippe Deo, & hominibus acceptabilis est. Pro! quot non a statu suo haud secus ac Lucifer a cælo per unicam inobedientiam exturbati sunt? Tu time lapsum. In humilitate obedientiæ te conserva. Quietus semper vives, ac contentus in sacra Religione.

## PUNCTUM SECUNDUM.

**S**it *memor periculi*. Alterum nempe est, si Religiosus respicere retro incipiat; si res, quas

quas semel dimisit, actu vel affectu resumat; si ad pristinas passiones, & vitia redeat. Constat enim de eo, qui mittens manum suam ad aratrum, postea retro convertitur; quoniam labitur statim, pristinum pelagus scelerum operit caput ejus, & non est aptus regno cœlorum. Contra hoc periculum paupertatis spiritus semper incumbendum est. Nam qui volunt fieri divites, incidunt in laqueum Diaboli. Hæc vero sancta paupertas non solum affectum omnem ad res terrenas, sed & ad universa vitia penitus excludit. Imo affectum nullum ad ea, quæ paupertatis sunt, habet. Pro! quot non pereunt; quia retrospiciunt? Quam multi a primæva abrenuntiatione declinant? Hinc est, quod tam multi sint vocati, pauci vero electi. Ut ex electis sis, constanter paupertatem spiritus amplectere.

### PUNCTUM TERTIUM.

*Sit memor periculi.* Tertium equidem est, si Religiosus stare velit non quidem relinquens ordinem suum, sed proficere in eo dissimulans. Pons est Religio super mare hoc magnum, & spatiosum sæculi erectus. Per hunc semper incedunt, & succedunt Religiosi. Cadat ergo necesse est ab his, qui sequuntur, impulsus, & eversus, si stare voluerit. Arcta enim est via, & impedimento est proficere, & proficisci volentibus. Hinc est, quod jugiter arguunt, & reprehendunt, quod fer-

re nequeunt tepiditatis ejus segnitiam, quod velut quibusdam stimulis urgent, & impingunt manibus, ut unum necesse sit e duobus, aut proficere scilicet, aut prorsus deficere. Contra hoc periculum poena corporis seu mortificatio assumenda est. Tunc enim Spiritus potens est ad currendum; quando caro infirmatur. Debilis vero est, ac lassus cum caro impinguatur. Impinguatus enim, ac dilatatus dilectus recalcitravit. Pro! quot conversionem morum ob carnis curam derelinquunt? Tu curre, tu propera; ne quando forte is, qui egressus est ut gigas ad currendam viam, longe a te fiat. Quem, si bene sapis providens in conspectu tuo semper, & in ejus odore tractus, per mortificationem carnis facilius, citiusque cures.

#### PUNCTUM QUARTUM.

**A**N ergo, o Religiose! vitas periculum, ne te aliis æques? Lucifer voluit similis esse Altissimo; sed non amplius inventus est locus ejus in coelo. An vitas periculum, ne retrospicias? Qui retrospicit, mittens manum suam ad aratrum, non est aptus regno cœlorum. An vitas periculum, ne deficias? Currite, dum lumen vitæ habetis, ne tenebræ mortis vos comprehendant. Dole, quod hucusque ista pericula non vitaveris. Propone illa fugere,



1. Humiliter omnibus obediendo;
2. Paupertatem Spiritus amplectendo,
3. Semper carnem mortificando.



*DIES XXVII.*

*De Salutis negotio.*

Modo agendum, quod in perpetuum nobis expediat. Prolog. v. 32.

*PUNCTUM PRIMUM.*

**O** Salutarum SS. Patris Nostri de Salutis negotio præceptum! *Modo est agendum, quod in perpetuum nobis expediat.* Rumpendæ sunt moræ, ubi faciendum est, quod in perpetuum expediat. Quid enim tardes, o Religiose! ipsum, quem jam dudum conceperas spiritum parturire salutis? Nil mortalibus vel morte certius, vel incertius hora mortis. Siquidem tanquam fur in nocte, ita veniet. Væ prægnantibus in illa die. Si superveniret, & præveniret hunc tam salutarum partum: Heu! perfodiet domum, sanctum germen extinguet. Cum enim dixerint, pax, & securitas; tunc repentinus superveniet eis interitus, sicut dolor in utero habenti, & non effugient. Eja ergo festina negotium salutis tuæ agere. Omnes moras rescinde, qui nec diem hic habes securum.

PUN-

## PUNCTUM SECUNDUM.

*M*odo est agendum, quod in perpetuum nobis expediat. Nihil cogitandum præter salutis negotium. A tua salute consideratio tua inchoet, ne frustra extendaris in alia, te neglecto. Quid tibi prodest, si mundum universum lucreris, te unum perdens? Noveris omnia; si tuam salutem nescieris, eris similis ædificanti sine fundamento, ruinam non structuram faciens. Quocunque cogitatio tua evagetur, ad tuam salutem revocaveris eam cum fructu. In acquisitione enim salutis nemo tibi germanior esse debet unico matris tuæ. Contra salutem tuam cogites nihil. Quicquid se considerationi offerat, quod non quoquo modo ad tuam ipsius salutem pertineat, respuendum. O Frater, cui firma satis propria salus nondum est, & quomodo alienam curare saltem satagis? Prius de salute tua cogita, antequam alios, ut de sua cogitent, instruas. Si enim tu tibi nequam, cui bonus eris.

## PUNCTUM TERTIUM.

*M*odo est agendum, quod in perpetuum nobis expediat. Omnia gravia attentanda sunt propter negotium salutis. Quid enim grande esse potest in præcepto, ubi salus est in promisso? Hinc bene ille Naaman consuluit, qui dixit: Pater, etsi rem grandem tibi dixisset

dixisset Propheta, certe facere debueras. Fidele prorsus verbum, rationis, & sapientiæ plenum: quippe suggestio est rationalium hominis sensuum, quos sibi Deus testes retinuit adversus hominem ipsum. Pater, inquit, etsi rem grandem dixisset tibi Propheta, certe facere debueras. Non credere namque Prophetæ, Dei est injuria: non tentare omnia pro salute, odium est suiipsius, & invidia. Ah! quidnam grande videri debeat vel difficile, quod præceptum est ad salutem æternam? Hoc si agam: me expectant justî; donec retribuas mihi. Istud, si non agam: me expectaverunt peccatores, ut perderent me. Hinc mihi gehenna; inde corona paratur: & inter hanc, atque illam medium nugari libeat, oscitari delectet? Prorsus omnia attentanda sunt propter salutis negotium.

#### PUNCTUM QUARTUM.

**A**N ergo, o Religiosè! maturas salutis negotium? Nunc dies salutis. Annihil cogitas præter salutis tuæ negotium? Sancta ista, & salubris est cogitatio. An omnia attentas propter salutis tuæ negotium? Hoc unum est necessarium. Dole, quod tam negligenter salutis tuæ negotium hucusque egeris. Propone



1. Salutis tuæ negotium maturare,
2. Præter illud nil aliud cogitare,
3. Propter illud omnia attentare.



## DIES XXVIII.

Quod neglectus Divinæ Præsentiae omnium scelerum fit causa.

Dei oblivionem omnino fugiat. Cap. 7. gr. 1.  
v. 9.

## PUNCTUM PRIMUM.

**N**ihil sic sceleratum facit, ut oblivio Dei præsentis. Unde SS. Pater suum discipulum monet: *Dei oblivionem omnino fugiat*. Fides annullatur. Sicut enim de fide, qua Deus præsens esse creditur, timor salubris nascitur: ita cum minime creditur præsens esse, omnibus malis fræna laxantur. Cur namque corrupti, & abominabiles facti sunt in iniquitatibus? Nisi quia dixit ille generalis insipiens in corde suo, non est Deus. Ubi semel fides de præsentia Dei extincta est, ibi pura corruptio carnis, ibi mera abominatio superbiæ invenitur. O Religiose! cave ergo summopere, ne fidem Dei præsentis unquam amittas.

PUN-

PUNCTUM SECUNDUM.

**D***Ei oblivionem omnino fugiat. Fides per oblivionem Dei præsentis ficta efficitur. Dolose quippe agit in conspectu ejus, qui dissimulat, quod novit invitus, ut inveniatur iniquitas ejus ad odium Merito prorsus dolosus ad odium. Qui ignorantiam Dei non habet, sed odium. Quomodo enim non odit Deum, cujus declinat aspectum, contemnit imperium, vellet non esse judicium? Ignorans quidem ignorabitur; odiens autem, & odietur. Ille reprobitur veritate judicii, in istum vindicabitur severitate odii. Et juste. Se scire Deum, vel sciri a Deo dissimulat: dum sciens, & prudens, imo imprudens, & impudens sub oculis ejus peccat. Putas enim, filius hominis, si nunc veniret, inveniret fidem præsentia suæ super terram? Nunquid fidem hanc reputaret fictam negligentium, & contemnentium, qua levius damnat cæcitatem infidelium, qua meliorem judicat credulitatem Dæmonum? Dæmones credunt, & contremiscunt; homines credunt, nec contremiscunt. Dæmones, quem credunt, verentur; homines dum, quem credunt, nec timeant, nec verentur, gravius de contemptu Divina præsentia judicantur. O Religiose! ne dolose agas, ut inveniatur iniquitas tua ad odium.*

PUNCTUM TERTIUM.

**D***Ei oblivionem omnino fugiat. Fides per oblivionem Dei præsentis mortua efficitur.*

*Spir. S. Ben. P. III.*

U

Fi

Fides namque est substantia rerum sperandarum, argumentum non apparentium. Hæc est fides, quæ per dilectionem operatur. Unde si fides Divinæ præsentia non ita operetur, mortua est. Fides enim sine operibus mortua est. Hæc est fides, de qua suadente conscientia meritum nascitur spes æternorum bonorum. Hinc si meritis fides Divinæ præsentia careat, mors depascet eam in æternum. O Religiose! qualis est fides tua de Divina præsentia? An viva? An mortua? Ah! noli oblivisci Dei præsentis. Nullum erit præceptum, quod non contemnas.

#### PUNCTUM QUARTUM.

**A**Nnon ergo, o Religiose! quia amisisti fidem Divinæ præsentia, in omnia scelera lapsus es? Non est timor Dei ante oculos ejus. An non, quia fictam duntaxat habes fidem Divinæ præsentia, iniquitas tua crevit usque ad odium? Dolose egit in conspectu ejus, ut invenitur iniquitas ejus ad odium. An non; quia mortuam habes fidem Divinæ præsentia, in profundum scelerum venisti? Periit fides de terra. Dole, quod exercitium Divinæ præsentia tam parum curaveris. Propone

1. Fidem Dei præsentis nunquam amittere,
2. Nec fictam,
3. Aut mortuam solum habere fidem Ejusdem præsentia.



## DIES XXIX.

IN FESTO S. MICHAELIS AR-  
CHANGELI.

De Fortitudine, Constantia, & Efficacia  
Boni propositi.

Modo agendum est. Prolog. v. 32.

## PUNCTUM PRIMUM.

**S**ANctus Michael unus e primis cœli princi-  
pibus superavit Luciferum, & assecclas  
ejus, qui renuebant Deum Hominem ado-  
rare, atque ejus Matrem venerari. Fortè con-  
cepit propositum Deo suo adhærendi, ejusque  
mandata observandi. Fortitudine nempe opus  
est ad concipienda bona proposita. De his ait  
SS. Pater: *modo agendum est*, id est, modo tan-  
ta fortitudine sancta proposita facienda sunt,  
ac si statim perficienda forent. Si enim adhuc  
sæpius peccamus, quando firmiter, & multipli-  
citer proponimus; quid fieret, si raro, aut nun-  
quam proponeremus. Et si adhuc sæpius virtu-  
tem negligimus; quando firmiter eam propo-  
nimus; quid fieret, si nunquam aliquid certi  
nobis proponeremus. Quanto enim fortiora  
proposita concipimus, tanto fallacius, & for-  
tius Diabolus insistit, ne ad effectum deducar-  
tur. Ipsemet testis esto, quot tibi non bona pro-  
posita

posita sive de examine contra vitia, sive de meditatione pro virtutibus interierunt? Quare perierunt? Ab initio non satis fortia erant. Aqua tepida ab igne semota, mox frigescit; & bonum propositum ab initio imbecille statim evanescit.

### PUNCTUM SECUNDUM.

**S**ANCTUS Michael cum suis affeclis constanter in suo proposito perseverabat, nec ullis Luciferi rationibus se permittebat ab eo avelli. *Ita modo agendum est*; modo, hoc est, constanter inhærendum est suo proposito, ut nihil illud impediatur bene terminari, quod in bono initio non potuit impediri. Non interrumpat frigus. Electi enim aliquando tanto frigore torquentur, ut nec orare, nec legere, nec operari liceat. At nolentes etiam piis operibus insistant, & mox vires animæ reparabuntur. Non corrumpat calor. Electi namque subinde tanto sensuum calore incenduntur, ut vix se continere possint, quin non ad externa per scurrilitatem oris, aut delectationem sensus defluant. At ad mortificationem eo constantius incumbendum est; quanto acrius propositum nostrum caro impugnat. Tu si nec acedia, nec delectatione sensus permitteris a tuo proposito avelli, semper constans in eo perseverabis.

### PUNCTUM TERTIUM.

**S**ANCTUS Michael demum propositum suum opere complevit; quando cum suis Angelis


lis Deum Hominem humillime adoravit, atque hoc uno verbo, quis ut Deus? Apostatas spiritus cum suo Duce e cælo æternum proscrispit. Non sufficit propositum fortiter concipere, & constanter in eo perseverare; nisi opere & efficaciter impleatur. Hinc SS. Pater ait: *modo agendum est*, hoc est, modo opere complendum est, quod bene, & salubriter propositum est. Pro! quoties cogitas mores tuos corrigere? Quamdiu jam in hoc proposito fuisti? Proponis quidem hoc fortiter, & constanter, sed tamen nullus sequitur effectus. Imo etiam, si quando incipis, sic misere desinis, ut ab inimicis tuis jure tibi dicatur: quia hic homo cœpit ædificare, & non potuit consummare. Quo vero longius tardas opere implere, quod proposuisti; eo magis vires Divinæ inspirationis, & gratiæ S. Spiritus amittis. Et quo citius & crebrius bona proposita effectui mancipas, eo ampliores gratias eadem exequendi acquiris. Sane hæc ratio unica est, cur tam pauci ad perfectionem vocationis suæ perveniant.

#### PUNCTUM QUARTUM.

**A**N ergo, o Religiose! ad exemplum S. Michaelis fortiter bona proposita concipis? Quis ut Deus? An constanter bona proposita incipis, prosequeris? Quis ut Deus? An efficaciter bona proposita opere completes? Quis ut Deus? Illi soli servire oportet. Dole, quod has conditiones boni propositi hucusque habere non studueris. Propone



1. Fortiter bona proposita concipere.
2. Constanter incipere, ac proseguere.
3. Efficaciter opere complere.



## DIES XXX.

## Recollectio Menstrua.

*Æstimet se homo de coelis semper a Deo respici omni hora, & facta sua in omni loco ab aspectu Divinitatis videri, & ab Angelis omni hora renunciari. Cap. 7. §. 2. v. 12.*

## PUNCTUM PRIMUM.

**S**ullo in pio exercitio SS. P. N. se exercuit, præsentiam Dei in illa solitudine Sublacensi exercuit. Hac quippe omni hora se excitavit ad obligationes status sui rite adimplendas. Tu saltem hodie eundem imitare. *Æstima te de coelis semper a Deo respici omni hora, & facta tua in omni loco ab aspectu Divinitatis videri, & ab Angelis omni hora renunciari.* Primo igitur in conspectu Dei, & SS. Angelorum considera, quomodo hoc mense te habueris erga Deum. An Deum ostendere timuisti ob considerationem æternitatis gehennæ? Ite maledicti in ignem æternum. An diem Dominicum Deo Creatori, Redemptori, & Sanctificatori tuo consecrare studuisti? Maxima in eo beneficia a Deo accepisti. An oblivionem Divinæ præ-

præsentia fugisti? Non est timor ante oculos ejus. Pro! quam graviter omni hora oculos Dei, & SS. Angelorum per hunc mensem offendisti?

### PUNCTUM SECUNDUM.

**Æ** Stima te semper a Deo respici, & facta tua in omni loco ab aspectu Divinitatis videri, & ab Angelis omni hora renunciari. Hinc recogita, qualiter in conspectu Divinitatis, & SS. Angelorum obligationi erga Religionem satisfeceris. An triplici obligationi status tui, promovendæ scilicet gloriæ Dei, salutis tuæ, & proximi satisfacis? Tota Regula istud præcipit. An non negligens es in usu rerum Monasterii? Sordes in rebus divinis totam Religionem dehonestant. An jejunia libenter observas? Nunc ergo dicit Dominus, convertimini ad me in toto corde vestro, in jejunio, & planctu. An nihil operi Dei præponis? In Psalmodia promptuarium omnium bonorum reperitur. An devote opus Dei extra chorum peragis? Maledictus, qui facit opus Dei fraudulentè. An non comedis extra tempus, aut foris? Elias, quia ex jussu Angeli comedit panem subcineritium, ambulavit in fortitudine cibi illius usque ad montem Dei. An Officium Cantoris rite imples? Obedientia Psalmodiæ conciliat saporem. An horis incompetentibus non accedis Fratrem? Qui nescit linguam suam refrænare, hujus vana est religio. An silentium post completorium diligenter observas? Non

est potestas tenebrarum harum. An lectioni ante completorium semper interesse soles? SS. P. omnibus omnino eandem præcipit. An ordinem Diei exacte observas? Voluntas Dei sanctificatio nostra est. Pro! quam indigna de statu tuo Religioso Angeli tui Deo renunciare debuerunt!

### PUNCTUM TERTIUM.

**Æ** *Stima te semper a Deo respici, & facta tua ab aspectu Divinitatis videri, & ab Angelis omni hora renunciari.* Ideo te recollige, qualiter in conspectu Dei obligationi tuæ erga proximum satisfeceris. An compassus es Fratri delinquenti? Ergo peribit Frater tuus infirmus, pro quo Christus mortuus est. An compassive arguisti Fratrem delinquentem? Instrue eum in spiritu lenitatis. An compassive orasti pro Fratre delincente? Orate pro invicem, ut salvemini. An in hospite Christum adorasti, & suscepisti? Hospes sui, & suscepistis me. Pro dolor! quantum non Deo displicuisti, quem tam male in proximo præsentem tractasti!

### PUNCTUM QUARTUM.

**Æ** *Stima te semper a Deo respici, & facta tua ab aspectu Divinitatis videri, & ab Angelis renunciari.* Proinde pensa, qualiter obligationi tuæ erga teipsum in conspectu Dei satisfeceris. An maturas salutis tuæ negotium? Nunc dies salutis. An fortiter, constanter,



ter, & efficaciter proponis? juxta propositum  
tuum erit & profectus tuus. An renuncias cu-  
piditati vitæ tuæ? Nisi quis renunciaverit om-  
nibus, non potest meus esse discipulus. An non  
es turbulentus? Discite a me; quia mitis sum,  
& humilis corde. An non tardus es? In operi-  
bus tuis esto velox. An non fastidis res spiritua-  
les? Anima nostra arida est. An probas humi-  
litem tuam? Humilis ponit se ad infimum  
locum. An discretionem obtinere studes? In  
senibus prudentia est. An tempus bene impen-  
dis? Suis spatiis transeunt universa sub coelo.  
Pro! quantum Angelos præsentis contristasti,  
dum eorum salutaribus inspirationibus restiti-  
sti. Dole, quod obligationibus tuis in præsen-  
tia Dei, & SS. Angelorum non satisfacere  
studueris. Propone meliora, & per ve-  
ram poenitentiam satisfacere  
stude.





# INDEX

## MEDITATIONUM P. III.

JULIUS.

II. In Festo Visitat. B. V. <i>De officiis charitatis.</i>	3.
III. <i>De Ruinis Religiosorum.</i>	7.
IV. <i>De Septimanariis coquina.</i>	10.
V. <i>De Scientia Religiosa.</i>	14.
VI. <i>De causis non murmurandi contra victum.</i>	18.
VII. <i>De malo pro malo non reddendo.</i>	21.
VIII. <i>De castitatis perfectione.</i>	25.
IX. <i>De vitando dolo.</i>	28.
X. <i>De necessitate Silentii.</i>	32.
XI. In solemnī commemoratione SS. P. N. B. <i>De necessitate perfectæ abrenunciationis.</i>	35.
XII. <i>De unica suiipsius cura.</i>	39.
XIII. <i>Quomodo Religiosus nulli injuriam facere, &amp; factam patienter sufferre debeat.</i>	43.
XIV. <i>De qualitate pænæ scandalizantium.</i>	47.
XV. <i>De necessitate confidentiæ spiritualis erga Patrem spiritualem in tentationibus.</i>	51.
XVI. In Festo scapularis B. V. M. <i>de monte carmelo.</i>	55.
XVII.	

## I N D E X.

XVII. <i>De Imitatione SS. P. N. B. per observantiam SS. Regulæ.</i>	58.
XVIII. <i>De felice Morte.</i>	62.
XIX. <i>Quomodo Religiosus obtineat confidentiam erga Superiorem.</i>	66.
XX. <i>Quibus mediis castus amor Fraternitatis obtineatur.</i>	70.
XXI. <i>Cur Votum stabilitatis tam arcte servandum sit.</i>	73.
XXII. <i>In Festo S. Mariæ Magdalenæ Poenitentis. De continua cordis compunctione.</i>	76.
XXIII. <i>De Pœnitentiis regularibus.</i>	80.
XXIV. <i>De Vigiliis.</i>	83.
XXV. <i>In Fest. S. Jacobi Apost. De Patientia in persecutionibus pro Justitia.</i>	86.
XXVI. <i>In Fest. S. Annæ. De modis bene orandi.</i>	89.
XXVII. <i>De necessitate, utilitate, &amp; merito laboris.</i>	93.
XXVIII. <i>Quomodo præceptum Divini Amoris impleatur.</i>	97.
XXIX. <i>De Exercitio S. Paupertatis.</i>	100.
XXX. <i>De Solitudinis prærogativis.</i>	104.
XXXI. <i>Recollectio menstrua.</i>	108.

## AUGUSTUS.

I. <i>Cur judicium Divinum semper cogitandum sit.</i>	111.
II. <i>De Patientia in infirmitatibus.</i>	115.
III. <i>De vitandis transgressionibus minimarum Regularum.</i>	118.
IV. <i>De perfectione obedientiæ.</i>	121.
V. <i>De</i>	



# INDEX.

V. <i>De vitanda somnolentia.</i>	126.
VI. <i>De reconciliatione discordantium.</i>	129.
VII. <i>Quod non liceat Monachis extra claustrum vagari.</i>	133.
VIII. <i>De Zeli malitia.</i>	136.
IX. <i>De mercede cælestis gloriæ.</i>	140.
X. In Fest. S. Laurentii M. <i>De fortitudine Religiosa.</i>	143.
XI. <i>De motivis obediendi sine mora.</i>	147.
XII. <i>De paucitate salvandorum.</i>	150.
XIII. <i>De contradictione.</i>	154.
XIV. <i>De Humiliationibus externis.</i>	157.
XV. In Fest. Assumpt. B. V. <i>De Humilitatis exaltatione.</i>	160.
XVI. In Fest. S. Joachimi Patris B. V. Dom. infr. Oct. celebrando. <i>Quomodo Religiosus in tribulatione subvenire debeat.</i>	164.
XVII. <i>De tribus motivis conversionis morum.</i>	167.
XVIII. <i>De indifferentia in S. Obedientia.</i>	171.
XIX. <i>De Religiosa Modestia.</i>	174.
XX. In Fest. S. Bern. Abb. <i>De Zelo bono.</i>	177.
XXI. <i>De bona consuetudine.</i>	181.
XXII. <i>De modis procurandi attentionem.</i>	185.
XXIII. <i>De obedientia erga Superiorem junio-rem.</i>	190.
XXIV. In Fest. S. Bartholomæi Ap. <i>De prudenti simplicitate.</i>	193.
XXV. <i>Quod non plus loquendum, quam expedit.</i>	196.
XXVI. <i>De vitando otio.</i>	200.

# INDEX.

XXVII. <i>De vitanda contumacia.</i>	204.
XXVIII. <i>De Lectore hebdomadario.</i>	207.
XIX. <i>De tribus modis Divinae Praesentiae.</i>	210.
XXX. <i>De vitando excommunicato.</i>	213.
XXXI. <i>Recollectio Menstrua.</i>	216.

## SEPTEMBER.

I. <i>De perfectione Paupertatis.</i>	219.
II. <i>De aternitate gebennæ.</i>	223.
III. <i>De compassione erga delinquentes.</i>	226.
IV. <i>De probatione verae humilitatis.</i>	229.
V. <i>De vitanda turbulentia.</i>	232.
VI. <i>De fugienda tarditate.</i>	235.
VII. <i>De negligentia in usu rerum Monasterii.</i>	238.
VIII. <i>In Nativitate B. V. M. De triplici obligatione vocationis Religiosæ.</i>	241.
IX. <i>De grandi murmurationis malo.</i>	244.
X. <i>De Discretione.</i>	247.
XI. <i>De silentio post completorium.</i>	250.
XII. <i>De lectione spiritali ante completorium.</i>	252.
XIII. <i>De jejunio autumnali.</i>	255.
XIV. <i>Quomodo Religiosus Operi Dei nihil praferre debeat.</i>	258.
XV. <i>Quod Religiosus extra communem refectiorem nihil cibi, aut potus sumere debeat.</i>	261.
XVI. <i>De Officio Cantoris.</i>	265.
XVII. <i>De servando Ordine Diei.</i>	268.
XVIII. <i>Quod nullus Fratrum alium accedere debeat tempore incompetente.</i>	271.
XIX.	

# I N D E X.


<b>XIX.</b> <i>De Die Dominica.</i>	274.
<b>XX.</b> <i>Quomodo opus Dei extra chorum, &amp; in via peragendum sit.</i>	277.
<b>XXI.</b> <i>In Fest. S. Matthæi Ap. &amp; Evang. De Abnegatione Vitæ.</i>	281.
<b>XXII.</b> <i>Quod foris non liceat manducare.</i>	284.
<b>XXIII.</b> <i>De Bono usu temporis</i>	287.
<b>XXIV.</b> <i>De hospitibus suscipiendis.</i>	291.
<b>XXV.</b> <i>De Fastidio rerum spiritualium.</i>	294.
<b>XXVI.</b> <i>De triplici Religiosorum periculo.</i>	298.
<b>XXVII.</b> <i>De salutis negotio.</i>	301.
<b>XXVIII.</b> <i>Quod neglectus Divinæ Præsentia omnium scelerum sit causa.</i>	304.
<b>XXIX.</b> <i>In Fest. S. Michaelis Archang. De for- titudine, constantia, &amp; efficacia boni Pro- positi.</i>	307.
<b>XXX.</b> <i>Recollectio Menstrua,</i>	310.

# U I O G D.





1.  
2.  
3.  
4.  
5.  
6.  
7.  
8.  
9.  
10.  
11.  
12.  
13.  
14.  
15.  
16.  
17.  
18.  
19.  
20.  
21.  
22.  
23.  
24.  
25.  
26.  
27.  
28.  
29.  
30.  
31.  
32.  
33.  
34.  
35.  
36.  
37.  
38.  
39.  
40.  
41.  
42.  
43.  
44.  
45.  
46.  
47.  
48.  
49.  
50.  
51.  
52.  
53.  
54.  
55.  
56.  
57.  
58.  
59.  
60.  
61.  
62.  
63.  
64.  
65.  
66.  
67.  
68.  
69.  
70.  
71.  
72.  
73.  
74.  
75.  
76.  
77.  
78.  
79.  
80.  
81.  
82.  
83.  
84.  
85.  
86.  
87.  
88.  
89.  
90.  
91.  
92.  
93.  
94.  
95.  
96.  
97.  
98.  
99.  
100.



C<sup>a</sup>

F<sup>a</sup>



